

050-2549

胡文忠公全集



第三册



上海益善書局刊行



益友圖書館

類號 050

著作號 2519

登記號 00083

上海图书馆藏书



A541 212 0018 7299B

胡文忠公全集 卷三

宦黔書牘

上皖撫王清苑師 (植) 道光二十四年甲辰

天十四月限書本

7307

前歲肅函。并善化羅茂才書。交門下士汪士鐸呈上。時以視學吳會。汪生樸學諄才。可以助理也。信未到而夫子已秉節皖江。汪生亦挾策北上矣。遲遲至今。歉悚何已。皖省為淮服屏蔽。江介要衝。士秀而專利。民逐末而倦於農。大江之北。刀劍以嬉。囂然不靖。故稱難治。自豫河再決。鄰國為壑。雖以清獻之視越。鄭公之守青。猶恐民氣大傷。瘡痍滿目。則求治更難。然而君子不更法以治者何也。法因人而立。貴審其宜。事因境而遷。貴當其可。夫以今日之天下。學校衰而士無實學。科舉濫而士無真才。負販之賈。得乘君子之車。六部之胥。無異宰相之柄。衣食忘農桑之要。而野鮮力田之民。政事為財用之源。而上無端本之治。凡此久大之謀。固非一手足之烈。與旦暮之功。所能撥而正之也。即目前之所謂武備。緝捕刑名詞訟。亦甚縣愒矣。試為吾師一一陳之。以備採擇焉。一、武弁宜注意也。國家設立官制。武轄於文。而文嘗輕武。近日裕督師之敗於浙。以文武之不調和也。急而求之。驟而繩之。其無濟固宜。惟先待以恩信。則禮貌之間。無損於威。酒醴之勞。無傷於財。而下之身心。樂為之用。此平勃之所以安劉也。一、標兵宜拔其尤也。本朝以督撫寄軍令。即將軍之制也。夫行軍之法。必有左右親兵。然後可冒不測之鋒。而作一軍之氣。韓岳之背嵬軍是也。即明史所載。如楊洪家蒼頭王越之盪跳士。梁震何卿馬永馬芳等。均以親兵百餘人。克立奇助。而滿桂之處。孤城叛兵。憚其家卒。成梁之蓄健兒。異日皆為將帥。此蓄養之力。然蓄養則貲費不易。惟有簡拔兵丁。優

胡文忠公全集 卷三 宦黔書牘

以餼廩。如戚繼光譚綸遺法。則可以收練兵之效矣。一州縣之疲玩。宜作其氣也。公文絡驛。大抵絕不關心。付之幕友書吏之手。卽迫於程限。亦且含糊上復耳。惟擇案之緊要者。諭以手札。明撮其要。直抉其隱。示以處置之方。責以稟復之日。公文同而手札專。則有不敢輕視之心。公文嚴而手札親。則有不忍膜視之心。嘗見一老吏言。生平所畏惟此。明相張太岳之鼓動人。卓然爲救時之相者。亦惟此耳。一捕盜宜定以日程也。先以手諭。令有案者開報姓名。無案者訪查巢穴。寬已往之罪。嚴諱飾之科。復自置冊登錄。分日分起。責令拿獲。敘功。月計歲計。而賞罰定焉。卽有不肖而忱於別案發覺。大憲訪查其不用力者。鮮矣。一親兵可遣捕盜也。有所訪聞。約道里之遠近。而給書函若干。到第一驛。開二驛之封。以次至境。可無漏洩。彼恐中途改委。必不敢預拆到境之封。而地方聞大憲專緝。不敢不效。協拿之力。且遇事觀才。默授以方略之要。積功得賞。復可爲簡拔之階。若輩職小。卽到州縣。所需幾何。設有犯罪之人。卽有制罪之法。天下固無無弊之政。惟視用之何如耳。廣漢翁歸。其發姦摘伏。雖不免鉤距之譏。要非無補於治術也。一詞訟刑名。宜限以日程也。案牘之起。一人投狀。十家爲破。官揣其肥瘠而食焉。膏脂幾何。徒飽衙蠹。其或優柔寡斷。濫收於前。而積壓於後。有案歷十數官而不結者。是宜嚴立課程。限其冊報。別置書記。掌之分日分起。札追結報。與捕盜同一胥役。宜嚴懲也。此輩狼吞虎噬。爲禍最烈。皖省某縣。差役號猾。一案到官。差先納錢請票。官以爲肥。而差役之豪侈肆虐。甲於他省。此皆在所宜革也。一懲貪污以厲節也。國家之敗。皆由官邪。近日風氣。似乎大法小廉矣。而實不能。然巧避其名。而陰取其利。市於事前。而償於事後。大約與者雖強出。而不能怨受者。直以爲禮義矣。卽如我朝之臺灣。西域。川楚。教匪。皆因官吏貪婪。職爲厲階。我朝承前明之制。其有亂民而無叛官。雖百世可知矣。然民亂必由官貪。使早劾黷貨之人。豈不賢於十萬兵哉。彼一家之哭。何如一路哭耶。一勤接見以廣耳目也。日坐廳事。門無留賓。專意詢訪。集思廣益。卽使縱橫說士。射利營私。而明鏡在空。本無成見。正未可因噎而廢食也。凡此皆卑卑無甚高論。以老夫子之德量。涵古經猷。冠時而林翼。顧沾沾爲此者。土壤不擇泰岱之高。細流不捐河海。

之大。工賈進規。矇眛獻頌。況林翼之受知最深者乎。直陋無文。伏乞鑒察。誨訓。

致廣順但雲滿丈十一則（明倫）丁未

一、貴州知府有自理地方。則詞訟案件。首當盡心。盡心之道。莫如使蠹役無所藉手。擬放告日。當堂收呈。或准或駁。即時批明榜示。已准者具呈時兩造均到。即諭令批呈事畢。本日即爲訊結。無庸差喚。一被告未到。查非顯然犯法。不致逃匿之案。即於呈尾批令中證約鄰轉飭被告。定於某日某時。自行赴質。以免差傳。並聲明逾限不到。立即差傳。原告不到。即行銷案。一、必預差喚之案。分別道里遠近。人數多寡。事由難易。限以到案日期。收呈之日。即時出票。鐵差詞訟案件。一票一差。逾限不到。將差分別懲處。仍自立號簿。每日稽查。一中證不干緊要。即行刪除名姓。仍標明某某不必到案字樣。於差票中總求少喚一人。即可保全一家。中證有緣盡到。而案情已無遁飾。可結即結。不使拖延。至呈詞已准者。尅期必審。不准和息。一、差票內擬粘連章程數條。如不准鎖鍊。不准私押人證。多帶白役等弊。使鄉愚一目了然。則根蠹之恐喝訛索。庶可少戢。人到不問何時。立即稟明。不得在外羈押。致滋勒索。且免在城訟師代爲設法。如差人不如限到城。及到城不即稟到者。如何盡法懲差。准被害人鳴鑼喊稟。或當堂面稟。即能明察無遺。一、貴州白役最多。石阡一府。最僻最瘠。白役尙數千人。此外各府。已可概見。似可約留十餘人及數十人。并榜示鄉城。載明榜上無名。均非官役。留者鐵分名次。以次差遣。仍令五人互結。取具連環保狀。以免逃匿。其裁汰之散役。不致別滋事端否。有緊要大案須差之時。不致爲差役所動搖否。一、命案之擾害閭閻。其禍尤烈。擬命案到後。即刻查問初供。不分風雨早暮。帶件作刑書。皂役各一名。轎夫四名。馬一匹。路遠或被褥及鹽菜飯食一肩。近則刪去。其不得逾十名。每名自發飯食錢文。家人差役一概不帶。一切陋規。概行禁除。所帶夫役件作。即隨身傍。可免在外滋弊。兇手飭差同鄉。約鄰證拿送。酌量優賞。自盡及希圖拖累之案。酌予懲處。似於地方可免滋擾。惟緝拿兇手。

如何而能迅速無誤程限。尙須隨地審察。一盜案與其用捕不如用民。捕利盜之財。則匿之惟恐不深。民惡盜之害。則除之惟恐不盡。然民恨賊而每畏賊。非畏賊也。畏官耳。送賊需費。又不卽理。苛求細故。問擬擅殺擅傷制縛諸法。又或賊口誣攀。事後報復。種種刁難。恩賊仇民。則除害而先受害。惟有裹足不前。忍氣吞聲而已矣。誠能予民以制賊之權。洞察民隱。力除陋習。仍嚴防挾嫌妄拿誣陷等弊。則盜風亦當少息。一昔人言民不畏死。奈何以死畏之。況我朝深仁厚澤。大德曰生。內外問刑衙門。均以民命爲重。殺人且不死。而盜賊更無論矣。彼知破案而罪不過如此。則其膽益壯。昔漢帝治盜。使盜自相捕斬。而紀文達說部中載一婢主使工作。尾綴盜後。盜返卽返。盜行卽行。天未明而盜已委棄所劫贓物。此誠知盜賊之情狀者矣。可否仿其意以偵察窩頓。一保甲團練第一良法。亦可爲第一弊政。何以使城鄉軍民不費一文。不見一役。而自能成功。一苗民之刁詐者。須加嚴處。而江西四川湖廣客民之百端盤剝。實爲大害。何以兩得其平。共知感懼。一州縣公事。有廢弛踟躕不振者。何以作其氣。其例設循環簿。向歸巡道提查。知府可否一并提查。此外有何鼓舞勸動之法。如何而可按期催結。照例遵行。以上各條。皆入仕淺陋之說。總之勤快耐煩。而民之枉費錢文者必少。或疑如此。則煩難瑣碎。不知官果能刻刻以懲蠹愛民爲念。則期月之後。獄訟自然少息。煩難瑣碎。正以求簡便法門耳。愚昧無知。伏乞分條訓誨。永爲遵守。

論貴州境插花情形啓 戊申

竊以貴州境內地多插花。安順尤甚。林翼妄不自揣。思欲逐一察清。妥擬章程。彼此移易。歸於至當。謹先陳愚管仰祈訓示。如蒙允准。再行縷析繪圖陳說。呈懇咨部改撥。以正經界。以便官民查貴州所謂插花地者。其情形約略有三種。如府廳州縣治所在此。而所轄壤土。乃隔越他界。或百里而遙。或數百里之外。世謂之插花。卽古所謂華離之地也。又如二壤本屬一邑。中間爲他境參錯。僅有一綫相連。世亦謂之插花。卽古所謂犬牙之地也。又如一綫之

地。插入他境。既斷而復續。已續而又絕。縣縣延延。至百十里之遙。世亦謂之插花。卽古所謂甌脫之地也。而貴州所以多插花者。其故又有三。貴州之郡縣。一因乎明之衛所。一因於元明之土司。一因於剿撫蠻苗所得之土田。明之衛所。本以屯田爲實壤。而屯田亦有星散四出之地。國初諸公。徒取其城治相近者。卽并爲一邑。未暇一一清釐。所以州縣地多插花。其弊一也。土司之壤。或承自唐宋。或叛於元明。歷世既久。彼此侵奪。本非畫一之規。及其獻土也。則舉其所有。而歸之於州縣。不暇一一爲之分析。所以州縣又多插花。其弊二也。征討之法。或用雕剿。則平一姓而兼平數姓之人。招降之利。必聯族類。則降一寨而兼降數寨之人。當其創制州縣。輒以一時所獲田土。歸之一邑。所以插花愈多。其弊三也。三者之弊。皆因戡定亂略之時。未暇深考。而其流弊乃百出而不窮。姑卽弊之切近者言之。插花地有離本治二三百里。而離他治未百里數十里者。民之輸將也。不於其近而於其遠。期會不時。資斧旣竭。遠來負米。勞費可矜。士之應試。其弊亦然。命案藉遠地而遲延。盜案因交界而推諉。姑無論矣。卽尋常詞訟。牽連他屬者。十之四五。輾轉關移。百無一應。官之所謂小事。卽百姓之所謂大事。羈候日久。旣無以恤其貲財。證佐不齊。又無以剖其曲直。歷數年而不見。一官歷數官而不得一審。往往釀成大案。此其不便於民也。肘腋之下。皆他境之民。臥榻之傍。悉他人之地。其所應教誨。應整飭。應修明。應捕逐者。皆遠在數百里之外。府廳州縣。號爲親民之官。欲其出入可見。咨詢易及耳。乃所親者在遠。而不親者在近。縱有留心民瘼之良吏。亦限於聞見。而莫可如何。追呼不便。公事掣肘。此其不便於官也。然亦有所甚便者。則刁劣之生豎。與擾害之棍徒耳。而盜賊爲尤甚。盜賊成羣結黨。必於插花之地。糾察之所不及。摘發苦於所難。吏胥於別境爲攔塞之詞。州縣以關移爲遷延之計。卽有任事之員。遵奉道光二十一年申明聖訓。不分畛域。而平日之耳目不習。卽臨時之呼應不靈。戶口阨塞。非其所知。鄉約寨頭。非其所轄。則越境捕盜之難也。其狡黠大盜。甚則結交各屬吏役。此邑見捕。歸於他邑。捏情希脫。賄弊多方。漠不關心者。旣涉因循。因以爲利者。更虞袒縱。是又公文關移之無益也。凡此各弊。相沿已久。而不敢輕言更張者。則恐吏胥

之因緣爲奸。更恐州縣之肥瘠不定耳。然使官不擾民。自爲總理。就疆域之形便。而截長補短。卽錢糧之會計。而益寡裒多。不更易州縣之名。不增減糧賦之數。則民情當必帖然。而吏治實爲大便。姑卽安順而論之。安順領二州三縣。而知府及同知通判。皆有分地。是名爲五屬。實八屬也。八屬之中。插花無慮數十處。其最多者。又莫如安平鎮。寧安平居府城之東。少北鎮寧居府城之西。中隔府屬及普定。形勢本不相連。而此二州縣之壤。割裂交錯。幾無整段。略而言之。蓋二邑各離而爲三。其與安平城治相近者。則爲五所。及柔東三排五所者。明代平壩衛之故地。柔東三排者。明代柔遠所東偏之故地也。五所三排。聯聚一處。東西相距九十里。南北相距八十里。東北一綫。按清鎮之蘆荻哨。西南一綫。接普定之石板房。爲驛道近旁之地。而環其南北者。皆鎮寧插花地。此安平之正壤一也。柔西三排。在安平之西北七十里。北負思臘河。河之南數里。有齊伯房城。卽明柔遠所之故城也。三排所亦卽明代柔遠西偏之故地。其地東西相距二十五里。南北相距三十里。東南西三面。多爲鎮寧插花地所環。北又貴筑羊鵠塘茅草寨。及大河十三寨環之。自柔西至安平。必出鎮寧插花之境。此安平隔越在西北之壤二也。又有西堡十二枝者。本西堡土司之故地。原屬普定。康熙五十五年。始改屬安平。其地在安平西北二百里。東西相距七十里。南北相距六十里。跨沙家大河之南北二枝。在河北十枝。在河南沙家大河者。卽思臘河之上流也。是河自郎岱之黃沙渡。流入四堡之六罵枝。爲陽隴渡。貫十二枝之北境。行三十里至樂東渡。出西堡境。又隔二百里。至邱哨渡。始入柔西之境。復爲安平地。其間蓋爲郎岱普定鎮寧平遠之地所隔越也。若自西堡入安平。必假道普定之定南里。及鎮寧之蒙楚諸枝。此安平西北絕越之插花三也。至若鎮寧州之三壤。則附州城諸枝一也。安平以北諸枝二也。安平以南諸枝三也。鎮寧附州城之地。爲東屯枝。爲西屯枝。爲郎洞枝。東西相距約五六十里。南北亦然。此爲鎮寧之正壤。又有木岡漿水阿破三枝。在其北。東接普定之定南里。西接郎岱之羅別汛。雖爲普定之腰鋪水母塘所隔。而阿破枝之北古寨。越在沙家大河之北。毗連平遠。以其大致尙與鎮寧治所相接續。卽可謂爲鎮寧之正壤。此其一。齊伯房枝居

安平柔西之東。而公具蒙楚枝三。又居其西。其南三枝。大勢環接。然在普定南里之東。不與州北之三枝相連。又橫梗安平柔西之中。爲鎮寧隔越在東之地。此其二。上九枝中九枝下九枝。居廣順州之東。安平之南。而南聯歸化廳。西則本州之隴革枝。東則本州之華楚枝。諸枝大勢相聯團聚一處。爲鎮寧隔越在東南之極境。此其三。大抵二邑之六壤。或數寨旁出。或半枝隔絕。非親履周詢。不能縷析也。其他若府屬之與普定。則府屬之五起十三枝。與普定之五里五枝。往往交錯。大約縣境居北及西南。而府境在東及南。縣境自城而北。直屬於三岔河。則本明定南里之故地。又自城而西南。直接乎歸化。則五枝之地。本寧谷司所改也。其四里居驛道之旁者。則普定衛之故地也。大勢尙相連接。然又有東出二百餘里。遠在鎮寧或楚枝之旁。而介乎貴筑廣順之間者。則爲尅坐場府屬之五起。本爲安順舊州之地。其餘十三枝。則安順舊軍民府之地也。十三枝參錯勻布。自東而南。而西薄乎縣屬之寧谷五枝而止。然又有水西莊。在鎮寧之西南三十里。蜡蓬寨。錯出安平堡唐基堡之東。錢唐堡。錯出安平豬槽堡之東。亦府屬之插花地也。郎岱歸化二廳。地頗連屬。蓋畫疆在雍乾之際。其時司事者。留心疆域。故無遺議。清鎮雖併聚在東北一隅。而貴筑之穀上穀下二里。袤六七里。廣且百餘里。又有羊鵠塘。舊人寨茅草寨。若絕若續。與之橫互其中。居二穀之北者。爲鎮里安里。明故鎮西衛之地。居二穀之南者。爲清里定里。明故威清衛之地。永寧雖集處於西南之一隅。而其地本偏遠州城及打罕一馬。沙營頂營募役三司六保阿果二枝。皆居北盤江之東。樂運樂壩樂舉八大朵萬播西甕便甕。由八十石石灣塞下募役十一馬。又在白水河之東。惟江外金井之地。則居北盤江之西。外界貞豐地復荒廣。爲盜賊聚萃之區。凡此皆諸屬插花之情形也。又攷西堡去安平遠而去鎮寧近。齊伯房公具蒙楚上九中九下九隴革華楚八枝。去安平近而去鎮寧遠。若舉以相易。實爲兩便。他若穀上穀下之當歸清鎮。江外之宜併貞豐。則又事關外郡。不敢輕議也。又查齊伯房之應納正銀。凡九十二兩八錢七分七釐。原糧八十石七斗四升八合三勺。公具枝之正銀二百四十八兩一錢一分三釐。原糧一百九十二石零九升。蒙楚枝正銀二百一十一兩

三錢九分二釐。原糧一百六十三石六斗五升二合。上九正銀二十五兩九錢八分五釐。原糧四百九十一石一斗中九正銀二十九兩四錢五分八釐。原糧五百七十石二斗九升六合。下九正銀二十兩九錢三分。原糧四百零二石一斗七升。隴革正銀一百七十三兩四錢四分三釐。原糧一百三十四石三斗四升三合。華楚枝正銀三百八十二兩一錢九分五釐。原糧三百零二石八斗一升五合。統計八枝共銀一千一百八十四兩四錢九分三釐。糧二千三百三十七石二斗一升四合三勺。又查西堡春糧米共四百十二石七斗一升七合三勺。又諸色銀共七十兩六錢二分九釐。七枝之米。多西堡且六倍。銀多西堡十五倍。此爲不侔之數。而實則西堡肥而七枝瘠。二邑恐不能從也。仍當察核地界。酌其相宜。一一比較。方爲愜當。此林翼所爲欲逐一察清。妥議章程者也。

■ 上喬見齋中丞（用遷）己酉

鎮遠一郡。水火偷賊。事事可慮。水火限於地利。旦夕難以圖功。盜賊以黃平台拱爲最多。施秉天柱。亦甚不靖。高山革夷山丙沙邦四寨。其最著者也。其旁村若黎樹坳卡榜白洗梭衣坡亮擺桃樹榜牌坊寨老鼠寨甕谷隴毛栗坪新寨黑寨青岡窩小米山樓梯坪冷水衝等處。皆盜勢滋蔓。革夷分上中下三寨。共七百戶。不盡皆盜。現已分別良莠。密册登記。高山五十八戶。只三戶不爲盜。其餘各寨良民尙多。莠民十之二三。其情狀或分或合。忽聚忽止。剿辦一層。無論兵不得力。將不得人。必致債事。且官甫出而盜先逃。官甫歸而盜仍聚。輕去則損威。空歸則玩寇。竊恐於事無濟。即使倖而剿殺。亦恐良莠不分。旣傷於仁。奸惡倖免。復傷於義。蓋殺人而不當其罪。不惟不知感。尤不知畏也。況林翼密察地圖。革夷三寨。勢甚綿延。箐林幽險。深入旣恐失機。圍擒短難周。高山孤聳峭厲。高逾數里。礮力不能上攻。人力不能幾及。而苗人滾山蕩澗。則處處可通。近日官心兵心。人人浮動。一人受挫。萬隊先奔。地利人和。兩無可恃。又何敢輕言兵剿耶。身歷其境。始知其難。計惟有以民衛民。而使賊之無可入。以盜捕盜。而使盜之自

相疑。添卡哨以巡防。購綫眼以追捕。信賞必罰。威信兩明。其團練招募。雖有流弊。而勢逼處此。不能不行。天下蓋無無弊之政。惟有隨時補救。隨時策厲耳。

致台拱令陳竹坡

作一日官。盡一日心。力潦草固爲罪。粉飾尤大罪也。山丙之事。盡以奉託。欲弟助力。弟必如教。弟之來此。以承乏耳。多則一年。少只五月。然京兆五日之念。所不敢存。擡槍乃利器。無論賊之大小。得二三十門。必可盡力。莫輕於前。莫餒於中。莫懈於後。上邊意旨。不必揣摩。能辦賊乃能省事。能振作乃能靜鎮。事上以誠意感之。實心待之。乃真事上之道。若阿附隨聲。非敬也。

致黃平徐牧

手告並知。阿黨香窟已獲。從此官有眉目。非兄見事之勇。布置之密。何能如此。仁勇智信。缺一不可。此岳軍之要言也。府役三十人。無一可用者。皆老弱疲癯。且生兔死狐悲之虞。意欲稟請擡槍二十門。烏槍三十門。刀矛二三十名。加以劈山礮。可以仰攻三里。似乎軍器乃能得力。惟非計出萬全。交不敢輕動。人言盡欲遲緩。美其言曰。鎮靜。其私爲弟計者。則曰。得過則過。得推且推。不過五日。京兆之見。弟自問志氣尙不至此。昔明季有一副將胡從儀。在此捕盜得功。其法以卡房巡哨爲主。親身督巡。或晝或夜。或東或西。人不能測其所之。故卡房哨兵不得休息。賊來以礮爲號。故四面圍擒。無一脫者。近日人心可笑。可恨。一人受挫。千軍皆奔。賊之撲我。其心頗齊。我之覓賊。其心最懈。且又思得其財物以自肥。宜賊盛而我衰也。紀律斷不可不嚴。策應斷不可不備。緣賊勢有日增之人。而我兵一無後勁。則必敗也。

致天柱令魏將侯

天柱糧案。情同化外。斂錢聚衆。愍不畏法。兄言該處士民深知悔罪。如果真心悔罪。必將糧米照舊上納。必將殺差兇手細送。必將唱首滋事之衆人先行投首。方可施一線之恩。竊恐兄之所謂悔罪者。不過爲緩兵之計也。尙祈切實查明。毋失事機。

致魯參軍春圃

閣下此行。冒不測之險。建非常之功。其勞力費財。人猶知之。其恩威並用。剿撫兼施。人不得而知之。弟知之而不能言。且不能留。深自愧矣。至前後手縛十餘盜。並首先拿獲楊姓案內。應斬應梟之巨盜六名。乃恐人心之不古。遂至讓美而不居。見識胸襟。俗人所不知。庸人所不肯。而弟則深抱不安矣。

致天柱令

近來聚匪之多者。無過永昌彌渡。乃初次彌渡打仗。咸寧鎮兵不過三千人。殲除回漢匪徒。幾及萬人。永昌漢回聚匪。多於彌渡數倍。軍威所及。竟不煩兵力。緝送巨魁二百餘人。可見烏合之衆。其理本不順。其勢必立窮。此上年之明證也。卽如聚衆鬧糧之案。其最大者。莫如湖北崇陽湖南未陽崇陽之罪魁。爲廩生鍾人傑。聚衆至二萬人。兵刀火藥。不計其數。而大兵一到。立卽就擒。鍾人傑乃有名行善富戶。招聚匪徒最多。然而自發兵以至藏事。不及二十日。而鍾人傑已寸磔街市矣。又如二十五年未陽之罪魁楊大鵬。聚衆數千人。軍器數百件。居然與官抗拒。時知府爲高公人鑑。調千總外委數員。帶兵不過四百人。卽將首從各犯。拿獲數十餘人。凌遲斬梟。卽時了卻。楊大鵬係

富戶秀才。身死家破。其情可惡。其愚亦可憐。天柱滋事。劣生刁民等。其罪尙不致如鍾人傑楊大鵬之甚。即如楊森龍如璋等。到府供認不諱。弟意將來定案。必爲破格施恩。予以自新之路。

致魏將侯 庚戌

三月十六日。清江顧倅。抄寄鎮遠朱甲翁。及閣下所言天柱黎平開泰清江匪徒情形通稟稿。稿內所言匪徒結拜弟兄。聚集百十餘人。擄劫村寨。持有火槍。又稱在黎平開泰之皮所地瑣龜尾溪。又稱須再查何屬之地。卽此可見閣下之情形尙未深悉矣。又稱須堵剿楚匪。俟軍務事竣。再行辦理。又稿尾開列通稟督撫藩臬字樣。弟反復思之。可商處甚多。如稟稿業經徑發。則禍患方始矣。若猶未也。尙可從容詳慎。以俟其成功。實於國計民生。均有裨益。謹逐條開陳。以備甲翁及閣下之採擇焉。一楚匪人黎境。弟於二十日到黎平。其時賊擾於外。兵譁於內。言利則勇。赴敵則怯。欲安內乎。欲攘外乎。禍患之萌。不僅禦侮之難也。幸賊於二十三日竄出。而兵亦漸定。卽此可見不教之兵。將有不戢自焚之勢。遑問殺敵致果耶。此時賊去漸遠。而兵不能撤。糜國帑而誤農功。卽楚匪一事。而官民已焦爛不堪。若再言用兵。則兵連禍結。將無了時。其弊一也。一凡辦事不外孟子天時地利人和三端。言天時則農功方始。蒲杏初開。用兵則誤農。民食旣虧。本實先撥。已亂者未知何日蕩平。而未亂者。方且窮愁生變。此則天時之不可也。言地利則閣下及鎮遠朱甲三黎平淡海珊瑚均到任未久。恐要隘形勢。尙知能周知。此拿彼竄。朝東夕西。賊行如鼠。兵行如牛。以牛捕鼠。必不可得。兵少則必拒。兵多則必逃。勞師糜餉。終無了時。昔馬新息聚米爲山。虜在目中。故能得隴望蜀。其征五溪蠻。則地利不得其要。故功效遲而讒慝因之而起。伏波尙如此。况我輩乎。弟於革夷山丙之事。上年閏四月署事。至八月交卸。畫圖將及百幅。攷證察訪。將盈百人。故於要隘之處。險僻之區。土人所不悉者。弟已盡知之。正月初六日。約期而會。分布周匝。實已得其要領。然猶不免竄逸也。猶不免曠日持久也。此地之東西南

北弟且不悉。卽朱淡兩郡守亦恐未悉。奉何輕言大舉。此地利之不可也。籌商合辦。卽使人人有必操之勝算。尙恐臨事有誤。況未必能如我意。其調兵以助聲威。則將官以下。必須選擇而後行。意中可用之官弁。有幾人耶。此人之難。其弊二也。一執事所言之匪徒。卽黎平之郭繼明姜大五等數人。糾約羣盜。正月間曾投入楚匪。疑而不收。每人給錢二百文。旋即散去。此時黎平大兵雲集。該匪亦驚疑奔竄。所以潛至清江天柱邊界。固非清江之匪也。鄙意此等匪徒。本是盜賊。非真能叛逆也。緩之固難圖。急之則生變。其理易明。此時楚匪若剿滅無遺。則該匪亦聞風落膽。若以不教之兵。不習之練。不熟悉地形之官吏。猝而乘之。萬一賊匪得志。則膽氣必張。禍患方始。鄙見軍務之後。若輩必散歸原巢。留備賞需銀兩。密囑地方官設法擒治。卽每名賞及千金。猶較大舉爲得計。爲省費。況不須千金耶。且殲厥渠魁。則餘匪不足平也。若拿辦而不得手。竄楚竄粵。是將授人以話柄。其弊三也。一辦事必先自度必勝。而後稟聞請示。更須量同辦事者之均可必勝。而後會合大舉。此次若徑稟大憲在中丞。近在本省鎮靜安詳。必有先機指示之處。設非中丞之鎮靜安詳。或據情入告。或親自辦督。彼時問原稟者要賊何以應之。勢必強殺數人。冒功虛報。以爲了案地步。其貽害於國計民生何窮。其弊四也。一辦事不外用兵。用民用役之三途。兵不可恆。無智愚皆知之。新任之官。恩信未孚。民不可恃。黎平府無幹差。天柱尤甚。且恐其與盜通情。則差亦不可恃。姑再遲回物色。綫目久之必可得手。又於暇時選擇武弁。聯絡鄉民。挑選差役。則三者又均可化無用爲有用。若急切用之。徒然債事。其弊五也。一此次藩庫已形支絀。而營弁仍多缺望。若藉此軍需。以辦盜案。其費不少。不如留此經費。以交地方官臨時購募。費半而功倍矣。蓋捕盜則支應可省。而軍需則應接不暇。且驕縱異常。其弊六也。一凡辦事首在得人。尤須持重。譬之李廣射虎。度不中不發。酒能除盜。酒能用兵。此等盜匪。其著名者無多。若地方官盡心盡力。必可設法擒之。但患不誠心耳。誠則金石可貫。鬼神可通。不比革夷山丙之負險不服。兵差不取入其巢穴也。若輕舉妄動。設使傷官傷兵。則賊餒必然頓起。此地處處與楚粵交界。一時不能了辦。楚粵受其擾害。則愈裹愈多。楚中奏粵

中又入奏責備歸於黔省。是又楚匪之續耳。其弊七也。一、地方之事。以十萬兵而不足者。以一二良吏爲之而有餘。卽如湖南會匪。好事其巨魁不過三五人。若得一二循良之吏。了此數人。何至貽害若此。又如永昌之事。其始不過羣盜耳。因地方文武不得其要領。不別其良莠。始則輕躁而以盜賊爲戲。繼則退縮而懼寇如虎。其無事之時。見罪囚則涕泣不食。一味寬縱。若至仁者。其有事之時。則縱兵殺民以當賊。若至勇者。宜其愈逼愈多。永昌爲十年之害。新寧爲三省之害。我省當以此爲戒。若不設法用計。老成持重。一舉不勝。害及十年。禍連三省。其弊八也。總之此賊因未卜楚匪成敗如何。故觀望遷延。相聚爲盜。若楚賊既滅。此盜必散。散則設法擒之。每巨盜一名。以一千金購之。亦屬有益。緣巨盜有限。而餘匪又不值一購也。若大舉則未見其益。通稟尤萬萬不可行。愚見如此。以執事胸有千秋。愛民愛國。望度力而審行。必養威而持重。卽使將來購擒未獲。而處處留心。則人心既孚。地形亦熟。俟農隙之餘。尙可審定會辦也。區區之愚。尙伏諒之。教之是幸。並求與朱甲翁顧賦亭商之。切切。

防剿賞罰支應條規

一、防剿匪徒。以古州清江之上下烏沙爲一起。以雷公山之附近五廳村寨爲一起。以丹江台拱各寨之多盜者爲一起。查烏沙之毗連。則古州清江丹江台拱。均爲緊要。卽須將各處緊要隘口。按羅盤指定方向。詳悉繪圖貼說。飛速專差寄示。送交古州營。其賊匪出入必由之山梁路徑。尤須訪察的確。以便預爲堵截。庶不致臨事失措。其雷公山之附近廳州縣。各緊要隘口。及盜賊出入必由之路。盜匪平日藏匿之高坡。逃竄之山梁。均須確切查明。用羅盤指定方向。分別東西南北道里遠近。何處可設防。如何堵法。何處可進兵。如何剿法。繪圖貼說。一一飛速專差函示。隨時送交敵府行營。務求確實的當。明白指示。是爲至要。至丹江台拱各寨之應防應捕。及其餘州縣。一切應防應堵之處。均期照辦。一、此次大憲密飭。不準漏洩一字。敬乞嚴密示知。一大憲志在除害。其地方獲盜。仍必切實詳

明其盜供確切。而詳報窒礙之處。必當設法辦理。仰窺憲意。必不追究已往。惟以現在是否出力獲盜之多寡爲定。一都勻府屬廳縣。與鎮遠黎平。均屬鄰境。而丹江八寨。尤爲盜藪切近。憲札雖未提及。業經敵府另行稟明。應密飭各屬。一律會籌防剿。一負隅固守之賊。易辦。忽現忽隱。出沒無常之賊。難辦。今所辦之賊。果有巢穴乎。蓋皆轉徙無常。此拿彼竄者矣。甚至有出而劫殺。入而耕耘。貌似良民者矣。此而欲以孤軍剿辦。從何處捕風捉影。再四思維。非行保甲。斷不能露出賊蹤。使匪黨不得潛匿。非力行團練。斷不能齊一民力。以守望遏其奔逃。即令臨陣略有斬獲。而漏網者多。不旋踵而復熾。勞師糜餉。年復一年。其若之何。爲今之計。宜急選各公正紳耆。立爲鄉正團長。授之印簿。使速辦保甲團練。方與此日剿盜之事有裨。並爲他時善後之謀立本。一賊本烏合易與。一經剿殺急切。勢必遠颺。不東走楚。則南走粵耳。其逃逸之路。水路最便。山僻小徑。次之。清江大河通楚。古州大河通粵。凡二河經過地方。如施秉清江台拱古州都江下江永從等處。各文武官。務於要隘處設立水卡。每卡守丁以二十名爲率。夜施木欄。以防偷過。晝間盤詰盜匪。如敢拒捕。準其格殺。不問生獲殺斃。果係真盜。卽照陣前之例。一體頒賞。其守丁口糧鹽菜。准於公項報銷。至山僻小徑。爲賊往來必由之路者。可責令附近村寨。設卡防守。果能擒斬真盜。其賞賜照水卡辦理。一賊之米鹽子藥。皆陸續取之民間。苟非嚴斷接濟。何能使之坐困。但賊往來無定蹤。棲止亦無定所。其貪利而接濟之者。到處多有。旣難盡防。其迫於力不能敵。勢不能抗。姑且順承。苟免目前者。更無寨不然。尤非官府所得周密而遍禁。然則欲斷接濟。將何道之從乎。仍須以保甲團練爲本基。保團行則彼有所貪。而接濟者察以衆人之耳目。必將無術可逃。卽有所畏。而接濟者恃有合款之協同。亦將反顏相拒。保團之爲益大矣哉。凡我同人。切要從此著想。一敵府之練勇。每隊有各色印旗。每名有黃布印帶。繫於肩上。中刊勇字。又有印花腰牌。凡都勻鎮遠府廳州縣分縣之練勇苗練。請一律指定旂色號記。先行專差送到古州大營。知會速速盼切。一地方所獲盜犯。除臨陣斬殺及格傷外。所有應行解省之犯。積至多名。卽由委員備文徑申臬憲。交附近地方官。派委遞解至前站。又派員

接遞各地方官不必預籌長解之費。其犯供案情不必慮及窒礙難辦。總以除盜爲本計。不至波累擾害。有傷官吏也。一練勇兵丁。臨陣退縮。及託故不前者斬。一練兵擅離指撥之防所者斬。一練勇差役兵丁夫役。除日用柴薪稻草。准其採取外。如有擄掠良苗財物牲畜者斬。一各地方匪徒。假冒練勇差役兵丁名目。訛詐良苗。擄掠財物牲畜者斬。一練兵差役姦淫婦女者斬。一妄殺良民。冒稱賊匪者。將殺良之練勇兵丁。卽時斬首梟示。仍將其本管帶練官。本管帶兵官。先行稟揭參辦。一臨陣殺賊。無論殺斃生擒。得首惡一名。賞銀五十兩。得次惡一名。賞銀三十兩。得夥盜一名。賞銀十五兩。一地方各寨民苗。解送盜匪。無論殺斃生擒首惡一名。賞銀十五兩。次惡一名。賞銀三十兩。夥盜一名。賞銀十五兩。一地方各寨民苗。擒斬盜犯。或送軍營。或送附近衙門。卽行發賞。不許稍遲片刻。一地方各寨民苗。送盜於附近衙門者。該衙門各官。由公項內支給賞銀。其民苗所送之賊。卽鼓明各地方首先之功。一被盜殺傷者。驗明實係面傷。分別賞卹。輕者酌量給賞。重至支體殘廢者。賞銀二十五兩。因傷斃命者。賞銀三十兩。一首先勇敢殺賊。受有重傷或傷斃。而大軍因此齊進。大獲勝仗者。賞銀一百兩。仍厚卹其父母妻子。以倡勇敢而示優異。一兵丁練勇擒斬巨匪多名。實在尤爲出力者。除按格賞銀外。並詳請超拔。給予官職。其武弁及文武紳衿。尤爲出力。照軍功例。詳請保舉。一各地方官所轄本地苗民。由各地方官指撥總要隘口。距賊巢稍遠者。設卡防守。其盡心盡力者。酌賞牛酒銀兩。以示鼓勵。以資盤詰。一各地方最要關隘。與賊巢最爲切近者。必須各地方官親帶苗民團練圍守緝捕。每名日給米一升。錢三十文。其管領之土司通事。每名給米一升。錢五十文。一各廳州縣自募練勇。照各衙門原募之工價支給。一所調防守屯軍。每名給米一升。錢三十文。總旂百戶准此。一查定例營兵。在本境本省防剿。向不支給鹽糧。此次從優。每兵一名。給米一升。銀三分。一書辦向無工食。每名酌給錢一百文。一總役每名給米一升。錢六十文。散役每名給米一升。錢四十文。一武弁千總以下。每弁日給米一升。銀一錢。衛千總準此。都守以上職分較大。如有協剿之事。自行捐辦。一總辦委員之練勇兵丁。其口糧支發。及各項用費。隨營動支。仍報明鎮

遠府查核。其鎮遠都勻黎平所屬廳州縣防剿之兵練差役口糧鹽菜及犒賞獲盜之費。各於該管本府公項內稟請支給。事竣報銷。一兵丁不必多調。而火器火藥。必須向營中借用。稟報各憲施行。

修堡各條事件啓 咸豐二年壬子

敬稟者。粵匪自永安竄出後。逼近黔省黎平。沿邊修築土堡。用土用民。協力防堵情形。卑府業已稟報在案。仰蒙大人先事籌維。當機立斷。兩次發帑銀八千兩。已經先後奉到開支。壘臺憲台發下槍礮子藥。均極充足。運赴各堡備用。又陸續自備數百門。慶參將又預備火藥數千觔。現已足資戰守之用。其餘木礮木弩竹箭竹將軍之屬。可用以埋伏山谷。斷賊來路者。均已設局製辦。足資敷用。現又探桂林解嚴賊匪。竄至興安全州一帶。去楚較近。去黔稍遠。惟大股暫爲遠竄。而小股又復蜂起。聞象州城內。被另股土匪焚掠一空。融縣之長安墟。亦有賊匪數百。攔河搶擄。三月二十三日。該處鄉民糾合敲頭練勇。戕斃賊匪多名。敲頭係廣西懷遠縣地。有居民五百家。與黎平之靠頭同名。對隔一江。近聞賊匪招集夥黨。佔踞長安街市。商民紛紛逃避。聲息傳至敲頭。居民畏其報復。亦欲幫徒。昨據粵省生員張華山張士清王之珍王瀾觀等稟請給旂。自願聯絡葛亮寨青旂寨福祿塘敲頭街市。共築一堡。於對岸互爲救援。又懷遠之古宜地方。去黎境六十餘里。亦有賊匪一股。與民苗數千。互相械鬪。賊稍創敗。尙未撲滅。竊恐粵界土匪之滋擾。正無了時。而黎平之防堵。未可鬆懈。卑府馳至靠頭堡中。督同署開泰縣令。署永從縣令。及委員紳士等操習練勇。晝夜巡守。並會同營員。帶領兵弁一體嚴防。目下土堡已成。靠頭八樂俱係連築。三堡中建礮樓哨樓。並攔江設木筏。混江龍中留關門。守以哨船。另備八槳小船二十隻。以資巡緝。又於與古宜就近之牙霜。築堡二座。堡大小略殊。大約每處均可駐紮兵練二三千名。其形勢則均包乎丙妹下江。永從黎平之外。而又截其下流也。其餘下江開泰各處隘口。均已分委興築。卑府因聞長安土匪不靖。卽駐靠頭。偵探防守。暫難分身。謹將

目下賊匪情形。與堡內防守。支放章程。恭肅蕪稟。開列清摺。伏乞鈞鑑。至將來如何斟酌變通之處。自當隨時具稟。謹將擬築土堡章程款目。開列清摺。再查八樂八枕牙霜靠頭。均臨黔省極邊。民寨在其腹內。地勢極爲扼要。僅恃民力民費。必難集事。謹擬官民並守之方。伏祈鈞鑒。一、每堡官房三間。一、每堡平頂土房土庫三百間。一、每堡常存米一百石。一、每堡常存錢一百千。一、每堡常存火藥鉛彈三百觔。一、每堡常存桐茶油二十石。每夜點燈籠。並誘賊入伏所用。可代火。一、每堡常存鹽一百觔。一、每堡應備石灰二千觔。一、每堡應備鐵鍋六十口。一、每堡應備石灰火藥瓦罐二千個。一、每堡應備木架高脚鐙五百個。一、每堡應備鐵菱角三百觔。一、每堡應備木蒺藜三千個。一、每堡應備石灰風車五架。一、每堡應備搪礮子棉絮被四十條。一、每堡應備大小旂幟百面。一、每堡應備竹篾四百個。一、輕而易運。內裝土石擊賊。一、每堡應備大小木桶二百個。一、盛水並可裝土石擊賊。靠頭堡有泉一眼。八樂堡有新池一處。均可少備木桶。一、每堡應備大小繩索一百觔。一、每堡應備生鐵一千觔。製造各器。一、每堡應備滾木礮石萬觔。一、每堡應備大小木礮數十個。一、埋伏由谷所用。一、每堡製造彈胡盧三百個。大轆轤一百個。一、以備援引木石。上下輕便。一、每堡常時巡守練丁百人。一、每名每日給米一京升。錢五十文。不願領米者。添折錢二十文。一、每堡預備守堡。臨時調用附近民苗二千名。一、每名每日給米一京升。錢六十文。不願領米者。給錢八十文。有警則調之守堡。無事則遣之歸農。現在間五日一調。至堡操演。每名祇給牛酒犒賞錢六十文。以鄉正團長領之。每人給團勇二片。縫於衣上。其鄉正團長之犒賞加倍。現在大股匪徒。漸入全州地界。暫停發以節糜費。而安農業。以上各條係極邊要隘章程。須派官紳堅守。故用費較繁。器具較多。口糧較重。其腹地次要之堡。可省去十分之七。合並陳明。

兵練支放操練章程

一、舊練百五十名。酌留四十名。巡緝東西北三路各寨各卡。仍派紳士家丁管領巡捕。其支放照舊每月四千文。撥舊練一百十名。新練百六十名。均精悍跳盪之卒。交委員韓超管帶。每七人爲一行。設行長一人。十五人爲一隊。設隊長一人。棉絮攔牌居前。長矛刀手繼之。四十五人爲一哨。設哨長一人。散丁每月四千。行長每月五千。隊長六千。哨長七千。以其技藝人材之高下。隨時升降。黔地高者爲山隘。平者爲田塍。不能大隊。以鴈陣爲宜。一委員韓超所管練勇。分三十餘人。專操擡礮擡槍。另爲行隊。近日武營陋習。恃火器而不練殺手。遇兇狡衝殺之賊。火器不能之地。卽束手待斃。拋棄軍械。粵軍之挫。半係於此。兵以火器強。亦以火器弱矣。至練勇之數。似不宜多。精而不多。一以當百。多而不精。百不當一。目前之過於糜費。事後之難於安插。更無論矣。一靠頭爲水路第一門戶。日前道守巡查。面飭中河設木攔混江龍。用小船排於關口。以便稽查。另造八槳六槳小船二十隻。以便巡哨。且亦可資轉運。其水手比守堡夫役。加增二十文。現已督辦如式。一黎平永從巡哨兵丁。係職分應爲之事。然營中舊規。每有差遣。均給盤費。該營公項無出。難於持久。每名擬酌給五分。領兵千把。酌給一錢。都守酌給三錢。以示體恤。緩急行止。隨時與營員妥商酌辦。以期實濟。一委員月給盤費銀二十兩。委員家丁三名。每名月給錢三千文。一紳士總司者。月給盤費銀八兩。紳士跟役。每名月給錢二千四百文。一紳士所司稍次者。月給銀四兩。

請辦理防堵事宜啓 咸豐元年辛亥

敬稟者。竊卑府仰荷憲恩。畀以邊疆之任。重以防堵之責。受篆以來。夙夜恐懼。思維防堵外匪。宜先清除內盜。奉行保甲團練之法。建設卡房四百三十五處。派民夫四名十名至二十名不等。分班四守。逐日委員及老成紳士分帶練勇百五十餘名。遍歷各鄉。勸諭巡查。周而復始。迄今半載有餘。所費不過四千六百金。業已自行損辦。盜首楊浪子等。次第翦除。分別懲處。居民稍爲安堵。惟聞近日懷遠融縣羅城匪土。或百餘人。或二百人。水陸梗塞。大河以

下。行李戒嚴。詢之往來探卒。該處劫奪之案。不一而足。所在蜂屯蟻聚。深爲隱憂。目前之小股。卽異日之大股。目前之小盜。卽異日之流寇。固不待洪韋述匪竄入黎境。始爲可慮也。而黎平與粵西交界各要隘。橫亘二百餘里。滇黔兩省。調發兵丁。及往來文報。均由此經過。視他處尤爲緊要。卽使調兵一千。恐尙不能分布防守。計每兵一名。例支行裝銀二兩。日給口糧米八合三勺。鹽菜銀三分。隨行賬房鑼鍋鐵鑊斧鋤衣服纜襪等物。歷次新章。令自雇長夫。每兵每日給銀五分。而仍不自雇夫役。一概取索於地方。查三十年黎平防堵。調兵三千名。爲期三月有餘。每兵每日給長夫一名。折銀五分外。尙用夫役至六七萬名。其時民苗疲苦怨歎。有兵來不如賊來之語。加以帶兵運糧。文武員弁。隨了官役。月給鹽菜折馬等費。銀兩尙屬不資。而稿房備弁。方且眈眈然日取軍需舊例。百方求索。滋擾不堪。地方官因辦兵差軍需。請領帑項。又復不資。計調兵一千。每月口糧米價銀二百四十九兩。鹽菜銀九百兩。兵丁長夫銀一千五百兩。加以暫支之行裝銀二千兩。文武員弁跟了月支銀兩。兵丁例外犒賞各費。初次一月。總須六千兩有奇。二月以後。除去行裝。亦須四千兩有奇。而需索夫役。每名仍須用至一名二名不等。巡徼十里二十里之外。非官爲覓夫應役。卽一步不行。且尙不過虛張聲勢。徒守空營。不能築溝浚塹。屹立天險。眞有所恃而無恐也。韓子云。徵兵滿萬。不如招募數千。計惟有於南路與粵西接壤之鄉寨中。雇募精壯民苗一千名。擇諳練紳士統之。與以鐵鋤畚揭。擇緊要溢口。如浪泡廣梅坳水口雲洞石牌沈口等處。築立土堡守之。每日抽一二時。仍編成行伍。課其技藝。使知且戰且守之法。民無裹脅之虞。賊無攔入之勢。堡成之後。聲威旣立。民心益固。彼時每堡祇須三五十人守之。練了尙可酌量裁減。不必定須取盈一千也。大率鄉兵一名。每日給米一升。工價錢五十文。合銀三分五釐。用鄉兵一千。每日連米價合計銀三十五兩。每月需銀一千零五十兩。又造製器械旂幟。購備竹木繩索。及委員紳士薪水。並盤查奸細犒賞等費。至多不過一百二百兩。每月所用。總不過一千二百兩。較之調兵一千。實省四分之三。而功效倍之。又無徵調遣發之煩。土著之民。保護鄉里。其情旣切。其勇自倍。節浮費而收實效。計無善於此者。前

蒙大人碩畫。已先委員解銀二千兩至黎。以爲防堵之費。祇領之下。固不敢浪費以虛糜。亦不敢吝嗇而誤事。現已札委員韓超劉毅等。帶同委員紳士。先於石牌等處。招雇苗民七百名。試行修築。一俟辦有成效。再爲推廣。愚昧之見。是否有當。謹稟。

論會匪啓黔撫喬 辛亥

承密詢會匪情形。苗民定未沾染。具見薰懷深慮。欽感莫名。卑府奉檄之始。在鎮遠一帶。卽預先訪問。均言黎平會匪極多。古州丙妹永從尤盛。有言會匪之總頭。拾盜匪爲爪牙者。有言會匪從湖南之寶慶衡州而來者。有言古州等處商賈。均係粵人。從廣東而來者。且言實繁有徒。兵差一氣。及實究其根柢。又不能得其誠確之據。此則訪問之大概如是也。到任以後。細加訪察。亦不能深得其情。惟獲盜訊供時。偶有盜犯一名。於刑訊之際。口呼天柱王菩薩者。極堪駭怪。又盜匪之老冒老三一號。大五大九大六爲盜之渠魁。其匪徒編號。從大一至大十。小一至小十。係湖南紙牌之字。察盜賊之名號。供情無不燒香拜把者。此則確有可據者也。愚以爲有會匪而不爲盜者。無大盜而不拜把者。刻下湖南四川之會匪。確有所據。然而不可輕動者。何也。武備之弛。兵氣之弱。國帑之虛。人心之虛。僞怯弱。實非旦夕所能挽回。設使辦理不善。禍機一發。不可收拾。轉不如暗爲轉移之爲得計也。暗爲轉移之法。莫先於除盜。莫切於懲貪。國家之敗。由官邪也。自來西域臺灣連州新寧桂平等處起事。均因官吏貪鄙。會匪得以藉口鼓動。煽惑愚民。如四川匪之惡戴如煌。而愛劉青天。其往事之明證也。卽如近年新寧之事。因李博勒平糶。勒價二千一石。而市價僅止一千六百。又因差役訛詐。凌辱雷再浩之妻室。以致民心不服。遂至李沅倡發亂桂平。韋俊因捐監。謬挂登仕郎匾額。差役迭次詐贓。因而倡亂。僞稱太平王。前此羨慕登仕郎而不可得。而後乃猖獗至此。挺而走險。誰爲厲階。會匪之地。如得廉吏主持。必不致釀成事端。無會匪之地。而以貪吏混跡。則平民亦可釀亂。亦一定之

理也。其次莫如陰盜。盜匪多強悍能死之人。會匪方借其力。會匪多深險不測之人。盜匪必資其計。翦其爪牙。則會匪亦弱。以爲無論。是會是盜。惟有盜案者。必殺無赦。則彼不能有詞。盜靖而匪亦消矣。明知其爲盜匪。中會匪亦祇究其爲盜。而不必問其爲會。則可以安反側之心。而消無形之禍矣。若計不出此。而訪拿會匪。將良懦之脅從者。爲兵差所凌辱。而渠魁必致脫逃。且必鼓簧其餘黨。以爲亂國計民生。兩有所損。禍非歲月所能了辦也。然則會匪可不辦乎。曰。辦入盜案。則泯然無跡。其甚者。瘼於獄中。法在除害而已。不必居辦事之名。尤不惜辦事之費。則於一省之大局。天下之全局。均有裨益。此情未可顯白於上。而尤不可曉示於下。其不可曉示於下者。則民可使由。不可使知之意也。抑慮更有言辦盜之法。用兵用差。不如用土用民。黎平之兵差。爲盜所殺傷者多。兵怯而差滑。不如鄉民尙爲樸實。不僅耳目真切爲可用也。昔戚南塘練兵。不取城市中之人。而必選農民。卽是此意。

回黎平啓呂方伯（侄孫）辛亥

卑府六月奉檄回本任。七月十六日履任視事。其地盜賊情形。慘無天日。大約三百六旬之中。每日不止一案。每案亦不止一命。殆其篤遠。一味諱匿。勢必至成粵西之續矣。卑府到任後。查訪情形。歷任所言團練。均僅止文告之虛文。而并無實跡。到任二日。卽躬自下鄉督辦。并分派委員三人。帶同紳士九人分辦。刻下團練保甲。大致粗定。約九月杪。可以一律蒞事。又自練壯丁百名。分途巡徼。訪古人雕剿之法。以爲百姓聲援。兩月以來。虛聲震懾。可暫而不可久。尤兢兢矣。僅有搶奪行李案。均經據實詳報。不肯一字虛誑。致盜賊實情。壅於上聞也。惟是巨盜甚多。巢穴亦散漫不一。救此則虞彼之失機。征南而患北之我怨。一句之間。或三五日在外。則本署之公事蝟穴矣。或三五日在署。而又恐潛伏之寇盜蜂起矣。五官并用。日不暇給。自慚才力薄弱。不能堪此重任。尤可虞者。前任某公。在此隱匿之案。不可勝計。其重情則有一案三命。一案數家者。案未詳報。不免授人以柄。現將開泰縣令劾參。勢必因此挾

制。鹿不擇陰。蠱猶有毒。此事勢之必然矣。該員到省後。蒙混開報。自獲盜犯五十八名。又擅代卑府開報二十八名。并擅代繕通稟通報。而閱其寄回單內。只徐老歪一名現存。餘均註明病斃。當此循名核實之時。忽作此追魂攝賊之舉。後任何能代爲補苴。不得已將實情詳稟。誠甫廉訪。并稟密商撤任。卑府之身受恩全。感企尤切。卑府辦事。不惜精力。不惜經費。五年黔中。自問尙可對人。無如勢逼處此。憂疑牽制。地方之公事。一籌莫展。而一方之疾苦。百病叢生。竊恐未能久隨麾節。勉效馳驅矣。了無兵柄。惟恃自募練勇。自籌賞資耳。縣力易竭。而盜匪無窮。此事所以難也。秉性愚拙。不能一事狡猾。不肯一事放鬆。處艱難之地。終日焦灼。此身之所以不支也。家慈在滬。僑寓考棚中。七十有六。精神尙健。差慰慈注。

啓湖廣總督程晴峯（喬采）二年九月三十日

近聞衡永一帶。搜獲逆犯多名。并獲僞戳旂幟刀矛多件。銷亂未萌。梓桑蒙福。除惡務盡。功德所被。直與衡嶽洞庭。同其高深。歡忭歌舞。億萬同聲。況乎林翼。烏能自己。惟是楚省積染已深。此等匪徒。所在多有。老夫子不動聲色。殲此渠魁。不使餘黨滋蔓。亦不使善良株連。其所裨於國計民生者甚大。所望寬脅從之人。開自新之路。嚴飭兵役。禁其妄拿。責成鄉里。限其舉發。緣近年以來。兵力大弱。國帑久虛。官吏之詐僞日深。差胥之滋擾彌甚。用兵用役。其弊無窮。不如用士用民。可以安反側。杜滋擾也。近聞鈞諭。飭屬舉行保甲團練事宜。竊謂此法誠救時之良策。聖人復起。不能易此。林翼履任黎平。卽奉爲圭臬。刻下委員紳士。均從鄉里竣事回城。統計各屬。竣由府一律董辦。所費亦甚無多。其戶口多寡之數。阨塞險要之地。均按籍可稽。兼由地方紳民。添造卡房數百處。日夜輪派巡守。網送內匪外匪一百餘名。地方現均平靖。此皆稟承恩訓。實力奉行之明徵矣。楚省既多良有司。地方紳士。視黔較多。竊謂撫而用之。其得效當百倍於黔矣。林翼入都無期。老母年高。因黎平道險。尙住鎮遠。兩地心懸。頗深馳思。倘得異日

仍依仁幪。得效馳驅之力。實所心願。湘陰孝廉左君宗棠。有異才。品學爲湘中士類第一。林翼曾薦於林文忠。因文忠引疾。故未果行。文忠過湖上時。招至舟中。談論竟夕。稱爲不凡之材。老夫子大人愛士如歐陽永叔。如便中訪問。必能有裨高深矣。

啓程晴峯制軍壬子

設使粵省果能蕩平戡定。亦未能比擬萬一。粵事救於已敗。楚禍過於將萌。其功德可蔭百世。楚中億萬人士。世世誦祝無窮。願老夫子大人世世子孫受福無量。衡清兩縣紳士。不肯出力。必有瞻顧之隱情。傳聞衡清敗類。其有身家在學校者。恐亦難免。此紳士所以瞻徇退縮而不前也。愚以爲必得廉正賢明之吏。久處此地。又得有才思血性之士而用之。當可安戢此邦。從前達州西域臺灣倡亂。均由官吏貪鄙。差役詐擾。故莠民得以乘機鼓動。脅誘鄉愚。卽近年新寧之匪。金田之匪。亦因官吏激釀而成。故地方得一廉能之吏。賢於十萬甲兵矣。前讀邸抄。恭悉老夫子大人激揚清濁。整飭紀綱。舉措至明。四方風動。是誠至要之策。欽感莫名。粵事得嚴仙舫姚石甫兩先生來。信均無十分把握。言中極言兵怯勇囂。恐非歲月可了。勞辛階方伯來書。亦言南太之匪。隱憂未艾。成算尙難。此均十月初旬之書。又不知近狀何似。黎平盜匪之多。民生之惰亟力整頓。心力交瘁。靖州署牧鄒公。奮發有爲。盡心民事。鄰境叨益良多。黔中近日。惟天柱清江丹江都江。盜匪時常出沒。黎平之境。四面空虛。誠恐有隙可乘。倍切兢惕耳。左孝廉品高學博。性至廉潔。卽陶少雲之業師。又其妻父也。在文毅第中。讀本朝憲章最多。其識議亦絕異。其體察人情。通曉治略。當爲近日楚材第一。惟秉性剛急。不願出山。實爲可惜。

啓程晴峯制軍壬子

余提軍帶兵援剿。初四日追賊。微有損傷。賊擾興安縣城。棄而不守。聞已竄入全州等處。流寇伎倆。剽悍特甚。專恃兵力圍剿。必難得力。況近年以來。兵將伎倆。久爲羣賊所竊笑。粵軍六七萬人。始終不能一戰。其明徵也。林翼之愚。惟力行堅壁清野之法。官民一心一力。則賊不辦自滅。然欲此法之必行。須先搜羅地方俊傑之才。使之董率勸導。宣布德威。接以恩禮。假以便宜。彼爲保衛身家之計。義無可辭。惟在帥武駕馭之耳。謹將衡州一帶紳士之素有才略。胸羅今古者。列列名單。敬呈函丈。伏乞推誠延訪委任。而責其成效。必能仰贊山海之高深。楚人幸甚。天下幸甚。左孝廉才學識力。冠絕一時。上年曾密陳夾袋中。其餘七人。林翼雖未經識面。而迭次訪問。均係有謀略膽識之才。粵氛日惡。與楚日近。妄不自揣。敬獻芻蕘。統祈採納。衡州彈丸小邑。久駐旌麾。查訪地圖。該處鴈峯寺嶽屏書院。均踞立城巔。形勢亦頗可慮。似宜於境外設防。乃爲扼要。林翼在黔粵要隘處設堡建礮。漸有頭緒。小湖先生會同巡勘。亦甚以爲然也。

啓張石卿中丞(亮基)壬子

敬稟者。正月二十五。四月初九十七日。肅奉兩稟。計呈鈞鑒。每念籌筆之勤。心願執鞭爲役。惟籍隸楚版。言行未孚。州里不行。而黎平職守之事。亦未盡了。當然神情依慕。固無時不在左右矣。前舉衡湘之十七人。聞其有才。未曾面晤。必可羅而致之。量驅策。內有左子季高。則深知其才品超冠等倫。曾三次薦呈夾袋中。未蒙招致。此人廉介剛方。秉性良實。忠肝義膽。與時俗迥異。其胸羅古今地圖兵法。本朝國章。切實講求精進時務。訪問之餘。定蒙賞鑑。即使所謀有成。必不受賞。更無論世俗之利欲矣。時事孔棘。得人爲先。林翼身受恩遇。拔誠於僑伍之中。如前賢韓魏公歐陽公薦士。不必識面。以此感激。日夜思竭其愚忱。以報所知。計惟有舉賢才以贊幕府。方爲忠愛之至。計野人葵藿之誠。蓋爲此也。季高處至今不能預告。恐其噴林翼之多事。而違其隱處之初心耳。近聞粵匪已入楚邊。衡

寶長沙各郡邑。民心動搖。戰守之地。需才尤殷。林翼之愚。以爲卽再調兵十萬。亦決其不能破賊。以武備廢弛。已成無可救藥之勢。且有兵之處無賊。有賊之處無兵。兵與賊終不相逢。卽迫之使戰。亦不過虛應故事。必無蕩平之日。除却用士用民。堅壁清野。守中言戰。別無良策。不僅節省經費已也。付呈二件。敬乞鑒納。再者近又訪得楚南士子數人。均有才識。另單開呈。伏乞葑菲不遺。專意延訪。推心委任。必能贊助高深。以成大勛。卽諸人而各舉所知。則拔茅彙征。衆志成城矣。事急矣。愚昧之見。不勝激切。尙乞恩鑒。

啓呂方伯（壬子）

敬稟者。奉到正月初九二月二十二日手諭。并功牌信報等件。感荷德意。奮勵彌切。永安賊匪。於二月十六日。乘夜全竄。前月二十七日。業將探報情形。呈之臬憲。并致首府。定蒙鈞鑑。昨又據探得該匪傾巢而出。十七日卯刻。揆帥始同向提軍督兵收復州城。并將水豆莫村一帶賊營燒燬。烏都統連夜馳往古樹村。跟蹤追剿。定於十八日。概行拔營前進。其竄往昭平。作何舉動。現有四次探卒在外。計本月可陸續回郡。前信言擊賊數千。賊匪始逸。系粵西官樣文章。非實跡也。近日之兵將舉動。令人髮衝皆裂。非復情理所有。而粵界土匪頗多。兵久不勝。狡起戎心。所在匪徒膽張氣壯。不僅粵西大股可患。卽小股亦然。粵中招致東勇。以救兵力之窮。然亦不能戰。且有與賊通者。卽戰勝之後。數萬驕悍之人。游惰日久。本業曠廢。何以位置。又何以弭患未萌耶。況始終未曾一戰。官兵伎倆。久爲此輩所覺。一旦軍餉不繼。禍乃方張。韓子云。徵兵滿萬。不如召募數千。誠爲至論。而林翼則謂召遠方之惰民。以充練。不如卽本境之農民。以自守。耳目習而地形之險要。熟利一也。性情樸而自保身家之念。切利二也。在官兵役。視國帑爲應得之物。受恩而不知感。小民勤苦得微利。而感激出於至誠。武弁文吏。身列仕途。恩極則濫。卽自以爲應得之物。而士民之稍異庸流者。望頂戴官職如登天。駕馭而用之。破格以優之。其力自倍。利三也。富鄭公言兇險之徒。讀

書應試無路。心常快快。因此遂生權謀。密相結煽。此輩散在民間。實能始禍。要在得人而縻之。蘇子瞻云。窮其黨而去之。不如因其材而用之。明邱濬亦言。紛紛擾擾之徒。一無定志。所慮者粗知文義。識古今者。在平時宜有以收拾之。觀諸公之所論。雖未必盡切今日之務。而要之駕馭人才。卽以銷弭隱患。先爲布置。得所生養。授以羈勒。範我馳驅。內蠹不生。外侮自息。故用士用民。實今日之先務。其利四也。鄉民怯戰。不僅長征遠剿。情必不堪。卽衝鋒破敵。亦恐難恃。只令自爲守禦。賊無闖入之勢。民無裹脅之虞。糧食不遭劫掠。賊餒自可衰息。利五也。此中流弊。如斂錢報限諸事。誠恐滋擾。然鄉人之事。稍有私弊。易於上聞。不比受兵役之害。難於赴愬。竊恐粵事日難。非可旦夕奏效。養兵之計。實爲大蠹。從何整飭。尙乞早爲籌度。卽日專圻兼圻。當以此爲報國之先務。昔張士誠以十八人踞高郵城。官兵數萬圍之。一旦脫去。今日之事。得毋類是。使賈太傅李伯紀當此。又不知如何論議矣。

與呂方伯論兵事啓 壬子

敬稟者。粵氛日惡。且日近。殊切兢兢。此時總以趕辦土堡。浚挖濠溝。沿河設水棚。不能孫吳之戰。先師墨翟之守。乃爲上策。守之所費多。而右定。戰之勝敗。渺茫無憑。兵敗則兵怯。民敗則民怯。民怯兵怯。則賊愈雄。故善言兵者。總不浪戰也。看來守禦所費。雖多而可久。且亦有限度。不比老師糜餉。有加無已也。假令閏八月。永安城外二十里之地。每日用夫役十萬。每名日給銀一錢。以六月之久。可役百八十萬人。費銀不及二百萬兩。其高觸天。其深及泉。其廣如長城。賊從何處竄逸耶。此天下至拙之計。而較之虛糜七百萬之帑金。猶爲巧矣。今日復探粵省二月二十八日。賊匪逼近桂林。城門已閉。懷遠一帶汛兵。均已調援。黎平地方。橫互二百餘里。與粵相接。是防堵尤爲至要矣。附呈粵地總圖。略存大概。伏祈鑒察。其詳悉。得便再呈也。黎平近年。因楚粵不靖。內外匪徒蜂起。商賈不通。蕭條尤甚。此次姑且試行米穀銀錢。量力酌捐之法。或亦小補絲毫。然大局必望憲帑。查黃平一案。十餘日後。酌撤兵練。十分

之七。二月以後全撤。而用費一萬九千有餘。黎平防堵楚匪。調兵不過三千。雇練不過數百。爲期三月有餘。用費三萬三千有奇。而地方官之私報流攤。共約萬計。此次議建土堡。招本境之民。爲本境自守。而工役卽在其中。本極省約。卽使扼要而辦之。亦須十餘處。一律修築。方能布置要隘。總須費至一二萬金。一氣呵成。方有可守之勢。承平日久。民不能戰。兵不能戰。身家念重。患難困苦之日。未嘗閱歷。怯者思逃。以身嘗賊。勇者思亂。聞風而起。其紛紛逃避者。皆因無可守之勢也。昔盧忠烈。堅壁清野之法。施之大名。鄖陽等處。立見功效。今日之勢。舍此別無良策矣。卑府自到任以來。所招練勇百人。每月每人四千。若以之衝殺巨寇。尙嫌不足。現須廣爲招雇。前此尙能勉強自捐。此時亦惟望憲帑接濟。伏乞籌度經費。多爲頒發。隨時接濟。雲霓在望。日夜以思。卑府兩次辦理軍務。其是否浮冒。是否儉約。必蒙訪察。此心如昔。尙乞鑒之。近日之兵。萬不足恃。而將官之昏庸尤甚。出位之思。越俎之庖。固知非是。然萬一軍報緊急。則督撫憲必應奏調兵將。以壯聲威。文武均有守土之責。固不可偏廢。且國家定例。何可廢兵。古州雙鎮。從河北調來。情形似尙未熟。可以分任。似難專任。古州營兵。習氣獨深。怯於公戰。勇於私鬪。三十年防堵楚匪之役。不服鎮軍調遣。敵血豎旂。幾成大變。皆由守備劈輝煌昏贖貪利。以致如此。又清江協中軍守備李德基。行止本來荒謬。前在黎平防堵。尤爲滋擾。又古州守備丹桂。搖惑軍心。遇事生波。此皆附近黎平。應調帶兵之員。密陳左右。以備異日察核。黎平參將慶瑞。人甚明白。亦無營伍習氣。新從粵西回營。養病之頓長。春周鳳岐。營伍整肅。事理明晰。貴陽營把總黃掄元。〔知外科金槍藥〕。凱里署千總王敦倫。朗洞柳拉千總夏登元。能耐勞苦。一並密陳左右。以備異日差遣。又慶瑞今日面商。該營存城兵丁三百餘名。向例出外巡防。本境日給四分。出境日給七分。如飭赴南路。紮營防守。請給四分。似亦尙省約。已給一月。囑其巡防矣。查三十年黎平軍需章程。每兵每日給夫價銀五分。而仍不雇夫。其弊因大。礮火藥。例由地方官應夫。故影射朦混。地方州縣。遇兵到境。送出境外。卽受無事之福。豈肯按倒認真。又兼官軍從安順貴陽。及他營而來。地方已濫應於前。則後來者。見其隨營本無長夫。勢亦不得不支應。

於後。竊謂將來如須用兵。除兵丁夫價外。一切軍裝礮位。均須一律給價。且須領兵將。備造冊開送長夫姓名。加結申報。仍嚴責首站。不得濫應。方免日後朦混。如一概不給夫價。由地方應付。則所省不省。惟添一番擾累。三十年舊刊章程一紙。附陳鈞座。以備異日酌度。連日督辦一切。鐙下縷陳一切情形。伏乞鑒納施行。

薦韓委員啓 壬子

敬稟者。韓委員超。係候選州判。因揀發借挑府經到黔。其同班後到之鍾策勳。早已實補。聞有他故。其吏已因此受罪矣。而韓獨向隅。查該員應歸揀發班補用。得缺較易。刻下柳霽縣丞后丞出缺。韓君係不論題調。皆可酌補之員。可否乞恩歸於酌量補用之內。抑或另調一現任府經。而使補其所遺。是所望於鴻恩逾格。於選法變通以成全之。該員腹有十萬兵。胸羅念一史。沈勇慷慨。一步百計。殊非泛讀兵書。侈言將略者可比。且忠勇正直。血性奇男子。可爲名將。可爲良吏。若及早拔之。大可爲國家出力。其年已逾五十矣。再過五六年。則恐其精力稍遜。實爲可惜。上年來黎平。即在外巡緝。深明機略。籠絡苗民。得其心力。本年正月杪回郡。二月初赴防所。風雨早暮。不避辛勩。近日兼督堡工。訓練丁壯。卑府視其駐工之所。辛勞刻苦。非復尋常官吏所能堪。其迭次所陳兵略。卑府採擇上聞。卑府非敢攘善也。實因轉抄不及。故摘要以聞。竊謂此材固一時之豪傑。如及時提挈。則感激思奮。不待鞭策。此人雄心遠略。不與俗諧。而人亦無有賞之者。上年蒙大人面獎。至再。破格垂青。業已以身許公矣。當此需才之時。用敢乞請逾格成全。區區愚誠。諸維海納。

致委員韓南溪(超)

月前賊在懷遠長安墟。離境二三日程。遲回審重。本擬一戰取威。適嘉應客民。先期取勝。戰功何必自我立哉。來

書言波山匪船哨至柳州。弟查此地距黔七百餘里。必欲前往。實所不可。越境剿辦。勞師遠襲。非計也。烏都護之援桂林。係大帥職守。與鄰省防堵不同。聞其遇兵甚厚。雨不張蓋。謂衆兵均無蓋也。囊無餘錢。得餉盡以賞兵。可謂一時人傑。橋上之敗。是日割臂血入酒中。與兵共飲痛哭。誓師感泣。願從者七百人。橋上之役。兵有傷者。而大將先隕。在都護忠烈貫日。復何所恨。然從此無辦賊之人矣。國家生賢良忠直之材。當爲國家愛護之。閣下不爲身計。弟則當爲國計。此固區區血誠。非同尋常賓誼也。然使賊果逼近。則弟自當身在行間。決不肯辱身失節。偷生目前。轉爲刀筆吏所侮。節節爲防。步步爲守。扼要爭奇。當能一戰總之。與城同存亡。郡地卽余塚也。不必再思。再閣下本無守土之責。只可協力助謀。與弟之守土者不同。萬一賊逼近地。臨時機括。總以多付銀錢。交給各村寨士民之手。於險要之地。昏夜之便。人自爲戰。以期一勝。卽使受士民之欺罔。而竟無成功。猶之虛調兵丁。同一糜費耳。閣下慎旃。成敗非吾逆覩。禍福毀譽。尤非我所知也。

致委員張虛齋（禮度）

始意建倉。遇凶歲則出之。遇中歲則取息。給守礪之食。縱不能取息。而按年支放。可支二三十年。實力奉行。永除盜賊。三十年之休養。亦屬佳境。其建倉以千石爲率。須穀本五百金。若置田則以三四百金爲率。然其息僅養三四人耳。一千石之保團倉。每年以六百石出借乾穀一石。還新收毛濕穀一石四斗。除去一斗四升補耗外。又除去六升爲經費及不虞之費外。實收利穀二斗。其收利穀一百二十石。所費與田相同。而利倍之。且利在救飢。輕理得人。則救生靈於無窮。其利甚溥。而弊在難其人耳。濫借無收。數年化爲烏有矣。置田之利。在急切無人敢賣。又不能負之而趨。弊在置買時浮損丈尺。浮損租石。一年有秋。二年告匱。三年則漫言漫應矣。

致翁學使祖庚（同書）

播州多奇士。有堪用世者否。大方荒寒。烏撒尤甚。有耐苦而力學者。則肌膚實而心地堅樸。視輕佻便利者。不啻霄壤。若得廣廈千間。歲假帑金一二萬兩。招致英俊。與之講求方略。則小寇何足爲患。凡黎平文武紳士。鄉居之人。苟於學冊有名者。盡入林翼保甲團練冊內。此中才分。各有短長賢否。亦默爲分別。大抵有讀書人之村寨易治。而無讀書者難治。鄉正團長得人者。一辦卽妥。不得其人者。屢整飭而仍不妥。永從下江古州無士可用。其地苗多漢少。漢人不過千百之一二。去其害苗者而苗盛。其團練較緊於內地。惟古州不得其術。其地勝兵數千。屯軍數千。竟不可用。近得一韓參軍超。熟精成少保之書。與以壯士百餘人。可成勁旅。然妹翼所患者。不僅在粵賊。而在內匪。內匪之可慮。不在此時。而在異日。界粵之處數百里。不爲不廣矣。然而有險可守。有術可施。如預存重貲。不煩兵力。而賊可得。黎平雖偏小。未嘗無千夫之長。百夫之傑。撫而用之。卽爲我用。而不爲賊用。古來成事敗事之人。必在塵埃草野中。用之則爲臣僕。棄之則爲盜賊。其間操縱。間不容髮。承平日久。文恬武嬉。額制之兵。無一可以禦侮者。以其巧滑偷惰。訂習已深。黔盜之多。所在皆是。刻下所得已百餘人。殺之無赦。然東奔靖州天柱。北走清江。幾乎以鄰爲壑。卽潛伏內地者。亦暫怵於威。牽於連坐之法。而相戒無大動耳。豈能革其心面。絕其根株哉。竊恐異日司事者。失駕馭。惜金錢。與士民隔絕。使鄉民望官衙如溟海。則禍患之來。如響斯應。處升卿之錯節。而才識不及學渤海之亂繩。而德量無聞。是以難也。革夷餘盜二十餘人。司事沿襲舊作。不知改變。便是認題不真實。則招募死士。籐牌手五六十人。登山驀澗。與盜相逐。不過千金。可以應手矣。

啓呂方伯

咸豐二年六月二十九日

敬稟者。日前正茅坪天柱交界處所。肅稟報聞。計呈鈞鑑。卑府所派練勇。遠從鷓鴣追賊。直入鎮遠府屬地界。查探賊蹤。距境在五里以外。入地頗生。未能進前。由清江一帶轉回。於二十六日始到茅坪。卑府現探柳州一帶土匪。

滋擾。復經派撥前赴靠頭防次。卑府仍每日三次認真操演。黎平營慶參將。近亦挑選兵丁百餘名。每日在教場操練。該員在營潔己奉公。兵心貼服。故日日操演。而兵不言勞也。惟是黎平一府。南面與粵毘連。東面與楚毗連。東北面北面。與天柱清江毗連。西北面西面。直通丹江下江都江都勻。內匪外匪。處處可通。自慚布置不密。防範不嚴。日前遠在南路。得信馳救。業已緩不及急。愧恨何如。韓委員超。自二月至靠頭防守。該處地當粵邊。頗多瘴癘。日午酷熱。夜間大寒。委員紳士練丁。半多瘡痍。韓州判染疾兩月有餘。因地方緊要。力疾辦公。巡行緝捕。猶復身歷行間。仰視飛鳶。殊無少游款段之感。卑府函囑回城調養。而該員尙以地接柳州。不能放心爲詞。查該員忠勇樸實。實屬不可多得之才。自當加意愛惜。現已派員前往接替。惟許多練勇。係其一手教練。其束伍之法。訓練之宜。他人雖仿爲之。亦不能精也。練勇一項。工食僅只四千。哨長隊長行長五千六千七千不等。然一月計之。約費銀八百金以外。現在南路東南路各堡已成。而東路北路西路。另派張委員禮度建置碉樓。以備他盜。核實樽節。所費亦煩。正月以來。兩次蒙發給經費八千兩。現在存餘不過千餘金。紳士捐輸銀錢穀米。隨收隨用。計又近萬。所餘穀米六百石。錢三千串。尙可支一二月之用。楚地久旱。開泰縣屬之東路東南路禾苗間多枯槁。設壇虔禱。惟附城稍稍沾渥。憂心如焚。誠恐誠懼。刻下催捐。頗難踴躍。其古州廳所呈報捐項萬三千兩。下江廳函報捐項二千兩。應否解省。抑或指撥備用之處。伏乞憲裁。再黎平團練。日前無寨不傳籤。無寨不集衆。士民奉令惟勤。惟烏合之衆。團而未練。見賊即逃。良由操練未精。膽力不齊。又不知埋伏要隘。乘夜襲取也。大人所刊鄉守輯要書。實爲救時之良策。敬求再發六十部。以便分團訓練。實爲至感。

復張石卿中丞啓

十四日奉到賜諭。開布公誠。如武鄉侯心跡本領。欽感何言。賊匪於六月二十四日。棄道州並舍永明江華。傳聞

已至桂陽州。而林翼接二十五日軍中將弁信。尙不知有此事。勞中丞接二十六日道州諸大將書。言不僅不能追剿。亦並不知賊往何處。時勢至此。尙忍言哉。謹卽鈞示下問者。略約言之。一撥帥左右無一正大。無一謀士。其忌刻傾險。盡是內務府氣習。此誠不可與爭權。觀於烏都護江岷樵之言之不用。而諉過於鍾泉。卽知其無能爲矣。不如姑示韜晦。待其自敗。以敗事計之。當在此時矣。竊見閱歷之深。無如仲紳。揆帥一日不離粵。西之事。例以古人忠義之至。固有未協。然委曲求全。保身卽以保國。如操縱得宜。指揮若定。能如胡梅林之籠罩趙文華。亦行軍之長算也。一堅壁清野。非用士用民。不能集事。士民中賞無欺我之人。亦豈無僨事之人。然兵將之滑者十之九。士民之樸者十之六。近年宦途頗雜。牧令旣少真才。佐雜尤多庸妄。其心術見識。不堪設想。不如士民之眞性未漓。可激以忠義。楚官與民仇。楚民與官仇。此孟子所謂疾視其上而不救也。惟有勤接見。決壅蔽。視民如官。視官如民。無衆寡大小。推誠相與。咨之以謀。而觀其識。告之以禍。而觀其勇。臨之以利。而觀其廉。期之以事。而觀其信。知人任人。不外是矣。近日人心。逆億萬端。亦難窮究其所往。惟誠信之至。可以救欺詐之窮。欺一事。不能欺之。事事欺一時。不能欺之後時。不可不防其欺。不可因欺而灰心所辦之事。所謂貞固足以幹事也。況賞罰具在。董歡因時。以大權臨之。何患不濟。未有注意於保甲團練。堅壁清野。而無成效者也。一盧忠烈公之督兵大名。鄖陽。其得力在堅壁清野。其制勝在親兵之能殺敵。致果也。傅重庵以礪堡制苗。而練丁千五百人。因閒雕剿。兵威乃振。鈞示招練。如何可信。爲日已迫。訓練豈一蹴可能。誠爲深慮。竊謂襄毅治粵。陶魯參軍所領三百人。皆卽時應募。而所向克捷。且戰且練。且守練一日。得一日之力。練一人得一人之力。百金之士。千金之士。誠爲難得。然三年之艾。亦在蓄之而已。至練勇之不可恃。則在馭之之法如何。領之之人如何耳。國威久不振矣。人心思亂。不自今日始。亦不自今日止。除日日練兵。人人講武。別無補救之方。此說與專言守禦者。實可互爲其用。而相與有成也。一聞諜爲行軍之要。而此事最難。其弊由於安樂日久。無耐勞苦。壯膽智之人。甘蹈白刃者。更不可得矣。來諭言我處之一舉一動。賊

必知之。則是保甲不實。稽查不力之故。賊之舉動。我不能知。則是未能間諜之故。物色此人。談何容易。陳平惡草具。付之以金而不疑。野利棗龜杖至垂斃而不悔。其用人之妙。用智之巧。良可味矣。竊謂謀賊則獲。積誠可通。雖非二月所能猝辦。然未有求而不得者。一江岷樵。昔年在京鄉試。負其死友之櫬而歸。二次行邯鄲道上。送一不曾謀面浙江舉子之櫬。此其行誼。即漢代獨行傳中。亦不多得。昨已函致岷樵。彼風節優於天下。當有感奮不能自己之誠。左公高隱。尚不知雄才大略。是文忠公一流人物。設其真知。必翻然應命。今已函致矣。林翼才力至劣。伏維河海不擇。芻蕘不遺。故敢即其所知。上陳座右。一代偉人。必能宏濟時艱。吾楚幸甚。天下幸甚。

再者所陳各條。其要仍以用人爲先。卽一技一能。亦不可棄。不龜之藥。勾踐藉以破吳。善穿地洞。李光弼因以陷敵。信陵得侯生。石勒得張賓。苻堅得王景略。皆以一二智謀之士。戰勝攻取。然必不拘資格。然後丹書中之斐豹。得獻其能。亦必寬其文法。然然怒攻主將之鄧羌。立摧勍敵。伐曹一役。晉文誅顛頤而舍魏犢。自古英雄作用。不拘一例。良以奇才難得。不容不加委曲於其間耳。

■自黎平至烏沙致都鎮兩府及所屬廳縣二則 壬子

攻剿之役。林翼不能辭。防守要隘。齊心協力。認真團練。防其竄逸。則必全仗諸兄之威力矣。愚意先辦烏沙。取其距古州不遠。卽乞訪定隘口。派練約期堵截。仍乞訪其竄逸之路。並間諜眼綫之人。遣赴營前。惟此輩抗拒之患少。而竄逸之患多。必望大力維持。指示迷途。其地方官獲盜之功。不能妄行攘取。其地方官難辦之案。必當妥爲思議。總以保固地方爲主耳。前函懇將烏沙四面應行防堵之處。各卽所知。繪圖貼說。飛速賜教。計必蒙示在途矣。至九眼塘番詳等處。亦乞分晰繪圖貼說。隨後寄示烏沙。事不可遲。謹定十一月十九日。從黎平帶練。由朗洞前進。尅期二十五日進剿。敬乞諸兄卽速查明所屬之與烏沙毗連者。如清江台拱丹江八寨都江各屬。何處應防。務求各帶

精練屯軍二三百名。分守要隘。於某日某刻。齊集應防之處。嚴爲堵禦。約離上下烏沙二十里三十里不等。四面守定。仍乞一面先將所帶練勇屯軍旂幟。何色何號。現駐何處。並地圖賊勢。逐一開單示之。此次未能開明地段。分撥防守。實因復諭未到。地圖未得。恐以意懸揣。指撥不妥。轉致貽誤事機。請諸兄自爲撥防。可以熟悉一切。且各有專守。專責也。至若帶兵赴防。沿途駐紮。及到防紮營所在。均須預派兵練。先行搜查伏賊。晝夜防範。以期妥慎。蜂蠶猶毒。而近年盜賊。尤須慎防。賊不竄逸。事無挫折。然後隨謀搜捕。追剿之方。乃爲有益。

請通飭修築堡啓

粵西兵勇六七萬人。皆選募於各省。其隨行餘丁夫役。各色人工。計又不下二三十萬人。費帑已逾千二百萬兩。兵力餉項。不爲不厚。然而圍守永安之日。終日挑戰。閱六七月之久。而賊終不出。所報斬獲。豈盡實耶。永安竄逸之後。無戰不敗。將星動搖。侵軼省城。勢更猖獗。兵將之勇敢者。多已傷亡。餘人膽落。怯不任戰。告急於粵東。而粵東多寇。饑饉不繼。楚省自保不暇。救援乏人。宏濟之略。相顧不發一策。專待廟算而後行。又不實力遵奉。以慰宵旰。是粵事直不可問。城守半月。條理當密。明季瞿公起田。極言桂林形勢可守。或竟無虞。而大勢終不能濟。然則粵事之失。其非不足於兵練明矣。驅怯戰之兵。日日浪戰。以冀幸其一勝。軍興三年。無一人深入賊營。探其虛實。賊營動靜。無能知者。亦未聞設一奇策。引賊入彀。我太宗文皇帝天縱神武。無戰不設伏。無戰不用間。其於阿山葉赫薩木哈圖攻城奮力。不令再攻。今粵西乃棄民以嘗賊。以此求功。竊所未喻。其失一也。久治之世。兵民晏安成習。心志不苦。患難未嘗。則智慧鈍而膽力怯。一盜夜呼。千人皆廢。彼小事且然。況大寇軍。粵軍兵將。臥耽鳩毒。卽無疾病。亦半委靡。選將不精。束伍不定。以此言戰。何恃不恐。以此言兵。雖多奚爲。其失二也。戚南塘選兵不用城市。而用鄉農。用意最精。愚見以爲召遠方之惰民以充練。不如卽本境之農民以自守。今粵西之練數多於兵。馳檄遠募。游手惰民。盡入籍

中坐廢歲月。漫無統領。一旦餉絀。職爲亂階。近聞索賞而後言戰。交綏卽退。並有輸情通賊者。其失三也。田疇許遠。尙保鄉里。塵埃之中。何地無才。何才不可策用。惟官不先用。則傑者思亂。懦者風靡耳。永安之民。如不通賊。何能接濟七月之久。陽朔荔浦。如能浚溝築堡。何能直犯桂林。古東之敗。如得土人指引協助。何致全軍敗衄。惟官不用民。而民乃爲賊用。此機一失。禍患無窮。其失四也。黔中與桂林最近者。惟黎平爲甚。近日各屬傳聞不一。稟牘頻來。卑府日夜籌思。設卽調兵三千。勢已極弱。然檢省核實。每月卽須銀萬二千兩。每年須銀十五萬兩。以黔較粵。兵力尙不及十分之一。粵不能戰。何望於黔。招練過多。恐亦非策。粵防奏凱。不知何時。經費之計。就目下而論。粵爲充盈。黔爲支絀。彼費至一千二三百萬兩。而終成虛擲。黔中豈能辦此。是爲黔計者。又不必從調兵設想可知矣。愚以爲天下之勢。必匿其所短。然後能用其所長。兵民之怯戰久矣。言戰不如言守。用兵不如用民。用民力以自衛。尤不如先用地利以衛民。破天下之巧者以拙。馭天下之至紛者以靜。公輸之善攻。不敵墨翟之善守。譬之於棋。負者誤於進取。勝者以慎守爲算。其切喻矣。熊公襄愍。經略遼瀋。惟扼形勢。繕守具。主固守。不浪戰。身之去就。係遼存亡。然考其方略。不過築堡插柳。以防衝突。盧公忠烈。督兵大名鄆陽。依險立寨。築土垣以保民。流賊遇公必敗。所至飢疲。川楚教匪。嘉慶二年。德侯奏請堅壁清野。合州龔牧所陳調兵之害。添兵之害。鄉勇之害。及四難十利各策。其時以糜費擾民之說。阻隔不行。而糜餉擾民尤甚。至額侯經略川楚。於六年內復奏奉行。立見功效。乾隆之季。楚苗不靖。福和兩帥以重兵剿辦。不勝。而傅公重庵。創行碉堡以制之。鎮筸總兵富公志那。憤司事者之歲費金錢。妄爲招撫。遂以象苗之資。歲十餘萬。畀之傅公。以成設碉之功。楚人至今賴之。治安已近六十年。此近事之成效可考者也。又王莽陳載田。况所陳平盜之策。言盜賊情狀。將帥不能破賊。擾害州郡。妄殺良民。各情無不切中。今日之病。其言收合老弱。積藏穀食。并力固守。賊攻不能下。所過無食。剿之易滅。招之易降。又深似嘉慶六年以後。堅壁清野情形。蓋其所謂徙老弱於大城者。卽後世之堡也。李牧備邊。收民入堡。終不亡失。是卽築堡浚濠之始事。合觀古今之勢。大抵開

創之始。此策可不必行。蓋亂極思治之日。人心物力。爲之一變。其堅定純樸。能耐勞苦。壯膽智。少嗜慾。則不僅在朝之將帥官吏爲然。卽在野亦然。李牧爲周季之人。熊飛百。建斗爲明季之人。惟德侯額侯傅公之策。龔牧之議。處乾隆極盛之後。目覩人心日安於便利。未嘗艱難。非此不足以救民水火耳。本日據魏令壬署令韓委員超劉委員毅馳稟。南路最要之八樂靠頭堡。大勢已成。民苗亦知自衛身家。同聲踴躍。成當不日。而卑府查閱地圖。凡與粵界之處。約二百餘里。以河流三大支爲界。由遠及近。由外及內。均當一律次第辦理。日役土木竹石鐵工千數百人。其章程款目。則取法於前。而稍變通其堡中防守之具。大概與城守相類。其堡外靜僻之處。或剗削以杜人跡。或旌旆以示聲威。或巡徼以絕窺探。守禦果定。則扼要爭奇。當可於守中言戰也。

啓呂方伯

楚南竄匪。上廬憲懷。分應迅赴思州等處。速籌堵禦。惟念李署守以十月廿九日。接玉屏及晃州信。而卑府所遣赴楚偵探之人。於十一月初旬回黎者言。賊二十日陷寧鄉。二十二日陷益陽。欲向常德。常德業已戒嚴。初八日回黎者言。賊破寧鄉益陽後。竟未向常德。十二日齋到糧道喬撫署左手書。皆言賊由益陽之北路南溪。離舍間十里。北赴洞庭。已到林子口蘆林潭。查林子口離舍間三十里。蘆林潭離舍間五十里。均湘陰縣地。乃入東湖之路。並非赴常德之路。蓋自益赴常。宜向西行。而此則向北稍東。其爲入湘陰入洞庭。竄岳州明矣。長沙官兵不能守。則岳州料亦無人守矣。至剛辦。匪一事。卑府已飛速密約三郡文武。於十九日起身。二十五日抵烏沙。各文武務於是日齊集。至二十三里外地方。擇要屯紮。以資圍拿。自宜踐約前往。且邇來常有三四起探卒在楚。若外匪見挫岳州。折轉向常。一得確信。不難卽日移駐。籌辦堵禦。若能先將內匪肅清。縱使外寇前來。亦可一意專辦。鎮遠文武請兵請餉。暫且不論。總之卑府旣蒙委任。則黔境之安危。不能稍有推諉。而緩急虛實之間。尤不敢不熟思而審處也。

再稟者。卑府自帶官員練勇差役長夫。共六百餘人。官兵少用爲是。禦外則以據險爲主。戰內則以購間爲先。

乞留古州某丞啓 咸豐二年

敬稟者。連日籌思上下烏沙之事。惟古州清江兩處。復信已到。均有眉目。而丹江台拱絃程尙遠。專差前去。尙須半月。方可定奪。料賊必竄必匿。一次不淨。誓以至再。至四。始終其事。或者愚忱所積。稍補萬一。尙不能自信也。頃聞傳言。大憲欲以古州。置之。年終甄別。自係大憲懲飭地方之苦心。惟查該丞到任甫及三月。而在外巡緝者已五十餘日。黎平古州。只三日程。訪察最確。該員才本明察。洞悉奸宄之情。僞是其所長。幼出官門。未經患難。身家念重。是其所短。然今日之官吏。其辦事而不顧身家者。實難其人。惟有董戒其不能使之知所趨向。方是正辦。該員到任之始。至於今日。卑府無一二日不飛函商辦之事。該員亦無不虛心遵辦之事。並曾再三函囑。告以服官雖久。卻均是太平景象。今非其地。當以膏膽臥薪自處。該員復函。亦深領會。曾將其所親歷地方形勢。保團方法。作稿通知。卑府當告以甫有頭緒。使須埋頭幹去。不在早爲通稟。細察該員明察之才。警惕之心。均有可取。烏沙毗連數廳。古州尤關緊要。刻下正擬從此入手。若驟易一人。則必致呼應不靈。卑府何能按兵而待。後任之來。若令其盡力拏辦。烏沙匪徒。限以四月。期於淨盡。當此無可諷免之際。荷此深恩。使功不如使過。當有濟乎。伏乞憲恩。密陳兩院。憲暫與寬假。並乞面諭首府。迅速飭知。令其專心辦事。尙其奮勉出力。則地方可保。憲恩可寬。如其不知感懼。緝拏不力。四月限滿。卑府必當密稟。斷不能徇一誤公。愚昧之見。尙祈格外垂鑒。不勝悚惶待命之至。

致清江廳楊

頃得來示。備悉所慮精詳。至爲欣慕。刻下賊匪何處最多。何股最兇。何人爲首。其平日聚積何所。追剿之餘。聞風

逃匿竄處約在何地。假令異日有人督兵追剿。尊處應防之隘口凡幾。能設法堵截。不致竄入否。又道路傳言。台黃兇盜。總在雷公山。弟意疑之。雷公山爲荒谷幽箐。官兵不能入。盜亦必難久居。設四面會剿。窮極無賴。或到此暫住數日。然周袤數百里之地。分兵圍守。勢必不及。卽守矣。使賊乘間抵隙。逃於山外。轉得徜徉行劫於各州縣。而官兵乃守株以待兔。有是理乎。欲辦此賊。何適而可。何法而可。使其不竄不匿。閣下賢勞夙著。經濟夙優。敬乞剴切指示。明以教我。不厭其瑣。不厭其詳。引領延企。實抱虛衷。請益之愚誠。并乞祕密勿宣。一切應防。應守。應捕。應剿之方。尙乞合三府五廳各州縣之地。通盤籌畫。細切詳示。以便遵守。

復古州廳郎 咸豐二年十月十三日

頃得來示。詳列十紙。具見躬行實踐。了然於心。了然於目。良工心苦。夫復何言。豈忍疑其不用心耶。苗寨有槍。禁之必不可。因而用之。卽古人所謂因勢利導也。嘗笑近年官吏。不能禁賊槍。而思禁民槍。豈非癡乎。設異日有事。不須多調。大約好手三百足矣。且須諭以只辦古州地面。不致越境。則苗人乃肯應命。否則疑矣。藥鉛火繩。可用印文。(鉛子與苗槍不合式。須另錘也。)向營中借用。俟稟請督撫。給發歸款。如再拘泥。則卽以稟稿交給園看。囑一面支借。一面徑申。斷無阻止者矣。口糧可每名給米一升。加錢三十文。四十文。特須妥人經管。並須有頭目承領。乃不虛糜。然此亦刻時調遣則然。平日則止可犒牛酒而已。謝賈無團練。其人既與賊通。尤須設法妥辦。保甲。烏沙之附屯軍。共幾堡。共若干戶。可設法責成也。總之一人理事。事必不勝。弟辦保甲團練。亦甚嚴矣。心規杜召。跡近申韓。如本寨有人出外爲盜。能責成本寨鄉正團長牌長要人。如外寨有盜入境。而不救援。不追捕者。則責成本寨鄰寨鄉正團長。罰錢入本寨充公備用。而官不經手。一年有餘。得盜三百餘人。豈第一人耳目才力能如是哉。不過責成嚴而罰賞明耳。卽月前嶺快塘搶奪之事。責成毛洞訪拏。卽時五人盡獲。所以必須先嚴保甲。而後有

綫索在手也。其鄉正團長牌長寨頭款頭署中。必有冊可稽。一遇有事。卽按冊札飭勒交。此冊置之座右。終日披閱。大約十戶則設一牌長。一寨則設團長二三人。數寨則設鄉正一二人。以此數人專主盜賊之事。卽漢書之游徼。周禮之閭師也。質之高明。當以爲然。南丹旣須嚴編保甲。小丹章爲盜賊出沒之所。均應設隘設關。派附近各寨輪流守之。烏雞寨人戶少。可嚴諭附近救援。並設關隘。調卡守之。洞里平油列辰俾吊仔三一哨樓。是何名字。必經相度。允協大坡頭九結坡喬亥。各建卡一處。派人輪守。甚善。振冷場撮箕坳爲緊要之地。應設關隘。俟斟酌盡善。訪察至密。將地圖寄來。弟卽稟請道憲。給銀督修。並代稟藩憲。均無不可。大約大憲之意。只要核實有益。并非吝錢也。營兵久成廢物。屯軍尤不可恃。臨時再斟酌。尊處練勇。至少亦須四十名。精而又精之手。日前所見十人。皆不中用。如此白費銀錢。誠不可恃。如得好手。不妨以五千六千養之。只用三十人。亦可貴精不貴多。尤以每日兩操爲定。榕江車江。尤爲苗船必由之路。望於最要。設一水關。關上或設一礮臺。以杜其入粵之路。此必不可少之計也。委員薪水。只可請公項發給。關隘工程。亦只可請捐項支銷。一絲不苟。處處綜核。各憲自必相信矣。并村之說。上憲亦深知其不可行。刪去爲妙。拏賊非賞不行。用人非錢不可。誠爲切論。然須放膽辦去。天下事只在人力作爲。到山窮水盡之時。自有路走。只要切實去辦。道憲藩憲必有耳目監察。必能無所疑慮矣。再者從住城堡起。至喬亥等處。與清江台拱丹江八寨連界者。望詳悉訪問要隘。並查堡幾處。譬如一人之身。從頂至項。旣有耳目口鼻。而咽喉爲一總。從肩至手臂。而外腎又爲一總。竊料地勢亦必如此。總有一必要之路。乞訪問繪示。盼切盼切。其毗連之處。共計屯堡有幾。所有若干人。尤須切實查明。交界之處。派人偵探。尤爲要著。切不可遲切不可少。拔貢梅蘭等。以禮羅之。必可應召。且可令其舉賢材而用之。用士較用官尤得力耳。

啓孔廉訪 咸豐三年十月十七日

敬稟者。近日專偵探改作雜貨挑子。前往雷公山附近。密探賊匪情形。迭次回稟。賊匪並不定在雷公山。其前次鎮遠會真。指定雷公山。設想似屬傳聞之說。賊之情狀。走而不守。散而不聚。總在台拱清江丹江三處爲多。或每股四五十人。或二三十人。或忽添至七八十人。開台拱之山。丙逸盜尾博。黃平之革夷逸盜九松。其尤著也。再四思揣。抗拒或可免。而竄匿則必不能免。大約用兵練會剿。則必竄於幽箐荒谷中。其在雷公山與不在雷公山。均難懸揣。卽果在雷公山矣。及官兵趕到雷公山一帶駐防。而彼又乘間逃脫於山外。雷公山吳表二三百里。人跡不到。賊匪何能久匿。而官之兵練。亦防不勝防。則其必竄於山外也無疑。設以雷公山爲標的。勞師糜餉於雷公山左右。而正盜轉在山外行劫。而不得知。豈非貽盜賊以笑柄耶。連旬思揣。實無把握大致。總以先辦保甲團練爲要。保甲團練尤以實力奉行爲要。如得賢有司各練精卒五十名。或百名。自保疆域。隨時隨地。與之剿捕。可不煩大舉而集。竊恐未能也。如委員督辦。委員至於此。而賊必逃於彼。委員追於彼。而賊又匿於此。百計思維。尙無勝算。謹將迭次偵探思議緣由。據實稟請訓示。不勝悚惶待命之至。

啓呂方伯 咸豐二年十一月初六日

敬稟者。二十八日接到鈞札。詳錄撫憲批詞。祇領之餘。倍深感悚。惟當勉竭血誠。以副靈念。成敗利鈍。非所逃觀。然盜膽雖雄。盜賊之伎倆。終不過爾爾。辦而不能料其成。不辦則能料其必敗。則不如辦矣。批語未及都勻。亦不及札飭武營字樣。查丹江八寨清平凱里都江。則皆都勻所轄。工員或可函商。武員非公牘不知遵辦。知府不能轄兵。非憲台專牘諄飭各鎮。則武弁一切呼之不出。貴州撫院有節制四鎮之專條。非他省巡撫可比。且事關防剿。又與尋常公事不同。似不必拘泥成樣。惟近日武營怯懦畏葸。習若性成。卑府原不欲輕用其人。惟恐異日認真追剿。賊匪四竄。地方文武坐視不理耳。且此輩只可防守要隘。不可望其追捕。然細思兵尙可不用。而保甲團練。則必不可

不辦。保甲團練并不多費銀錢。一府之州縣。只需委員二三人。紳士七八人。五閱月而大定。其總要隘口。追捕救援之方。均須照憲台鄉守書摘要而行之。又卑府兩辦黎平之稿。或有二三條可採。大約一府之地。用費不過三四百金。如都勻委牧令一員。加以何廷熙（平越教官）一員。佐雜三員。鎮遠委牧令一員。加以楊煦（思南教官）李雋（鎮遠教官）並佐雜一二員。思州委牧令一員。加以徐大銘（思州教官）並佐雜三員。紳士不拘隨帶行走。仍諄囑本境知府牧令。視爲切己之事。如尙屬可採。即乞酌行。或本境之官。能奉行以實力。尤爲大便。總之除盜之方。不外乎此。小辦則小效。大辦則大效。久暫精粗。無不各有其效。此一定之勢理也。至卑府帶練剿捕。如遇成股苗匪。必不患其抗。亦當不致於敗。所患者敗匪匿於幽箐中。猝發鳥槍。則隊伍或不免於死傷。然生死命也。勝敗常情也。萬無恒怯畏縮之理。所最患者。見官而逃。追之不及。或投戈而混入寨中。如狡猾異術人混於羊羣。無可別識。或畏我而竄於荒谷幽箐。官兵暫住。則伏而不出。官兵久住。則由別道逸去。守株待兔。貽笑無窮。卑府反復思揣。日夜不忘。惟此實無把握。故曰非保甲團練。使民苗協力防賊。則賊終難盡絕也。以督撫大憲之威令。輔以憲台之諄諄誥誡。至再至三。至於七八。而申警加嚴。必期於蕝事而後止。（甚至三百六旬中。日日申儆。亦無不可。）頑石朽木。當亦知悔矣。可否婉陳兩院施行。實於地方有益。

敬再稟者。緝捕盜賊之情狀。兵練少而弱。浮靡不整者。賊見之必抗。此挑練不精之過也。似尙有法可施。請勿過慮。惟捕盜與剿逆。互有難易。逆則患其抗而盜則患其匿。并患其匿耳。官無久駐之勢。盜有暫伏之技。此剿辦之所以不能得手也。前言保甲團練者。所以防竄匿。即所以輔雕剿之不及。保團可禦時零奔潰之賊。已敗已散之賊。而不能當大股方張之賊。專精雕剿。又所以救保團之所不及。二者缺一不可。細思賊勢。此卑府何能坐待保團之成。而始議動手。即使地方官保團不力。又何能推過於地方官。且黎平保團。盡心一年有餘。無日不討國人而訓之。成效尙不過四分五分六分。能自謂已精已善乎。然總勝於不辦者。總勝於徒待文告者。卑府受命

委辦。荷國士之知。恨不即時掃盡萑苻。所以再四乞辦保團者。實以保團非一手一足之所能兼。又且非其官長。則令不行而禁不止。讀請再四。豈欲以口說侈陳於上憲哉。實見賊狀必歸於竄匿耳。昔趙壯侯金城平羌。主臣辯論往返不已。卑府才識至庸。何能妄爲援引。然愚者千慮。或有一二可備採擇之處。尙祈明察。並乞節取送次稟詞。稟陳兩院。則於地方實有裨益。

致左季高

胡林翼頓首拜上。季高先生姻丈執事。前奉二函。一交張中丞專迓。一交唐蔭雲專交。七月八月。張中丞兩次專人備禮。走請先生。一阻於兵。其一計已登青覽。昨得張中丞八月二十三日喬口舟次信。言思君如飢渴中丞才智英武。肝膽血性。一時無兩。林文忠薦於宣宗皇帝。以是大用。先生最敬服林文忠。張中丞固文忠一流人物也。默計楚禍方烈。天下之禍方始。非才不濟。而大助必成於張中丞。以其開布公誠。一片至性。近年以來。官長之所少者。才略而尤少者。真性情也。林翼與雲南崔觀察。黃州徐太守。同蒙奏調。八月十三日奉旨赴楚。方冀趨附驥尾。彈血誠以酬知己。業已簡料戎衣。計日待發。且已物色壯士百人。挾之以趨。而黔中八月十四驛奏。請留言士民失望。關係匪輕。又言事關全省大局等語。奏詞過分。林翼決不能如此。然勢必留黔。慮負中丞知己之誼。東望枌榆。我心如何。崔觀察聞極有才。未曾識面。徐太守警敏異才。與林翼同辦事極相得。可見中丞之知人。且軍中尙有一奇人。江岷樵者。中丞已招而致之。必與先生志同道合矣。林翼之先人與先生之先賢交誼厚。林翼與先生風雨聯牀。澈夜談古今大政。前後十餘年。先生究心地與兵法。林翼曾薦於林文忠。文忠一見傾倒。詫爲絕世奇才。去年冬間。以大名呈薦於程制軍。而不能告之先生。固知志有不屑也。林翼之意。非欲溷公於非地。惟桑梓之禍。見之甚明。而忍而不言。非林翼所以居心。設先生屈己以救楚人。較唐荊州之出山。所補尤大。所失尤小。設程制軍聽余言而堅求。

先生楚禍何至如是之亟。區區愛國愛鄉里愚誠未蒙深察。且加誚讓。且入山從此日深。異哉先生之自爲計則得矣。須知自古聖賢仙佛英雄豪傑。無不以濟人濟物爲本。無不以損己利人爲正道。先生高則高矣。先代積累二百年。虛生此獨善之身。諒亦心所不忍出也。如以近日急功近名爲不屑。則功成不受賞。長揖歸田。盧仲連遺法。尙可遵守。況張中丞不世奇人。虛心延訪。處賓師之位。運帷幄之謀。少受脩脯。或竟不受。均足以全其清節。卽或結義勇以殺賊。而不與官吏合隊。又不經手銀錢。又何嫌焉。設楚地淪於賊。柳家莊梓木洞。其獨免乎。先生其毋遺葑菲之言。以自遺後悔。

■辦台清丹江盜匪說略 咸豐二年

台清丹江一帶盜匪。有出路兩條。一路由山脚都江古州下江丙妹之八樂堡。至靠頭入粵。一條由都勻下泗凱里巖門新城勝乘施硎口清江柳霽。至黎平之苗光平略挂治王寨茅坪徑天柱縣境入楚。上年七月。林翼於開泰縣屬之苗光。及府屬之王寨挂治茅坪。各設水卡。其時顧賦亭亦於清江柳霽南嘉堡。沿河各汛各堡。均設水卡。本年顧公卸事。清江之水卡廢。而而平之水卡如舊。擬日內函致古州。於城外設水卡二處。用杉木浮於水面作牌形。(每卡不過三十千。)城頭設一處。派武營司之用。本城兵二十名。城尾設一處。派古州廳司之用。屯軍差役二十名。凡船隻往來。均須稽察。下江之城外。亦設卡二處。文武分司。均安礮位。一交下江游擊。一交下江廳。丙妹設一處。派丙妹縣丞司之。如此節節有備。當可無虞。卽使疏漏於彼。尙可盤詰於此。其卡均在城之左右。用兵用屯軍。用差役苗民。均不遙遠。不煩多費工食。卽欲從優發給。每名日給米一升。錢二十文。儘可足用。其三脚都江古州下江丙妹。請一并札諭行之。此可防其竄粵矣。至苗光茅坪挂治平略水卡。其地無文武汛官。王寨有一汛官。兵丁不多。應請飭派委紳士。帶資財少許。獎諭地方百姓。加意嚴防。其柳霽地方。本有游擊。又有縣丞。可設二卡。文武分司。其南

嘉堡有屯軍。可設一卡。(此外凡台拱清江。有屯軍營汛。沿河通舟楫之處。請札飭通行。)清江廳有副將通判。可設二卡。施碛口有勝乘縣丞。有營汛。均相距不遠。又有鎮遠府關稅隘口。可設二卡。每處派撥二十人巡守。官發槍礮口糧。所費無多。敬請飭行。可防其竄楚。凡水卡之文武兵役。如有盤獲。照獲盜例。賞銀二十兩。由地方官審明。彙寄供詞。歸案審辦。如漫不經心。致任免脫。或經別處發覺。或由下游盤獲。審實由某卡竄出。文武兵役。應請議罰。其餘陸地要隘。敬乞速飭各處。詳悉繪圖貼說。並懇賜寄一分。俟詳爲揣度。另稟懇請訓正。再此次用練。或不須五百。亦尙未定。其委員紳士薪水。或仍照防堵章程。委員二十金。紳士八金。亦可敷衍。府道以上。各自出資。不取公項。再者。凡水卡。日以橫木浮於江面。旁安一船。凡往來船隻。令其由口內經過。須防兵役滋擾。攫人財物。最爲要著。夜以橫木斷江。尤須嚴防偷渡。又一卡需二十人。設有二三十巨盜成羣。執械順流駛下。守卡兵差。多人則浪費。少用人則勢孤。似須在城之左右。及大村寨屯軍街堡之處。設之儻河勢寬闊。用碎石障水。使歸一邊。或拋石於中流。使其淺礁。則勢必附岸而泊。賊有執械抗拒者。准其開礮。又堆積大石於高岸上。以石擲之。其舟可壞。又用大鐵鉤。繫以粗繩。使力士於岸捧之。可以鈎拽賊船。凡凱里黃平台拱勝乘清江黎平間之苗光王寨地段。又都勻古州下江丙妹。至靠頭地段。可否均飭行遵辦。

■ 剿辦革盜啓 咸豐三年

鄉紳所言良苗驚疑之議。承示速卽曉諭。只辦革夷之盜。不剿革夷之苗。足見深識。欽感之至。卑府思一捷法。已於去年十月行之。曾飭革夷及附近老寨頭。招精壯人丁充練。明知未必能戰。藉其路熟。且安其心。使不疑。已無疑之者矣。官吏早爲收束之議。以目今實數論。真盜幾及二百。了案有餘。以本心實情論。則高禾一股。兇盜未除。未散。似難止對大憲。至各處來信。總以毋貪功冒險爲詞。冒險二字。勢不能免。小心之過。則近於慧。語不云乎。不入虎穴。

焉得虎子。成敗命也。七日傷寒不發汗。未必能生。然本心實願其成。不願其敗也。貪功二字。尤爲不然。兢兢然救過不遑。何功可貪。卑府在安順。除會匪兇盜約百餘名。一字未稟。在鎮遠四月。除大盜幾二百。有案者贈予同人獲。無案者一概便宜。二次充委員。所獲三百十八名。則盡稟矣。到黎平一年餘。去盜約三百名。所可稟者。不過三四十名。若以獲盜爲梯榮之地。則前事已幾及千人矣。尙能謂之貪功乎。但卑府平日辦事褊急。時時責人。不能容物。此學問之淺也。此次尤甚。不成則負過。成則地方官吏及委員之力也。罵人則如恐不及。好處則私自得之。此非卑府之所以居心。異日萬一了案。文武委員紳士。必可擇要乞恩。本身卽加級紀錄。亦必力辭。質之鬼神。可以自信。所以然者。現任只一知府耳。怨誹甚大。卽蒙保全。已屬萬幸。且使兩院中心賞鑑。如知其尙有良心。則異日在官。何時何地。不可保薦。不須藉此爲梯榮之計也。革夷現存之苗。老弱不堪。貧苦尤甚。在外者則高禾九松。蕩垢及台拱之老薄也。唐一股也。畢竟好人尙多。惜保團不力不實。官與民不相親。以致如此。然保團之事。言之易而行之難。行之非難。而實行者之難也。此股積猾兇狡。殺人多矣。營兵屯軍當之卽敗。一日之中。可於深山密箐中。驀越百里。多防則經費甚大。不防則出入無時。變幻至巧。倏忽萬狀。三府六七廳之地。尾追而勢不及。且戰且走。分練而力不敷。愈分愈弱。卑府之力。實亦止此。若加調各處之兵。練屯軍。則請領者每廳一千二千金。計又不下五六廳矣。然而當之則靡。徒費盜兵而張寇志耳。若一概節抑。不准多用兵練。地方官又安坐不出。置若罔聞。此所以經費日煩。成效無覩。卑府之才。無可如何。不得已假公牘以申傲之。詞彌嚴而怨彌深矣。愚昧之誠。不敢自隱。敬乞便中。婉稟兩院。嚴札各屬。同心協力。日夜哨探窮追。并函致各委員及地方官。激勵兵練民苗。務期掃除羣盜。以靖地方。以答蕙念。

致台拱廳周一則

得示敬悉。凡地方防堵遇賊。及哨探遇賊。此地方官及弟等應有之事。遇賊而傷我人。正見吾輩用力之專。用人

之當。不敢不認真之實意。何嫌之有。惟四路放探。遇賊極力一戰。期於斬獲。此正辦也。不可因苗練受傷。練勇受傷。稍稍挫折。便爲灰心。且此股賊匪。非偵探不能得其蹤跡。非重賞偵探之人。不能得其實在之處。非舍命決戰。不能攻破其黨。非約會各處。不能免其竄走。吾兄信來。深恨斬噶江傷尊處苗練之事。然此事足見吾兄認真。彼不管事者。方且置之不理。若無事然。則不可問也。尊處偵探得有確信。必卽飛寄。以便調委員前來堵拿。尊處所獲之盜。前後所解。弟均復詢。供情確切。弟已密稟。一併解省。其中有實在市登烏交姑傷馬衛正案者。尤必須解省。惜正兇未獲耳。弟不敢藏人善。尤不敢攘人功。此心惟兄或可鑒之。所有此次再寄盜單一紙。除前次面交一分外。此單係合唐賴市登及各大案。而總開之數。有已獲者。有未獲者。有前已開單者。有此次始行究出者。應請緝拿。至高禾等一股。非多放眼目。報之練勇。極力一戰。必不能剿。此股最狡最兇。非尋常差役所能捕獲。昨十五日黃平何土司承基。帶黃平練及弟練。遇賊於清平長拔之小衝內對山。黃平先奔。弟練二十八人。因路徑未熟。致傷練一人。長夫二人。然弟終不敢因此灰心。勝負固軍家之常。況互有斬傷乎。總要同心同力。期於殄滅此賊而已。聞尊處另緝有人。可請就近解凱里。兄處之犯。自無妄拿。必有真供。弟處支應局發審局。均調來凱里。再者高禾九松等一股。總在丹江清平台拱黃平之地。求兄嚴飭探報。如得實信。飛速示之。弟與兄辦事如一家一身。至人嘖嘖言兄者甚多。即各大憲亦有大不放心。密諭弟與兄同舟共濟。只求實心實力。保衛地方。大憲亦必蒙照察也。此復。又弟處四面放探。專意高禾九松一股。并乞兄處專選精幹人役。探報確蹤。每次探實。無論弟之練勇。有無勝敗。有無斬獲。只要實在。指引弟處練勇。及兄處練勇。與賊相鬥。實係九松等一股。即便賞報口銀四十兩。決不失言。至另單所開人數。亦請密緝。至感至感。武昌之事。人所共憤。荊州尙無事。聞黃州九江危耳。

再啓者。人言嘖嘖。謗騰於上。歸於兄。有謂諱盜尤甚者。有謂諉過於人者。有謂自大自尊。不准人進言者。有謂有盜不拿。又不准人拿者。有謂妄用盜匪爲練者。弟覆訊尊處。已獲之盜。僅有正盜。且有傷馬衛案內之真犯。至於自

大自尊一節。則本是太守。並非謬妄。可見人言亦不可盡信也。台拱之盜本多。平時瘠苦。賞不應手。或難如期弋獲。此次弟處支應賞犒。按罪名輕重給發。地方自更鼓舞。兄亦可以策勵承緝之人矣。來示因尊處斬噶江望坪二處之通事張鵬騰。防範不嚴。被賊竄入。以致重煩責懲。足見認真之實。且可見尊處苗民尙肯爲官出力。急須卹之賞之。切莫遏其向往之機。至九松九斤一股。本極兇悍。乞嚴飭所屬。多放眼綫。遇賊報知尊處。并弟處。帶練窮追協剿。方能破散其黨。兄日前來示言。時而台拱之斬噶江望坪。時而黃平之黎樹坳卡榜。時而清平之螃蟹寨火燒凱棠。凱少等寨。誠如尊示流徙無定。以弟訪之。窮追遠搜。則又時而清江八寨丹江也。弟立志必要破除此賊。無論上憲恩威。不敢相負。不忍相負。即使財力果竭。弟一人典貨衣履。亦當聊補賞需。惟弟練有限。能督之使戰。必不能再分。之使探。所以望仁兄加意探報。立重賞以偵之。庶幾可以一遇耳。至弟處委員練勇之成敗利鈍。均是弟一人之事。不拘何處遇賊。成則必實敘地方指引之功。敗則一人任其咎。決不諉過於人。如此明白直剖心腸。諒仁兄必已垂鑒其愚忱矣。至斬噶江窩戶。并所寄盜匪名單。必望設法速緝。弟欽佩仁兄之才。無所不可。所望一掃羣盜。以保疆域。以間羣言。弟非風雲雷雨之人。亦非傾害同類之人。惟要保全地方。使真正盜犯。一概盡淨。方肯歇手。至尊處所已獲者。弟必擇要先行解省。其已在鎮遠監斃者。亦必錄供上稟。斷不肯負兄出力之真。其必先將尊處獲犯解省者。亦以人言繁興。勢不可遏也。區區愚忱。亦可以質之我兄矣。時勢日艱。保全一處。是一處之福。保全一省。是一省之福。我朝深仁厚澤。諒此粵逆。總可即日蕩平。且屠滅良民。如此慘酷。天理必難容也。荊州無恙。安徽可危。惟我黔省。必應早爲了辦。不及此時大憲肯辦之時。努力爲之。則此後地方官吏。永無安枕之日也。

致辰沅永靖道翟（誥）咸豐三年

承示。昨奉貴院訪聞黎平一帶土匪滋事等因。並審巡歷所部。順道靖州會同一帶。親督查察。足見忠藎勤勞。至

極有加。查黎平一府。昔年多盜。公祖防堵粵匪。久駐邊地。早已洞悉其情。林翼於二年到任後。力行保甲團練。添設卡房三百餘處。添建碉堡五十餘處。一年以來。經地方紳民捕獲內外盜匪三百餘名。實已靜謐。沿邊梟示之匪徒。昭然在人耳目。一切詳細。靖州鄒愚亭先生均已深知。上年十一月卸事後。另委剿捕他府之盜。其四鄉巡緝防堵事宜。仍札飭舊用之紳士專管。仍由總局紳士給賞。每月三次彙報。安靖如初。若有匪徒滋事。官吏縱肯諱飾。紳民必不甘心。緣設立總局以來。一切保團碉堡經費。出之於民。該處痛恨昔年之盜。自願出力。故不甚董勸。而踴躍同心也。貴屬芷江王令黔陽張令。故因捕務罷軟。名登白簡。欲求諉卸。無詞可措。或者以昔年之黎平情形。影射搪塞。致有此詞。重煩蕙念。不然。鄒愚亭吳遠生。均係靖州會同之長官。與黎平相隔咫尺。誠如來論。地方官無並一字之及。可見前言之不實。芷江黔陽與鎮遠屬之天柱縣毗連。靖州會同通道。與黎平屬之開泰縣毗連。譬如風馬牛。然開泰之盜。三十年元年二年迭次剿捕。均已肅清。足慰注念。至林翼上年奉委。係因楚粵寄居黔地之匪徒。勾煽頑苗。聚積於烏沙雷公山老林深處。經地方官密訪稟聞。又蒙大憲先期籌辦。捐畫嚴明。除迭次圍剿陣斬外。實已捕獲二百五十餘名。刻下殘賊逋逃。實不過數人。查烏沙爲清江台拱八寨丹江都江古州交界之地。萬山叢錯。八面甌脫。雷公山爲丹江台拱交界之地。綿亙數百里。林箐幽深。係都鎮二府疆內。均與楚地相隔甚遠。未舉之先。林翼先將竄粵竄楚之路。四面設防。層層布置。然後身領精練。窺入其阻。復經地方官四面協剿。所獲極多。實係地方官吏及紳民之功。并非林翼之力。荷蒙垂詢。故敢直陳梗概。敬乞察核。林翼家是楚民。身爲黔吏。愛楚之切。甚於愛黔。不敢有所偏私。定蒙垂鑒。縷縷奉復。即請台安。

緝捕羣盜啓 咸豐三年三月十六日

下游之盜。以烏沙爲最多。以革夷台拱爲最狡。然兩處之盜。結會燒香。已歷數次。其盜魁則龍老冒也。上年奉命

之始。誠不知從何處下手。姑卽古州清江台拱八寨丹江都江交界之處。先到烏沙剿捕。至今思之。先後次序。尙爲合宜。烏沙人多而心渙。一經震駭。故得盜最多。上年六七月。鎮郡緝台拱黃平之盜。該盜等卽由雷公山竄入烏沙。牛坐條坐家中賭錢數日。此次剿捕黃台之匪。而烏沙之巢已破。烏沙之盜已得多人。故不能復行勾結。卑府始意亦未必見及於此。近乃知其無心暗合。亦僥倖之一端也。高禾九松一股。上年勾結烏沙台拱羣盜。多則七八十人。或五六十人。始終不散。十二月杪。派韓張委員帶練來捕。本年正月十三日。卑府駐凱里。十四日聞清平地方失事。民未報而官亦不聞。十五日張委員之練三十人。巡哨於長坡。遇賊力戰一次。陣亡練勇長夫。賊於十五日之夜。過丹江尖山。卽夜折回台拱地界。又在台拱斬噶江。遇台拱苗民。打仗一次。傷苗練三名。在台拱雞箠。砍斃黃平探卒一名。至二十九日。復由尖山竄入丹江。是夜撲尖山之卡。弁兵聞賊。奮數先逃矣。二月初三日。黎練打仗一次。初五日賊竄大竹圍。適烏沙留緝之練。迎來截擊。又大戰一次。自辰至申。斬殺頗多。陣亡五練。傷八練。初九日黎練圍賊於丹江山中。大霧未經得手。初十日以後。只贖二十餘賊。其殺死耶。其分竄耶。不可盡知。亦不敢啓軍營捏報斬獲之弊。故凡言殺賊無據實者。未使草率稟聞。從初十日至本月十五日。絕無一仗。百計訪探。不見賊蹤。是民與盜相習。官與民相隔之弊。憲諭所謂必須從保甲下手。方能有實濟也。合而計之。台拱烏沙黃平羣盜。卑府合一百餘盜之供。并爲一單。開具年貌。其必應緝拿者。尙有三四十八人。如丟坐卽條坐蕩往絞。今往絞。備生九勇。降勇高禾九江。老令蕩垢禮醒。河備擗牛等人是也。至鎮遠思州天柱之間。尙有零匪。又不在此數內。固不得其端倪。無從動手。卑府於緝捕之事。自幼未曾學問。到黔以後。適當其厄。實慚無以上慰蓋念。謹此稟聞。

陳辦匪情形並乞奏請獎勵官紳啓

奉到二十九日鈞諭。敬承垂問。卑府於初一日回撫。因黃平舊州之事。牽綴未定。遲疑未決。裁撤之議。尙須稍緩。

各屬兵練均已酌裁酌留。惟黎練三百尙留。僅裁長夫一項。刻下仍派人密捕丹台黃清四處。三百之說。實發既屬難行。虛糜又恐可惜。應不煩憲注。卑府迭次移會各處。緝拿逸盜。除高禾九松丟坐等犯。另備賞格外。其餘各盜年貌姓名。均移知各處一體訪拿。釋濼之日。按前定五十兩三十兩十五兩賞格。分別給賞。則各屬亦不得以緝捕無費爲辭矣。所患者。卑府之才力有限。各屬日久生懈。則公牘信件。不能加意嚴詞。至已獲各犯。業已三次開單稟報。其有案可歸者。應請飭審局彙辦。早爲清結。其無案可歸者。卑府之愚。若盡作粵楚之匪。恐境外之人。得以有詞。若以盜犯懲辦。誠如鈞諭。窒礙甚多。可否卽以楚粵寄居黔地匪徒。勾煽頑苗。於丹江都江八寨台拱清江古州廳交界之烏沙雷公山兩處老林中。聚積二百餘人。經地方官密訪稟聞。又蒙大憲先期密札。飭令於正月十五二月初三初五初十等日。帶領練勇。會同地方官四面圍剿。除陣斬外。並擒獲二百餘名。內有某案逸盜若干名。其餘煽惑起事之某等。希圖糾衆竄赴粵楚。均已分別提省。并委貴東道就近正法。除總委辦委員胡林翼。職分較大。僅止調撥。不敢仰懇議敘外。所有在事之印委文武各員。并紳士。卽可附片。請以獎勵。地方官應得處分。請免置議。仍責飭訪緝逸犯云云。如此措詞。似較直捷。亦不致有干部議。卑府昔年所殺之匪多矣。因已往不可追咎。只可疏節闔目。專以除害爲主。并無計功近名之心。此次爲委員紳士起見。不能不設法一報。至稟稿俟請省中定議。再爲補呈。現在黃平糧事尙未定局。黎平新有淘金之人。多倅來信。尙未驅除淨盡。又風聞下江有零星粵匪。俟探的如未平靖。再行赴省。面請訓示。多倅署任。已結部駁。吳鼎臣是丞倅中極可用之才。特恐缺苦事繁。亦不願往耳。儻近月以來。逸盜盡得。則飭回本任。仍是熟手。天下多故。何處是安樂之境。思不出位。古有明訓。廉頗妙手。思用趙人。是爲真摯。

至黃平舊州啓孔廉訪（慶餽）咸豐三年

十五日在鎮遠起程。十六抵黃平舊州。黎練只二百人。添帶鎮練百人。加以黃平練百餘人。黃平營兵百人。均於

十六日齊至。十七日早起。傳各城舉貢生監。逐一開諭。該紳士等默無一詞。惟言月前匪徒聚集二萬。與之爭辨。必至房屋家產。均被毀敗。不勢由己。無可如何。卽時剴切嚴諭。責成網獻。雖唯唯聽命。非出真情。旋有報離城十餘里。聚匪數千者。又報離城五里牛市坡。有匪千餘。又報城外對河有匪。卑府與周牧再四細商。查閱道途。應分兵兩路。而匪多練少。道路分歧。恐兵勢太分。轉嫌單弱。卑府卽帶黎練前行。周牧亦帶練同行。柴千總帶兵在後。至城外五里爺。遙見兩面山坡。人勢甚衆。約分三大起。頭起在去路之前。約二千人。二起在去路之左。約千餘人。三起在對河之右。約不滿千人。鳴鑼鼓噪。遙遙吶喊。卑府行至距頭起二里許。擇一空地紮住。該匪放槍礮三聲。卑府心知其怯。不忍痛殺。令紳士前進開導。無應命者。令家人王順尹升及韓委員家人孫成。棄矛前進。詳悉開導。並令以家丁二人作押。令伊處二人前來。面申一切。而家丁空回。該處之民。畏不肯來。卑府復進一里許。黃平之練。已有躍躍欲試。先開槍礮者。卑府明知愚民無知。被匪徒脅刦而來。不忍殺戮。以身擋住槍隊。復持牌諭遣人前去。該匪等不近亦不散。寬容一時之久。該匪竟敢拾石擲來。持矛鼓噪。跳擲前進。彼恃人衆。以爲官必畏怯先遁。卑府明知烏合之衆。心必不一。不得已親率黎練前進。甫一交綏。彼盡駭走。僅殺四人。卽擲石放槍之人也。餘人敗不相救。卑府姑息之愛。不忍多殺。且威已立矣。何容多殺。未滿半刻。當卽收兵回行。而柴千總後隊之人。飛報言數百人堵截後路。卑府飭令不准動手。行二里許。聞槍礮聲頗繁。猶疑後隊營兵放槍。遣人查詢。並面詢周牧柴千總。均言實係該匪等抄尾放槍。因隔住山坡。彼尙不知頭起迎敵者已潰敗。故欲攔住歸路。當令黎練殺去。陣斬二十餘級。生擒四名。餘匪紛紛竄去。因恐黎練窮追不止。鳴號追還。而隔河之第三起。亦不能鼓噪。漸已引退矣。因時已暮。整旅回城。效首已畢。生擒者交周牧詳訊另辦。卑府明知鄉愚無知。若非聚集日久。張貼狂悖之詞。必不忍前來剿辦。若使該匪聞卑府前來。先已潰散。卑府不必督飭周牧。從緩緝拿。不忍開仗。若使臨時肯以一二人投戈申訴。亦必准其改悔。無如相逼而來。不得不稍示以威力。然兩次開仗。均不滿半刻。申令收兵。因彼已奔潰。不欲多殺。是振威之中。仍不能

不仰體大憲好生之德。但不審該民喻此恩意否。總之軍威不振。良民亦變爲驕子。何況亂民。區區以殺止殺之心。非得已也。該匪目中無官。擅殺人並毀房屋。斂錢肥己。固其罪之最著者矣。看今情形。威力已振。雖非本心所樂爲。而事必易了。容再續稟。本日卑府之人。無所傷損。惟新僱礮夫。聞礮聲而畏怯。避入山中。適官練發礮。誤傷腸出。亦由自取。至鎮遠之兵。切求不必調動。威聲已樹。只宜開導匪徒。或未必竄入甕安。亦求不必調兵。若言緊急。只求飭地方官函知卑府。自當應援。不動大兵。可以外結。公事好辦。其成敗利鈍。猶其顯焉者矣。

自烏沙移駐凱里啓呂方伯孔廉訪 咸豐三年

敬稟者。正月初八日。由古州差遞去臘十九日鈞帖。敬悉所訓黔中遇事造謠。總是長盜賊威風。倒自己志氣耳。鈞諭人心浮動。誠切中時勢之論。卽如卑府進逼烏沙。乃深以不見賊爲恨。而外間傳說。則竟至不可言狀。民之訛言。慘莫之懲。其奈之何。又如卑府在黎議辦之始。各屬來信。有言某處殺牛聚集者。有言某處把守關隘。與官作敵者。其進言者。皆鄰近地方大官也。卑府愚見。卽使果如所言。亦不能有所退怯。及至烏沙。竟成烏有。彼進言者。方且啞然自失矣。夫賊固不可輕視。然亦何至不能懲辦。蓋盜之羣起也。其情狀如蠶。一蠶起而百蠶隨之。不及時挫遏。其勢則無知愚民。皆變爲盜。盜之遇兵練也。其情形如犬。人畏犬而竄。則犬亦奔之。人止則犬止。人進則犬退。大抵小小抵抗。是盜賊常情。設有意外則命也。惟有加之謹慎。時時提撕警覺而已。烏沙界連丹江台拱清江古州八寨。向爲甌脫之地。俗名四不管。是以釀成盜藪。在黎平古州。與郎丞再四密約。如下烏沙之盜。四月不淨。必當稟揭。至今仍日日頻催。而上烏沙古州坳及附近烏沙各寨。均當責成清江台拱丹江等處。實心遵辦者。不可多得。卑府之志。不敢市恩。亦不避怨。惟求於公事有濟而已。年內烏沙附近之盜。經各地方上緊緝拿。已獲百名以外。而匿者尙屬不少。卑府之練教訓已久。三次遇賊。均不退怯。雖斬殺不多。均無挫敗。亦足稍寒賊膽矣。尤喜古州下烏沙之牛

坐九坐巨盜已獲。如清江等處。再加搜捕。終始不懈。則烏沙羣盜。可期肅清。刻下張委員韓委員分赴丹江之毛坪台拱之台盤。卑府定於初十日親駐凱里。

與友人論黃平事 咸豐三年

民不怨官而怨書斗。會聞此言。及身歷其間。沈思密訪。竟不盡然。周牧爲人盡心民事。愛氏甚切。到任以來。所費公私銀錢。均非民間之物。此非好利之人。尤非偏護書斗之人。若以早年情形而論。書斗誠爲可殺。若以周牧到兩年而論。官尙未曾征收分釐。書斗房屋身家蕩然無存。從何作弊。此卽叛臣清君側爲名之故智。須知君側除。而叛臣之叛。仍如故也。且此次並非真鬧糧。匪徒本無糧。欲脅糧戶以聚衆。成事之後。彼之魚肉花戶。欺壓良民。必更甚於盜賊。其弊豈止於書差哉。卽如日前彭姓。糧只數斗。該匪在秦卡寺。遣人傳說。卽日碾米十石送去。畏其兇暴。不敢不從。該民密同紳士言。每年交官不滿一石。該匪已索我十石。此後該匪又索。何以應之。又按戶派錢。勒人出銀。是何道耶。又該匪沈人於河。置人於死。遠年近年一切莫須有之竊案。憑空誣人。詐辦勒贖。此豈爲糧事乎。豈爲糧太重乎。又藍靛下通吳楚黃平之利。盡在此中。其利倍於穀。其功亦倍於穀。視上游之種鴛粟者。邪正迥殊。此又何關糧事乎。莠民出示拔之。是何從乎。卑府到時。紳士畏縮不前。其所以不前者。半是自知負罪情怯耳。十七日之事。卑府極不願。再四以身攔槍手。遣人前去。其狂悖之狀。狂悖之詞。卑府亦不忍書之於手。所以不書者。卑府非要軍功討好。不過期於地方大局可了而已。再者各處來書。其意不過欲人盡如甕安耳。如甕安何害於我。如甕安亦何害於周牧。特一甕安起。而效甕安者多。一舊州起。而效舊州者將及通省。且率天下而甕安。不僅無此政體。勢必至官危而民更危。舊州之人。其造意非甕安之比。其人勢亦非甕安之比。捏造狂詞。以駭鄉愚。種種不法。何能形之筆牘。且又置此一二萬鄉愚於何地乎。示威以散之。撰要而懲之。此不得已之苦心也。刻下糧已大減。書差每年可得

二千金者。今僅二百金矣。昔年官之費用。及正雜解款。均因限期催迫。由書墊出。糧書豈是富戶。加五加四。貸之於人。卽不能不取償於民。有書吏已收。而因私累妄費者。有窮民久欠。官勒書吏賠墊者。有官富紳乘書比限緊急。不交糧而放債。以利準折者。書吏無力可賠。自不免向良懦小戶多索。而富戶與刁民。轉得自便其私。此近五六年書斗之積習。亦黃平之實情也。吏胥多半是不肖之人。其害旣已在民。而吏亦並不能爲利。今周牧定爲自封投櫃。則書斗無權。然官之緩急。官之期限。不能再責成於書吏。必士民各矢天良。早爲完納。尙可不致虧欠。我朝賦稅最輕。黔省輕而又輕。必以古人催科政拙爲美談。沾名干譽。自爲計則得矣。質以古人作貢治賦之正理。竊恐亦未盡當。總之莠民因粵逆猖獗。而欺官欺民。以無糧之人。脅有糧之戶。卽使盡數奏請豁免。其鼓譟抗違如故。其滋事擾民如故。其狂悖不法。必更如故。棒頭有孝子。法在則知恩。非虛語矣。今日具結回家者。已數百寨。不日卽可了結一切。此番不殺。其氣方驕。此番不殺。後更多殺。區區愚忱。敢布腹心。再者化大爲小。化有爲無。此誠官場之切密金鍼。然行之於道光初年。尙爲有益。蓋今日之風俗人心。已非昔比。愈退怯則民氣愈驕。愈消化而癰毒愈大。當可之謂時。不可一例而論。特不可稍涉張大。且本心不可以有事爲榮耳。再者未到之先。周牧已減徵。而仍抗違如故。蓋刁民之氣。燄方張。必欲盡如所言。則世間不必設官。然使定不准減。則是官與民爭利。非士大夫之行也。吾輩又何須作官。除官之秤餘。酌量裁減外。又釐剔書吏二千金。僅存交金。可謂厚於民而薄於官吏矣。有恩無威。勢不可遏。有威無恩。後難持久。所患者官事日煩。缺分日瘠。不能養育良吏。而不肖者轉得側身其間。非地方百姓之福也。再者鄉市耆民。來城面訴。言此次若不整頓。則該匪等魚肉無窮。日前勒派勒罰。已不堪命。若使得志。又將日日苛派斂辦矣。此言頗誠。附以及之。再者十七日抄尾之人。內有頓姓文生一名。持械圍官。被黎練殺斃。此人二月尙在書院應課。周牧窘迫萬狀。本年於書院中捐信膏火銀。用四百城。其意亦不過欲養士安民耳。而孰料人之無良。竟至於此。其家不敢言。亦不敢認。可以警戒一切矣。

陳明黃平事竣並釐定糧章啓

奉到二十一日鈞帖。並恭讀院憲轉諭。敬承所謂。舊州之案。莠民倡始。鄉愚被其脅從。其倡亂之言。非說僞太平王登基改元。卽說某省某處亦反。若非懼以軍威。後患誠不可言。十七日親領黎練爲前行。先用火箭三輪射之。不動。用大鳥機轟之。且却且退。用刀矛猛力前進。始駭退。如鳥獸散。卑府親督其間。見其一敗永不回頭。且有奪路擠同類於水中者。敗不相救。烏合之衆。大抵類是。是真敗。非詐敗也。因一念不多殺之心。孰知是天誘其衷。保全後隊乎。設一味高興。再窮追三五里。則後路抄尾一股。勢不相及。必致另有圍困情事。彼方漸漸逼緊。先以槍礮嘗試而來。視官軍退怯否。不料卑府已旋軍先至。取小徑馳馬赴之。分股用短兵殺去。所殺已屬不少。餘人駭潰。如驚燕飄零。如秋風振籜。使必欲取快一時。縱兵多殺。將又貽百年之憂矣。此事若多調營兵。無親練諫死之士。恐不免如去年浙江孫梧桐之前鑒。若含忍退怯。以消化爲心。則處處效尤。必致接應不暇。今年楚北東征西討。爲日不足。非明驗乎。聲威不可不立。而不可無恩威兼濟之心。首要不可不誅。而不可無脅從罔治之心。愚昧之見。尙乞鑒納。前任黃梅知縣金崇城。係己丑進士。並各鄉士民等。逐日來城具結乞恩。遵奉約束。兼爲之釐定糧事。並禁革私派私刑私罰等事。該士民已有將要犯網獻來城者。大勢安定。斷無他虞。卑府之所以兼及糧事者。徐石民升牧。在任三年。迭次滋事。亦頗有裁減。而書吏例外浮收之流弊。究未能逐一清釐。致若輩得所藉口。以惑鄉愚。不除此弊。藉口之禍根未止也。且官長須高自位置。必以多寡計較。臨民亦未免先處下牀。故卽周牧預先允減之意。而斟酌之。損官者不滿千金。損書吏者。則二千金三千金矣。而又明予書吏二百金。又明予各項人等雜費二百金。則一切有定制。有定限。昔年影射需索流弊。一舉而空。使異日官長。以謹慎無嗜好者。爲之辦公。儘可應手。不致藉口貧苦。廢攔公事。日昨節抄與友人論黃平事由各書。度呈鈞鑒。

致黎平府多 三年

得手書。具悉一切。下江劉容夫稟稿。已閱悉。惟逸犯名單粗率。不能細密。如元年楊星垣初辦蔭音塘案。以浮游不實之誣供上稟。遂破黎平天柱良懦數十百家。弟七月到任。八月得楊浪子。始審實真供。亦已晚矣。是可戒也。此皆問案不細心之弊。所以弟意嚴切囑之爲禱。至所示劉容夫之爲人。弟亦素所深知。然此案不獲真實盜犯。則空言何補。開泰大信之事。如實係互爭起釁。亦須根究實情。竊恐有假託消化之弊。不可不嚴爲查察。平秋金廠。可救黎平之窮。前書欲封禁。似不得其要。鄙意不如以本境之人。開本境之廠。惟不准外人參雜其中。致生事端。況本境之人。亦須造冊稽查。則後患易弭。廠旺則有益於民。廠竭亦不致爲亂。粵西因官員家丁取煙土而不給錢。且酷虐貪詐。致有傷官之事。此種貪污之徒。實屬可恨。我輩宜嚴馭屬吏委員。毋蹈粵西之覆轍。鄉間須親去。如萬萬不能分身。則遣委員。不如遣紳士之爲妥也。至黎平紳士淳厚者最多。其紳士之邪正。曾經密及。定可曉然。用紳士總在平日接見時。專心致志。詳爲談論。談究一切。察其爲人如何。用其所長。棄其所短。有佳士即當告以大義。若有邪心者。即當面折其非。承示派人輪流巡守。思患預防。極是近日地方之要著。天下多故。誠不可一日鬆勁。養練一層。若不操練。與無練同。招練而不挑選至精。亦與無練同。精練不必過百人。足以禦侮矣。縱未能一可當五。一可當十。總須力兼二三人。方爲有用。尤不宜用城市之人。讀感南塘書。自能領悟。首府信已悉。此後如拿獲要犯。最要者稟臬憲。其供情如果確切。自己信得心過。則不必解省。總以辦事爲主。毋以稟牘爲先。若一稟公局。則有許多推諉。許多疑慮也。弟因黃平舊州聚衆滋事。於十六日帶切至舊州。當傳各紳士反復開導。無如該匪始終抗拒。不得不稍示以威。現在均已畏服。進城具結乞恩者。已有數百餘寨。其事即可了結。俟事竣後。仍當回澗。籌辦緝捕事宜。奉旨籌捐黎平一府。去年古州一萬餘。下江二千餘。永從未報確數。弟尙不知也。黎平開泰五萬餘。通計亦已七萬矣。除古

州已收已報外。黎平開泰已捐銀錢米穀收至二萬有餘。民心不爲不厚。民力未免可於此時只須催捐繳省。不可再爲寫捐。貴州十二府一州三直隸廳。惟黎平人心最厚。亦惟黎平最窮。

請孔廉訪親臨饗安啓

初四日奉稟。交平越專差。初六日丑刻。由平越專馬。復將初五日打仗情形。縷細稟報。未知平越地界。不致阻截否。初五日未殺賊之先。四面鑼聲不絕。開仗之後。後路之鑼聲尤殷。初六日早起。查詢後路距營十里許之大橋。已於初五日未戰之先折毀。該處河水頗深。無舟可渡。此匪黨欲三面乘我。一面斷官軍歸路也。又營中遣差運食物。送文書者。一概網奪。以致城中與營地文報不通。而城中婦孺號泣。遷徙漸空矣。初六日卑府拔營。由小路翻山回城。城中尙驚訝狂駭。及見前旌。士民乃敢來見。且始知有殺賊之事。人心恇怯。本屬恆情。然細核此地情形。四鄉匪徒。幾於到處盪起。不止干溪一股。亦非僅殺四十人所能辦畢。且湄潭之告急文書。昨已兩至矣。卑府隨身練勇。只有此數。初五日之事。幸未稍挫耳。匪黨網差役。并阻截來往行人。必詢練勇多寡。詳探虛實。邱貢生一枝尙未見到。先是邱貢生到荔波。該處紳士不肯發餉。卑府有銀三百。借給魏令。魏令付邱生。始行招練。是以遲耳。兵事不可狂小勝而忽大局。謹將可慮之處。逐一陳明。伏乞鑒察。速賜核奪。匪徒之多。幾於遍地盪起。誅不勝誅。則宜剿撫兩施。然不剿則脅從不散。剿則首從同誅。不暇分別。可商者一。撫則不致多殺。脅從可以無恐。而首惡未必卽來。來一二入而縱之。則後來者不疑。縱而復來。則又縱而又擒之。始可多得。可商者二。文武生監之未革者。頗有渠魁。不能不用重典。卑府權輕職小。恐日後謠詠紛乘。無以自白。黃平臨陣殺一文生。而流言必謂其從書房捉去。何多口之可憎乎。可商者三。首惡之就撫者。免罪未必革心。計斬未必盡得。失信於民。更無論矣。何去何從。可商者四。初五日匪分三路而來。我兵先顧一路。而後及他路。畢竟未能遠追也。來往紛紛。接應不暇。此非用兵之正道。以人少不能分

顧姑救一時耳。萬一日後情見勢絀。所患方大。可商者五。平越營兵孱弱不堪。省中營兵驚怯尤甚。不得已姑調平越百五十名。以作聲援。然必不可任戰。卑府人微言輕。本無馭將之權。亦非馭將之才。兵弁有罪。未能輕行其法。可商者六。湄潭已蕩差聚集。告急者屢矣。距此四日之程。急切不能兼顧。可商者七。湄尚因糧。甕安侮官擾民。法當分別。可商者八。匪徒又言。胡某豈能久於此地。去後另作計較。此次不妥。後患方大。狂悖不情。藐官尤甚。卑府固不在目中。可商者九。以身督戰。又患餉絀。又慮力單。兼籌一切。早夜未遑。誠恐思慮未到。顧小失大。顧此遺彼。貽誤方大。至應恩應威之略。或操或縱之機。非得大憲坐鎮。逐一稟承。則事機必難順手。可商者十。卑府之愚。必乞大憲挑帶材官數名。隨護駐節。甕安籌度指揮。不必帶兵。萬一須兵。添調黃安鎮遠附近各營亦便。庶卑府隨時隨事。得所稟咨。且聲威隱重。事必速了。不過三旬。甕事大定。緣大憲按臨。則地方聳動。匪膽愈小。軍氣愈揚。投之所向。無不如志。否則卑府征於東而西已驚。征於鄉而城又駭矣。至督戰之事。卑府一身任之。萬不致有絲毫推諉。絲毫退縮之情。惟求大人坐鎮籌度。發縱指使。則受恩多矣。臨稟不勝翹企之至。瞻仰之至。

續請孔廉訪親臨甕安啓

初四初六初七日均已稟除一切。囑平越州專呈。兼囑繞道行走。緣此間文報不通。已經三日。恐被匪黨四路阻截也。徐令與杜教官不合之處。甚是小事。只候大憲按臨。嚴飭勒傳。滋事生員。該教官豈能脫身事外耶。且文武生員。有身家妻子之累。不能久匿山谷。勒傳必到。該教官平事有教訓之責。此時豈能安坐不理。此事甚不足難。所難者匪黨遍地皆是。卑府之意。以解散為主。以從緩緝拿首犯爲要。徐令言首犯固結。必不可得。且以爲此地必爲粵匪之續。堅持一掃光之法。欲逐棄焚剿。卑府告以焚剿之餘。民無生業。勢必激成流寇。且兵練所到。首犯先逃。所殺者只老弱良懦婦女耳。斷不可爲。且焚剿一二處。而四鄉之亂民。必致倡惑要結。徒堅其作亂之心。於大局必不可

支。徐令言黨羽既盡。則首惡卽逃出。亦不能反。卑府之意。覺無此糜爛辦法也。徐令言誘民固終。誘拿必不肯來。差緝又不能下鄉。卽坐守一二月。兵退之後。仍復思逞。只有備辦殉難二字而已。卑府之意。此時本無必得首犯把握。然盡剿多殺之說。期期不敢奉詔。緣此時首犯與脅從。心志尙未齊一。若多爲剿殺。是速之使一也。總之徐令言疾惡如仇。專意主剿。欲以身殉。殊不知此時國計兵力。實有不能如願之苦衷。該員秉心剛正。本所欽羨。然度德量力。揣時審勢。必不可爲。敬乞大人俯賜按臨。庶事有稟承。可以遏此亂萌。至初五日以前。卑府極力開導。所以寬宥之者。不遺餘力。乃至初五日。匪黨愈聚愈多。漸逼漸近。且先期二。三時。仍遣人再四開導。且予以投誠赦宥之牌。該匪竟將牌砍毀。三面撲我。一面斷後。不得已殺四十一人。其劉瞎么一犯。尙是先日所得。可見臨陣所殺。不能分別首從。只於執械抗官者。卽爲可殺耳。該匪是日傳齊之人。不可殫紀。四山阻截。三面乘我。且於遍地要隘。聚石爲關。屯人防守。又要殺軍中遣回之人。至於支解二名。并斷軍糧。徐令之怒因此。而其前此之積怒。更可知矣。殺亦無傷。只於時於勢。大不可耳。卑府神志有限。才思有限。力量有限。必乞大人俯念事關緊要。儻其寬嚴失當。必致禍患頓起。卽望親臨督辦。臨稟瞻望。日夜引領。

■ 陳辦榔匪情形啓四則 咸豐三年

此間自初五日三次開仗。斬殺四十二人以後。四鄉脅從。漸次解散。所獲者僅止劉大天王一人。尙是勒交之犯。非陣斬所得也。惟首惡未得。擬明日下鄉偵緝圍剿。未知能否得手。先是初四初五文書之差。運糧之役。均被該匪等（王四老洸等）中途遣人要截網殺。大約十名以內。并有支解之人。兼有祭礮之說。此均是未開仗以前之事。刻下官與民相隔。城與鄉又相隔。差役被戕之後。官衙中無一人敢於下鄉。城鄉舉貢生員。雖無用之才。然不能不就地節取。庶上下之氣可通。而官民之情乃協。若卑府等以橫厲無前之概。作吐棄一切之狀。若輩惟有

脫身而去。緘口不言耳。該匪之罪大惡極。夫復何言。然赦脅擒渠。乃古今不易之法。即使渠不可擒。而脅仍兼赦。若逼之使爲一心。後患將不可言。前得九月朔日書。知已剴切示諭。堅索只得一紙。令何教官懸於巖坑矣。卑府昨擬一示。雖不敢必其取信。然匪黨勾結已遍六里。不能不如此設想。以冀早爲解散。已交何教官雇人分送。卽有疑其寬緩者。卑府亦當毅然行之。初一日以後。有無賜書。敬乞查明。恐被中途要截。平越營兵。原不望其能戰。惟冀壯威耳。昨已函致該營。如遇大憲親臨。可隨同護衛前進。吳甄丈曾言。此後帶兵。凡省城之人。驕怯尤甚。幸勿調遣。或者有味乎其言之也。

十三日肅稟後。探得距城十里許之白巖。有匪徒數名。負險拒守。壘石爲關。安設大礮等情。卑府於四更造飯。五更起程。同徐令前往。卯刻到白巖坡下。查驗所設石關屬實。其山頂均有草棚數處。哨望者約數十人。見官兵直上。旋即竄逃。當卽將壕石扒一塚口而進。匪徒直奔山梁。經徐令帶領練勇。追斬五名。生擒五名。奪獲鳥槍二門。大木礮一門（約三百觔）。標桿三件。餘匪滾巖翻山而逃。卑府因微雨路滑。飭令不必窮追。收隊回城。查所造青桐木礮（約三四百觔）。一門。其粗大笨重。不知者以爲可駭。殊不知槍礮不可有絲毫走氣之處。走氣則藥力橫出矣。該匪且圖重大。多貯子藥。以兩片合成。則知其無能爲矣。再查此事如河魚餒敗。自內而外。遍體糜爛。逐一焚剿。亦不爲過。但剿則首要與脅從不分。焚則人不可得。而徒毀其生聚。恐後患無已。卑府願受遲鈍之誚。不圖苟且之謀。一縣之地。妥實辦理。不過一月可畢。當其時無奇功。竟其事無後禍。本心如此。未知福分才具。能副所願否。今日投誠者三寨。二寨給示。一寨勒交首要。限十日後再爲給示。逐一清釐苦心。分明較之逐一剿洗。似爲得計。容俟次第辦理。再爲縷陳。平越兵已到百名。此不過爲城中驚慌特甚耳。未必有濟於事。刻下情形。四鄉附者。十散六七矣。近三日之中。投誠者百餘寨。（今夜又得三十餘寨。聞明日更多。）當時給予免牌。牌卽按寨按戶詳註。并備存

一册。牌子民爲民之護符。册存官爲保甲張本也。其寨中著名土匪。分別勒限細獻。以地方之人。拏地方之匪。不派

一差下鄉。并勒令呈繳槍礮。刻下城中設局。每里派二人專司其事。到局者無一文之費。六里共派紳士十二人。并派何教官魯未入總司其事。凡投誠之村寨戶口。逐一登明。即可接辦保甲。清查糧冊。以杜書吏欺朦。兼可物色醇謹老成之人。選派辦事。蓋榔匪假榔以欺官殺人。此次由官經理。則六轡在手。操縱因心。昔日之榔匪爲政。異日之保甲官爲政。似可弭禍一時。兼可弭患永久矣。十日之內。大致可定。一月之內。當可就理。勒緝首要一節。差不可用。練不可用。只有用地方人民之一法。縱有遠飄之人。亦必有就獲之人。就獲者解行轅辦理。遠飄者責成地方。則永無歸路。至則成擒。惟在行之以實。持之以恆耳。卑府之愚。總以安民爲心。以不嗜殺爲主。恐事機稍失。貽害無窮。察看情形。解散者十居其九。均是實情。初五十四軍威未挫。匪技已窮。兼聞糜節按臨。故不煩言而解。兵可不用。餉可有餘。

鈞帖敬承至訓。十九日從早至暮。投誠者二百餘起。人人親爲點名。問之教之。均給免剿牌。內有三四紙。叩留未發。仍限十日勒交補給。又白巖之李武生。綽號六霸王。到案勒令另緝巨魁贖罪。又巖坑角旁等處。投誠之中。頗有匪類。已加結加保加限。前往緝匪。并搜尋大鐵礮大木礮等件。以爲贖罪地步。密察情形。似非不力。二三日後。當必有確信矣。保甲乃救此禍之急藥。投誠畢而保甲之綱目盡得矣。每寨若干戶。現在投誠者幾戶。未來者幾戶。已逐一註明。其已到之戶名。已詳悉粘單存投誠結中。渤海不云乎。治亂國如治亂繩。又云。將勝之乎。抑安之耶。誠爲此時此地寫照。

論辦養安榔匪啓 三年

卑府八月三十日。帶黎練二百五十名。鎮練七十名。馳抵養安。其地土匪蜂起。幾於合邑皆是。而千里之干溪。尤爲倡亂之始。初一日出城至千里。擇野田中安設營帳。傳集城鄉士子。設法開導。赦宥脅從。專緝首要。實已舌敝唇

焦。至再至四。詎該匪劉瞎么等。於初五日。三面撲營。數至二三萬人。木礮鳥槍。直前抗拒。並將持牌開導之差役。網殺祭礮。牌示砍毀。往來文報米糧。一並阻截。刦奪民夫官役。網殺至十餘名之多。且於官軍來路。折橋斷後。其心叵測。不得已親自督練。斬獲六十餘人。賊餒稍挫。被脅良民亦解散。十四日復探得賊匪。於白巖險要隘口。壘石爲關。安設大礮。當於夜半造飯。冒雨潛行。出其不意。攻破石壘。奪獲四百劬大礮。並鳥槍刀矛數十件。賊匪驚覺。追斬數十人。並生擒首惡劉瞎么卓老五等餘匪。並被脅良民十散其九。現在按名勒緝逸犯。准令被脅各戶。投誠免罪。並予網獻匪徒贖罪。於城中設局收結。過堂造冊記載。戶口多寡。分別有無遺漏。以爲辦理保甲團練張本。初劉瞎么等十餘人。於上年四月。倡議以齊榔爲名。斂錢建廟。恐民之不從也。則以歷年來。詞訟告官不理。盜賊控官不究。不如在鄉私埋沈河。由榔斷案罰處省費。不准入城爲詞。又恐民之不輸錢也。則以榔成後一切錢糧。由榔作主。可以欺官減糧爲詞。實則甕安官糧所餘甚廉。並非朘民以肥官。然而愚民之信而從者十之一。畏而從者十之一。遂於六里中各村各寨。選取素不安分。武斷鄉曲之人。派充頭目。大者管領數千百戶。小者管領百數十戶。勢稍稍滋蔓矣。本年派錢建廟已成。復按戶派造鳥槍。按戶共造大礮。民之不願入夥者。掠其財產。毀其房屋。控案纍纍。派差拘拿。網殺多命。民之畏之信之。附和之者。十之八九。此甕安始亂之實在情形也。幸而發覺尙早。代庖之令徐河清。未敢諱疾。故黨羽不堅。器械不習。官吏猶得而懲之耳。或謂匪人以齊榔滋事。亦藉保甲爲名。顯與官抗。乃不多殺以立威。而從保甲著議。非襲其成跡歟。對曰。昔日之榔。匪爲政。故亂。異日之保甲。官爲政。且可選擇人之有才品身家者。充鄉正甲長之選。故可治也。綱目初舉。條緒尙煩。一月二月後。實力辦理。當有轉機。渤海不云乎。赤子弄兵潢池。將勝之耶。抑安之耶。升卿錯節。利器爲先。此一說也。治亂國如治亂繩。又一說也。揣勢度時。不可膠一法以求治。愚昧之忱。未識有當否。

致左季高 三年正月初二日

季高先生姻丈執事。年前專二力奉上一函。又郵寄一函。計先後可到。崔正甫除夕過灤。詢問賊情。言楚北大勝。武昌危而復安。然乎否乎。張石卿先生公誠英勇。極力振飭。楚中數十年積弊。當可復見天日。但辦事總以積漸而成。若得二三年內。不卽升調。則勛業必集。聞中丞勤勞特甚。亦須節省精力。又聞先生終日勞神案牘。竟無片刻之暇。竊謂宜再延一精曉例案之刑名幕友。專管咨題文案。而先生專管例外之奏摺。及例案外之文。批則精力有餘。智慧更大。謀畫更鎮定。而有餘刑名法律。秦漢已然。卽蕭曹名將相。亦以文無害見長。絳侯將百萬兵。而不能爲獄吏牘背。自古如此。何況今日。大抵天下亂則法密。密則必亂。天下治則法疏。疏則必治。此不刊之至論。而無如胥吏之天下。勢不可驟挽回也。惟在司事者神明於規矩之中耳。目今辦事。必須知今知古。知今者可與言蕭曹之規隨。知古者可與言房杜之謀斷。先生可謀可斷。而法律太繁。則恐精力或有不及。大清律易遵。而例難盡悉。刑律易悉。而吏部處分例難盡悉。此不過專爲書吏生財耳。而實政無絲毫之益。然疆吏殫竭血誠。以辦地方之事。而部吏得以持其短長。豈不令英雄氣短乎。林翼所處。只有一府耳。其辦事也。終日手不停披。口不絕音。然精神志趣。專注於紙片之外。其必須形之公牘者。詳司達部。付之幕友。一人之精力幾何。若於文牘過勞。則精神已疲於小事瑣事。轉不能辦其遠者大者矣。敬質高明。以爲何如。楚北情形。究屬如何。并乞明示。林翼捕盜一月有餘。各屬報獲已逾百人。而逋者尙多。擬再親往督緝。總局審局。仍設於灤中。黎平二年。摺摺然用力良苦。其地士民醇謹。不刁不詐。不淫矣。實爲黔中諸郡之冠。但嫌稍弱耳。一年以來。訓練武事。頗改舊習。到黔七年。四握郡符。黎平頗盡力。安順次之。鎮遠只四月。斯下矣。思南八月最逸。又最有餘。無甚新政。德慧術知。視其操心如何耳。黎平本楚地。國朝改入黔版。何忠誠公（明諡文烈。封中湘王）故塋。從湘潭改葬來黔。至今樵牧不禁。無人看守。林翼捐資修理。復置田產。惜才力薄劣。不能歌詠其美耳。前此寄函。以用人練兵四字奉質高明。用人在旌別淑慝。樹之風聲。不必多爲參劾。而風氣自可轉移。練兵則必須挑選。定額本多。只須簡取十分之二。練成勁旅。則有事時可以制勝。無事時可以震攝奸

萌。林翼之學力至薄。才力至小。固知無補於盛業。然不能已於言者。其心誠耳。老母年高。時患痰嗽。得到無侍奉數月。甚覺安貼。唐宅周宅姻事。今年必欲辦了。一妹戊戌生年十六。一妹遺腹生。辛丑六月年十三。尙未字人。曾託便中物色佳子弟。乞留意而幸。

與孔廉訪論會匪啓三年

承索所論會匪情形書。謹錄以聞。此辛亥年秋杪事。與今不同。今日國威不振。卽愚民亦生狎侮之心。何況莠民。當以練兵求才爲務。先如飢渴之於飲食。一日不食則飢。一日不講武則死。所望有兵事兵柄者。屏棄萬緣。專意武事。黔中之事。非立誅三五貪劣將弁。并勅去三二十人。則不能起鼓聲而作士氣。以九十萬之餉。養此昏庸之鬼。每兵百名。侵融空曠。殆將及半。其半在伍者。皆城中槁房隊目之姻婭。僕妾之黨耳。否則革兵老兵死兵之子孫耳。否則將弁僕妾侍婦之子若孫。及壻及姻親耳。胎病已深。來頭已久。油滑怯懦。卽日夜講武。未必能武。況得過且過耶。所望有兵柄者。日夜懸一死字於臥榻之旁。知此身之必死。則於此求生。或有生機。更以武昌安慶金陵之事。作一設身之想。思之思之。鬼神通之。兵事尙有辦法矣。嗟乎。此言亦僅可於知己前一吐其愚耳。

啓孔廉訪

敬稟者。舊州一帶之事。早已定局。因太平堡一隅僻處。尙有觀望之人。於初六日領練成行。二日至甕安縣之侯場。而黃平民悔罪輸誠。到案投結者。紛紛而至。此等事。當其氣燄方張之時。非威不濟。及其恐懼消沮也。可以恩行。然所謂恩者。亦不過持重養威。准其自新。限以勒獻。非消化而示以姑息也。緣匪徒脅糧戶以爲聚衆之謀。不解散糧戶。則不能伐其謀。若意在急切。則良懦受害。加以攻伐。則首從莫分。卑府之愚。必先分良莠。如醫治疾。扶正氣。卽

可禦外邪也。黃平之事，不日可完。至甕安涓潭唇齒相依，狼狽爲奸，甕安匪徒尤甚。殺官馬，奪官械，徐令專以恩意諭人，然不可久，無可守之城，無可戰之士，無可傳喚之差。初到無人告狀，近則有人來城，亦稟告榔匪私行擅殺而已。若得大憲恩示多張，貼於四境，示諭之意，專指匪徒之聚衆，以鬧糧爲名，而私罰人錢，擅沈人於河，一切不服官斷，必應將首要捆獻，許免脅從，如再抗違，准某等帶兵練剿辦，以此虛聲默爲開導，則保全必多。總之匪徒非由糧而始起事，特不藉糧爲名，不能得人，不能得財，卑府等亦非欲爭糧利而來。安糧戶卽所以散黨羽，匪徒之勢孤，則緝拿必可得力。否則卽減損糧戶，至於無糧，而地方之害彌大，區區之愚，直陳無隱。

啓陳剿盜十二條三年

道光二十九年十二月晦日，率師討苗匪，用兵千七百人，營於險要，令其毋擅動，毋挑戰，用革夷附近之團練萬七千人，環而集之，搗其巢穴，復以計誘之，賴同事文武士民之力，得盜頗多。卑府於二月十七日，又往黎平塔楚匪矣。三十年十月，逸盜二十餘人，殺寨頭阿賈以逞，阿賈者卽是年春，助官縛盜之革夷寨苗也。頗知大義，識漢文，於是鎮遠黃平台拱清江清平丹江凱里施秉各官吏，再會於巖門，跡成事以圖續剿。自三十年十月，至於元年三月，乃蕺事，而盜固逃竄於荒山密箐中，正犯無一獲也。然則刻舟可求劍乎？膠柱可鼓瑟乎？必當知所變計矣。近日台拱清江丹江施秉之盜，又稍縱矣。約而言之，昔年之事，利用圍攻，今日之事，利用追剿。昔年之事，賊可餌誘，今日之事，當以力擒。昌黎韓子慷慨有大志，陳說十四條，至爲精當，謹另錄以呈，復思其節目之未備者，附呈十三條，惟密採而留意焉。

一、辦盜先須寬吏議也。王夫之言，自古盜賊之多，無若東漢光武。先後所降，幾至二十萬，其通鑑論宋論，津津其言之。考漢史建武十六年，郡國羣盜處處並起，郡縣追討，到則解散，去復屯集，乃詔遣使者下郡國，聽羣盜自相糾

擿五人共斬一人者除其罪。吏雖逗留迴避。聽以擒討爲效。但取獲賊多少爲殿最。惟蔽匿者乃罪之。夫上用意嚴而用法密。則下之避罪巧而貽害乃愈深。儻能捐棄一切特參之條。寬以時日。責其擒討。在下者感寬大之恩惠。而不必用其欺。在上者有切實之事功。而不煩虞其詐。如此而後。事無窒礙。督捕之員。亦不致貽同官之罪戾。否則上下相蒙。終歸諱飾而已矣。

一、捕盜莫善於雕剿也。黔盜裹巾扛礮。情罪與逆匪無異。以不選不練之兵。練剿之。則盜必拒。兵必潰。以精兵精練剿之。則盜必竄矣。然則當從竄處著議矣。田山薑黔書。歷陳平苗之往事。以分而勝。以合而敗。不惟深明兵法。亦且洞悉苗情。竊計用兵練五百。飭委幹員。將黎平之精鍊。挑去百名。於都勻鎮遠兩府。標式招募二百名。必於其地招募者。卽慶鄭所謂生其水土。服習其道也。於營兵標式招募百名。或二百名。古州鎮遠貴陽各鎮協營中。每處十人。或三五人。或竟無人。可缺而不可濫。其兼用營兵者。營兵固怯。然百人之怯。豈無一人之勇。虞允文收集潰卒。致功於采石。勝國逃潰之兵。入本朝而爲龍興勁旅。卽此意也。且事後不煩安插。卽不虞後患。

一、標式以選精銳。不可專用火器也。宜長短相間。長兵者。槍礮弓箭是也。短兵者。刀矛鑿棍是也。叔世人心怯懦。偏重火器。謂可殺賊於百步內外。無跳盪搏擊之危。非特賊刃難加我身。并賊血亦不得汚我衣。何便如之。且隱計於百步內外開礮。若見勢頭不好。丟棄槍礮逃去。賊追不及。又何便如之。兵因火器強。亦因火器弱。誠然誠然。明季偏重火器而兵益弱。議者欲改其制。而莊烈不允。遂亡於流賊。自英夷入犯中國。見其以火器勝。我亦遂因而偏重之。每營刀矛手少。火器手多。刀矛手自大操三跳之外。未有練習者。所練習不過火器而已。然十餘日或數月始一操。一操只打三槍。命中者十不得一。是有偏重之名。究無偏重之實也。以此毫無可恃之技。臨陣未見賊氣已餒矣。既開仗。心益惶。手益戰矣。於是或裝藥忘却下子。或先下子而後裝藥。或裝藥下子而忘却發藥。或開放於百步外。一二槍不中。則相與棄槍反走。又何怪每仗必敗乎。昔冉子用矛入齊師。孔子稱其義。爲其奮勇直

前。舍生以合事宜也。烏枝鳴用劍敗華氏。謂用少莫如齊致死。齊致死莫如去備。此二事乃兵家之祕。後世得其祕者。岳忠武之背嵬軍五百人。本朝岳威信之馬兵三十六人。楊昭武長槍手百人皆是也。邇來軍威不振極矣。總以火器不可當爲詞。司兵柄者。亟宜變計矣。大約火器手宜四成三成。刀矛手宜六成七成。每日操練。以備戰鬪。火器當前。刀矛繼之。火器精。可壯刀矛之先聲。刀矛精。則火器有恃無恐。精火器之人。尤須並精刀矛。則膽氣愈雄。神氣愈定。而打放不空。果能打放不空。勝已七八矣。況又以精悍刀矛衝出。如雨驟至。賊焉得不奔潰哉。故今日標式。以火器四三成。刀矛六七成爲要。

一、用兵貴審形勢也。委員選兵募練於二府之地。兼可留意地輿。度其險要。彙侯以圖志而知阨塞之要。亞夫因趙涉而搜殺暱之盜。自古將帥類然。此行兵之至要也。

一、多用委員。不如兼用士民也。肉食者鄙。未能遠謀。曹鬪鄉氓。功成長勺。此用士用民之說也。用都游以上。不如能千總以下。智勇困於所溺。仕宦怠於已成。此都游以上之說也。能與士卒比飲食。可得士卒之死力。能耐飢渴奔走。然後能與盜相追逐。此千總以下之說也。鷹之在羶也。飢則爲人用。飽則不爲人用。夫中人之性。亦若是焉已矣。惟士民武弁。功勞不可淹沒。不得以與例不合而舍。是昔王文成之征南贛。征粵西。所用皆門下學究書生。功績甚偉。然死必有卹。功必有賞。是可法者。

一、雕剿宜實行保甲團練也。韓子可主征討之任。然任於此不能分於彼。保甲團練。不精不嚴。不切實認真。如一身一家之事。則征討之事亦窮。投戈而混入寨中。則如人入羊羣。見羊而不見人。畏我而匿於荒谷幽箐。則如以驥捕鼠於井竈之際。反不若跛貓矣。濫殺之不可稍縱之卽逝。故必精保甲團練。然後可以收雕剿之功。

一、保甲團練。須用士用民也。近年保甲團練。人人言之。亦人人行之。然文告徒煩。實政無補。牌籍空設。良莠不分。其交給土司差役。分發各鄉者。徒資訛索。尤爲浮僞。夫十室之邑。必有忠信。三人同行。厥爲我師。一邑之中。豈無二

三明白正派之紳士。虛心訪之。實心求之。委令下鄉。帶同冊籍。每到一村。先於此村。訪彼村之正人才人。有衣食有頂戴人到村。又訪前村後村之人。廉得其實。加以委任。官爲給札。註名於冊。責以保固鄉里之義。諭以分別良莠之機。付以防捕救援之法。隆之以禮。尤必須董之以威。雖欲不肩其任。不可得矣。彼鄉正團長到城繳簿。一冊存官。一冊存鄉。預囑家人門丁。隨時傳入。不得稽延。其冊中良莠。密加訪察。密爲記載。不可卽卽爲施行。視其言者何如。其所請防捕救援事宜。分別不可。立卽施行。不使羈候於城中。其怯懦退誘者。卽時斥責。其迂闊不曉事者。反復開導。委曲求全。其公正明白者。侍坐賜茶食。卽椎髻之苗草屨之民。侍立於側。切實講求。苟有知大義者。卽不必苛以尋常官禮。其下鄉委員紳士。所帶書差。官爲給費。擾及分文者。杖之不赦。如此而後保甲團練之事。十得三四。然猶不敢謂其已成也。而奈何易言之也。

一、保甲團練。須官爲士民作主也。賈子言。治天下至纖至悉。其保團之謂矣。監司以上。大憲可示其教。而勢不能理其事。理其事者。其牧令乎。然而才具各有所宜。不必盡能其事。亦不必實行其事。無已。其擇州縣樸實精明。講求此道者。由大憲札委。或專司其事。或隨知府督辦。予以貲財。寬以歲月。務求訪察至精。奉行至實。或有濟乎。然擇官專辦。或係在省候補。而久勞於外。或本有實缺。而奪其所有。均非俗情所能堪。亦恐室人之交謫。凡委員之督戰。與辦保團者。月給私費百金。便爲至厚。酌半亦可。計委員不過數人。委任不過一年。恤其內顧之憂。而彼乃不能紓大憲之憂。忍乎敢乎。

一、保團縛送之賊。非速審速賞不可也。賊到而不立審。則鄉民如重負在身。方以送盜爲厲已矣。粗審而不細切。則必不肯速賞。賞遲而民氣怠矣。不計功。不謀利。非可責之蚩蚩之民。使其送賊而在城守候。至於一日二日之久。其愁怨當何如耶。何以勸後。故貴速審。貴速賞。

一、審盜貴專精也。委員捕獲之盜。及鄉民網送之盜到案。卽詳訊其案情多寡。行止聚散。一食一飲。至微至陋之處。

並其同夥行蹤年貌。逐一筆之於書。隔一日再審。三五日又審。其不留意處。其細縷處。一一符合。則盜真矣。凡盜供之狡賴者。無同夥之衆供。以指其瑕。且官亦無隙以發其私。故善訊者不特刑求。凡被誣而妄認者。受人教誘。許以錢物。彼竟不知錢之不可得。慌以亂刑。加以恐喝。凡猾胥教供冒賞。往往以此。兵丁亦然。竟有自認不諱。隨口妄攀他人。詳悉筆之於書。異日再訊。卽其直認處。必有自相矛盾之隱。可得間矣。此事惟黔苗受害最多。其愚過人也。故審案貴精。在外委員。將犯供逐一稟之臬憲。尤須委能幹樸實之員。於臬署設局。最爲要著。辰入酉出。交供呈核。譬如風簷局試。白卷者少。否則酬應徵逐。日復一日。抑且年復一年。案以久而不了。犯以狡而愈疑。故審案貴專。

一、提解斬殺。可便宜也。凡盜就獲。除委員格傷格殺外。令其逐一詳訊。開列同夥年貌。案犯日期。無論遠年近年。已報未報。多獲少獲。概不爲罪。以申文露申。而實供則密稟臬憲。卽將正犯。就近交地方官押解。從某處至省城止。均係沿途文員。親自派押。遞交臬憲復訊後。請令正法。續獲再正法。彙至事竣始入奏。則法網既無窒礙。限期亦屬從容。可以實盡心力矣。

一、經費宜寬籌也。精兵精練五百人。約每人日食一錢。月須一千五百兩。加以委員紳士薪水。與夫價差盤礮藥鍋帳夫役。又加偵探眼綫。此最要費。不可惜。大約用間諜差探。總須五十人。或百人。月費總在三四千金。一年肅清。則四五萬兩可以足用。惟須由大憲簡派二人專司其事。期於核實不欺而已。

一、委任宜專也。委員如韓子者。腹有詩書。豈至以聲色加人。私欲求人。然以卑官辦他境之事。非克伐怨欲不行之地方官。不能同心協力。越境攻盜之難。曩固疑之。今日驗矣。然使大憲深信無猜。則事必有濟。近日人心怯餒。中無所有。卽使謠詠播於都會。蜚語傳於京師。而明鏡在空。流言自止。毅然付余玠以汴師。委陶魯以峒賊。權之所屬。威望重焉。不待斬莊賈。戮揚干。然後令行禁止也。虎帥以聽。誰能犯子。而東里因得志於鄭國。非明徵歟。

以上各條。數之無甚高論。愚陋之識。知無不言。大抵常人之情。當厝火未然。則諱言兵。及赤眉黃巾安史闖獻起。則曰。此乃天數。非人力所能挽回。然亦思樊崇張角等。果天殛之乎。抑人誅之乎。究是幾個有志之人。將狂氛掃盡耳。而謀國者又勸以無財爲說。竊念鄭畋守鳳隴。韋臯鎮川蜀。皆值國步艱難。物力不足之時。而勁敵當前。屢索敵賦。何不聞以匱乏撓大計。又况明季國窮。守都城兵。至於米薪不繼。乃本朝定鼎之初。天下入版圖。輸租稅者。僅三分之二。何以用兵數十年。不致告匱。不聞往遼東飛芻挽粟。不聞議推廣秀才舉人之例。此無他。天下之財本無不足。視其政事何如耳。如蒙採擇。天下幸甚。黔中幸甚。

附韓州判剿盜匪說

經書何儒不讀。用以爲文。好醜各殊者。切題與不切題也。古方何醫不記。用以療疾。生死不同者。切證與不切證也。兵法何將不知。用以臨敵。勝負各歧者。切時勢與不切時勢也。方今會匪鴟張。土寇蜂起。粵楚机捏不安。而黔地惡苗。遂亦欲因風縱火。非速加懲創。禍固不可勝言。非妥爲安排。亂又烏知所底。是在卽賊與我之時勢。熟籌而審處焉耳。苗耐飢渴勞苦。寒暑無所畏避。行止輕便。無行李。背負飯包。大可供數日食。上下峻坂。捷若猿猴。又習用火器。從禽逐獸。日以爲常。曲左臂架槍。其發多中。此其所長也。性多疑忌。貪利無陣法。疑則易誤。以多方忌。則易誑。以鬼神巫師。貪則易釣。以餌。烏合而無陣法。則易制。以節制之師。此其所短也。至我員弁兵練。膽薄技疏。不諳戰陣。遇敵則退。後論功則爭先。有短而無長。方諸乾隆嘉慶間。已遠不相及。何論國初。然則當此之時。處此之勢。將剿苗匪。其何道之從乎。謹卽管見。臚陳十四條。敬陳左右。

一、明賞罰。有功而不賞。有罪而不罰。固非。有功而使無功者。受其賞。有罪而使無罪者。受其罰。尤非。甚至有功而反受罰。有罪而反受賞。是非顛倒。更不足以服人心。惟賞罰當乎功罪。則賞一人而三軍勸。罰一人而三軍畏。

乃知所趨避焉耳。

一、謹約信。鼓之而弗前。金之而莫退。呼之而不至。限之而故違。雖韓白孫吳。不能操算矣。夫收信之效在臨事。而致信之效在平時。平時不輕下令。有令則不更。不苟相期。有期則必踐。古人千金徒木。三日去原。約信不爽。毫釐三軍所以用命也。

一、勤操練。近今弁兵怯懦。見賊卽逃。雖有不逃。亦未聞直前殺賊。此固由志卑氣弱。亦自願無保身殺敵之能。不得不苟且圖免耳。則操練安可不勤乎。然尤貴因地制宜也。昔秦再雄鐵甲度水。傅重庵提重登山。皆度地練兵。所向無敵。今將剿匪於黔省多山之地。我兵技藝行陣。必切多山之地爲之。方有實用。瑩確之徑難登。故身宜輕也。巒巘之間多礙。故陣宜疏也。如此則將勇兵強。戰勝攻取矣。

一、簡趨捷。苗跋山如履平地。漢人弗若也。一旦相角逐。則彼急我遲。彼暇我忙。優絀分而雄雌判矣。此宜用沙囊之法。練習升高陟遠。簡其趨捷者。別爲一軍。或用以邀擊。或用以跟追。或用以繞道別出。此剿苗匪之必不可少者。

一、選員弁。一將豈能獨理。則協理之文員武弁。在所必需。雖然。軟熟者不可用。諂諛者不可用。胸無實際。大言欺人者。更不可用。選其反乎此者。則庶乎其近焉已。

一、擇士民。官來自遠。於苗境之山川風土。未克周知。豈若士民之生於斯。長於此哉。此宜擇其有才能而心地可靠者。不分漢夷。使之效力軍前。以供指臂之用。

一、嚴保團保甲。團練最爲守禦之規。近年大憲。已三令五申。特患奉行不力耳。嚴以督之。未行者咸能遵依。已行者益加振作。忖忖自守。不獨難於裹脅。從賊者稀。抑且困於糗糧。呼庚者衆。况能各出鄉兵。隨處截殺。其有裨於剿匪。更爲何如哉。

一、精間諜。善用兵者。凡敵境之險夷。敵衆之多寡。敵意之趨避。敵黨之離合。敵將之性情嗜好。莫不灼知。故能批卻導竅。應手而解。然而甚難其人。也。必其沈密勇敢。又有妻孥之繫。然後予以厚賈。俾混入賊中。以察悉其纖微。若能不用漢而用苗。不用民而用賊。則言語相通。氣類相投。更爲得力耳。

一、務分攻。苗性遲凝不決。我分兵以亂其耳目。則方寸益淆。苗性專一不歧。我分兵以致其紛紜。則氣力必懈。至於力不能支。或且潰圍四處。集散亡以再肆狂氛。又當空闕一方。層層密伏。使之聚而殲旃也。

一、防伏劫。自來苗匪跳梁。其兵法有二。埋伏與晝夜斫營而已。我軍行走。宜翼以搜伏之軍。戰勝追逐。宜用威南塘防伏之法。至每夜伏路與瞭望者。尤宜加意。

一、勿妄殺。爲賊者誅。餘人不問。若波及無辜。甚或欲絕其種類。則奸人得以煽動。必至蔓延。

一、勿輕撫。人心思亂已久。加以邇來粵楚不靖。更思效尤。其真正爲賊者。未至十分窮感。而遽撫之。以博好生之名。且或以爲易了之計。則禍心未死。轉瞬復張。此宜痛剿靡遺。方足杜萌芽而昭鑒戒。

一、急捕亡。剿辦得手之餘。其著名惡匪。必有漏網逃匿者。儻以黨與旣散了。然無復可虞。竊恐不數月間。又將招集其徒。再圖舉事。此宜迅速搜窮。罪人斯得。而後不慮其復然也。

一、緩撤兵。兵事費用浩繁。早撤一日。則省儉一日。所以一得勝仗。便思抽撤。賊勢將次平靖。便思全撤。後來之熄而復熾。軍需益不貲。未之計也。試思一篲未成。乃不肯及時竣工。致令全山頽圯。再思平地爲之。果孰逸孰勞。孰省孰費乎。此其宜於緩撤也。審矣。

此十四條自嚴保團以上。從己作事。自精間諜以下。從彼著想。皆切時勢以籌之者也。而操練間諜二條。尤爲緊要。誠能不中沮於事機。不旁撓於羣議。精心果力。徹始徹終。於剿辦苗匪何有哉。

下游情形。殆哉岌岌。姑卽愚陋之所及知者而言之。已不下十數事。麻陽船戶。辰沅水手。皆強悍有力。鎮遠以上。驛路脚夫。亦遊蕩不羈。兩三月來。客商裹足不前。無所得食。人心皇皇。殆不可支。夫以官養民。不如使民自養。爲盜而死。忍饑而死。等死耳。犯法可以賒死。忍饑則將立斃。可慮一也。各府各廳之寨苗。大者一二百家。小者三五十家。連年盜劫。積蓄一空。爲良則畏盜。而又畏官畏差。爲盜則一無所畏。是將迫之使爲盜。可慮二也。良苗終日採芒爲食。（卽登彼西山。言采其芒之芒。）四時不能得一粟入口。耕種所入。遇青黃不接之際。借穀一石。一月之內。還至二石三石不等。名爲斷頭穀。借錢借米亦然。甚至一酒一肉。積至多時。變抵田產數十百金者。心怨之而口不敢言。其黠者則怨恨所積。引羣盜以仇之耳。而漢奸終不自悟。方且失之於盜劫。而取償於盤剝。可慮三也。苗產盡入漢奸。而差徭採買。仍出於原戶。當秋冬催比之際。有自掘祖墳銀飾者矣。蒿目痛心。莫此爲甚。各廳並無錢糧贏餘。專恃差徭採買一切陋規。以爲公私之用。近年民力日絀。官事日多。卽令如數收納。尙呼瘠苦。何能禁止。而強以不情。且力役粟米之征。一概停止。則苗民脫身化外。不復知有上下之分。是禁之固難。將縱之。而任其多取乎。則窮愁怨歎。苗民日見其蹙。將更法而歸於受田之漢民乎。則差徭採買。有已成之俗例。而非賦役之正供。苗寨本無錢糧。漢民豈肯領受。訐告紛紛。上下其手。可慮四也。官取於苗者十之三。土司通事差役之取於苗者十之七。取良民之精血。以供其宴安酖毒之資。台拱丹江古州八寨清平。其弊尤深。可慮五也。漢奸恐喝苗民。無所不至。卽如上年十月。倡言某人帶兵。見黑便殺。（便民青衣。故云見黑苗殺。）雖大張曉諭。開布公誠。而浮言不止。其造言恐喝之人。卽平日盤剝之人。卽異日倡亂之人。欲藉以快其私耳。人心思亂。無理可喻。可慮六也。官兵數萬。已成廢器。卽令千人爲營。而十賊可破。凡有血氣。莫不痛心。屯軍九千餘名。布置各堡。本極周密。然虛籍徒存。實政無補。數十年之積弊。不能一旦挽回。今日之食屯田者。半是刁生劣監。一旦繩之以法。則捏造黑白。勾煽愚苗。其禍且益速。操之太急。是鼉錯峭直之弊。委心任運。是胡廣中庸之諄。可愚七也。邪教之興。隨地皆是。根柢旣深。萌芽已露。惟大臣持正而不

阿。小臣奉公而潔已。則無隙可乘。尙可不卽舉發。黔中近年大憲兢兢業業。察吏頗嚴。然在上。有震動恪恭之心。在下。有得過且過之意。未經患難。不知恐懼。公牘所到。寓目已忘。可慮八也。天下治亂之機。外不乎義利二字。人心嗜利。則亂。嗜義。則治。近年嗜利之人。豈惟官哉。凡在官之人。皆然也。卽在野之人。亦駸駸乎其莫不然。用人而不得所。雖堯禹之憂勤。不能以治天下。亂則耗財多。處已亂將亂之時。則賞不得不重。罰不得不輕。故耗財尤多。度支已竭。仰屋空嗟。可慮九也。禍積於蕭牆。勢處於危急。而不能不資成案。秉舊例。絳侯之乞憐於牘背。魏尙之見屈於刀筆吏。古今同慨。必至決裂不可收拾。例案一無所施。而後節目疏闊。則事已不可爲。可慮十也。勤王事者。食於官。舉義旗者。食於民。舍稽事而割正。夏湯是也。孰敢不簞食壺漿。以迎將軍。諸葛之言是也。南陽太守。稽留義師。斬一守而人皆奉令。孫堅是也。天下非鄙吝之人。不能聚財。非抑勒不能散鄙吝之財。明懷宗之勸慰而不助軍餉。李自成之腦箍而盡數以獻。叔季人心。大抵類是。粵逆入鄂。括取民財。計逾千萬。設官爲董勸。則十萬亦難。不至此時。不知悔懼。人心又大抵類此。黔中官兵。仰給於藩庫。藩庫又仰給於鄰省。轉運則有所不能。抑勒則有所不敢。畏首畏尾。勢必致官危而民亦不安。可慮十一也。兼弱攻昧。取亂侮亡。言道學者疑之。而英君賢相之方略。實不外此。自強者。天道之所取。自弱者。洪範謂之極。帝王馭世之微權。必取強桀之人。預爲駕馭。爲我用而不爲人用。世廟募武力絕倫之人。令史相國統領駐防。豈爲駐防哉。所以消天下之英傑而不覺耳。姚啓聖督浙閩。署中歲費以百萬計。不數年而海澄公施侯歸於麾下。今欲鎮攝邊陲。必須日日練兵。貴東一路幅員至大。非挑諫精兵八百人。分防分捕。且戰且守。則不足以攝奸萌而資防範。一年之費。又將安出。可慮十二也。黔餉設令不繼。則兵民皆困。禍不旋踵。將任其自亂而自已乎。抑將養壯士而去老弱。核名實而察空曠乎。非常之願。黎民所懼。行之不善。是明季裁驛卒之事。行之而善。是商鞅變秦法之事。成則爲怨府。敗則爲禍階。可慮十三也。保甲團練。實救時之善政。委員之辦事。其時甚暫。恐民不信。其勢相隔。恐民不親。則非收令不爲功矣。然而奉虛文者。無實意。察小害者。忘大利。大憲之董戒。不

雷穎禿而脣焦。各屬之奉行。惟有稟復與告示。可慮十四也。大江東去。望風瓦解。刺臂奸細。反來黔地。卽是逃匿之餘。亦恐勾煽之禍。可慮十五也。以上十五事。姑卽東路而言之。然而言易行難。病多藥少。非一手一足之力。所能挽回。亦非空言剿說。所能補救。約而言之。則亦不外練兵求才。察吏籌餉四事耳。已亂易治也。未亂易治也。而將亂難治。林翼之愚陋。卽使殫精竭力。亦無補於萬一。况一人之精力。幾何。一人之才識。又幾何。如石填海。如蚊負山。固自知其不堪矣。區區愚誠。尙祈鑒察。

辭委署東道啓 三年

頃接省信。稱西道委湖丈。東道飭委卑府暫護云云。道路傳言。未知信否。查卑府奉委防楚。兼辦內匪。粵匪比來西竄。遂專意捕盜。自十一月以來。各屬所獲。據報已及二百五六十名。除窩戶接引不計外。尙恐有妄拿塞責等情。必須逐一核實定罪。始能分起稟報。通計核實。實劫盜一百及二百名。二百之中。其尤狡兇。不計劫殺次數者。總在百名以外。其行劫二次三次者。尙在小盜夥盜之數。不足爲奇也。卑府以盜匪之蹤跡所在。卽移營相向。本無一定住址。近月以來。賴地方官及各委員之力。盜勢漸已衰息。而尙有十數犯未獲。督緝許久。隱匿無蹤。焦憤之餘。寢食均廢。近日舊恙復行舉發。此卑府奉委承辦實任情形也。若能護任東道。勢必有各處公牘核辦。轉不能專意辦盜。東道駐古州。僅能照應附近一面。衙署書差文案等件。均已安土重遷。拘守一隅。已屬鞭長莫及。分巡各府。勢必騷擾官民。於辦事轉覺不便。古州已界粵西。春夏秋三時酷熱。如火烈。瘴癘異常。道憲和平涵養靜攝。猶深以瘴癘爲念。卑府兩到榕城。時際秋冬。日間汗流浹背。夜間重衾不溫。抱病而回。雖萬不能顧惜身命。情固規避。然身體不適。必不能努力辦公。誠恐貽誤地方。若使移印就地。而粵西一路。遠隔十餘站。緊要之地。既不可無官鎮壓。粵防楚防。顧此失彼。關係匪輕。此又卑府揣度地方之實在情形也。而私心所急。欲陳請者。則不能侍養老母。實屬烏鳥

之隱情。大憲錫類推仁。永言不賈。尙乞憐而念之。卑府之母七十有八。在安順跌傷左足。雖已醫治痊可。而動履須人。勢必不能跋涉道路。且左目瞶神雲翳。去冬今春。痰咳尤重。一夜之中。可吐一二碗。去年前年。卑府在黎平再四迎養。母意總以鎮遠近居水次。可以回籍爲詞。卑府之愚。思欲了辦內地盜匪。卽乞憲恩俯允回籍。所以不能陳請者。憲恩高厚。欲到籍後。再備文牘耳。卑府終鮮兄弟。又無兒女。年來母氏老態頓增。心勞力拙。百病叢生。犬馬之力。實已疲乏不堪。並非委恩眷而甘自棄。迫切愚忱。不得不展陳於大人之前。去年冬杪。稟已請此後不再署事。曾蒙恩鑒。左公來信云云。卑府亦已再四堅辭。實以母氏年高。賤軀多病。不得。不求卸肩耳。遲遲未行。徒以恩眷至深。知遇非常。不能遽去。不忍遽去。思欲內盜漸清。稍報知己之恩耳。瀝誠稟求。伏乞慈鑒俯允。至委署之員。上游則某某三守。可以兼護。下游則某某四守。亦可兼護。正不患無才。臨稟不勝激切悚惶待命之至。

致黎平府曹子祥（興仁）

此間之事。忽插一波。幾與全局大礙。幸止之尙速。然投誠者頗觀望矣。勒緝之事。連日無獲。甚爲焦急。弟本無才。而此地官民。毫不相通。上下之情。隔成兩橛。所以難也。湄潭之事。隱容於前。又求助於後。既不能強。又不能弱。此之謂也。昨奉憲諭。以弟請咨。尙有留意。但弟之不可留者。有五。與兄久處。相知最深。故縷陳之。尙乞婉詞密稟。自到黎平後。羣盜如毛。攜重資。破宦囊。以濟目前。粵逆擾桂林。相距六日程。身處瘴地。六月於此。乃因王廉普一言而疑之。并疑薇柏之偏信。此八月所以兩次請病。因留摺。又出兩憲之手。情義所感。濡滯至今。此遷延之計也。其不可再留者一。奉委辦盜。在窮谷荒山中。支帳久處。馳逐半年。斬殺實已不少。烏沙革夷尙餘三四十名。亦未敢欺上。然已獲二三百名矣。因廉普諸公。以爲多事。到省後。中峯亦不以爲事。見面之時。漠然寂然。近年天下大亂。何處不因莠民而起。且兵政如此。而不知整。吏治如此。而不知察。如甕安額兵四十八名。實在不過八名。其四十人。僅飽貪弁。若甕

安果有四五十之兵。何至人情驚恐。動輒欺官耶。又如今令之貪鄙昏庸。在一處卽壞一處。有一言謂其釀亂否。國計如此。而尙謀自奉。人心風俗如此。而尙顧私情。竊恐此方之事。前盜已死。後盜又生。不過一年。又當復熾。事不可爲。此其不可留者二。黃平之事。始終懷疑。遂至謗言四起。在外之微員。以二三百人。抗萬餘之衆。到頭尙是擅殺耳。誰敢忘身以殉事耶。甕安初次之來。無一二字提及。故不敢殺一人。非推諉也。分在則然耳。此次幸臬憲按臨。信到之日。羣小闐然。卽日解散。緣外間訛言。以知府係徐公私請而來。人微權輕。勢必相抗。其不可再留者三。林翼久無利心。黎平二年。私計久細。家丁清苦尤甚。散去者五六人。尙有二三廉謹者。亦將引去。在黔八年。除綺城小雲外。又除尊處曾經通挪外。交情絕少。去秋至今。所賴以借貸者。灘中行店耳。刻下已計一千八百市。賣皆窮。借貸亦難。此私計之不可以言狀者。集鬱集枯。自有命焉。弟之不求財。是本心也。惟一家數十口。僑寓灘中。於今三年。送回鄉里。易於食貧。此又私計之不可再留者四。省中巷談塗說。忽以開缺。加按察使銜訛布。母氏疑爲某公所中傷。而不知開缺一層。弟曾辭之。弟意其意不過欲爲明鱗諸公計耳。牛驥一皂。不敢梯榮。且不於某公未到之前。而於某公既到之後。事可知矣。虛意羈縻。中心不好。其不可留者五。總之八年黔中。險阻備嘗。握印不滿四年。帶兵將及三年。犬馬之力。憊矣。然終以小人自我。又何樂久爲此小人哉。去志已決。萬不可回。一切細情。嫌於忿激。不必言之於上。惟求去甚堅。且不逾十一月初旬。此情乞隨時代陳。如日後得犯。卽親送平越。并專人送臬憲回省。給咨亦去。不給咨亦去。弟因鎮遠考試。須移居避之。已艤舟東行李矣。時事日艱。才薄不能作事。非有所貪冀也。諒之黎平之行。何日可去。能振興之。殺戮之。邊防可治。缺分之苦。事務之繁。非平越大定可比。然保團成法。尙未散漫。內地盜匪。清除殆盡。此弟二年心血。可以共信。幸加意補救。以救此方。

啓呂方伯孔廉訪

今日聞初九日已捕得王桂發等。交八寨收押。此是初五日與官兵對敵之重犯也。差爲一慰。已備公文信函。懇吳丞徑解行轅。收審計時。卑府病愈。亦當押犯到平越矣。承示楚報。爲之痛恨。勞光泰本是誠險刁詐。毫無良心之徒。石卿先生初到湖北。彼以鹽利干之。其時城邑殘破。遂偶用之。昔年停舟湖北一日。久已訪知其人。屢欲函告。而嫌於非分。遂亦中止。今竟誤大局。悔恨何已。黔中之事。本應盡力。以答憲台知己之恩。且臨有事之秋。而掉頭不顧。異日更何望其爲國盡力。惟是此中難處。不能不逐一陳明。實非可爲而不爲也。尙乞格外原諒。兵事非可空談而成。趙括僅能讀書。馬謖言過其實。是兵家所忌也。卑府三十年來。本未究心於此。近年身處危難。剽竊前人陳籍。百不及一。所謂道聽塗說。是尙趙括馬謖之不若矣。六七年來。偶有所事。亦皆僥倖。國家大事。莫難於此。莫危於此。自問本無真實本領。不敢自欺以欺上一也。連年疲勞。精力不支。國家多難。萬不敢存偃息在牀之心。然軍旅之際。非以身先之勞之事。必無補。古今名將。不僅才略異衆。亦且精力過人。賤體素孱羸。近更多病。必致有負委託。上傷國體。兼傷知人之明。此固所不敢自欺者。二也。在黎平防堵緝捕。其始尙有私囊。故膽壯氣盛。無事不嚴行督責。期於必成。私囊甫竭。而憲帑兩次頒八千金矣。交紳士專管。以示官之不私一文。幸有胡子和等。倡議捐輸接濟。收繳已逾二萬。今年所收在外。此事可一不可再。日後尙能得如許貲財乎。不能也。去冬至今。防堵剿捕經費。又逾二萬五千。除發給各廳各屬。并委員張韓經手一萬七千四百餘兩。另有冊報外。卑府隨營支放銀八千三百餘兩。所費固屬不貲。國計支絀萬分。卑府用如泥沙。尺功未建。寸心難安。且畀貲與人。爲數已多。實獲盜犯者。亦不多見。予之則經費之糜如此。吝之則事勢渙散。呼應更覺不靈。彼辦盜尙如此之難。況當大股。且又安得此鉅萬經費乎。蓋不能矣。刻下之練。不足以成軍旅。勢須添募黎平鎮遠銅仁松桃思州。每處或五六日程。或十餘日程。不能遍及。卽不能兼顧。且所到之處。財用何出三也。近人貪利冒功。今日之求乞差使。爭先恐後。卽異日首先潰敗之人。屈指計之。用人不易。至武弁不歸。管轄尤難。以知府徑行軍法。賞罰不立。威望太卑。卽如甕安烏合之衆。初五日三戰。十四日一

戰不爲不嚴。所以解散之故。則以憲台按臨。闕然頓散。此卑府不能立威。不能辦事之實證。至平越小弁。兵不滿百。索夫百六十名。彼竟不知地方武弁。本有處分。方且謀利詐擾之不暇。加以嚴詰。面無懼容。他如此類之文武員弁。及其更甚於此者。何可勝道。舉目蒼茫。動手窒礙。必致一事無成。束手而待其潰敗。四也。此時講明武備。參劾劣弁。已屬臨渴掘井。卽如省弁之伊之霍。其貪鄙庸惡。尙堪一日留乎。霍之出兵。其劣跡何如。伊之中衡。其劣跡又何如。本省中尙敢如此。此外各屬。更僕難數。卽使認真辦理。未必能戰。而况剝兵蝕餉。其何以堪。五也。自來帶兵之員。未有不專殺立威者。如魏絳戮僕。穰苴斬莊賈。孫武致法於美人。彭越之誅。後至者一人皆是也。今日之營弁。斥之且不可。何論於斬蹈常習故。本非軍旅所宜。才薄人微。尤以顛越爲懼。六也。總之自問全無本領。不敢罔上而謬以爲能。揣度時勢。及人心吏治。武備國計。殆不可爲。與其事敗而負恩。不如據實陳明。稟求遴委賢能。事關重大。確然自知。其不稱。至給咨不給咨。出自憲裁。非所敢期也。

致周觀察

頃得手諭。拳拳告語。不啻再三。人非木石。能不感泣。惟姪自到黔以來。澀蒙賞鑑。何忍不竭力以酬知己。無如病症日增。下血如注。精力頹敗。不能支持。且自到黔以來。直率疏狂。不通世故。不與時諧。讒間之言。成於市虎。如前日錦屏團長。帶練追賊於四灣。被傷硬說錦屏被劫。且說錦屏城內徐姓被劫。練勇越境殺賊。硬說練勇行劫。公然形之稟牘。以致大憲疑慮。批飭密查。而省中流言。無日無時。不以黎平爲謠誣。其離奇恫恍之狀。一日千態。大憲雖不爲其所惑而不能。卽大憲意欲保全。衆口難調。大憲其若之何。看此情形。必不欲使安其位。使大憲疑我。使我負大憲。使大憲無可如何。然後快於心也。語云。千人所指。無疾而死。此之謂矣。大府恩眷。豈不知感。士爲知己。卽捐糜亦所不惜。雖然。色斯舉矣。後時者敗。惟受知之深。則此身不得不私爲己有。來諭拳拳。恩誼良厚。惟立志已決。病狀日

增。無可如何。他年身健。尙可報恩。兩院前乞據情稟陳。口述倩人代書。不盡依依。

致湖南永綏廳但梓村二則（文恭）

三應向多壯士。有真實不怕死之人否。林翼欲糾集二三千人。爲勤王之師。然招募難。支給亦難。如實在有人可募。併紳士內有人才可任將者。擬回楚後設法招致。卽赴吳楚剿賊。但不怕死三字。言之易而行之實難。非真有膽有良心者不可。僅以客氣爲之一敗。卽挫矣。林翼之志如此。未知能如所願否。敬乞囑世兄代爲物色。密示爲幸。

林翼視壯勇如一身一命。與同甘苦。疾病死亡。撫卹最重。惟不用油滑人。怯弱畏縮人。每月工食四千爲準。其頭目則五千六千。其擡礮旗幟。林翼業已預備。並請選擇紳士之曉兵事。有膽識。有志氣。不顧身家。不愛錢財者。二三人爲管領。林翼到辰谿泊舟考驗。卽不取者。往返盤費。林翼必當給之。考驗之法。取石掇二百五十觔者。弓開八力者。槍礮十發七八中者。刀矛有身法手法者。能泅水者。能飛縱上房屋者。能日行百八十里者。能精製軍器火藥攻具者。能使風使舵者。最要莫如樸實耐勞苦。膽量可信耳。如得義勇二三百人。能倚以平湖北之賊。則報答君師。此心乃覺不愧。前蒙世兄助錢五百千。師弟如一家之親。需用之際。不敢作一毫虛文。亦不敢言謝。所求練勇。必乞十分可靠。有志上進之材。乃有實濟。若如近日之兵練。雖多無益矣。至於將官中。非十分知兵。十分敢戰之士。不可攜帶也。

飭郡紳緝拿土匪諭 道光己酉鎮遠任內

照得稂莠不鋤。嘉禾不生。兇暴不緝。良善不安。此古今來保國保家之大要也。本府到任已逾八月。地方匪徒。緝獲極多。惟沿河司附近一帶。著名巨匪迭次派差往緝。總未應手。皆因差役得賄縱放。與匪同一氣也。實堪痛恨。查

該匪等平日積惡窮兇。訛詐賭博。滋擾鄉民。種種惡罪。極應懲匪。並聞該辦設立皮家會名。燒香拜把。遇有訛詐滋擾之事。一呼而至。百十成羣。設遇穀米稍貴之年。隨事生風。執械坐索。大有搶奪剽劫之勢。是亂萌已伏。匪黨將成。若不及早翦除。則鄉里街市。粗足衣食之人。必致被其擾害。身家不保。細思緝匪之法。用兵用差。不如用士用民。以兵悍而惰。差滑而貪。而民則樸實可用也。若我同黨士子。讀書明理。深知地方之大害。必爲苞桑之遠謀。斷不忍漠然坐視。徒作自了之計也。且目今該匪等。僅止訛詐居民鋪戶。若因循姑息。則肆行無忌。必駸駸擾及爾等紳衿矣。爲此札委該處舉人生員知悉。照另單所開姓名。密約該處曉事族長鄉民。設計誘擒。隨擒隨送。派委妥實鄉民。持該舉人等稟帖。送至府署。每名賞錢十千文。并大銀牌一面。以酬其勞。決不失信。亦決不輕縱。致貽報復之患。惟是匪徒行蹤詭秘。耳目亦多。務須不動聲色。遇唱戲酬神。及吉凶聚會之時。或該匪聚衆賭博之地。必可會在一處。妥爲誘擒。或以智取。或以力制。或用匪黨爲誘致之謀。或用鄉民爲圍擒之計。聽爾等妥速籌議。無使一名漏網。是爲至要。本府訪得該舉人等。平日精明正派。必有一番幹濟之才。隨時隨事。相機妥辦。毋負本府一片苦心。且實於爾地方有益。但事貴慎密。尤貴妥速。勉力無違。儻該處鄉民族長。不能上緊捆送。本府立即拘提。治以通同包庇之罪。凜之特諭。

鎮遠團練章程諭 己酉

照得近來盜賊繁多。肆行剽劫。善良受害。閭閻不安。實本府一人之過。深以爲恨。本府立志除暴。必當殺賊保民。惟是賊蹤靡定。兵役巡緝難周。與其拘成法而緩不濟急。不如藉民力而先事預防。茲特酌定團練簡便章程。官不惜費。事不擾民。逐條開列於左。一、內盜宜清也。鄉村堡寨。周圍二三十里。作爲一團。一團之中。公舉正派紳耆二人。作爲團總。公舉強幹曉事八人。作爲頭人。一、苗寨中苗民。亦照此例辦理。一、董司捕務。其團總頭人。及各戶姓名。均

註明印簿。如一團中有窩戶引綫。及交結匪類。平日爲盜之人。該團長頭人。卽先捆送到官。送官之後。審係真正盜犯。必當盡法懲治。有死無生。以免報復爾等之患。如或誣攀。爾等送盜之人。一概不究。卽使爾等從前脅從爲盜。只要此時能將盜匪捆送。本府亦不追究。以免攀累爾等之苦。經此次曉諭之後。如爾等再爲包庇隱容。事發卽以窩盜論。一外盜宜巡也。凡盜匪入境。本團放信礮一聲。各戶齊執器械禦盜。並先派定人戶。於要溢處所用火器亂石拋打。仍四面協同追趕。其左右前後各四團鄰寨。聞信後。接放信礮。均各執器械撲救。並派定人戶。於要溢處所用火器亂石拋打。仍四面協同追趕。如保護得宜。盡心竭力。官長於得信後。馳往看驗。每團犒牛一隻。酒五十觔。如有坐視不救。或無故驚擾。必當嚴辦。一賞罰宜明也。團練之寨。每寨每季。官爲捐牛一隻。酒五十觔。由官親自巡閱給發。以作犒賞。能生擒強盜一名者。官賞銀二十兩。格殺一名者。官賞銀一十兩。當官給發。決不食言。決不遲延。其勇往殺賊。致被賊匪傷者。當衆驗明傷痕輕重。官爲賞銀醫治。醫治不效者。官賞銀五十兩。以卹其家。至強盜入寨。一家有事。而團中不肯盡力相助。或失事後並不追趕者。一經報案。照印簿所載戶口。按戶提究。並將本團罰牛一雙。鄰四團罰酒八十觔。以示懲警。一守望宜嚴也。凡各屬交界要隘處所。每日每夜。令每寨輪派二人放哨。俱要力壯善走之人。由頭人認識保充。見有大夥賊匪入境。卽速分途報知各寨本團。放信礮一聲。左右前後各寨團。均依次放信礮。各戶均持火銃器械。齊集追捕。放哨之人。一面進城報官。分別程途遠近遲速。重加犒賞。儻賊匪竄入放哨之人。違誤失事。該寨頭人卽查明賊由何路入境。將放哨人嚴行懲辦。本府仍不時派人密查。儻查無放哨之人。卽將團總寨頭。提比懲處。一私派宜禁也。團練之所以不能實力奉行。以民間本極貧苦。既恐費用之難給。又恐官吏之濫擾。今本府之印簿印旂。及牛酒犒賞一切用費。均由地方官捐辦。並飭地方官親赴該處團所。當衆發給。不致民間捐派一文。亦不致在城守候。儻書差土弁鄉約頭人。有私派一文者。准卽稟官提究。一私仇宜禁也。團練原爲大夥強盜而設。儻有假公濟私。藉此報復。藉此訛詐。藉此擾害搶擄者。比照強盜例治罪。至尋常鼠穿狗盜之犯。只

許稟官緝拿。不准擅殺。致干法網。一路徑宜清也。破廟巖峒。容易藏奸。賊匪入寨。多以黑夜。必先於此駐足。爾團總寨頭。先於各寨中。封閉銷燬。其山僻小路。易於通賊。任爾等公同築牆。挖濠堵塞。其河岸渡船。亦著爾團中公撥。妥實渡夫承值。儻有賊匪。由該處渡口偷渡。查出。即將渡夫照窩盜例治罪。一防範宜周也。凡寨衆壓送強盜。到官沿途經過之寨。均派人護送。以期妥協。其盤費官爲賞給。不致空勞往返。至每團丁壯。先期核算。人戶多寡。議定股分。遇盜匪入寨。以兩股禦賊。一股守望。不可全數出寨。恐致疏虞。以上各條。簡便易行。今本府不惜數千金之貲財。力爲此舉者。祇因盜賊之擾害爲可恨耳。爾鄉村堡寨紳衿民苗中。公正善良者。忍不急爲辦理。保爾身家。全爾妻子。以體本府一片苦心乎。以民衛民。有備無患。實有厚望焉。

嚴禁訟費示 辛亥

照得黎平地方。地瘠民貧。苗民尤爲苦累。本府下車之始。訪聞昔年。每因衆寨興訟。致有拖山名目。費至數萬數千數百金不等。腥穢之至。慘無天日。夫民生之膏血。幾何。何堪如此剝削。其弊皆由客店影射衙門陋規。藉端開銷。以致民苗受其愚弄。不保身家。合行嚴禁。爲此示仰客店軍民苗寨人等知悉。嗣後訟案到官。隨到隨審。一切鋪堂送案。取結之費。概行禁止。宅門以內。門印家丁。不取一文。惟書差之紙筆飯食。姑念該書役貧苦。准爾等酌量給與紙筆飯食錢文。不得格外多索。違者許爾等稟究。至客店飯賬。每因小案拖延。開銷至百金數百金以外。殊屬荒謬絕倫。極堪痛恨。嗣後爾等有案到城之民。務須開算現錢。不准客店浮冒開銷。盤剝取利。如從前積習。准爾等民苗喊稟。本府定將客店提究。從重追贓辦罪。庶幾訟累可清。民困可蘇。爾民苗亦不得因小故興訟。自取咎戾。各宜凜遵。

諭黎都佈種春花 辛亥

照得黎羣四鄉田土。每歲於播種粳糯以外。於春花一事。絕無見聞。推原其故。非地利之不宜。實農人之好懶。且爲其田主者。多因春花不得予分。亦各置之不問。本府志在教養。見此膏腴。任其荒蕪。深爲可惜。本年雨水稍缺。秋收歉薄。來年青黃不接之際。米價必昂。尤當未雨綢繆。惟此地春花種子甚少。事在創始。諒非易易。今本府爲爾農民立定章程。所有種子。均令田主購買發給。或種大麥小麥。或種胡豆豌豆。各隨地之所宜。不拘一定。俟成熟後。田主准分十分之三。不得多取。除傳各鄉紳耆面諭督辦外。合行勸諭。爲此示仰闔郡民苗人等知悉。爾等田主務於本年閏八月初一日。購買種子。佃戶於九月初一日以後。各赴田主家承領種子。一律播種。熟時收分。不特佃戶之口食無虞。缺乏。抑且來歲之糧價。藉可平減。從此種子有餘。接年而種。家有蓋藏。人無饑饉。是本府所厚望矣。本府於秋冬查閱卡棚。考驗練丁。點查戶口之便。卽親赴鄉間。履勘田畝。如田主不能董率佃戶。給發種子。將田主責罰佃戶。領種而耕作不力。並將佃戶責比。其遵奉教令。上緊辦理者。本府查看之時。定行頒賞。爲功爲過。聽爾士民之自取。各宜凜遵。

嚴立規條諭 辛亥

照得興利除害。所以安民。黎郡盜風之熾。民生之惰。業經本府督辦團練。勸種豆麥。此外尚有未除之害。未興之利。及前議所未盡者。合再定立條規。開列於左。一。撩錢賭博。致盜之由。責成牌長團長。不時巡查。有犯者稟官究辦。一。客籍新來。此輩非勾結爲匪。卽重利盤剝。最爲地方之蠹。嗣後一律禁止。不准招留。違者公同稟官。驅逐出境。一。種植雜糧。無論種麥種蕎。種豆種菜。聽民之便。不拘一定。惟來春務要一律青葱。野無曠土。責成田主佃戶。互相勉力。儻田主不給籽種。致田土荒廢者。定行責罰。田主已給籽種。而佃戶怠惰未種。致田土荒廢者。定行責懲。其城汛營馬。自有馬廠馬棚。如兵丁縱放踐食。及民戶牲畜踐食。一體送官究辦。一。重利盤剝銀錢。利過三分。及放穀一挑。

勒還二挑。因青黃不接。俗名斷頭穀。以致窮民終歲力作。難供欲罄。除訪拿重辦外。准受害之人。隨時控告。官爲嚴治其罪。其田主不惜佃戶。放借斷頭穀。加倍勒還者。譬如剜肉醫瘡。害必及身。尤當嚴懲不貸。一、黎郡山場。惟杉木油木栗木橡木。最關生計。貧富皆可取資。各處俱要蓄禁。不得盜伐。加意補種。不准再有童山。違抗者稟究。一、鄉間銀錢甚少。多以米穀交易。須作市價。不得勒措抵算。違抗者告官提究。一、各寨新設卡房。如查無巡守之人。定行責懲。一、鄉正團長。專司盜賊之事。不准干預詞訟。一、現在各戶所出練丁。專爲本團捕拿盜賊。各保身家。並非抽丁征調。毋庸疑慮。儻其謠言阻撓。致惑衆心者。定即提究。以上九條。務各實力遵行。有則戒之。無則加勉。慎勿以身試法。致干究處。凜之特諭。

申諭保甲團練章程 壬子

照得黎郡所屬廳縣。界連楚粵。地雜民苗。盜賊橫行。劫掠無忌。爾士民苦之久矣。本府上年七月下車之始。殫竭血誠。爲爾士民除害。親帶委員紳士下鄉。飭行保甲團練。賴爾士民力。各鄉董勸行之。期年所獲。逾三百人。盜賊衰息。居民頗安堵無恐。然立法不密。則弊生。興利不盡。則害伏。查各村寨間。有不能實力共保。團而不練之處。爲此再三申諭。復立條款。委員紳士。復爲編審董勸。期爾士民曲體本府心。各爲身家性命計。同心實力。依條款遵行。以幾長治久安。則地方幸甚。本府幸甚。一、卡所以盤查匪徒。宜晝夜防守也。去歲各村寨設立卡房。由鄉正團長輪選丁壯。晝夜防守。或十人八人五人不等。均出具甘結在案。今本府查各村寨間。有玩而不守者。有守而人數與結內不符者。亦有徒手不帶鳥槍刀桿者。至夜間無人防守。各處皆然。不知自誤。誤人殊堪痛恨。嗣後除守碉守堡。另示章程外。爲此責成鄉正團長。必每日清查守卡人數。夜間即以輪流支更。必各帶鳥槍刀桿。如有玩不守卡者。查明每人罰錢五百。人數不符者。照此議罰。徒手者每人罰錢三百。夜間不防守者。每人罰錢五百。所罰之錢。交鄉正團長

收具備用。不受罰者。准指名稟究。特須公同查明。不准妄指。致干勒索之罪。鄉正團長失察守卡。及縱容包庇者。經官查出。加倍罰錢。一各村寨經費宜籌也。食足用足。乃可言守。去歲行保甲團練。鄉正練長按戶量力派捐。存於各鄉各寨。以備公用。今本府查各村寨中。除已有預備外。尚多不籌經費者。大款輒以人心不一。小款輒以戶口不繁爲辭。不知平日經費不籌。一遇警變。食用無出。人心渙散。受害不小。且按戶分派。所費無多。存濟急需。所關甚大。每慨鄉愚無知。一味慳吝。試問盜來劫殺。財何有。性命何有。悔之奚及。細查保甲團練清冊。大款戶口或數百數千不等。小款亦有二三十戶。或百餘戶。大款派捐。固自易。即以小款論。百餘戶中有田地及經商者。亦必得二三十戶。卽此便可按戶量捐。況款小則出練少而易給。嗣後責成鄉正團長。除窮民免議外。均按戶量力派捐。或穀或錢。交本寨殷實鄉正團長公管。存具備用。違抗者稟官究治。侵蝕者加倍議罰。一稽查編冊。宜嚴明詳備也。去歲各村寨清查戶口。已給印簿填明。一存府署。一存鄉正矣。今本府查各村寨尚多漏戶。或以早日犯竊。及習慣爲盜。不安本分之人。鄉正團長多不能與之同款。或以族戚之故。容隱不忍逐出。不知編聯保甲。正爲此輩而設。若使成爲漏戶。彼反恃無稽查。現因保甲團練嚴緊。伏而不動。然舉報不盡。將來必至肆行無忌。尤不可不嚴以預防。此次發印簿。責成鄉正團長。逐一再查。不准遺漏一戶。此輩於取具甘結後。一體註明冊內。寫自新二字。或寫察看二字。或寫游惰二字。如一二年真能無犯。則去之。他若添新幼丁及病故者。亦須註明。幫去者註明某日幫去。幫至何方。幫入者註明某日幫來。幫自何地。作何生業。亦必詳註。又查大戶餘丁多遺漏不載。此次須一一清查。悉開列冊內。平日鄉間集衆賭博。及展轉招募外人種地。盤踞山中。亦宜查禁。似此則稽查密。戶口清。匪徒無自容矣。一守禦諸法。平日宜預定也。有團不練。與無團等。操演之法。烏槍在前。刀桿在後。烏槍不精。則臨時手顫。發必不中。一發不中。勢必棄槍而走。刀桿手亦因之而驚。故必精烏槍。以護刀桿。刀桿不精。不但不能近賊。烏槍手無可恃之人在後。其技雖精。其心尤怯。賊匪突來。亦必棄烏槍而走。故必精刀桿。以護烏槍。此在明白大義之鄉正團長。平日於款內。擇一隙

地。大款選四五十人。小款選二三十人。或於三、八日清晨演習。給以飯食。並與衆講明。賊來我們地方道路。我熟彼生。賊衆裹脅我們。非親卽友。大家齊心守護。大家齊心救援。大家齊心擒捉。他如何能對我。只是我們一走。賊便乘勢慘殺矣。如此演習。如此講明。人人奮勇。人人諳練。足以自保。亦足以共保。又平日必擇一二謹實精明之人。爲巡丁。臨事用爲探報。一值有變。必要聽清楚。方不誤事。鄉正團長等分隊統率。總須靜鎮嚴肅。鳥槍等器。不准輕發。自守往援。須據險設伏。以計謀相取爲上。如賊離寨不遠。往援必分練自守。往援之練。須帶大旂一面。上書某鄉練勇。有便與賊衆分別。一調遣須用傳籤遞信也。本府前經製造傳籤。分給各處鄉正團長收存。一遇盜警。卽從該處發籤。籤上註明盜自何方來。互相傳遞。以便各處堵禦。就近各團聞信後。卽率練飛赴聽候。派遣遲誤者。稟官究治。旣獲盜賊送官。亦用傳籤遞解。籤上註明盜賊姓名數目。獲盜何人。起解何時。護送若干人。經過各寨地名。亦必開明。以便照籤接解。接解之處。亦須註明時刻。護送若干人。遲誤者。稟官究治。然獲盜處之鄉正團長。總須得一二人沿途長解。庶不誤事。以上五條。簡便易行。於上年七月初次頒示條款外。更進一層功夫。除盜安良法云備矣。爾士民其實力實心。遵行毋怠。本府自到任以來。無日不與士民相接見。其有關係保甲團練之事者。無不立時傳入書房。詳悉訪問。切實講究。卽白丁苗頭。亦得侍立左右。口講指畫。所請無不立刻施行。送盜來城者。卽時審問。卽時頒賞。凡鄉間爲難之處。無一不爲爾等作主。設法究辦。爾士民業已共見共聞矣。若不卽此時大家齊心。斬盡盜根。更待何時。爾士民務當各矢天良。永守條例。切實奉行。以保身家。以圖久遠。毋負本府再三申勸之苦心也。勉之。凜之。特諭。

移府廳州縣偵探會辦文 癸丑

竊照

本府奉大憲奏委兼拿內匪。查內匪以黃平之高禾。（卽高鵝。）九松當垢台拱之老薄也。黨烏沙之丟坐。（

卽條坐。丹江之架生也。生爲最。而高禾等一股。尤爲兇狡。急應嚴辦。以淨禍根。本府迭次詳訊現獲盜犯。供稱該
犯等上年夏秋間。猶在栗樹坳插秧收穀。及迭次在棉花坪望坪排申排養等處。會合行劫等情。歷歷如繪。查所供
地界均係黃平台拱丹江之地。緝拿上緊之時。到雷公山暫行潛匿。總不過三五日卽出。是賊匪雖流徙無定。要不
能離村夥以求食。且同夥數十人聚而不散。其接濟米糧火藥之窩戶。固屬罪不容誅。良懦之苗民。畏盜燒殺。往往
被其欺壓。容忍不言。卽報之士弁通事寨頭。亦不轉報官長。且恐有不願其報者。此賊匪所以出入自由。莫可誰何
之實在情形也。上年臘杪。派員帶練。久居台盤。本年正月十三日。本府行抵凱里。十五日申刻。放哨之練二十餘人。
聞長坡寨先日已有賊匪跟至。大營對衝山內遇賊。膽敢抵抗。拒傷練勇。并隨行長夫。訪聞是夜賊卽竄至丹江之
尖山地面。後經折回。十九日二十日。在烏霞溝。二十一日在台拱雞箬。近經台拱黃平清平趕緊會合。出外巡緝。而
又不見影響。此又高禾一股。近日出沒無定之實在情形也。本府細意思揣。賊之出沒無常。則米糧火藥之接濟宜
嚴。其要一也。賊以夜行。多行僻路村寨。苗民畏其兇悍。力不能禦。姑爲隱忍。然力不能禦。而見賊卽可速行飛報。務
須剴切曉諭。其要二也。各地方官責成土司通事寨頭。如見賊不報。卽嚴行提究。治其縱庇諱匿之罪。如報明賊蹤
屬實。只要指引兵練。追剿正賊。無論有無斬獲。先賞保信人銀四十兩。其要三也。各地方各選派差十人二十人。重
給盤費。四出訪探。一見賊蹤。卽飛信報知帶勇委員。限信到之時。拔營山徑險僻。林菁幽密。限日行四十里。尙非百
里趨利者可比。如委員逗遛推諉。許稟。希移。知查究。但須探實指引。卽一例頒賞。其要四也。賊聚一處。非剿不可。地方官
探實指引。其剿捕之利鈍勝敗。均惟本府任其咎。惟查有賊而不報。經過而若爲不知者。則爲地方官之咎。萬一賊
匪聚而偶散。則又可由地方官趁勢緝拿。所有要犯年貌住處。父兄妻子有無。均經迭次開送。卽行分別購拿。其要
五也。至烏沙羣盜。現獲過半。仍留黃千總帶練駐守搜緝。旣免竄匪之會合。又期逸盜之盡淨。其前次迭次之逸盜
名單。卽希貴府廳。飭該縣州。一體上緊。總以盡淨爲望。其要六也。高禾等一股。行蹤飄忽。由台拱可下擾清江。并擾鎮遠府縣

及黎平一帶。兼可轉擾都勻所屬。由丹江可上擾都勻。並可擾及台州。務須各處一體嚴防。其要七也。爭論地界。各分畛域。此土司胥吏之俗見。譬如粵匪到楚。總以現在官吏之能防剿與不能防剿爲斷耳。貴州廳該州縣當不以土司胥吏之言爲然。且憲德高厚。憲意嚴明。總以除盜爲本。以獲盜之多寡爲衡。其論疆域分彼此者。恐轉獲咎。其要八也。合就移知札行爲此。合移札抑貴府應希該州縣務即趕緊示諭。斷接濟。勤偵探。信賞必罰。編甲齊團。嚴防會剿。一面跟定賊蹤。一面飛報稟知。如日後查出土弁通事寨頭。見賊不報。經過而佯爲不知。或被劫而姑爲隱忍。本府惟當一面行提。一面稟請大憲。將土弁等嚴爲懲辦。總之盜匪一日不除。地方一日不安。即文武官員。又何能回署辦公。是所望於同心協力矣。

札開泰縣魏令 癸丑

本府現辦苗匪。所帶兵練業已分途伺擊。風聞粵西融縣一帶。土匪蜂起。與黎平相隔咫尺。不可不嚴行防範。查該處各堡及苗寨情形。該縣上年隨同本府辦理。已知大概。所有舊日派委地方紳士姓名。該縣亦盡相熟。雖地系粵防。然本府未敢拘泥坐視。合行札委。札到該縣。立即持帶本府團練總冊。按團按款。傳集守禦。并酌帶總局銀兩。獎勞苗民。無使官民兩歧。休戚不顧。是爲至要。留防之練目六品軍功王世章。智勇兼優。可備緩急。宜與之妥商。七品軍功頂戴南江吳紹元。八品練目七埋巖梁永昌。亦頗謹慎。均可妥爲調遣。用兵以得民爲先。安民乃能禦侮。毋使胥吏兵練。擾害吾民。尤須確探實情。切勿張皇急躁。驚衆心而挫民氣。切切。

札開泰縣高令

本府現辦內匪。隨帶練勇業已分起派去。伺便雕剿。本日據丹江營廳函稱。探得初二賊匪。已至雷公山下番祥

脚鳥一帶。恐即徑竄清江古州。查清江古州。爲黎平府縣連界之地。賊如下竄。一二日即可由深山老林之中。竊入黎境。昨已迭次飛函告知多任。并函諭各紳士矣。多署守來函。傳聞融縣匪徒蜂起。南路須防。本府業已派委魏令前往堵禦。勢必不能兼顧北路西路。而現在內地流匪。亦須嚴防。查北路從開泰苗光起。至府屬平略止。上年夏秋間。已派姜興國李光茂專司防範。清江之事。并有各鄉正協同辦事。北路兼西之烏柞拗至高微一帶。系扼守青山界老林要地。凡台拱黃平之盜。竊入黎境。必由青山界朗洞一帶而來。此地山勢最大。歧路尤多。上年夏秋間。因鎮遠一帶。頻有盜警。特派委員張禮度。帶同紳士楊日暄。廖文善。吳立本。新賞軍功吳光榮。於各苗寨要隘。舊設卡房。外。新建碉樓。并新添埋伏處所。計又不下數十層。并有各鄉正協同辦事。此次又專札吳立本。吳光榮。加意董辦。該處苗民淳樸者居多。必肯用命。但須官爲董勸。使之不懈耳。現在魏令已派赴南路。勢難分身。合行札委。札到該縣。立即由古州便道。先於高微一帶。會同已派紳士。酌帶銀兩。獎勞苗民。攜帶本府保團舊規舊冊。按照上年楊廩生日暄所指。派設伏處。所逐一申警。務使苗民知官之意。在保愛。并非煩擾。尤須嚴約隨丁。不帶差役。與士民同體同心。不使其私受苗寨粒米分文。則苗民感德畏威。出力更倍。并須嚴飭各文武委員。所帶兵練。毋使擾我良苗粒米分文。如有不遵舊約。貪鄙不肖之人。本府一有訪聞。無論文武委員。立即稟參嚴究。本府以防範地方爲急務。業已據情稟知大憲。札到速即遵行。務須不擾不驚。官民一體。是爲切要。

■ 凱里紳士團練諭 癸丑

爲札委勸諭事。本府奏奉諭旨。委辦防堵。查有革夷高禾九松當坵一股。時時出沒於凱里地方。急須聯絡榔衆。合力剿捕。爲此札委該紳士。攜帶銀兩。前往劉淳兩土司地界。親到各寨。逐一勸諭。并將願出力者。開冊稟知。一面分賞牛酒。務須一心一力。除此羣盜。以保苗民。該紳士之飯食盤費。均系本府酌發。毋許絲毫擾民。切切。一發去印。

冊將某寨若干戶。十戶一牌。立一牌長。一寨一團。立一團長。數團之中。設爲總團。立一鄉正印冊。一本繳府。一本存鄉。交鄉正手。一遇外賊。不要明與打仗。只先期報信。約會各寨。夜間埋伏。用計襲殺。或用火攻。所燒燬之民房。本府出銀百兩修補。不累民也。一遇外賊。即時遣人報之官長。如能指引對敵。卽賞銀四十兩。如僅止報明。不能指引對敵。賞錢五千。一鄉間苗民殺死一賊。只要是高天九松蕩坵一股。每名賞銀百兩。生槍殺死一樣。如得高禾九江。每名賞銀五百兩。一各寨如有實在敢死有武藝之苗民。本府招爲練勇。另給工食。但須實在敢死。實有本領。不得冒充。一各寨只保各境。不派令外出。以免征調之煩。一各寨明白曉事。肯齊心者。先賞牛酒。以示鼓勵。以上各條。姑言大概。爾紳士等。其速卽曉譬。剴切言之。務使苗民。共知本府愛民除害之實心。地方永保太平。幸甚幸甚。

撫鄂書牘 (1)

致鄭譜香 (蘭) 乙卯九月

羅山方伯之師已到。林翼派兵到蒲圻迎戰。或言只此三千九百人。不宜先進。然我是主人。盡以難事諉之客兵。非也。且廉恥安在。成敗利鈍。古之賢者。尙不能逆觀。勝當戰。敗亦當戰也。賊勢之注於南岸者。約五萬人。羅山之捷。散去一二萬人。其聚於蒲圻者。約三萬。聚於金口者。不過三千。而下游之劇賊張子朋。已領其船。自九江上駛。楊之水師及各水師。日來索餉。而李鶴人又另索四千。故本月所費口糧外。另費一二萬。其實多留久留。費乃更大。且所清補者。亦是前欠。非例外也。弟思餉欠將三月矣。欲水師成功。非給以一月半月之餉。不能多備米鹽。久戀戰地。若此二月之中。藉羅山及塔公之寶勇。以次攻復武漢。則鄂事猶可爲。若羅山因餉絀而頓兵。或水師因餉絀而不能

進。卽進矣。又不能久駐危地。則日久更難爲謀。卽武鄉之兵機。純陽之點化。亦嫌後時矣。敬乞速籌急解。至感至要。弟營新集仁鳳。兵強而將稍弱。楊之彪營。將則強矣。此外亦有兵無將之營。大致尙可用。惜乎以苦心挑練之勇。一潰於金口。再潰於麥山。十去其三。又從而汰之。近日不能如前此之強矣。從前打金口。打八步街。打蔡店高廟。何嘗目中有賊。麥山之潰。何嘗非有心。可憾之至。然有羅山未必不可戰。玉鎮軍之勇。多予保票。亦或可戰。給以餉項。速飭進取。乃今日之第一要議。故近日之乞餉。羽檄交馳。非得已也。能保九月十月無虧。乃有望。過此更難。他省亦不能給也。

復莊蕙生觀察（受祺）丙辰三月

得書披讀再四。適與營官言軍事。座中傳觀。有泣下者。知公之所憂者大而所慮者深矣。林翼與閣下均是好漢。未必能擔當艱距。而值此艱距。卽欲辭避。而亦有所不能。知我者惟公與澹村仲遠。及同事數人耳。初八日羅山其頽。弟先二日卽駐其軍中。與迪庵商定。仍山窰灣駐軍。洪山代領其衆。是日寅刻。此軍回洪山。而羅公已刻卽逝。弟與握手而訣。此老道義剛大。言不及私。卽危困而堅毅不撓。喃喃嚶語。皆軍國民生之事。可入祀廟廷之儒。不僅名將也。賊因林翼久在洪山。日夜攻我營。礮子直墮帳中。幸將士尙能堅守。初十日約會迪庵助我四營。林翼自派六營。以全力破其新壘三。填其新溝五。殺賊逾千數百人。而我軍之鏖戰。則自湘潭岳州以來。未有如此之苦者也。林翼一軍。以仁鳳爲強。鳳之將爲周得魁都司。大子中腦。不可救藥。該員每戰必先。是塔公舊部。隨林翼二年。大小百餘仗。痛憾何如。此等事任是如何思議。不能避死。十四日賊壘又成一座。其大倍前。其高逾丈。及此不破。又難爲力。時會所逼。難於回慮。却顧江水已長五尺。非丈許。則河渚不能淹沒。非丈五尺。不可用計也。水師營中。人才頗盛。有鮑超者。目不識字。而嚴明曉暢。勇敢尤其餘事。弟已言諸楊軍門。乞渠往楚另招三千人爲陸路。如武漢可得。林翼

誓以此身此心。堅守二城。卽饑饉師旅。期以三年苦守。如竟不可卽得。迪庵豈能久留。鮑公亦後起之傑也。又有劉峙衡者。與迪庵埒。迪欲之。弟亦欲之。迪公天姿近道。木訥厚重少文。蓋絳侯也。其思念滌公欲援江西。是血性中人。林翼不遣去。則已。遣去則須以六七千人畀之。蓋十萬悍賊。不易剿辦。若分枝。則兩無益而徒失良臣。不可不慎也。湖南允代林翼辦軍械。招新勇。而屬我自謀其餉。林翼之窘於正餉外。另有卹賞三萬餘耳。總之虛實誠僞。公道在人。閣下之心。豈私我哉。盡力以謀事。此志斷不可懈。

致周笠西（樂）丙辰

理財之道。仍以得人爲先。以閣下心術正大。又旣念時艱。沙市之釐。特以奉勞。擇人先品。剔弊以漸。其地方利弊所在。隨時條列。以備講求。士紳之才品兼優。可備楚國之寶者。尤須敬慎以訪求之。得一正士。可抵十萬金。天下事固患貧且弱。楚禍尤甚。而所以貧弱之故。則正氣不伸。而僞士得志也。求才是先務。理財亦須先求才也。鑄臣樹人。菊人三君子。均經理營務。薦賢以救我楚。兄之功也。武漢終可力復。年前血戰攻堅。傷我水陸千七百人。而士怨未伸。蓋攻之之難。與戰大異。而我師亦可謂出力矣。

致胡蓮舫（大任）王孝鳳（家璧）丙辰

沙市之鹽行。意主於我。頃得笠西信。以每串十九文歸行用。弟思揣再四。是千金之本。月可息千金。利權大重。盡歸之於商僉矣。譜與蕙本無短長。可持。譜之抽用作公費者。鹽務乃官府之所肥。惟弟無分。先岳陶文毅前督伊莘農。不取用於鹽。此外凡吳楚之官。其不倚牢盆爲生涯者。鮮矣。蓋日食以千萬人計矣。譜之爲此。亦前此太守及他處云云耳。利之所在。卽爭之所在。設無此項。又將巧取而害仍歸於國計。於公家耳。譜非利此之人。欲事之成。而姑

以餌旁伺之口耳。至外間抽取。或多五釐。亦只問其爲公爲私。充餉與否。宜昌水運之鹽。利通兩省。陸路之入行者。可抽用。水路之不入行者。可至鄂至湘。官爲權之。不得以權委之於僧也。利歸於官。尙有逼迫入公之一日。只在擇任一二人。則利歸於我矣。利歸於僧。則上無訪察之權。統馭之術。豈非自失所憑哉。且以利爲利。當權子母。試以千金衡之。凡鹽行之以千金爲本者。每年得息三千金。卽足矣。利市之大。無過於此。若以路過之鹽。任其抽行。用而無制。奪官之利。旣病於現在之餉。擅自以爲制。尤苦於楚北之民。大不可也。如以此爲得計。弟當改弦撤帖。乃可弭謗以釋爭。否則異日楚北之民。其留貽禍根。由我而起。我本武漢罪人。罪尙未贖。更增一大罪案。亦不可也。此事出於弟之創舉。有明之季。始造根窩。昔年嘗笑其謬。今思之。蓋亦弟等急切求餉。留此根窩。爲異日弊藪乎。或未盡然乎。古語云。利不十。不變法。誠爲老謀。尙乞通盤籌度。弟之始意。必欲爲此。誠以求餉也。辦事不可有成見。惟期事之有濟於公理之必歸於是。利之必得其平而已。陳孺子之割肉。可宰天下。蓋言均也。官有私固不可爲訓。商之擅利行私。壟斷獨登。勢必取我現有之餉。而盡歸烏有。豈非有貽伊戚哉。幸深籌之。此事如弊多利少。有礙於現在之大餉。弟卽停帖。及此時猶可爲也。意創於我。有過則當改之。吾輩心跡。當如青天白日也。至奏案與現辦章程不符。非弊也。少言之。以斯待外餉。免部詰耳。若弟主政。則並一奏而無之。此非譜與蕙之短長也。軍事少閒暇。而此事恐辦理不平。日夜懸懸。特此縷致。此逆之敗。迪庵馬隊之功。弟無尺寸之力。將士之功。在湘潭岳州之石。

致周笠西 丙辰

弟處之窘。諒在意中。上半年尙賴鹽課。今則查不可得。弟前此欲兄留楚。以拯斯民。蓋楚民之阨。是近六年天下所獨也。憫念之至。頗思力圖補救。然大官一味偏好虛詐。小人逞志之秋。欲以碩果回春。是所謂一薛居州也。繼思一意東征。只得置武漢於不問耳。如弟者才力不逮中人。心志向上。持其意趣。尙不大謬耳。居北而自愧自艾。不如

臨陣殺賊。必得死所。蓋藏拙之道。可倖免一生之罪戾。若委曲艱難到底。一事無成。則身名之敗裂。人亦不諒我心。其如後世之譏何。由前之說。取廖鑄臣王麟洲足下賀月樵文任吾羅仙可牟皓升鍾雲卿方卓然黃虎卿諸公之。已可倚任者爲之倡。然後各從其類以茹進。不過二三年。正氣必伸。楚地可大治。澹與薰與譜。固弟所深信密保者也。然事權不一。邪氣方張。不如弟之繼念專意兵事。從賊所向。與之終始。卽今潰敗決裂。而我之名自在。我之志無愧。最便宜者。莫如此法矣。至楚北兵事。除迪庵最深固不搖。然所將只五百人。爲至精。其餘四千人。又其次也。撫標現在萬人。應汰者有二千人。（卽近日所招致守青山者）如何紹彩之膽力。亦一時無兩。然尙不能如迪庵也。張榮貴勇而少學問。丁篁村勇而廉正。無條理。周芝房正而嚴厲。閱歷太淺。李景湖才情紀律過人。而臨陣未能衝鋒。義渠細密而膽氣稍遜。部伍最整。鄒叔明樸質。而見識游移不果決。又有鮑超者。英鷲無匹。而天姿太鈍。凡弟所用之將。在北岸。則超羣絕倫。在弟視之。可戰也。未盡可恃也。又如水師勇敢有餘。然須用得其法。矢以小心。乃可不敗。其本領亦在能勝不能敗之列。此皆弟一二年精思而得之。無一字虛浮者也。天下事大難。幼年精力。半耗於八股。及時俗應酬。是以學識太小。本領太低。力不如志。爲可惜耳。我鄉自嘉道兩朝以來。顯宦如趙文恪陶文毅嚴樂園先生。均有可傳。其後如李如羅。則無所表見。可傳者亦未能如晉之陶侃。唐之郭裴。宋之韓范。司馬李伯紀。況其不能自立者耶。精力學力。殆是下等。豈不自憾。老兄念我最深切。何以教之。北省紳士。近日只得一人。許金堂頗淳樸。不苟且。亦無虛浮名士之派。惜年已五十九矣。

致胡蓮舫周笠西王孝鳳 丙辰

軍中極匱。敬乞速爲接濟。此軍頗強。頗知恥。並無鬧事之人。天下惟要臉者不招人愛。而不要臉者偏愛之矣。自來家庭亦然。假如二子同居。一子不肖。父母兄弟鄰里。乃愛之惜之。周繼之一子勤苦。謂其尙可緩也。亦大可笑事。

卽如江西之援軍。及滌帥舊留江西之部曲。在今日總算強兵。然百餘日無餉矣。若吳若皖之兵。以十餘萬計。未必如此之厄。亦可慨矣。此時愁病日深。夜仍數起。肌膚欲削。心緒不佳。

致鄭小珊少卿（敦謹）丙辰十一月廿五日

武漢倖復。然已遲鈍矣。頓兵城下。實已一年。陷賊之久。則二年矣。且自軍興以來。四年之中。武昌三陷。漢陽四陷。國計因此而緇。民力因此而凋弊已極。此番欠餉。已積四月。其得倖免潰失。兩城同復。則是天之憐楚。非人所能及也。現已派兵直下。以期南岸肅清。大約陸師交李迪庵統帶。水師交楊厚庵統帶。馬隊交都直夫統帶。均有餘力。所不足者餉耳。如大廷飭一強有力者。專司餉事。不使湖北之兵餉。爲他人所奪。則此後或有可爲。所最可危者。湖北將文武。無一堪戰守之才。刻下倖而得此。而可慮方長。計近五年以來。鄂省所費國帑。以千萬計。而兵將文武尙不能戰。上年武昌失守。城中兵勇萬二千人。賊在十里外。遙樹黃旗。城中已絕城盡散。所餘者僅陶中丞多首府并五六人耳。頓足搥胸。不死何待。又如廣濟之役。楊霈亦統萬餘人。敗賊回竄。不過二三千人。一潰再潰。直奔八百里而後止。此奔潰之衆。與其將領。至今安然無恙也。又如本年襄陽之事。土匪三百餘人。府縣率萬餘人禦之。見賊卽奔。不一月而脅從且二萬人。非馬隊二百。唐義渠千二百人。趕緊赴援。則直不可思議矣。湖北文武兵將。大抵如此。所以然者何也。將不得人。不勇不廉。不知兵略。若夫兵則天下之人皆可用也。有不可戰之將。無不可戰之兵。有可勝不可敗之將。無必勝必不勝之兵。此兵事之大較矣。今年收復。與四年滌帥塔帥收復又異。昔年只九江安徽有賊。今則江西八府。僅復袁州一府。此外七府未復。而七府之賊。均可與武昌通。蓋武昌一府。與江西之義寧武寧瑞昌。處處毘連。萬有不虞。不必多賊。而兩城仍恐不保。蓋習成若性。恬不知恥也。至省城淪陷已久。文武將官。視紀綱法度。漠然無動於心。所謂悍然罔顧者。現已勦去約二十人。衆怨之府。其以我爲僑矣。然應勦者何止此數。揆道法

守蕩廢已久。蝕國虐民。視爲本分。設歲大飢。民不堪命。揭竿而起者。蓋不必舉。匪而吾民亦將盜弄潢池矣。又北岸川楚無籍游勇。殆萬餘人。以掠民食爲生。幾何不窮且盜哉。大抵游勇之患。法在慎之於始。尤在慎之於微。其投効軍功。大半無額。妄報八百。實無百人。即使足額。領餉之後。見賊卽潰。潰後卽又顧之也。仍可領餉。軍事無律。莫楚甚矣。其弊在司兵政者。不求將而先求兵。譬之披衣裘者。不提其領。漁人之撒網。不挈其綱。且禁之勢將自斃。已今日之小事。卽異日之大事。今日之小盜。卽異日之大盜。今日之土匪。卽異日之流賊。易慎童牛之牯。尤戒履霜之漸。蓋誠鑒乎此也。林翼勢必不能久留於鄂。林翼之力已竭。神已疲。而民生之困窮亦已極矣。武漢豈可再失耶。侍在此一日。必劾貪吏怯將。所謂一息尙存。此志不懈。然亦有必不相容之勢矣。如率師東征。以目下兵力攻城。必不能取勝。而野戰尙有七分把握。猛將尙多。廉將亦不少。所慮者鄂境再有小警。則凡秦晉巴蜀之餉。必無挹注於我軍者。卽予之者。能以奉旨爲爭。而奪之者。又以事關緊要。從緩補措爲詞。且已奪之後。卽必不可得矣。爭之亦徒貽宵旰之憂。而失國家之體。然亦必飢而已知。如分兵遣將下剿。侍力尙能及此。本省之餉。不能籌十分之一。以歲飢民困被擾太久。且太多也。大約本省之力。不過養勇七八千人。而刻下侍之水陸共二萬餘人。分剿分防。一時實難盡撤。馬隊三足二千。允推精勁。月須二萬。其餘本省兵若勇。尙二萬餘人。戰則不可恃。而滋事有餘。亂萌方卜。是以僅養八千之力。而養五萬人。奈何其不飢且困也。凡此可憂可慮之事。積鬱於中久矣。無可與言者。而鬱結更深。老前輩與仙舫老伯愛我最深。何以代籌。雪帆留心世事。亦可密思。侍耿耿不寐之衷。可否乞代致樞老。爲我一籌。則東南幸甚。武漢爲荆襄之咽喉。荆襄爲南北之關鍵。卽如近日收復。則京銅京鉛。亦可設法挽運。今日天下之大計。以保鄂爲要。譬之鬪者。一犯手而卽扼其吭。則顛仆在卽。然則武漢之必應設重鎮無疑矣。廷議以爲何如。侍五月以來。瘡痍徧身。不啻百孔。八月至今。痢症久延。日夜十餘次。苦於口不言病耳。蓋義不能言。且不忍言。縷縷奉告。

致鮑春霆游戎（超）丁巳

去年奏定以弟改帶陸勇。已蒙俞允。今擬以弟前往湖南招勇。弟可先選將官三員。每人可將五百人者。先擇其勇。次擇其才。尤須深擇其品。預先到營而議。異日即以爲營官。勇由彼招。必能得力。募勇之法。兄處卽備札及咨與銀。先行遣回湖南之道州寧遠江華新田。招集勇士到省。約計一月之後。弟卽兼程前往長沙。逐一挑選。編定隊伍。計九十月可以到鄂。到鄂之後。訓練一二月。乃可大戰也。弟除三營外。另招三百二百人作親兵。而弟實統三營之事。約計精兵一千七百八百人。兄再以強壯敢戰之仁營副仁營寶營鳳營。共二千七百人。隸於弟標下。已約四五千。人矣。則所向克捷。必成大勛。一宋國永已改營官。瞿定國亦改營官。此次可選勇敢特著。兼有才子之營官三人。一哨官爲最要緊之事。必須十分可信。十長管十人。十長得人。則全營皆可恃。兄思陸師難於水師。水師一哨十餘人。多則四十五人。哨官有膽。則全船之人。皆無可退逃。舵工頭工皆有膽。而一船之人。萬無逃路。亦無退法。陸師之稽查約束。難於水師。然亦有簡捷之法。營官哨官不逃不退。已得十分之三。假如五百人六百人之營。放哨官五人。副哨五人。旣已精選哨官矣。哨官又各選十長。可信者十八。十長管十人。只要同隊有可信者二人。則其餘七人均不能跑。何也。出隊不過六七成爲定。一隊不過六七人。有三人膽大。則其四人不能不同行。卽有退縮。一查而知。打三五仗之後。膽小者亦變爲膽大矣。總之治兵在提綱領三字而已。擇營官擇哨官。又擇十長。則萬無不勝之理。一口糧章程。本營與滌帥舊章。大致相同。可飭營官來鈔領一分。一軍械帳房。均一一自製。然糧臺近日已造有湖南精緻之軍械帳房。儘可領用。惟斧鍬須自行打造。須事農人之樣。莫學做官人所造之樣。乃可適用。一經費先可每人日給百文。到成隊之時。卽速來鄂操演。到鄂之日。按章支付。一經費可先帶一二千金到楚後。兄再付萬串。一每營兵額之多寡。至多不得過七百。至少亦必須五百人。乃可出隊。太多則稽查不周。照應不到。又不能多分枝。以營官不能分爲二路也。太少則力單。五百人出六七成隊。有三百餘人。儘可打仗。若三百人一營。卽太單矣。一幫辦以人品爲先。而經手帳目銀錢者。尤爲緊要。每營須二三人。乃可照料。此事最難。營中有壞種。萬事皆廢。而奸猾生

盛。花言巧語。媚骨逢迎。尤爲萬分可惡。一勇丁以山鄉爲上。近城市者最難用。性多巧猾也。一。百技藝皆可爲勇。農夫獵戶尤妙。惟書辦差役。斷不可爲勇。亦斷不可招入營中。營中不能無裁縫剃頭之人。另給工食。不必冒勇名。入勇冊。一。古人募兵。琵琶腿車軸身之式。取其多力也。又陶魯於六七萬人中。定爲標式。挑入格者不足五百人。已橫行一省。建立奇功。專挑多力之人。亦是一法。然終以膽量爲先。隊伍爲上。多力者亦可備一格耳。一。擡槍大礮易學。鳥槍非一月不能學。打獵之人較易。一招勇以道州寧遠爲上。湘鄉亦可。江華新田東安等處次之。如他處有勇士。亦可十取二三。而總以一方一縣之人。同在一營爲宜。取其性情孚而言語通。則心力易齊也。一。川楚不和久矣。將是蜀而勇是楚。則川人不過五人六人。至多十人。恐其終必不和也。一。營制如每營用七百人。則作爲二營。用五百人作爲三營。隨時酌之可也。以上各條。大概如此。其精微處緊要處。全在擇頭目。選營官哨官與隊長耳。他皆枝葉事也。

致牟皓升（嗣龍）

聞廉吏之風久矣。勤苦之至。感念何深。閣下蓋以伯夷之節。爲士行之勤者。弟尙擬特薦而未發。前此乃軍務例章。不足以盡公之美也。昔年有餉無兵。近年有兵無餉。下游積欠百餘萬矣。有岌岌不可終日之勢。乞餉之書。與申包胥七日七夜不絕聲相似。而憐我之人。殊不可得。秦哀無衣。亦不再唱矣。本省餉項。以鹽課爲大宗。然蟻慕羶行。魚多漏網。辦理不得其人。立見減縮。楚中廉吏。弟以閣下爲第一人。宜昌之事。必借長才。大局所關。維持匪易。閣下卽多勞。而又烏能已乎。弟志在東征。百折不回。但望夏秋之間。九江不潰。事必可爲。從此勾當公事。不僅保楚兼之。保吳。弟力又非能保楚保吳也。有都與楊與李以爲將。弟等只須謀餉以助之耳。尙乞念鄙人至愚至拙之苦衷。與申甫麟洲妥爲經理。以濟時艱爲幸。

致周笠西司馬

前得手示。因麻城事緊。賊逾二萬。日夜征調。批發裁答。殆逾二十三十起。遲遲未復。周子佩昨日到省。一見良慰。然遠道訪我。心以爲歉。應復之事。開列於後。一襄堤之事。專派沙市貿易人。尤爲弊藪。弟已札飭莊公岳令。並面告岳令。當以此事爲下車初政。一鹽務辭卸之稟。弟早已批道准行。意欲以牟易公公才長於吏事民事。以權利應酬之事。煩公非其志也。秀帥薰生。均不願換人。弟思換人。則釐金之事。實不盡放心。公試舉賢以備訪可耳。救天下之急證。莫如選將。治天下之真病。莫如察吏。兵事如治標。吏事如治本。子佩歸時。再言其詳。一沙布釐金。紳士稟求卸責。此必不可行之事。弟在鄂一日。必能保全實心任事之員。卽異日有間言。然釐事弟所專管。苟其實心。弟若不持正論。顧大局。非夫也。去年沙市釐金之謠言。與鹽務之奏。同日同年而語之事。弟處一筆了之。大樹於鹽事。戛戛其難了。而又誤徇人言。諉過於嚴步高。此節頗覺不得其平。其應繳之項。聞已入奏。如何緩頰之處。候與莊道酌商。一麻城之失。只一營駐守。頭起之賊。以八千人間道襲入。而大營三千人。在商城邊界者。聞警折回。已無及矣。近到續賊約二萬人。三千人苦戰十日。幸尙未挫。刻下又續調六千人馳往。廿七日可齊。希庵前往統之。必得力也。設九江早復。大軍東征。則此禍又如四年之慰農矣。弟正月初旬。卽選將募兵。添益四千五百人。三月乃齊。尙有新到未及點名。卽札派調發者。刻下餉日絀。而兵日益。一人之焦苦。直不可言喻。而同此心志者。究無分憂之人。又大股竄浙江。已入蘭溪。東南之局。殆其日危。天下事並無起色。禍不在盜賊。而在人心。綱領不立。是非不明也。

致牟皓升

展閱手書。具悉宜昌鹽務。經閣下經理。章程秩然。凡事得正人君子董理。自能坐鎮一切。昔劉晏專用權鹽法充

軍國之用。官獲其利而民不乏鹽。國用充足而民不困弊。其法祇在用人而已。閣下關念大局。時以兵士枵腹爲虞。固能實心實政。不愧廉吏也。皖賊竄擾蘄黃一帶。前月得都將軍忠義倡先。有廿四日之大捷。然該逆裹脅尙衆。逆壘尙有數十座。我軍餉竭兵單。撐持無術。憂憤實深耳。

致周笠西司馬

襄堤利病應酌辦。此等事在府縣得人。不得人。則贈以書經。周禮一部。終是害人之法。非保民之法也。弟於荊州事。日有憂慮。而不能條理得人。負慚滋多。楚中一二賢者。又多不好爲官。無可如何。星槎先生患病急歸。此老出山。必能有造地方。連年萬事。一畀益之。積勞太過。弟之罪也。安得此等人布之郡守。何憂天下不治。公欲卸鹽事。具體尊意。此地固不可久居也。願以一縣展其素志。乃有實濟。然亦必須有人替手。如牟如鍾。庶幾可爲替人耳。

致周笠西

近時大局艱難。只求一二有心之士。力濟時艱。濟之之法。壯者殺賊。廉者謀餉耳。謀餉之法。多籌一文。卽有一文之益。所望於吾笠西者甚大。蓋軍興八年。昔年有餉而兵不強。近年有兵而餉已竭。下游實欠百餘萬兩。可危也已。查四年六月。湖北潰城之日。人人知其餉竭援斷。至今楚人尙憐青公。弟查其時有李虹橋遺牘。欠餉約一月耳。尙有穀十萬石。銅二百萬斤。今則欠餉六月。無錢無米。其情形十倍艱於往日。望老兄與蕙公譜公及沙局正人。極力謀畫。毋使弟爲楚之罪人是幸。

致鄂中僚友 戊午

林翼於八月十一日扶轡回里。前奉恩旨賞銀治喪。賞假回籍。苟非全無天良。豈忍孤負君恩。託詞自便。惟是奪情起復。名教攸關。天下之患不在盜賊。而在風化。已則尸位。何以教人。籌餉籌兵。在日前屬急務。而自大端論之。則此僅末務也。秀峯宮保寬仁博大。推誠待人。實能主持東南全局。其器宇度量。有舍己從人之概。林翼相處最久。相知最深。非敢謾爲諛詞。巧自脫卸也。羅澹村莊蕙生。均極一時之選。其廉正勤明。他人莫及。至都直夫舒輔廷。楊厚庵。李迪庵。均冠世之名將。但令鄂省不缺其餉。皖省不撓其權。必能指日成功。而秀帥心地公忠。能顧大局。此鄂事可以無慮者也。儻以燹燹在疚之身。尸戀官位。林翼之心愈悲矣。刻已涕泣陳情。當可俯允。昔江陵奪情。負天下之大謗。以江陵之才力助德。功被海宇。而天下且猶非之。儻才力不能有所成就。是爲進退失據之人矣。

再致鄂中僚友 戊午冬

十三日起程。十四日阻風雨西陵港。湖南之勇。左公任之。同舟來省五人。皆非軍旅才。可分理小局。差委耳。楚軍倡義以來。如江如羅如李如劉如王。均大將之選。江忠烈才氣無雙。可以兼督撫而有餘。尤爲楚才之最大者。不數年而凋喪殆盡。其生此數君子者。所以明人事之當然。其卽生卽滅。迄無成功者。是則天運之自然。然則天意蓋可知矣。賸此滌生與不肖之林翼。又奚以濟。楚軍旣全覆於皖。是卽林翼平日所謂兵勇之氣如豬豚然。當其盛時。千錘不破。一鍼之隙。全脣皆消也。此時若卽逃將逃勇。濫收濫應。以此補救。卽三五年亦無成效。不見賊則已。見賊卽潰矣。應俟到營。與希公妥商另辦。滌生先生之軍病疫。此危機。已致書切戒。不啻大聲疾呼矣。如滌帥率師圖皖。尙可稍安楚疆。但恐中朝游移。不早定策。迨皖豫全失。乃更催促之亦晚矣。曾記迪庵每克一城。林翼卽作書戒之。惜軍中無智謀之士。稍爲贊助。一蹶不復再振。傷哉。此時欲求此厚重木疆之大將。忠誠剛毅之名臣。更從何處得來。傷哉。林翼出則非禮。不出則不義。出亦於事無補。不出則於心尤不安。只此一副精神智慮。竊恐終貽天下後世之

譏耳。一智慮生於精神。精神生於安靜。林翼之力。視此有愧。其何以濟事。一應商事宜。開列於後。一傷殘之營。固難整理。不戰而潰散之營。亦須嚴懲。應訪問周至。分別開明。以便林翼之採擇。林翼既以軍事而出。若不能軍。則此出更屬無謂。一鮑超一營。二月未曾領餉。糧臺委員只求省事。此心并未貫到營中。平日發餉之文書。名爲隨餉發出。實則交給委員代發。一發則不復再問。其收到與否。若秦人視越人之肥瘠。與己無涉也。應請查明委員劣蹟。作稟以憑參劾。一湖南之勇。已由左公代募。林翼既已先行。必有陸續趕到者。兵不在多。而在精。將不在勇。而在謀。此次之敗。其過仍不在兵寡也。其長沙募勇。聞已起解經費矣。應聽左公斟酌。一臨出署時。曾以錢漕徵解比較之冊。託之子山。應請速查報解完欠分數。吾輩作官。如僕之看主。若視主人之家。如秦越之處。則不忠莫大焉。林翼必擇其尤玩者。特劾之。天下之好効人者。林翼是也。天下之至不好効人者。亦莫林翼若也。此意請稟之藩糧。先行以弟意函飭。札飭能成全一分。亦是美事。其不願成全者。弟等亦無可如何耳。一揔災之州縣。必應特參。亦乞查核。一夷船聞已到漢。是何情狀。何日下去。可專人於水次報之一。不張蓋。不設儀仗。不頂戴。不入署。前已明言之矣。此次應面商一二日。卽先行馳入希庵營中。或借糧臺一宿。或在舟中一二宿。均可。惟萬萬不准糧臺及州縣費用一文。天下作大官人。視州縣應酬爲天經地義。除需索供應。講究應酬。別無所思。別無所知。是可恥也。必力矯之一。欲鎮壓地方。或看旨意緊否。斟酌借受印信。此爲地方餉項營汛呼應起見。於我心仍飲恨之至。

致李希庵觀察（續宜）戊午

昔漢光武於伯兄齊武王之慘死。枕邊時有涕泣。而平時言笑如常。兼以其時密剏大業。另樹鴻基。蓋英雄作事。以大志爲尙。不可作兒女子涕泣自效。且天下之賊多。而亂亦日甚。涕泣悲傷。可以止亂耶。可以有補耶。徒爲庸人亂人所恥笑。不如不生此世。林翼何嘗不引此爲深痛。況我兄之至性至情。百倍林翼者哉。然而必爲此言者。願公

之思其大而顧其遠耳。闔廬在姑蘇。此積弱之國也。其欲強國也。見怒蛙而式之。以蛙有怒氣。則致敬禮。所以教國人戰也。軍中取材。專尙樸勇。尙須從有氣概中講求。特恐講求不真。則浮氣客氣。夾雜其中。非真氣耳。又行軍之道。智略居首。勇力次之。保國之道。全軍爲上。審時審勢。審機爲上。得土地次之。吳王夫差庸妄失國人也。然其復父仇也。則使人呼曰。夫差。爾忘勾踐之殺爾父乎。如此經年。而仇竟復。特信用宰嚭。寵縱西施。不能善其終耳。擬近年以此呼三軍之士。有願爲復仇報恩之人者。敬之禮之。愈蓄愈盛。愈養愈深。特不可輕試耳。

致司道 戊午

爲將亦須稍具智略。審勢審機。是爲上策。此番長城頓失。堅貞安重之將。亦且無人。何況智士哉。林翼此番作孽不小。與迪庵共事最久。棄之以歸。致全軍歿於異域。罪一。招何伯擬甫到十日。即罹於難。罪二。若此人不死。尙有一將可用。天下人最多。將才最少。是可痛也。所委解餉之員。非人。鮑超等軍。兩月不得一餉。罪三。丁篁村一門孝友。家世儒宗。強以爲將。覆於三河。具其父死。其祖死。林翼均不准其歸家。罪四。軍事以氣勢爲主。以百戰之餘。覆於一旦。是全軍皆寒。此數萬人者。將動色相戒。不可復戰。賊何日得平。楚又何時可保哉。罪五。到鄂後。卽辦應卹應劬之委員劣蹟。及糧臺支放日月。乞先行查明爲要。

復李雨蒼茂才（雲麟）十一月二十三日

十四日得書。并另疏一紙。應復之事。開列於後。來書言季公許以兩月半全餉。而尊意以四箇月爲期。蓋起募去到鄂。必須四月也。書意似須另添一分之餉。查新募未成。軍未起程之先。伸縮多寡。原可裒益。似季公所許。亦不甚少。如實在不敷。弟與季公非吝財者。酌量加益可耳。至謂將長夫招齊。由旱路起行。以習節制。此計頗宜。凡步軍不

可使狃水路之利。狃其利則習於巧便而不耐苦。流弊轉多矣。來書極是。另疏謂今日湘勇。利將終而害將始。頗有識略。凡兵勇均不足責。責在將耳。湘將如羅如王。如劉如李。設令不死。合而謀東南之事。湘軍必可成功。惜天意之遲回。與人謀之舛錯。茫茫四顧。尙不知將略其誰屬耳。吁。來書以次第詳明。布置周密。一語爲綱。所言良是。其餘所言似均有見。其要歸於不急功。不辭費六字。某不敏。旣以度外之士。期兄豈復迫促時日。以督過爲能。漢用陳平。不問四萬金之出入。欲求非常之勇。又豈以出納之吝爲志哉。惟鄂軍章程。已行之三年四年。所御已二萬人。軍法與法國。以畫一而後可守。二三則囂然不靖矣。未便輕爲改易。如有必不可少之處。應另立公費名目。以劑其盈虛。如異日另設騎兵。則另定鄂軍騎兵之章。蓋減於東三省之數。而優於綠營之制也。又來書拳拳以明年九月調用爲囑。林翼志在久練。以成精兵。斷無欲速見小之心。但時事有不可言語形狀者。試令兄處武漢。武漢適有寇警。兄能晏然自處。謂吾軍必不可戰乎。試令兄處襄樊。而襄樊之境。爲賊窺伺。民望屬於我軍。迫切尤命。又能退然自謙乎。君之所陳。猶是贅議。總之所言者法耳。綱領之要。成敗之數。不系乎此。大抵兵事不外奇正二字。而將才不外智勇二字。有正無奇。遇險而覆。有奇無正。勢極卽沮。智多勇少。實力難言。勇多智少。大事難成。而其要以得人爲主。得人者昌。失人者亡。設五百人之營。無一二謀略之士。英達之才。必不成軍。千人之營。無六七謀略英達之士。亦不成軍。世事狃於昇平。人心習於巧利。僞謀百出。混亂成風。君其專精於此。乃克有濟。他非所屬也。

致都直夫將軍（興阿）十一月廿四日

聞兄欲三路進兵。此策至善。但我軍兵力。尙有不敷。迪庵新亡令弟。六兄又復盡忠國事。悲感良切。據此機勢。暫宜堅守。以待天時。人事之稍爲轉移。乃可大舉并進。兄之密探。以爲賊勢微弱。迅速進剿。必易得手。林翼之愚。賊之大股。必轉而與袁與勝與張爭勝。其守石牌太湖。當是另股。我軍不進則已。進則預求萬全。設賊以大股乘我并力。

上援。必須吾之兵勇。能與堅守。能與力爭。乃可進取。否則殆矣。古人行軍。不問賊之強弱。而先審己之強弱。今獨有老兄一路爲強耳。南北二路尙弱。似須林翼到黃州蘄州。實力審察。如不能確有把握。仍以固守待賊爲主。不敢輕進也。此番之誤。誤在兵分力單。以致大挫。雖血戰而得之。四城不旋踵而委棄於賊。兵事以全軍爲上。得土地次之。善戰多殺賊爲上。攻堅斯下矣。假令李迪庵得桐城之後。分兵守集賢關。而自行駐守桐舒之交。斂兵養氣。以待賊之來援。先以最弱之營。委令營賊。賊必驍勝而驕。我兵亦必戒慎而懼。然後并力圖之。賊可大破。不待賊來而輕進。以瀕於危。又顧慮後路之虛。而一分再分。是以敗也。實則分留之營。聞前軍挫失。不戰自潰。究無絲毫之益也。夫兵以分而乃得勢。譬如手之五指。以分枝長而得力。足之五指。以不能分枝而不得力。此兵事之大勢也。然分兵必須有人才。能獨當一面者。果何人乎。此林翼之所深懼而深愧也。老兄以三路分兵爲示。誠謀皖之至計。不如此必不能成功。然林翼只能深信老兄一路。其餘二路。尙未敢信。蓋義渠守將。未能獨戰。余際昌新勇。未臨大敵。李希庵痛兄。意念悲感。所收新敗之卒。竊慮其膽氣先寒。聞警自擾。故林翼以爲目今二路。尙不足信也。秀峯中堂奏。滌生移兵圖皖。廷旨尙未准行。湖南路中丞。又以爲言。聖人見督撫意見符合。或必採納。而滌生見迪庵之殉難。又深感中堂相待之誠。或卽奏明請行。亦未可定。此計果行。則老兄一路。滌生一路。希庵一路。無論賊勢多寡。總可成功。總可復仇。若滌公竟不能來。則須俟招集之人。稍稍堅定。新募之營。稍稍練習。乃可如願耳。又老兄以楚皖交壤。條條是路。防不勝防。欲蕩殄寇氛。保固疆界。非力剿不爲功。此誠至要之名言。古今不刊之大計。林翼之所以不憚征繕。盡力謀餉。以養此兵者。蓋亦深知不能戰於竟外者。必不能守於竟中也。應俟軍氣稍充。卽從鞭鐙。至謂刻下田乾溝。禾稼未興。林箐松稿。馬隊便於馳驟。此誠識時務之至言。然二路未能齊進。至羈討虜之功。尙乞稍抑忠藎。觀時而動。軍興已九年矣。緩急不在一時。與一事也。志在平賊而已。豈可以一時一事。輕於一擲哉。大抵兵貴因機。事貴乘勢。今觀於令弟與迪庵之殉難。機勢稍鈍矣。必應稍爲審慎。遲回。則事不勞而功必倍。至太湖一城。若并力以取。

之尙不能難。然與其攻城而損銳氣。不如養銳氣以待大戰也。閣下以爲何如。

致嚴渭春觀察（樹森）二十四日

林翼負土成阡。用百人。越八日而草草完竣。始滿百日。卽馳拜父墓。忽忽返里。三虞并作一祭。十一月十三日登舟。洞庭阻風雨已六日。急不可耐。頃得下游十九日來報。聞尙無恙。賊不能乘我軍氣奪。并力襲我。吾知其無能爲矣。林翼此出。勢處萬難。蓋出則非禮。不出則非義。出則於事未必有濟。不出則於心大有不安。與迪庵共患難。交最深。聞難不赴。非友也。且值時會艱難。叨竊官位。若藉守孝。以遂其推諉巧避之私。鬼神鑒其微矣。惟旣以兵事出。當馳往下游。治兵爲先。借受印信。不過籌調餉精。董戒州縣耳。斷不敢冠蓋堂皇。偃然自處。胸中無數要言。以不得我兄商榷爲歉。條書於後。乞卽集思益我。一此次兵敗。過不在寡。前一月連克四城。俗士驚喜。以爲兵將如虎如熊。殆將飛而食肉。林翼早竊憂之。四次寓書相戒。聞每克一城。中傷千人。攻堅爲下策。已犯兵家之深忌。得桐城勇丁有私獲。則無鬪志矣。兵不可貧。亦不可富。不宜無傷。不可過傷。夫戰勇氣也。當以節宜蓄養。提振爲先。又陰事也。當以固塞堅忍。蟄伏爲事。尤必以智計爲先。迪庵之爲人。木強敦厚。安重不遷。設遇盛時。必爲周勃之助。今則四顧茫茫。無可委託。賊何日而平。楚何日而安乎。希庵至性。戚戚於心。其智略較勝其兄。其寬大尙遜其兄。蓋狷狹之士也。設其父母因悲感而召之。設希庵異日負兄骨歸湘。則鄂中大將。殆虛無人。且此次道府州縣副參千把死者千數百人。人才殄瘁。莫此爲甚。卽如丁篁村。其治兵智略稍遜。而忠勇不欺。卽欲求此等裨將。亦不可再得。而何伯凝劉星槎等之初入軍營。留備將選者。同時殉難。殊可憂傷。此爲鄂事之可慮者一也。自昔周瑜陸遜陶侃柳仲郢。均撫交廣。或兼白帝長沙零陵等州郡。以數州之富。養兵不過五萬人。今則一鄂而供征兵五萬人之食。賊不可了事。事不可止。兵日多而餉日少。非餉之少也。不敵其兵之多也。處此時勢而不能去弱留強。去奢從儉。設一旦有水旱之虞。民

穀不登。禍亂之來。不在賊而在勇矣。夫在上者以養人爲職分。能養者爲仁。不能養者爲暴人。至飢餓則必不畏死。苟悅不云乎。人不樂生。不可齊之以法。蘇軾不云乎。賒死之與忍飢等耳。此誠千古治國之至言。姑卽今日湘鄂而較之。湘中鹽茶百貨。月計司十五萬。所出不過十萬。鄂中入僅多數萬。而出乃多至十餘萬。湖南失守。地少倉穀。尙有存者。鄂中幾無粒米之存矣。鄂城只有捐穀數萬石。遇急可稍應飢兵。不能養民。荆襄爲天下之要。又頓以不耕不織之重兵。不知已捐穀若干石。若以錢貨爲重。而輕倉廩。在樂歲則可狃於便安。然豈遠慮近憂之道哉。意欲廣捐穀之招徠。以治其標。而又寓屯田於防守分汛之營。以固其本。公明於今古之略。爲我詳思而核議之。夫言貨則月少十萬兩之銀。言食則一省之大。公家無三五日之糧。然且以爲安也。與燕雀處堂何異。此鄂事之可慮者二也。天下以盜賊爲患。而亂天下者不在盜賊而在人才不出。居人上者不知求才耳。鄧侯治漢文若佐許。武鄉治蜀。景略圖秦。其得力全在得人。盡無一時一事不以人才爲念。得人者昌。失人者亡。以衛靈而不喪國。以武氏而能治天下。其效可觀矣。鄂吏貪庸者。卽令以范六丈一筆勾去。亦恐前去後來。猶吾大夫也。於事何濟。竊欲旌獎一二賢才。以爲之表的。庶使中人以下。勉而從焉。鄙人之於求才。亦頗至矣。然樸實之士。捐介之守。尙有一二。求其識時務。具智略。負奇氣者。亦不數數觀也。深思其故。由林翼器局之小。鑒別之疎。不足盡天下之才。夫人才。隨取才者之分量而生。亦視用才者之輕重而至。我之分量。窮極夫天下古今。則必有天下之才。應之。某之。不才。誠竊自愧。古人必使各舉所知。立賢無方者。亦欲以此心。推之人心之公。庶幾博求而有得也。鄂意編列條目。徵求事實。飭司道府各舉所知。其有奇才異能。必須度外汲引者。另作一格。均以公牘舉薦。竊謂此爲治鄂之大事。今鄂中人才安在。求才之方又安在。此又大可慮者三也。閣下智略勝於今人。其精思以益我。

致蔣之純觀察（凝學）十二月十四日

所轄各營。乞飭將營官哨長十長姓名籍貫。開具一冊。寄交弟處。以便查閱。又營中幫辦。賢奸雜進。尤關緊要。亦乞飭將姓名籍貫開示。又所轄各將。孰賢孰否。孰強孰弱。將官之勇怯。營規之嚴寬。與一切利弊之所在。均乞詳悉示知。夫軍事以求才爲本。得人爲上。多而不治。不如求精。嘗笑世人好兵多而不知人才少。則多之致敗也。尤速人才多則多可勝。少亦可勝。且兵少則賊輕。我必不固守營壘。必來搦戰。可以永不攻堅而殺賊無數。不攻堅則不傷元氣。來搦戰而勝之。視攻壘攻城之殺賊必多。是在深明兵略者之默爲領會耳。

致袁午橋欽使（甲三）十二月十六日

羣示屢以繞舒廬下手。節節南攻爲囑。林翼之意。亦深以爲然。同人所慮者。深入重地。餉道中梗耳。疑未能決。尙乞詳示。義渠觀察穩實有餘。現駐陳德園。專防蘄州一路。統勇三千餘人。勇敢者多。智慮之士亦少。始意欲以此助淮北。於六月擬之。七月乃成之。其時先慈見背。遲至近日。尙未成行。殊深歉愧。應請斟酌緩急。備公牘示之。如此路守定。不致滋蔓。則南路尙可措手。唐公是樸實人。不堪爲他人任使。專隸驛下。則尙可盡力也。其進兵之路。是否由英霍取道。敬乞預示。

致嚴觀察 十二月十六日

初十日到黃州。十五日迪公忠骨過此。迎哭於野。悲軍國之委託無人。非僅私誼也。奉書指類詳明。蓋於事理真有體認者。軍中未及詳復。摘敘梗概於後。荊州捐穀一節。所慮深遠博大。蓋豐稔不可久倖。而戒籌當及幾先。弟之思此。蓋恐一旦飢困。將破吾良法耳。此法志在十年不變。則民利國利。而州縣亦大利。所謂此法者。卽七年弟與公手訂之章也。陰雲不食土費。志行甚高。嘗恐陰雲博愛善應酬。窮難自今。則不計貧而毅力奉公。湘人志氣日趨於

上矣。屯田捐田一節。所論極得情僞。吠畝版築魚鹽之中。乃有英雄。膏梁子弟。決無英雄。以積習不除。不知情僞艱難也。求才一節。如童子木李雨亭張洙三閩丹初范雲吉范百崇穆海杭均當陸續奏調。惟李雨亭是軍務省分之官。措詞須妥耳。笠西雲卿一節。沙局不可無此公。宜昌不可無此公。兄可函之省垣。聞欲笠西異日履江陵本任也。

致郭筠仙太史（嵩燾）十二月廿四日

軍士傷尙可完。大有亡不可贖。楚才殄瘁。國事殆不堪思矣。林翼必竭二三年之精力。以求補救。而成敗利鈍。實非所料。昨祭迪公文。有公來生我。生我楚人。倚公爲命。以至於今。又有與公同命。覲顏尙存之語。又有出山非禮。在山非義。涓埃無補。金革無辟等語。文詞甚悲切。異日當錄呈左右。迪公碑記諡法。乞錄案示之。羅公一案。亦乞補錄。林翼擬合刊一本。寄呈翰林院國史館。并將前後戰功刻入。以垂後來。以備史臣之採取。林翼精力。殆將不支。然無法可避。只合幹去。譬之大海遭風。不行亦未必活命也。此時大討。應速求統將二三人。僅恃希庵一人。尙不足也。求之未得。我勞如何。令弟三先生。聞其天分絕高。左公之論。謂德則公兄弟自一而二而三。以天定之序爲定。謂才則公兄弟自三而二而一。以人事自下而上也。公思之果有當耶。三先生能助我否。

致曾滌帥 己未正月初四日

進兵之議。尙待再酌。謹條列於後。尙乞指示。一、全軍然後能保楚。保楚然後能謀吳。此理至明。聖人不易。楚軍之將。希庵如碩果。如魯靈光。無論其助勞甚大。品行絕高。固當爲國家愛惜保護之。卽林翼私交。亦實有不可相離之隱。林翼同行。則希公只管兵事。戰無不勝。其官事外事。及竟外無限之事。均可代勞。此其爲力也。其細已甚。而在希公則受益頗切。其願酌者一也。二、目下兵力。其未經挫敗者。鮑統三千三百人。多統四千數百人。（王錦堂之四千

人。經多挑選一千七百人。居然可戰。蔣之純四千七八百人。數已逾萬。力已不單。其收集之營。并希庵舊營新募。及林翼新募。又不下萬人。現均駐紮黃州。若如都將軍之意。以多領餉。及其餘各軍爲一路。以希庵領各營及蔣爲一路。一走石牌規安慶。一規潛山。兵力有餘。都意以爲如此。則有戰有圍。必安慶得後。乃行進步。意在不急圖舒桐也。果如所議。則氣勢旣盛。轉運亦尙不難。尙未與希庵面商。此其應酌者一。賊不得逞於驛路。必由潛山伺英霍之虛。以犯楚疆。七年夏。從張家塆入兩蘄。始有黃石港。但見潰勇之誚。七年冬。張家塆設重防。以唐丁余守之。八年春夏之際。遂由六安直趨羅田商城。入麻城黃安。其時恃有希庵。舉國安堵無恐。然力尙不支。致煩迪公自援黃安。賊乃退走。今以大力注重太湖。而邊地僅有余參將際昌之二千人。唐義渠之三千人。午橋求之頗切。未便久羈。致失前約。鄖兵驕而怯。將太老實。恐無用也。固嫌其虛。而腹地尤虛。荆襄之警。無歲無之。此其宜酌者一。湖南四年。卽無粵匪入境。其猛將壯士之倦而思歸者。踵接於道。五六七八等年。湖南未嘗一日忘兵事。湖北則強寇在門。而宿將無一。奈何其敢不懼。都公奏請林翼駐黃梅。已奉旨允。林翼此番總須以兵事居外。東征三年。未可卽安於衙署堂皇。固無疑義。駐黃梅不過作轉運之督。使隨希庵。則較親切。林翼不知水師戰法。且有厚庵。則不勞逞臆干預。然駐劄之處。却須水陸氣勢可通。則彼此有益。此應酌者一。謀士之欲林翼劫季公來鄂。則子春與印渠部下之三賢將。將予取予求。同氣同聲。林翼亦湘人也。疑未敢決。大約季必難搖動。子春恐不忍舍。欲備南路之保障。印渠三將。其才力性情字號。丈已盡知。乞示其詳。此應酌者一。林翼去鄂。局勢頓大。七年冬。釐旺。漕折亦旺。餘銀四十萬。以補春夏之不足。而外間不盡知也。八年冬。用費太廣。兵數太鉅。較七年虧欠七十萬兩。然百貨錢漕皆旺於秋冬。此時不覺其窘。應速汰弱留強。乃可善後。否則明年夏令。必有不支之勢。然此事尙易爲謀。餉事究比兵事差易。求謀餉之才。比求統兵之才。亦較易。嚴劾中飽。未必不自愛其鼎。林翼卽暫入皖境。半年之內。尙可不虧。此其宜酌者一。以上各條。敬乞訓正。夫求賢如相馬。今使萬馬爲羣。中有千里馬。而人不識。卽識之矣。狃於鶩駘之便安。則

千里馬亦且自悲。林翼之慕才。其志則美矣。而本領不及。器量不及。得毋類於世俗之好馬者。尊意早已屬於賢才。近日所得必多。便中乞示悉爲感。

致左季高正郎 正月初一日

到宿松與都面議。仍暫返黃州。定期卽進。途中遇雪。節候未春。深冀年穀之豐。補我才力之短。佳節思親。私戚不釋。除夜輾轉待旦。踽踽獨行。無可與言。得二十日四更手書。稍爲慰心。迪公之卹極優。奉硃批另有旨。詳覽奏牘。不覺隕涕。惜我良將。不克令終。尙冀其忠靈不昧。他年生申甫以佐予也。欽此。迪贈總督。其父賞光祿大夫封典。二子賞舉人。并送部引見。並銀五百兩。餘均照例。兪允。璞山無此殊恩。此豈文字之不如我耶。總之天下奏牘。僅三把手。而均在洞庭以南。此三子者。名次高下。尙待千秋。自問總不出三名之下。儻其抑志拊心。儲精厲學。則不肖尙未可量也。李雨蒼信來。急欲得黃子春一軍同來。鳥則擇木。未知子春視鄂人爲何如。雨蒼以爲鄂任召募之費。則可來。湖北斷無不任費用之理。湖北不至如是之鄙。湖南必無以費用爲去留之理。湖南亦不應若是之淺。林翼所患者。湖南之患在嶺南。必須留作干城耳。鄂之謀臣。則曰。丈之聲名。已篆天心。凡官凡紳之入見者。均蒙垂詢。想像之神。與商室傅巖維肖等矣。丈在小淹。自嗟遲莫。世無知者。則曰。除非帝賚良弼乃可耳。今已名在九重。轉有憂色。能憂是吾丈見道處。鄂人言不必急求子春。亦不必急求印渠部下之三將。惟有劫丈來鄂。位以薇柏。則子春諸公不期而會。此計爲鄂謀則忠。且異日不肖他徙。鄂尙可保。其用意亦頗深遠。特不肖亦湘人耳。疑不能決。求賢如相馬。得千里馬而其人之本領不能用。與無馬同。知其良矣。而性嗜駑駘之便安。則千里馬亦且自悲。今日之事。得毋類是。然則爲鄂謀者。其刦丈耶。其僅刦子春與印渠三將耶。丈其示我。乞安徽河南江西湖北影本地圖。盼切盼切。甚於求篆書也。

致陳秋門給練（光亨）正月初四日

歲杪於宿松途次。奉二十一日手教。反復思議。尊旨大有可疑。匿而不言。轉失誠敬之義。查錢漕一項。乃歲用之常經。非征軍之正餉。因征餉日迫。借官廉及坐營兵餉一半。以救目前。實則征軍之專望鹽課。與牙釐牙帖。已爲強弩之末。所恃者釐金耳。又湖北歲入正供。歲不滿百萬。尙須請撥部款三十萬。以養荊州及各營官兵。此則百十年之舊章也。今則正用之百餘萬兩如前。而每月加增征兵月餉三十萬兩。去年攻九江。卹賞七八萬兩。三河桐城卹賞十三四萬兩。加以造舫修船及帳房軍火。（每月火藥二十餘萬觔。礮子二三十萬觔。）又須數十萬兩。是正支之外。歲須三百九十餘萬兩。鄂力其何以堪此。時俗之人。則曰。專乞於鄰耳。乞人可憐。亦可恥。使乞之而得。猶可曰。於事有濟。乞之不得。困於外。不如反於內。求於人。不如求於己。此固志士之所宜嘗膽臥薪。爭自樹立。況吾儕桑梓於楚者哉。竊嘗考古今之跡。治世與亂世不同用。而愛民之心則無不同。將猶干城也。兵猶爪牙也。農猶根本也。商猶枝葉也。欲保楚莫如謀吳。欲養兵則不能不任勞怨。以等餉故。寬其意於錢漕。所以培本計而致厚於農民。嚴其法於釐金。所以開財源而致力於兵事。非獨苛於商賈也。商逐末取利厚。緡算亦便。農力勤取利微。損一分受一分之益。所以培根本也。若如俗吏之志。則必以加賦加畝費爲得計。是將重困吾楚民矣。聞與國釐金。前輩之意。總不謂然。或曰。凡商賈乞緩乞薄。公無不應者。其信然與。又先年與國捐輸至盛。星槎去後。大戶富室之捐。至今未能繳清。或疑公之有所徇。然與至錢鋪之不應添與漕事。前函已明。又漕折不僅利民。亦實利國。河運果通。尙須官爲買米。以運太倉也。春夏到邊。當可以不盡之意。面爲申明。此其大概耳。林翼年十五。前輩已通籍承明。素深欽仰。本無纖嫌。因有所疑。不得不言。又實因籌餉萬艱。思得前輩助力。以爲鄉人觀感。乞爲楚謀之。此番到鄂。事濟猶不免爲罪人。不濟則罪無可赦。將才之摘殘若此。天意人事。大略可知。不敢惜此身以託於孝名。而此心彌傷矣。

致安陸府邢星槎（高魁）正月初四日

弟正月乃返黃州。不日仍馳往下游也。弟左右無人。希庵欲公仍總營務。弟意公之吏才。乃可治行第一。可開鄂之風氣。可使在位以爲矜式。不欲公之富貴。公亦不自欲富貴。欲使名垂千古。并使鄂吏。羣知天下作官人。固應如是也。然希庵謂吏與兵較。兵爲大。且謂自有公而吾之左右皆正人。斯言良信。何去何從。乞公爲我諒之。酌之。

致唐義渠觀察

探聞天堂一帶。賊頗注重。其太湖石牌。已有守而不戰之勢。則賊意必由天堂一路。或英或霍或六安。另有所注意。眞從英來犯。則陳德園可遏其鋒。從霍來犯。則羅田喫緊。蘄水亦緊。從六安來犯。則可以假道豫之商城。或徑從固始。分擾楚疆。轉出黃德之交矣。此時大計。應於賊之注重者著手。應否待其來戰。應否先期進剿。訓營昌營。自信有幾分把握。應否添兵駐陳德園一帶。以便進兵者無後顧之慮。或應分一枝進紮英羅之界。如松子關之類。以潛伐其謀。而預防侵軼。敬乞集思。公商明以教我。

致糧臺總局 正月初四日

林翼於初五日已返黃州。專候希庵到營。另行商酌進兵之策。澹村先生所寄甄別密件。卽由林翼處主稿。約節內專摺。乞回明中堂。年終恩賞福字。并荷包銀錢銀鏤食品。乞蕙生先生作謝摺。軍中本不尙修飾之文。況墨絰在軍。尤不宜以四六自鳴。應請代撰簡約質樸之文爲要。劉印渠部下。如劉坤一江味根李明惠。乃賢明之將也。已函致之。特恐湖南不放耳。南路日警。已挾劫季高。爲我謀之。又希庵欲湖南之劈山礮。祈以銀四百兩便寄季高代購。

十座。弟處已函致矣。

致雲貴總督張石卿（亮基）正月初八日

函繕十日尙停未發。滇事誠難措手。雖以武鄉侯之才。若非藉蜀中物力。滇亦難平。假令以公督蜀。則滇黔可望漸次削平。以公督滇。目前實屬窘手。去年夏間。曾以此意詳函告之雁汀先生。遲至四五月。乃得復函。尙謙讓未遑也。不謀黔滇。蜀中獨能晏然安處於高堂之中耶。公手書以未能出省殺賊爲恨。林翼之愚。則曰。且問公麾下將才何人。吏才何人。羣盜如毛之日。若必以親臨督剿爲能。尙不算本領。明公素負知人之鑒。尙乞專精於此。餘皆枝葉耳。鱗爪耳。季高先生。天眷至篤。倚注獨深。季公在小淹時。每與林翼縱談。自嗟遲莫。以爲非夢賚良弼。不可有爲。今則大類傅巖之象形。惟肖。而轉覺愀然不樂。蓋湖南必不可無此公。而籲門中丞尤不能一日離也。屢屢劫之。竟不可得。奈何。奈何。鄂事仍恐不支。勉竭其愚。仍以求將才爲第一要政。求之未得。我勞如何。去秋擬以三五千人益午橋。至今未行。終必力謀之。午公軍事最苦。以無位無權也。林翼與午公未謀一面。而獨憐其誠。豈有私哉。

致訓營唐義渠觀察 正月十八日

得十二日書。敬悉一切。進剿太湖之舉。聽閣下斟酌。鄙意凡兵總不宜逼城太近。太近則萬一後路旁路有賊。而我軍既慮其後。又慮其前。頗難爲力。應紮何處。及阿余二軍如何行止。均聽尊裁。弟不能遙制也。

致多禮堂都護 正月十八日

得正月十五日賜書。敬悉旌麾已抵太湖。若能誘戰。戰勝之後。賊氣必奪。當易於得手。攻城則自古無良法。蔣道

唐道阿參將各營。悉候老兄指揮。至紮營之地。亦似不必盡逼城下。須留精兵。以備援賊也。承示蘄州張家塆及麻城黃安一帶。須撥兵嚴防。弟思兵力現非不多。無如獨當一路之將。不可多得。現定於天晴後。移營適中之地。以便策應一切機宜。仍乞老兄隨時指示。弟必遵辦也。

致李次青觀察（元度）正月十九日

益陽奉復謝函。并璧厚贖。非薄於老兄也。老兄之清貧。萬萬不敵老弟之富厚。迪帥飾終之典。近百餘年。無與比倫。人亦孰不樂爲忠義。強爲忠義哉。林翼負大罪而出。不可爲人事。若有濟。猶恐貽天下後世之口實。不濟則更不堪問。嘗讀史見袁粲褚淵之忠奸。其端先判於此事。實用懽然。要之近二三年。必住軍中。必力圖皖事。皖事定。吾楚可安。弟亦當陳乞。以贖大罪矣。希庵氣固。弟氣亦尙不衰弱。前撲祭迪公之文。文之字句。儘有不妥。而氣性淋漓。卽此一端。或尙可辦成一二事耶。其文質地餘美。乞老兄同滌丈點竄。以便付梓。溫公之忠骨已得。係湖廣督標馬兵劉步瀛之力。去年覓迪公與小石之忠骸。亦此人也。弟等各營。近日擬進駐蘄水。星槎署安陸。誦聲冠楚。吏實可爲吏治之準繩。國人之矜式。惜弟左右無人。營務不理。蓋弟處自有星槎。而吾之左右皆正人。四月以後。仍當調之入營也。滌丈如有保摺。乞以篠泉保湖北記名道。非私於鄂人也。欲以鄂爲中原之樞紐。故求賢獨急耳。如嫌不合例。則林翼應專奏以求之。

致訓營唐義渠觀察 正月二十一日

現在官軍與太湖城賊相持。攻之不可。克之不足。且直逼賊壘。若其久頓久攻。萬一援賊旁至。轉成羝觸。亦虞狼噬。其蔣道一軍駐荊橋。所以防石牌也。其唐道阿參將一軍。已進南陽河。尙未能卽赴太湖。愚見太湖之克復。遲早

尙未可定。卽克矣。亦未能多殺。而轉慮士卒之多傷。應於英山潛山。間道以七千人另爲一軍。直搗虛處。不攻城。不逼壘。專主於戰。不主於攻。儻此計可行。賊若屢次挫敗。則三五城可同時拔之。惟此起必須強兵強將。力可制賊。乃能有濟。又山路之崎嶇。轉運之艱難。亦須周咨博訪。乃可審度辦理。又羅田英山一帶。採辦食米。足敷每日萬人之食否。轉運潛山霍山天堂等處。夫力不致遲誤否。亦應先籌。手此奉商。如以爲可。卽切實示復。却不可宣布於外也。

與各帥論兵事 正月二十一日

兵事以逼城爲下策。以攻堅爲難於得手。得一堅城。破十巨壘。殺賊不多。賊氛仍熾。而士卒傷殘。元氣不復。此非用兵之至計也。又兵事當逼城攻壘之時。如雀之伺蟬。志在於蟬而不知弋人之又伺其後。假令攻堅不克。志懈力疲。他賊旁援。往往誤事。此近九年之通弊也。鄂之謀皖。已歷二年。總未得勢。則以兵祇一路也。七年賊畏黃梅之馬步。而間道從蘄州張家塆內犯。已繞黃梅之後。八年馬步力扼宿松。於張家塆復設重兵。賊又從間道由霍山繞麻城黃安。直欲乘虛以犯漢陽德安之邊境。惟我軍之未能批亢搗虛。而賊匪乃得以乘間抵隙。無他。備一路而虛一路。故賊得以狡焉思逞也。八年麻黃之賊。以李公昆季之精兵。并調省營二三千人。又調宿松二郎河靈營三千人。幸而獲勝。勢尙洶洶。今弱一個矣。謂之何哉。八年之秋。皖民稍見天日。以分道揚塵。另有一枝勁軍前行也。然不過一月之久。前功盡棄。迪公非不知兵分力單。勢必不支。然一分於彭湖。再分於蘄黃。三分於桐城。四分於舒城。所帶之勇。又皆攻堅之餘。創殘之遺。其忠心義氣。可感。其分防分守之苦心。亦可憐。然則謀皖之事。若再枝枝節節。而爲之。可逆料其必無所濟。無論九年現在之兵力。不則如八年秋後之精。卽令力攻而得太湖。得石牌。得潛山。得桐城。事事如前。而分防分守。仍不能不如前。是終不免前車之覆。況其必不可得也。說者曰。急攻安慶。得安慶而鄂乃可保。竊慮安慶之未必卽克。而賊之踞石牌者。方且修城濬壕。爲久拒計。爲久拒計。則必不急與官軍交戰矣。攻城無

良策。自昔已然。是說也。心疑其曠日持久。而又虞他賊之從。霍英以襲我後。說者又曰。以全力攻太湖。攻石牌。然後以一枝循安慶作圍兵。期以二年之久。如潯陽之四面合圍。斷其饗道。一枝循潛山作戰兵。伺賊來戰。隨機策應。是說也。較爲得力。惟英霍一路。尙嫌其虛。六安一路。無人守禦。從英霍可侵兩蘄。從六安則可達光固。而侵麻黃。蘄黃均屬空虛。賊不得逞於此。必轉竄於彼。以期官軍之却顧。而回剿。仍是七八年之故智耳。唐余二將。可守於蘄州。而不能分守於麻城。羅田。蘄水。心尙危之。且石牌太湖。又豈易得耶。似無實在把握。或謂以唐以余。以阿以蔣。分駐蘄羅英霍。作守局。而以李公速進石牌。林翼隨之。以多與鮑進太湖。都公統之作戰局。其說然歟。或謂旣以蔣道扼荆橋矣。異日可進石牌。旣以多鮑唐進太湖矣。異日可搗潛山。不必改調。即使賊圍匿不出。而攻不足者。守有餘。是黃梅一路。已無他慮。若以黃州之勇七千人。從羅田英山。出潛霍之天堂。專主於戰。不主於攻。深入虎穴。則各路之賊。必麇集來援。如其布置得宜。接應有法。大戰數次十數次。賊氣自餒。而各城守賊將無固志。是說也。其計頗奇。蓋以兵出於潛霍之境。是已據羅田蘄水蘄州之外藩。則內地之防。不勝防者。禦於戶庭之外。可以無虞。侵軼其得力一也。不走石牌太湖之正路。而以拊其背者。噬其吭。前面太湖石牌安慶之賊。已屬自驚。且必糾聚而求戰。較之逼近城壘。與礮石爲仇者不同。其得勢二也。惟兵出於潛霍之交。山徑崎嶇。地勢較險。米糧軍火。轉運最艱。非躬自督辦。則呼應不靈。非多設委員。招引紳士。則轉運必誤。且賊所必爭。必有大仗。非強兵能力戰者。不能奏功。此則必須籌酌。蓋善者也。總之非三路分進。終是頭痛醫頭。脚病醫脚。枝枝節節而爲之。吾恐三四年未必成功。而水陸將領精力盡疲。英華衰歇。是欲速而反遲也。若蓄勢審機。駐兵於賊所必爭之地。使賊欲不戰而不可得。則一半年之後。城邑可盡復。是似遲而實速也。更有奇者。昔東吳晉宋之際。公瑾士行。均以舟載陸師。登岸殺賊。洗脚下船。此東南地勢如此。自昔已然。若以一枝。由江流登岸築壘。伺便進剿。兵來之先。賊必無備。設備之後。兵又他徙。兵退之日。賊必弛備。弛備之後。兵可倏來。不過一年。賊已備多力分。疲於奔命。此申公巫臣教吳之至計也。又宋世龍驤將軍張興

世以軍入橫浦。所謂奇兵數千。潛出其上。因險而壁。見利而動。使其首尾周遑。進退疑阻。中流旣梗。糧運自艱。此亦制賊之奇也。似可於一萬水師之中。挑選將領。兼習三四千兵步。如舳板十六人。以八人兼習步兵。口糧須於水師本分應領外。酌議加增。以水師之半習步。則登岸之後。乃有患難相依之情。若以陸師改水。或借船以渡陸師。則情意不孚。難期共事也。此計若行。賊無不滅之理。此又兵事之至奇而至當。必乞速籌者。蓋不僅三路竟可變化不測。作爲無數勝著也。湖北月費口糧。須三十餘萬兩。月欠口糧在七八萬兩。若不裁弱留強。急求戰法。則年復一年。終歸於飢潰而後止。以上各條。非千里請戰之意。亦非欲築室道謀也。軍事重大。安危所係。一人之誠見。固不可有自是之心。卽衆人之思議。亦當求集思之益。用敢縷陳其概。乞訓正賜覆。不盡欣企。

致司道及各局二則 正月二十三日

攻堅是近六年所切恨之事。必應急求戰法。置精兵良將於活著。則滿算棋子皆活。審地勢。審賊情。審兵機。均須從此著精神。然斂抑自思。非知之艱而行之爲艱。亦談何容易乎。近察情形。擬月杪月初。移駐蘄水之六廟鋪。游家嶺一帶。距蘄水下四十里。距蘄水之界嶺上六里。距黃州城百三十里。下游有警。百三十里。兵行須三日矣。是必應下駐。乃爲正辦。距羅田百二十里。比黃州駐紮田。少近四十里。暫行駐紮。刻下太湖之多鮑。唐步兵萬人以外。馬兵千人以外。尙有蔣道六千人在荊橋。兵力不爲不厚。惟賊匪堅閉不出。不得勢耳。四眼狗言正月若不回援金陵。當分道犯鄂。若回援金陵。諄囑賊將。慎勿與戰。如項羽戒龍且之法。此十二月二十五日。有醫士逃出之探報也。林翼近來惕然深懼。非畏賊也。畏此身之無所補益。徒負名教耳。吳廷華新立新仁營。其才力膽量。似勝尋常。面有清肅之氣。或是將選乎。必選將養兵。而後疆土可保。總求司道總局分局。力持定見。屏絕虛浮雜費。卽善後事宜。亦難一一速辦。蓋必久保疆場。然後有善後可行。若其不保。又何後之足善乎。此須切實董戒。昔張太岳奏稱常

將有日思無日。莫待無時思有時。此言雖小。可以喻大。切望認真奉行。

致都直夫將軍 正月二十三日

弟回黃州後。再四商酌。只嫌蘄州蘄水羅田麻城後路空虛。賊以大股來犯。固恐不支。卽以小股分擾。亦屬可慮。蓋百姓與營兵之不能見賊。卽一二千小匪偷入。其紛紛驚擾。必致上煩薰勞矣。弟意似不可併作一路。併作一路。必致內地告警。牽動前敵。弟已定計前往蘄水下四十里暫駐。再行審定進兵之路。至太湖兵力。現在不薄。然鮑鎮之意。只知力攻。唐道之號令隊伍。能否整齊。尙乞諄囑多禮堂查看。總之賊不戰。則我兵必有力攻之心。賊來戰。則我兵恐又有難戰之勢。是宜求戰法。不求攻法。乃爲妥當。老兄所示。先自穩固。乃爲至善。是兵家之至計。弟之愚見。凡兵總不宜逼城太近。太近則援賊若至。不便接仗。卽城賊出仗。亦不便施展也。乞訓正示行。

致訓霆二營 正月二十四日

太湖之兵勇。計共一萬二千餘人。聞四眼狗初七日自安慶已至太湖。此厚庵來信如此也。然一萬二千之兵。若再嫌少。亦屬可笑。此時大計。應斂兵自固。靜以待動。不必攻城。不必攻壘。連絡軍營。以待援賊之自至。審機審勢。以求大戰。若孟浪輕率。恐必誤事也。湖北之兵。盡注下游。義渠先生來函。以陳德園無人守禦。我亦無兵可分也。總之萬餘兵勇。若布置得宜。卽二三萬賊來戰。未嘗不可取勝。若以萬餘人而不能戰守合宜。則亦可羞也。乞戒諭各營。勉力自愛。莫直逼城下。致使不能施展。莫立意攻堅。致損士卒銳氣。先求穩固不敗。然後相機防剿。賊多烏合。非官軍可比。賊計在包抄。我軍須防其後。切囑切懇。

致漢陽府劉冰如 (齊銜) 正月二十三日

昨得復函。明白切實。舉善無溢詞。觀人無俗念。即此亦足徵公之胸次矣。鏡颯以品行純謹。才堪經世。作考聽孫以綜理精密。志行清嚴。作考已繕摺擬。月內拜發。措詞在軍務。注意在地方。必軍務乃能破格保留也。稍暇當加函寄閩。仍乞老兄函致弟。傾慕延跂。如飢如渴之意。文忠清德冠時。此來繞道。過行亦殊不易。應從何處寄致盤費。乞明以示我。林翼每念治理之要。賢才爲本。苟不知求賢。即勞心焦思。亦屬廢事。公其隨事留意。苟有一節之可取。一行之足稱者。乞手函示我。國之求才。如魚之求水。鳥之求木。人之求氣。口腹之求食。無水無木。無氣無食。則一日不安。日即於亡。得水得木。得氣得食。則生。此理至明。人自不察耳。又孔子之教。各舉所知。周公之訓。人無求備。大抵聖賢不可必得。必以志氣節操爲主。嘗論孔孟之訓。注意狂狷。狂是氣。狷是節。有氣節則本根已植。長短高下。均無不宜也。昨讀聽孫所寄閣下家書。其言蘇人作善。僅慕其名。若去奢崇儉。以虛用作實用。尙可多養一二萬人。此卽孔子用力於仁。力無不足之義。又言旅居清苦。一介不取。無忝所生。又言豪富侈泰州縣。般樂怠傲。旨哉斯言。固志節之士也。中心嚮往。不能言罄。

復厲伯符觀察 正月二十三日

三河桐城卹賞。可於正二三。先行每月解三萬。(至少亦須二萬餘。)希庵之意。口糧可欠。而卹賞不可虛也。今日都公據多函來咨。似嫌太湖兵少。又據唐道稟稱同情。凡官軍之技倆。不見賊則捨命仰攻。一見賊則倉皇畏戰。此天下之拙工也。唐道來稟。又言陳德園空虛。夫豈不知楚師之盡行也。蔣道駐荊橋。豈可移動。凡將總是一勝卽驕。一敗卽怯。此最誤事。已於今夜連發三四函。囑其斂兵自固。以待賊援之自至。不知戰而知攻。不善攻而蠻攻。此等將領。令人悶悶。湖北後路前路。均是少將。諺云。兵貴精不貴多。將貴謀不貴勇。斯言也。其有味哉。其有味哉。湖北餉項終虧。乞早商如何節制之法。

致李次青觀察 正月二十五日

一月未得滌丈書。深以爲念。滌丈深痛脊令。又痛迪庵。聞其精力漸減。乞護持之。天下事成敗利鈍。早已然了於中矣。林翼尙然。何況心通天人。如滌公者乎。惟經手未完。前此心血可惜。若竟不能成。自有一條灑脫自在法門。有一二幾希之望。仍不如盡力幹去。譬之大海遭風。已知萬無可救。然苦無島嶼可望。行固不得活。不行亦必不得活也。建昌近事。江右近事。均乞十日一示。及夷務顛倒謬誤。大亂不遠。天下之禍。不盡在盜賊矣。近年有無異才奇士。在胸中。乞明以示我。拔營蘄水。距黃州百五十里。二十九日。與希公同往下游各將。頗無智略。統將無才。是所懼矣。

致官節相 正月二十六日

栗仲然到營。欣悉福躬已安。惟珍衛萬善爲慰。應商事宜。開列於後。一滌帥不能渡江。毫無疑義。如能如其所志。循江岸而清皖南。亦鄂之利也。私計恐此舉亦尙不能。都公有退志。林翼豈堪并任耶。無論才實不可。亦力有不及。一多處應以所帶八百人爲度。其新到黑龍江西丹。請速撥歸舒公。其駐荊橋之巴姓寶慶（本是舒公撥交迪庵。從麻城改撥之營。非多部下也。）其都公親兵。尙有西拉布黑龍江二百餘人。如都公欲假。可撥歸舒公。卽札飭駐宿松荊橋亦可。必乞以公牘行之。一希庵與林翼之軍。與蔣道之軍。應歸一氣。卽無馬隊相依。亦可用也。況舒公純良。隨時可以策應。一多欲自當一路。除馬隊外。尙有鮑鎮。可以久隨。唐道可以暫隨。其蔣道一枝。仍專隸希庵與林翼爲荷。一滌公欲鄂代奏察哈爾馬匹三千匹。曾函允代爲購馬。而滌帥已奏。應請鈞酌示行。如應奏明。卽請主稿。（或司中代擬亦可。）以上各事。敬乞鈞度。都公尤乞慰留。或必不得已。到省養病亦可。尤要者。分馬兵之小半與舒。則兵機乃千萬妥善。

致昌營余會亭參戎（際昌）二十八日

近日軍情賊勢如何。幸隨時告之。應商之事。開列於後。一、天堂之賊。另作一股。豈非預爲窺伺英山及兩蘄羅麻地步。一、貴營移英山之城外十里。近又移進。其陳德園一路。可保無虞否。一、貴營二千人。分七里之內駐營。不嫌疏闊否。有賊一二萬人。可守可戰否。一、賊若小股來試。二千人可抵禦。特不宜高興遠追。賊若以大股萬人來試。二千人如布置精當。出奇制勝。亦可捷也。若賊以二萬人來圍。則營中之薪米軍火。汲路須預先思議。能守十日。則兵乃可到。一、陳德園已札飭彭牧集團。然僅恃團勇。則萬不可戰。平日查奸細。臨時助聲勢。則可耳。一、姚敦禮之五百人。不知可戰否。姚敦禮本人。不知膽識何如。可調與否。當思議示之。

致禮中營姚主政（敦禮）三十日

得二十六日之信。知賊進千堂。啖合騰雲廟。黃沙嶺柳家。啖。近萬人。賊蹤近更何如。賊計約略何如。尚乞續報。望速望速。羅田應齊團把卡。速卽告之。來信言意在窺伺楚疆。其在陳德園與兩蘄耶。其在英山羅田耶。

致唐義渠觀察 正月三十日

賊竄麻城羅田。本意中之事。弟之不敢輕進。實系乎此。而下游諸將不知也。此時若竄羅麻。弟處六千人。尙可應敵。若分枝分竄。或再繞光固之間。另竄他處。又出麻羅之上。則力更難矣。至貴營已至太湖。糧道須改由宿松。此一說也。應由尊處咨武穴局吳丞。及松宿松史委員。如專注龍灣。應以并力回援爲是。一切情形。弟不能遙制。總之不攻堅。不蠻打。則士氣不傷。卽萬賊亦可戰也。一切謹慎行之。老兄老於兵事。當知其妙矣。如英山兩蘄無警。兄可

自酌。或靜或動。弟不遙制。如英山兩縣有警。則請回援至麻羅一帶。弟自任之。

致羅澹村方伯

承賜寄秋門先生所言漕糧改折。較徵本色爲難。查天下漕弊。小戶交折色。大戶交本色。小戶折色者。與國及鄂省三十餘有漕州縣。均係以錢折米。未聞以銀折米者。小戶交折色。愚弱良善。書差欺壓。數至倍蓰。向來監利每石折至三十六串文。江夏每石折至十二三千文。其餘每石九千至十八千九百文者。積弊已百餘年。至於大戶。則以本色完納。書吏不敢盈取。州縣用費不足。則以小戶之有餘。暗爲取償。是湖北二百年之虐政。亦天下有漕省分之積弊也。嘗謂不侮鰥寡。不畏彊禦者。仲山甫是也。侮鰥寡而畏彊禦者。今日州縣書差之於錢漕是也。經某於七年痛加刪減三次。奏定一例。改折大戶小戶。是紳是民。較若畫一。奉旨嘉獎。經部覆准。並經通行有漕省分。以爲準則。翁二民先生。江南大戶也。深以此法爲可救民而利國。姑卽湖北一省而論。自去年一律改折。痛加刪減之後。每年減收民間之錢一百六十餘萬串文。儻能行之十年。藏富於民間者。可一千六七百萬串文。鄂民安得而不富乎。秋門先生一省之望也。卽不爲興國計。獨不念通省大計。其藏富於民者。爲數甚鉅乎。又言花麻積滯。穀不值錢。是豐年之情形。湖北湖南大局皆然。何獨興國。且賴花麻而後有錢。而後有銀也。此固不必較論。又言興國半是小錢投櫃。揀去其半。查小錢必應嚴禁。安徽福中丞不禁私行小錢。以致物價日昂。民生日困。此事關係錢法大政。民生緊要。必須官與紳與商賈市鎮。通行會議。一律嚴禁。如有私用小錢者。本地紳商一律議罰。若僅文告示禁。或假手書差。或委託捕廳。則不過需索錢鋪陋規。而於實政。有害無益。應請嚴札嚴示。飭行至向牧之委捕廳查禁私錢。與例案雖無不合。然捕廳之力。何能禁止小錢。不過調劑捕廳起見。若思調劑。則本官可以量行解囊助之。不必藉公事以示惠。此向牧之大錯也。應卽飭行。又言向牧慈仁。下不畏法。是誠大過。亦弟等委任非人之過。應酌擇嚴

健強項之吏。以資整頓。又稱現在商之向牧。銀錢並收。此則斷不可行。以錢折收。系奏定奉准之章。不能任意改移。又閱向牧寄信。稱奉給諫之令。宜聽錢鋪代花戶完納。若由錢鋪兌銀交櫃。則錢鋪每串可獲銀七釐。查與國前因銀匠積弊太深。痛行裁革。若如給諫之意。又以利權歸之錢鋪。試思銀店與錢鋪。其弊等耳。不過二三姻亞。開設錢鋪之人。慳惠以奪官民之利耳。夫事之有益於國於民者。吾輩當盡力行之。若於官民無益。而取官民之利。以資錢鋪。則必不可行。况錢漕重件。官吏考成甚重。若不責成官吏。而委利權於錢鋪。異日流弊。不可勝言。非與國與給諫之利也。且給諫不許民間自封投櫃。而欲以錢鋪代民改兌。是即顯違自封投櫃之定制。而又必以書差之外。添數百虎狼於錢鋪之中。此議斷不可行。應請一面函復陳給諫。仍一面函諭向牧。至爲感企。

致各司道

林翼泛舟黃州。讀小宛之五章。疑傳箋釋義蓋未盡也。傳曰。交交小貌。應釋爲羣飛貌。箋曰。釋竊脂無肉食粟。失其性不能自活。亦未盡當也。交交桑扈。率場啄粟。喻今日之差胥。周圍民居。所在啄食之也。交交喻羣黨之義。竊脂喻貪賍之意。哀我填寡。宜岸宜獄。喻今日之官長。不問黑白。凡到案。即先羈押班房也。詩人自知孤弱無可訴。而以岸獄爲宜。其忠厚悱惻。哀而不怨。亦可傷矣。呼長上而冤不可申。即卜之鬼神。亦無善兆。詩旨尤爲沈病。管見所及。錄呈鑒政。或亦警賦矇誦之一得乎。夫經在致用。政貴安民。苟其存心濟物。力無不足。敬乞司道鑒定。如以爲可採。乞作函札。訓勉府州縣。以時省覽而垂戒焉。

致長陽縣程光第

聞足下到任。結案二百八十起。百姓有不要錢能了事之頌。本年足下別時。有立志作好官之概。林翼愚昧。賞其

言而不知其果有實濟也。吾人作官。在廉在勤。及是時明其政刑。猶可補也。勉敦志節。靜聽循聲。是所至感。林翼初到黃州。軍政少暇。驟聞佳譽。欣忭無已。

致鄖陽府李午山

別來甚念。鄖爲明代重鎮。特立巡撫。蓋巖疆也。閣下才智優爲之。特同城之人。虛浮驕怯。恐誤公事。如有實在劣蹟。不妨詳以示我。我於世味無所嗜好。利純成敗。升沈禍福。皆不計也。又棗陽有巨匪謝開基。亂襄鄖者。必此人也。以其殘忍嗜殺。迥異尋常盜賊。弟已札飭襄鄖道府及唐丞矣。舌敝唇焦。久而不應。又料此人未必久匿棗陽。非走河南。卽竄鄖陽耳。敬乞物色鄉里傑士。懸賞購線。極力緝拿。如能格殺此人。則功德甚大。楚民其感且不朽。

復應山縣吳木齋（林）

所稟均有心思。若再閱歷有年。便是大有條理之才。以其質地本樸實也。應山之士民。習見官之無恥。遂自忘其恥。習見官之不廉。遂自忘其廉。百年痼疾。豈一旦所能挽回。來書以寡廉鮮恥。習與性成。渾括一縣之士民。斯言也。抑何不仁之甚。夫士民之風俗。在父母斯民之轉移。果能隨事隨時。諄諄教誘。則天良具在。自知感化。十室之邑。必有忠信。互鄉難言。孔子進之。此古今不易之理。特必寬以歲月。行之以漸。持之以恆。乃有效耳。獨是績弊州縣。貪吏在官。則劣紳與官一氣。集事轉易。乍以廉吏爲之。水火相搏。轉不能集事。然此亦古今恆情。天下通病。昔子產治子皙。子南之獄。始右子皙而逐子南。以子皙之宗強。而子產之爲政日淺。令有不行也。繼而并誅子皙一事。而前後異詞。子產蓋識時務之俊傑矣。孟子所謂操心危。慮患深。德慧術知者。殆卽指此作官久。臨事多。則昔年所讀之書。均思之有味。吾子其體驗物理人情。以施於政事。始患其扞格。終必渙然冰釋。油然理順矣。又此時宜急訪正派士民。

加以恩禮。德必不孤。德亦必不可孤。試深思之。

覆孝感縣文（南邦）

讀來函。備悉治行精勤。良深感慰。聽訟是教民。養民之大政。知情僞而折服。董戒之教也。省株連而不擾其生計。約胥差而不使滋蔓。卽養也。足下優爲之矣。鄉居益陽已數百年。先世十餘代無訟事。而鄰里鄉黨之以訟破家者。比比皆是。是可傷也。錢糧設局。保甲設局。最爲得法。澧川隱匿詭害。逋糧七八千之多。歷任因循。坐視不理。如秦人視越人之肥瘠。漠然無動於中。吾輩司牧。如大戶之派人庀家政。今使家宰不顧主人之田廬市廛。徇人情而任其逋匿。主人必曰。此不忠之人也。當謝絕之。獨於國計。則上下相蒙。恬不爲怪。則又何必歲費數百萬之帑。盡千萬人之命。以爭此土地人民乎。讀來書。錢糧粗舉其端。未竟其緒。八月之久。原難急切苛求。然此事必仗足下澈底澄清。乃可有濟。他人必無望矣。若賠墊以顧目前。是苟安之計。非可久可大之規也。所開資才。如張子已延爲家師。夏與姚與田與金。均攜手同行。夏尙未到。徐硯農贈以行資。入京北上之期。必至澧川。可再惠給之。弟嘗恥沿門發卷子。囑徐公勿爲此舉。未知城北之美。以余言爲然否。

致曾滌生侍郎 己未正月二十七日

都將軍足疾。欲引退。深以爲念。多與鮑與唐。逼太湖而壘。如不蠻打。不浪戰。防援賊據地勢。則馬步一萬三千人。儘可望勝。此三君者。智略均短。誰督戒之。恐不盡從也。蔣之純駐宿松之荊橋。以杜石牌之窺伺。未可移易。楚邊均要。若并力一路。兵勢亦必不活。都欲引退。則事更難耳。水師以三分之一兼步。若於樅陽須濡等處。隨機雕剿。見利則動。因險而壁。賊懈賊弱。而擊之。賊守而不戰。則撤入舟中。實爲千穩萬當之至。且賊船日少。江岸先清。則陸賊自

困。彭與楊近日均憚陸師之勞。應請尊意函商。囑其選將分任也。安壘之處。有水師相護。則萬萬不誤。凡兵事只畏三面四面受敵耳。有一面可恃。則強兵可戰可守。有三面可恃。則弱兵亦可戰可守。又陸兵三千人。須月餉一萬五千金。若以十分挑三。則一萬水師。可得精兵三千人。三兩六錢者。可加一兩四兩。餘者可加至五兩。餘所增亦不過數千。無捷於此者。如鈞意以爲可採。尙乞無遺葑菲是幸。

復曾侍郎

一月之中。音驛不到。系念殊深。得正月中旬十九號信。知凱章克捷。私心大慰。所咨三件。并尊函。卽日送鄂省矣。三日後斟酌。再行詳復。上駟院派員解馬。近年京旗各員。愈貧愈貪。吾恐三千馬匹。惟得其皮與其骨耳。日昨兵部咨稱。申嚴責成地方。林翼妄不自揣。以責成追賠復部。未審部中如何。用不得人。法亦無補。殊可慨也。丈所籌者。遠大一年之後。方知丈之公忠利國。林翼敢不黽勉圖之。或奏請。或自購。商定卽行速辦。都公引疾。林翼覺其是真病。而舉國均以爲多之驕縱。不受約束。鬱鬱而爲此也。鄂事更少一良將。爲之奈何。都公仁厚。尙有豐鄙故家之遺風。近年內大臣之從軍於外者。無此質地也。林翼前奏迪公之死事。蒙以激昂二字見賞。祭文則特荷嘉譽。如老貢生五六十不中舉。忽聞登榜。爲之一快。林翼本不能文。初次學作。便爾可造。今年方四十八歲。若肯發憤。尙不爲遲。預爲要約一節。林翼與丈爭先後。不爭彼此也。溫公忠骨。近日可到。當善爲護送。敬慰德念。另紙以水師三分之一兼習步隊。實將來之要著。明年以後。可以見效。幸主持之。黃州蘄水駐營。均屬便利。希庵體氣漸好。志不願歸矣。李筱泉大器也。敬乞以湖北司道記名請簡。謀鄂之忠。此爲第一。殊深切懇。廿八日發摺。請林鏡帆六君子矣。

致唐義渠蔣之純兩觀察

讀盡一部念三史。古今兵事。有戰法。無攻法。惟近九年之官軍異是。賊不欲戰。官軍蠻攻。賊果欲戰。官軍一定要。此近年官軍之情狀也。昔年攻武昌。攻梅家洲。攻九江。均無計不施。無醜不備。亦可知其大概矣。老兄讀書君子。久在戎行。凡攻堅之事。亦無役不從矣。幸乞以此戒約一切。如有強兄攻堅者。卽錄此以憑稟報。以憑奏報。

復李次青觀察

得初十日手書。如獲異寶。拳拳以龍公爲念。古誼可師。頑鄙興起。龍公遺腹。計在近旬。擬以千金專交湘舫。置田以養其後。不得挪爲家用。其家頗好客。欠累甚鉅。天下惟自己培植自己。乃可靠。外人及父兄。均不能代謀也。老三老四。異日當可謀養。老四現在營中。近月湖北頗貧。以三河桐城之卹銀太鉅。迪公功特大。以萬五千贖其喪。亦官民之誼也。林翼攬利權而歸之公。公私之所費。皆出於此。迪公之事。有謂宜派州縣公助者。林翼恐開科派之漸。尤恐此端一開。影射無窮。故仍以取諸公中爲正辦。他事類此次第行之。則事乃就理。龍公之遲遲未贖。蓋有待也。且亦必須另爲謀畫。黃金一擲。諸少年或不甚惜。必致其遺孤仍無所依倚。閱世閱人多矣。言之可嘆。此林翼之微意也。曾憶水師周清元之喪。贖金七八百兩。代爲立繼。并代爲斷案。又託左湘農代爲置田。經營兩年。乃告無罪。非僅以出錢爲功果也。林翼學問文章。原至淺薄。迪公之祭文。以夜半起坐。悲憤而成。應請滌公改正數十字。同林翼之奏。刊成一本。傳之通都。藏之名山。或可藉人以傳文耶。過蒙足下與滌公獎借。如老諸生五十年不得中舉。忽聞榜發有名。爲之一快。至要約一節。實難預定。彼此林翼與函公爭先後耳。異日尙有奉託之二三人。則季高與足下與霞仙耳。上年以黃金五十兩。託人往揚州購書。贈希庵。并時勸希庵讀古文。亦要約之微意呼。平江祠宇。以龍擴黃公居之。而祔以三千人。亦是盛典。應請撰稿會奏。鞋鋪招牌。抽幫換底。實已做到。整舊如新。尙難自信。此林翼黃州之軍情也。賊不欲戰。官軍蠻攻。賊果欲戰。官軍欲走。此天下官軍之病也。林翼必痛戒之。滌公早到湖口。爲是楚人。

不宜分幫。只此一副本錢耳。馬匹一奏。將滌函飛遞官相。廿八九可復到。卽日定稿施行。林翼與官相之意。只恐上駟院之人。好利不好名。先蝕銀錢到手。則參革亦自怡然。三千馬匹。惟得其皮與其骨耳。事經官手。異樣荒唐。見慣之後。不似早年怒髮衝冠矣。溫公忠骨。近日可到黃州。先軫喪元。肖形同殮。此劉步瀛一人之力也。林翼事無了期。而精氣不如四年遠甚。公尙未及見耳。篠泉大器。去年戰案。乞滌公特筆畀以大任。不可離湖廣。尤須以湖北爲緊要。天下無督撫保督撫之理。嘗謂今日之司道。卽異日之督撫。明眼人須著先明。著精神。以此告之左公。心是其言而力不足也。乞堅志毅力。隨事隨時告之滌公。必求以此公見惠二年之內。當以吏事託之滌公也。奏調林鏡颿。林聽孫閻丹。初衛榮先張建基（曾任湖北東湖縣。有循聲。）童子木（棫）六君子者。惟林鏡颿尙識面。餘皆不知。蓋訪求而得也。林翼欲與滌公爭賢才之多寡。各奔前程爲要。

致司道總局

廿六日得廿四來信。并繳回都刑之函。所論多中肯要。欽感無既。然亦有應商酌者。仍詳陳於後。又滌帥今日來咨來函。乞公閱。逐條示復。仍請攜原咨原信。并弟所呈中堂之信。敬乞公同趨謁中堂候示。滌帥之不能渡江。萬無疑義。竊料其心欲依傍彭澤。以規皖南。江省主人未必肯放也。江省拉人強人。則頗有本領。而平日待人。則毫無真性情也。自謂權術冠時。而不知志士早已冷眼窺破。卽如滌公在江省。不願久留。而劉印渠部下有三賢將。防湘防鄂。援皖之事。均不欲辭。惟不願到江西耳。又如沈幼丹。乃江省道府之傑士。亦使之終日鬱鬱。不得其志。卽其他可知矣。都公似是眞病。其多禮堂跋扈一節。似亦不十分確切。林翼未到宿松之先。頗聞此語。到日與都公談三次。幾於無話不說。亦頗默察其微意。其傾慕多禮堂。無心流露。似非矯飾。且三日之久。淡鼓至深。都公若有他意。不應如此之深沈莫測。豈林翼之太淺耶。至今思之。尙不謂然。惟省中所求醫生。聞因起課不吉。不肯卽行。殊不知課之吉

凶。不如命之前定。愚哉。人至以術卜生。則其得生也。不亦微乎。都公若須暫假。應以馬隊之大半隸多公。而以五六百人隸舒公。其巴姓寶慶之在荆橋者。應歸舒公。其都公親隨之西拉布二百人。亦可改歸舒公。其黑龍江新到西丹一二百人。卽請速歸舒公。（本是舒公遣回另換之案。）合計已五六百人。舒公得之可大戰。惟必乞中堂將此事決斷施行。計無有妙於此者矣。若遲滯不行。則有尾大不掉之勢。且於軍事有礙。舒公卽下駐荆橋。亦無不可得。欽差之札。卽驕將亦萬無可以放肆之理。舒公如欲上援。亦隨時可以檄調。此人純良。必不誤也。切切。一。滌帥欲求中堂奏馬三千匹。中堂之意。恐牧廠舞弊太大。委員沿途剝蝕。惟得其皮骨耳。林翼之愚。不如以萬餘金。分三起專弁出口買馬爲穩。此信已復去。而滌尙未接到。今則專盼鄂中代奏矣。滌公一片實心。辦事可靠。我輩豈忍坐視。且所爲者。公家之利也。何惜此財。滌意必欲鄂奏者。由鄂奏則鄂人不能不籌餉耳。然添兵馬而裁步營。亦可長短相準。盈縮相敵。弟并不怯也。應如何撰奏。或出口自購。或卽如滌意代奏。請察哈爾撥馬之處。乞速請中堂施行。至於打仗。則營兵難用。牧馬則官廠難用。理財則衙門人難用。由來舊矣。我輩當戒之。公示欲以都公督希庵進石牌。多鮑進太湖。希庵之意。不畏賊馬。并不欲依隨他人。惟乞獨當一路。專受中堂與林翼之札耳。亦乞勿以撫湘之營。交他人差委。補撫湘雖摧殘之餘。猶較他營爲強。且此番更換整飭。實有起色。並非欺謾也。酌之。其蔣道之五千人。亦歸林翼與希庵調遣。乃可得力。一。滌帥所謂抽幫換底。整舊如新者。乃京中舊鞋鋪靴鋪之謊詞也。卽如仁營將勇兵強。歷有明效。然朱希廣因誤信壞種之言。辭去同知沈定鈞。其營務卽日卽於弱撤之。則此人異日或尙可用。又如何紹彩之強悍敢戰。然近一年來。終日舟中不理營務。凡人至不理事。則兵無不驕縱者。驕縱之兵。無不怯弱者。此萬不能不更換之事也。顏光敏作戰字八股文。天壤間有予而無奪。古今來已不勝保舉之煩矣。一。黃州本屬適中。取攜甚便。夏秋六個月。陸師千五百人。水師左光培一營。弟可包守。冬春六個月。須兵多乃可守。惟其妙處。在與麻黃相近。其不妙處。在與太湖宿松差遠耳。蘄水之游公橋。形勢亦好。左傍山而右挾湖。惟春冬則水涸。取攜不與。

招新汰舊。招引士類。延接官吏。無城市可依。亦不甚便也。弟適不過欲多移一步。以遵廷旨。且違禮從戎。不能殺賊。殊覺悚惶。而仲然與希庵。尙以黃州爲是。姑待初二日。再定拔營之期。一弟處營務無人。而星槎顧做好官。若假手一二年。必可遂其俎豆千秋之志。却不欲補缺發財。只求成功。使後世百姓。說有某某是好官耳。私意亦望其成效。以爲鄂吏之矜式耳。然營務太無才。四月內不能不調。惜其一片作官之苦心。不能使之盡申。此則無可如何之事。一造就人才。原是君子之心。仁人之術。裘令之事。現已密訪。若以此辦公。原可矜恕。特恐自肥者不少耳。欲救全人。須使之先有忌憚之心。以上樓縷。應回明中堂者。可速行爲要。再者餉絀。月欠七萬八萬。奈何奈何。如何節用。如何預籌。乞公商酌辦。再者希庵之父母胞兄。求希庵回家一面。希庵不肯我告也。林翼頗難處置。林翼素不強人。蓋因禍福生死。成敗利純。皆有分定。惟是都病多驕。鮑愼而愚。唐惑而疑。林翼左右。又無可恃之員。恐誤鄂事耳。

致錢萍石樞密（寶青）

漕折事仍照舊。部中則通行各省。意欲仿照江浙情形不同。尙須從輕。江浙州縣痼疾太深。亦恐非目今長官所能鈐制。且情形實未可強同。二民先生之意可感。而實恐在外之官吏。必不能仰體也。異日如以駱以滌辦江浙督撫之事。均力能及此。非欲遲也。蓋有待耳。商賢之不免參差。蓋不知民之情僞。不知難也。卽令運河通。近年可艱鄂中之米。以銀購運。亦儘可辦到。况近七八年。運河不通耶。卽今江岸肅清。二三年先辦海運。則鄂中尤屬不難。弟辦此事。亦預爲十年後地步矣。且喜緊要處。已荷大力主持。其閒筆只合不理耳。江浙不能不兌米。應大戶。戶一律兌米。不准多收一粒。兌米之後。應每石加兌費雜費。共一兩三四錢爲度。此一兩五錢之中。如何提半以益國計。如何分存以利兌運。則在六官之一手經理。非一二年不能妥辦也。駱之辦事。全在左卿。然公忠之志。亦近年所獨也。滌若任事。則才力更大。惟與俗不諧耳。滌庵恩旨。是我公燕許大手筆。激揚忠烈。生氣凜然。此公功勳甚大。近

年將帥。無此忠良。得公爲此制詔。死且不朽矣。其諡法何字。其碑文祭文昭忠祠文之出翰林院者。未知尙能沈著切題否。敬乞寬稿見示。所擬水師兼習步軍各條附覽。此系與各營公商之件。尙未定也。遍地皆賊。防不勝防。非算定。非多算一二著。不能成功。又三路分兵。苦無三路之將。迪旣云亡。都又求退。滌公必無渡江之理。湖北之將。實不敷用。恐所議者急切。均不行也。人便附呈覽正。可見軍事之難。而餉糈之不易。尙其有以教之。

致張仲遠觀察如冠九太守

前承惠拓本江南地圖。感甚。弟之志識。豈堪及遠。武惠收圖籍於江南。鄴侯得戶口於秦府。古有其事。今非其才。特鄂處東南。實爲中原樞紐。敬乞鈎摹江南湖廣河南江西六省原本。暫不求其開拓。保此亦足以豪矣。其餘各省及拓本。隨後再請寄示。不過欲備案頭之省覽。豈堪周知天下之形勢耶。

復昌營余會亭參戎

運米自外江入英山。實非易易。連日風雪漫山。尙難決定。太湖潛山。無力攻之法。攻城無良策。自昔已然。此時官軍逼太湖者。萬四千人。多而無益。駐荊橋者。五千人。在黃州者。六千人耳。貴營在郝家橋。足資堵守。其在東河夾鋪之賊。情形若何。深以爲念。陳德園不嫌空虛否。羅田足資堵禦否。卽望示及。得二十八日之探稟。所慮極是。頗有條理。漫水河出流波礮。直達松子關一節。尤見思慮之密。應以黃州之六千人。準備麻羅貴營及唐道各營。專顧蘄州。蘄水英山等處。如貴營力能自支。或賊知英山有備。不入蘄水蘄州。則唐道之行止。尙可再商。如兩蘄及貴營有警。則二千人恐尙不足。可以此函先行商之。唐道相機策應。至麻羅之事。暫應責之於我。儻異日兵力實在不敷。則臨時調遣。亦尙可行也。仍望隨事隨時。專探專稟。盼切。

致糧臺總局

天堂之事。尙無動靜。卽有動靜。仍守前此辦法。總是穩著。中堂來信。以戰爲守。且戰且守。乃是深謀遠慮。天下事決無近功也。王璞山之部。百戰之餘。其精銳不可當。湘軍除迪庵一二營外。以此爲最雄。張凱章一軍。不過三千人。逼景德鎮而壘。已損折五百人。賊數約七八萬。勢必不支。應保全此軍。則江右乃得安枕。滌帥乃得萬全。鄂之南岸。乃可兼顧。是誠難事。卹賞按月搭解。力所不足。希庵亦不強也。可不必容心。湖北月餉大虧。乞速議節法。儉約法。入將之罪。可由省中分別定擬。弟無必殺之心。若以殺人示威。則仍是爲己之私也。情罪的當。得其平允。可使死者復生。而不愧。生者知畏而知感。則善矣。再節儉之法。如糧臺應辦雜物。及年節送禮。三五日內。擬通飭各營。一律停止。總計不過每年少數萬串。莫謂此爲小費。小費不惜。大費亦無可惜矣。高以下基。洪由纖起。此之謂乎。第一要事。莫如裁營頭。五百人一營。每年須三萬五六千兩。少一營。卽節去三萬六千兩。然兵之難裁。以統將少耳。使得統將。則五千人可抵萬餘人。不省之省。其利乃大。又滌帥乞奏察哈爾馬匹。愚見添馬隊。乃豫爲皖豫之計。可於察哈爾調五百匹。大凌河調一千匹。或一千五百匹。不由上駟院經手。請中堂代奏。又馬勇三千。何人能統。何人能分統。且勇丁來去自由。尤不易馭。應請中堂定見。仍奏請西丹千名。卽可抵三千馬勇之用。且有舒公等可駕馭也。

致羅澹村方伯

我輩心腸太直。無一切作用。亦不暇及此。能開誠心。布公道者。惟中堂一人。弟亦質直而粗淺矣。羅田空虛之處。來示撥新營二千人。專爲防守羅麻。其防麻耶。其防羅耶。其一處一千人耶。賊不入楚則已。入楚則必挾全力。非三萬人必不敢來。多或四萬人。少亦二萬人。若如尊意。則恐此二千人者。適足以供賊餌耳。而於軍氣亦必微損。軍額

之在黃州者。實不過六千餘人。豈堪再弱也哉。且二千人無分領之統將。則謂之無一人可也。連日得霍山英山余將伍令等探報。情形漸真。是太湖荆橋之如不欲戰。非忘戰也。賊意固別有在矣。弟日夜之所思。不患賊以二三萬人并一路。并一路則力可倖勝。若賊分爲二爲三。則眩我心。日搖我疆場。以六千人分兩路均單。且無分統之將。其預爲思議。有以益我。來示清野。是第一良策。請試札之限之。昔年民欲賊來。不肯清野。近年民不願賊來。然尚不肯清野也。欲清野尙待創深痛鉅之後。如此時能行。此則感激之至。川中來咨。已有三萬餘解鄂。哥寄函秦蜀。再四力懇。懇請之詞。不爲不切。可請中堂再加一咨。催言及月欠已鉅。共百餘萬兩。此後仍一月一咨。似不必再奏酌之。

致唐義渠觀察二則

前奉一函。詢謀之事。預爲異日上援地步。弟思賊在流波。現到者固多。竊恐尙不止此。以賊不來則已。來則必以大股也。荆橋陳德園均不可無兵。荆橋尤重。而陳德園亦兄一二年精力之所布置。棄之可惜。所商條列於後。一、以阿三千人與彭牧帶督守卡團練。可保陳德園無事否。如此處以千人與團練可保。則尊處訓營與荆橋湘營均可抽調。一、尊處如移荆橋。則上游無警之日。可與蔣合同防剿。如上游有警。抽撥一軍。則下游不虛而。上游有備。一、弟處六千餘人。縱使二萬賊繞入羅麻。繞亦同希庵力與之角。特患其分爲二枝三枝。能我軍不能即分。無論六千餘人分爲二處。兵力均單。卽強分之。而統帶只希庵一人。亦難駕馭諸將也。一、尊營移荆橋三千餘人。守或有餘。以上均乞速酌。以備異日調遣應援。

初四日探單均悉。頃纔致書請示一切矣。弟意太湖石牌。必無求戰之意。（卽欲求戰。亦須官軍力攻氣懈之後。此一定不移之故智也。）弟意總欲以堅定不搖之營。與賊久持。賊懈然後乘之。而另備一萬精兵。俟機進剿。或援應上游。上游果能不失。則剿退之後。乘勢力取。可得一二城也。

致厲伯符觀察

所議節約各條。有可酌行者。有必不可行者。遲再詳悉奉復。至協餉三萬。酌減一萬一節。此萬不可行之事。滌公忠義冠時。斧柯未具。專恃湘鄂之餉。無論如何虧欠。此三萬者。必不可絲毫欠缺。至下遊彭楊水師。每月可暫欠五六千金。下游及黃州陸兵。亦可十分欠三。均屬無礙。又弟處黃三清一營。希庵處彭炳武之剛右營。李贊助之毅右營。均已啓程。可派員迎催之。彭炳武李贊助到省。軍器鍋帳銀錢等件。乞速付給。飭令速來。又皮連升帶來左公交付之劈山礮三十尊。亦乞速付糧臺。以便支領。松子關銅鑼關等處賊蹤。漸逼麻城。黃安尤關緊要。而羅田其次也。

致牙釐總局李香雪太守

兵事勉竭其愚。或猶可爲。已詳公函中矣。餉事以釐金鹽課。爲可大可久之謀。然此二事。在人不在法。此番力請壽山回省。欲與老兄細商分局人才。預防中飽也。所有應辦之事。乞老兄直言無隱。弟處本無絲毫飾徇之情。聞善言。見善行。無不卽時遵奉者。此情早在洞鑒之中。又總局分局之根本。必在寶善堂。此須著精神。則財與才乃不竭。公在鄂中。可算明於人倫好手。莫自謙也。惜相處仍未久而黃州又非公可駐之地耳。

復黃鶴汀太守

客冬辱頒輓章。當已拜領。奉函致謝。惟承惠百金及鐘表各件。謹以奉璧。以遭喪之後。概未受賻。不敢獨領尊賜。而頻年戎帳露處。鐘表精細之物。未可與戈矛並列。蓋不用此等物。已十餘年矣。林翼客冬臘八。馳往黃州行營。蓋自三河敗潰。元氣太傷。軍收從新整頓。皖中羣盜如毛。與鄂疆緊爲接壤。歧途百出。防不勝防。聞賊於石牌潛山修

築僞城。以爲負嵎之計。內度軍情。外審賊勢。有剿法。無堵法。非分途進攻。未能得力。惟添募收集之師。鹽糧軍火。殊形竭蹶。計月餉三十餘萬兩。春夏六個月。月欠十餘萬兩。秋冬六個月。月欠八九萬兩。竊恐民力已竭。兵禍未已。終貽笑柄耳。奈何奈何。

復勝克齋欽使（保）

皖省數年賊踞。所在蹂躪。羣黎之流離疾苦。如苗稿然。若得時雨下降。雖不能驟如從前之生氣。而徐徐漸有生機。惟閣下濟變宏才。救時蓋抱振虎貔之士。掃殘氛而祛妖祀。大沛甘霖。以蘇皖民無數百萬生靈。其造福豈僅一世哉。鄂皖緊相接壤。犬牙相錯。防不勝防。林翼自客冬馳駐行營。惟三河敗潰之後。元氣盡傷。四年糾合之精銳。覆於一旦。而且敢戰之才。明達足智之士。亦凋喪殆盡。斯時收集舊卒。添募新營。急迫成軍。將領尙未得其選。恐一二年不能得力。而鄂中鹽糧軍火。按濟維艱。月欠十萬兩。內外錢漕釐金。入不償出。且恐日復一日。猶不免飢潰之憂。此則私心之所焦急萬狀者也。太湖石牌。羣盜如毛。游氛往來邊陲。未嘗一日忘睡。且有分道并入之勢。蓋覘楚之健將無人。欲以乘機侵軼也。

復訓營唐觀察

接來函。具悉築壘成橋。俱臻完善。而小湖河分營駐守。後路又可無虞。深以爲慰。天堂之賊。聞逐漸南移。已偏近柳家畝地方。意圖上犯。尙祈偵探示之。來示不急攻剿。賊來則戰。洵是穩著。又來示賊逼近營壘。堅守不動。俟諸營抄出。而首尾夾擊之。尤爲萬全至計。地道攻城之策。惜沙土難於支撐。恐必不行也。總之防援賊。不攻堅。審地勢。度賊情。保全精銳。一鼓成功。乃行軍之妙法也。尙乞大才裁審之。

復余參戎

接二十日並二十三日來函。具悉分營駐紮。扼要設防。其地利情形。惟足下可以就近審度。軍事固不能遙揣也。英山一路。可繞羅田。襲我軍之後。來示謂英山萬可無患。甚爲忻慰。深溝高壘。刻日經營。靜以待之。整以禦之。函中此四語。頗得行軍要領。率隊操演。仍須派探丁前導。整飭步伍。以張軍威。幸勿以賊蹤尙遠。而散隊巡游也。四營相距七里。似尙嫌遠。酌之。

復寧鄉縣魏茂才

接奉來函。藉諗閣下。養望名山。不欲輕於一試。想見高賢自處。別有深情。意者其烏則擇木之說乎。林翼德性疏薄。不能有補於時事。特以流波旣頽。正氣未長。扶持顛危。必藉賢才。況盜賊充斥之天下。與叛藩叛國。可以避地避世者不同。如柴桑如廬山之虎溪。如桃花洞天。往代隱士所恃爲奧區也。今則盡爲盜賊游行掉臂之地。識時務者爲俊傑。閣下卽有獨善之志。其能安然自處於堂室之奧耶。早出一日。卽可早盡一日之心力。惟望閣下卽日來鄂。面談一切。局務軍務。任其所擇。幸勿金玉其音。令我長懷白駒於空谷也。禱切盼切。

復多禮堂都護（隆阿）

接奉惠函。藉悉軍情平穩。我兄忠勇冠軍。長城倚重。私衷快慰。如何可言。來示預派馬隊。以備撥援。具見公忠體國。規畫周詳。尤爲欽感之至。惟新到西丹官兵。本欲令其前同大隊。操練膽識。因上游馬隊太少。而六霍之賊。乘虛漸逼。恐各路分警。不得不留爲準備。且數千里遠道迢迢。未免征夫況瘁。急令驟臨前敵。又加數百里之奔馳。亦殊

可念。弟前函告將軍。謂應如何調遣之處。均請隨時札飭。仍候將軍節相。隨時酌調。弟必無成見也。

復均光營阿參戎

六霍之賊。竄擾潁壽一帶。貴營扼要立營。加高加深。自是要著。惟須約束兵丁。不得滋擾。又須不時操練。停步伐。整齊。技藝精熟。庶戰守皆能有備耳。

復楊厚庵軍門（載福）

軍情瞬息千變。英霍出剿之議。又待緩圖。李鶴人官亭失利。十六日遇害。太湖石牌兩路。堅壘困我前軍。而鉅股漸逼固始。窺我羅麻德黃各處。此間六千人。二月十二日移駐上巴河。只能迎剿一路。現已抽撥唐道一軍。移紮荆橋。以備各路分警。爲調蔣道回援之計。唐道守荆橋。想亦可敷堵禦。然非有實在警信。蔣道仍不卽調也。湖南事勢甚緊。賊衆號稱二三十萬。十三日桂陽州又陷。又來乞援。弟將去冬所募二千人。盡以畀之矣。湖南請以王明山舊部戰船。駛回長沙。想已入照。弟處已派蕭翰慶上援矣。如賊入麻黃德安。則恐須再調部下一營。防府河襄河。預言及此。以備不虞。

復楊厚庵軍門

王明山所部戰船。想已派往湘中。前經函告尊處。他營暫可緩撥。陳李二營。可在下游。聽湖南後信。再爲酌量。來示謂須可靠陸軍往援一節。已派趙羊黃李四營。合二千一百人前往矣。并籌馬隊二三百人。尙未成行。鄂力固不支。而上游多事。則鄂成腹背交困之勢。且慮軍士聞警。情切望鄉。惟日內未得來信。甚爲懸念耳。六霍賊蹤。尙無舉

動。聞有分擾定遠之說。逆情意爲後路之計。非忘楚也。

復載益園將軍

接奉惠函。以旂營餘兵月餉。無項供支。並詢從前生息本銀。當經飭司查復。并令稟商中堂。致稽裁答。據云此項之銀。原歸鹽商相權子母。從前辦理。已屬不敷月支。曾由藩庫開款墊給十餘萬。自咸豐二年。鹽務改引爲票。兵燹之後。本利全無。現在庫款支絀。正兵之餉。尙無可措。餘兵更無庸議。來示隨餉撥解之說。近年旂營正餉尙虧。何能更及餘丁。本年東征之餉。月虧十萬兩以內。亦不能更及坐營矣。林翼再四思維。於三年後。俟吳地肅清。先行籌畫旂營正餉。再數年乃能恩及餘丁。刻下無米爲炊。徒喚奈何耳。

復棗陽縣賀月樵

接奉惠函。具見視事以來。於地方風土民情。悉心諮訪。甚慰鄙懷。惟求治之意。似有不爲火烈而爲水濡者。不知世變風移。近來人心。日趨於僞。優容實以釀患。姑息非以明恩。昔子太叔爲政。不忍猛而寬。所以萑苻之間。羣盜蜂起。迨其取而盡殺之。而所害爲已多矣。居今日而圖治。必以痛掃書差積弊爲先著。除莠安良。爲中權至計。而非用霹靂手段。不能顯菩薩心腸。迨至息游惰而勸農桑。興保甲而敦戚睦。害馬旣去。伏厖不驚。則法立知恩。而良吏之後效也。大抵吾儒任事。祇盡吾義分之所能爲。以求衷諸理之至是。不必故拂乎人情。而任勞任怨。究無所容其瞻顧之思。固圉庇民。胥於是乎在也。因卽來函所及。條列於左。搶刦之案。刁風最不可長。今日之搶犯。卽異日之亂民。畏難姑容。則積久釀成巨案。如遇有不法兇徒。肆行搶奪。卽設法緝拿。小事稟之該管府。大事徑稟。可以公商。必須辣手示懲。使知畏法。則此風或幾乎息矣。土地所以養民。訟事不得牽連無辜。差役不許在鄉滋擾。使斯民各安本

業。得盡力於農事。而山多田少之區。必以雜糧爲生活。其不宜五穀者。諭令廣爲樹植。使無隙地。每於聽訟下鄉。隨時董勸。有游手無業者。重加儆飭。庶人盡歸農。而凶荒有備矣。要犯謝開基。從前兇饒逼人。屢次札飭訪拿。未能弋獲。既尙在隨棗邊界。務須設法密捕。不可孟浪。不可過於急性。驚飛之鳥。亦當回翔舊巢。鬆一步以爲緊著。切勿再令驚竄遠颺。至要至囑。湖北錢漕積弊。皆由書差包抗。需索日增。煩重斷不可假手猾吏奸胥。致滋流病。清戶柱嚴推收。節節清釐。層層鞭策。撫字之與催科。亦皆並行不悖。使正供有缺。軍餉何資。蚩蚩之氓。尙須曉以大義。無令陷於罪而不知也。縣中用項。藉平餘爲開銷。儉以養廉。自宜節省。冗費。惟所用人數太多。轉覺難於稽察。薦人之人。不能分受賠累。何不可却。擇可用而用之。不可用則去之。此中正無容多慮也。以上各條。皆切直可行之事。惟賢宰實力而舉行之。

致舒輔廷都護(保)

頃接中堂將軍來咨。以湖南奏請此間馬隊。急需派撥上援。多禮堂現臨前敵。未能抽調。而上游事機至緊。大局攸關。敬請麾下。酌派馬隊二百名。營總一員。迅速馳赴星沙。相機策應。聞湖南征兵二萬。力頗不單。惟馬賊奔突。步營難與爭鋒。石逆達開。最畏湖北馬隊。以魯家巷洪山之役。石逆幾乎就擒也。惟所派營總。尙須明練老成。并乞鼎言諄囑。使與湘中步軍。合力剿賊。一心而成大功。惟蓋抱權衡。自無不斟酌盡善也。

致羅復亭司馬

皖中羣盜如毛。逆氛時虞衝突。本擬分路入剿。適以湖南上游不靖。勉力應援。尙俟湘患稍紓。始能力圖大舉。刻下欲爲保楚謀吳之計。囑伍令於近界要區。察看地勢。修築關隘。礮卡。聞板廠龍井。尙屬搃吭。而地屬珂鄉。動衆

興工必資熟手。閣下爲一鄉之望。宣風展義。不殊登高而呼。令嗣亦落落長才。儻得相助爲理。則人地素習。呼應較靈。固知小隱堂前。不堪煩擾。而同仇敵愾。猶奮老拳。礪卡成而守禦旣得。可杜賊蹤窺伺。近界各處。亦利賴之。敢請先生爲之道地。其一切布置之處。仍乞與所派麻城各紳商辦。

致四川總督王雁汀前輩 己未二月初四日

前在益陽倚廬。兩奉手諭。感銜無似。臘月初旬。從戎黃州。遇冰如於漢臯。詢問鈞候至詳。尤以爲慰。楚省抽稅兩重。實緣饑饉不給。綜計宜沙兩局。并有內銷外銷之款。其形之奏牘者。皆內銷也。其外銷亦隨案聲明。均歸督轅主政。毛公謂楚之應得者。不但倍蜀。殆并外銷言之也。至督幕所繕季報。自系幕中習氣。此件向不歸撫署會奏。有事後補行者。有并未會銜者。撫不管鹽。與越與晉與齊魯不同。應候告之揆帥。使於季報留意。總之楚人食德已深。楚軍之尙存。皆老前輩在秦在晉在蜀之德。臨臯亭下。盡是岷山之潤澤。豈忍倍本耶。楚地吏才將才太少。三河桐城之債事。實亡五千人。養生以死。撫舊募新。頓益三十餘萬兩之費。而按月之水陸援江援皖者。又三十餘萬兩。林翼臘月到鄂。已虧九十萬。近月將百餘萬兩矣。到黃州月餘日。極力振作。外質如前。而中情非昔。則以人才殄瘁。志氣不如昔年也。軍士傷尙可完。大將亡不可贖。其皖軍之謂乎。念滌帥以忠義倡率。近三四年精銳殆盡。如林翼等。獨能自強耶。春夏六個月餉。敬求老前輩如數如期委解。如林翼藉手而稍有補救。則昔年老前輩之垂念楚軍。隆貺未墜。前事可完。儻春夏六個月之精力。竟不能復振。或竟無可成。則利鈍不可逆觀。虛糜亦屬靦顏。不復再以鄙言奉瀆矣。滌公一軍。鄂濟三萬。湘濟三萬。以滌公本起義於湘。湘頗足用。鄂人則入皖者二萬餘人。水師人皖與守湖口者。又一萬餘人。其駐黃州者。六千人耳。代守湖口之陸師在外。通計江皖援師代守之師。與蘄黃自守之師。水陸馬步五萬餘人。鄂力本不及。而念滌帥公忠。力完楚疆。何忍負之。故亦勉効月餉三萬。自夏至秋。自秋徂春。未敢間

也。聞湘鄂每月共協六萬之外。尙欠三萬。奏乞蜀中二萬。乞尊處按時協濟。遲一日則滌公多欠一日。少一千。滌公多欠一千也。近日守彭湖及應援景德鎮之師。又係楚中派撥。聞賊以七八萬人圍繞滌公之所。派張道一軍。張道僅二千五百人尙完。亦可危矣。萬不得已。由鄂撥援。非鄂力之有餘。實江右之喫緊。人每言楚人月費三十餘萬。爲舍田芸人。爲甫田之務。廣而荒。爲微生高之乞鄰與人。林翼獨念禦侮必在境外。若閉房闔以拒盜。終無及矣。鈞見以爲何如。林翼負大罪而從戎。因迪庵頻年安楚。拯我於危。聞難不赴。負心於冥冥中。且紅皖援剿之軍。又三四年糾合之餘。亦不能棄置不顧。才力與事勢。明知其無補。亦明知其必不能有濟。恐託詞避禍。神鑒其隱。惟事成猶不免罪。不成則罪無可赦矣。每念及此。中心摧傷。又鄂中軍事與餉事。均乏人才。與冰如商榷。奏乞鏡帆聽孫來助。特恐其儉德辭榮。德輝自闕。殆爲鳥則擇木之意乎。然求之頗堅。或鑒其愚矣。到黃州後。又巡邊疆一次。整理新軍。日夜少暇。作復既遲。措詞亦苟。姑盡此意。尙乞海宥。

致余會亭 初六日

所答六條。均有可採處。陳德園已派彭牧守卡。俟彭牧有警。或力實不支。再飭唐道回援。亦甚直捷。此時尙可不必也。切須告之唐道。進退遷移。必須十分審慎。近年州縣一聞警信。動輒請兵。各顧其私。不顧大局。非審慎出之。未有不爲州縣所誤者。此意可告之唐道爲要。初四之稟。則賊情趨往霍山一路也。弟料霍山之失。自在意中。特賊若入羅麻。非二三萬人不敢徑入。若僅止數千人。必不來也。來亦必無足慮。此事我早料定。如近日果有賊來麻城等處。則六千人亦可禦二萬三萬之賊。若再分枝。尙須斟酌耳。

致唐義渠蔣之純兩觀察 初六日

太湖石牌之賊。必不妄出。賊之不妄出。非忘戰也。意固別有所在耳。弟處現有六千人。如二三萬賊并作一路來戰。弟當力與之角。未必不可決勝。若分爲二枝。則我軍不能分。以統將太少耳。卽分矣。而每處僅三千餘人。亦恐彼此均嫌不足。萬一賊入羅麻。弟意此番必更繞去麻城之上。蓋七年官軍攻黃梅。而賊乃乘虛以犯蘄州。八年蘄州陳德園有訓昌義禮營。則賊又乘虛以犯羅田麻城黃安。今則必更繞上一層矣。又賊不犯楚則已。犯楚則彼亦自處於危。非二三萬必不敢來。來則必分枝傍擾。以眩我心目。驚我疆場。六千人可戰而未必不可分。預先商酌。以爲準備。是爲至要。或曰。賊如入境。則調訓營上援。是說也。然歟。又或曰。賊如入境。則請訓營由太湖移荆橋。而以荆橋之全軍上援。其說然歟。又或曰。異日警動。則以余阿并力。以捍兩蘄。而以湘撫上剿。以訓駐荆橋。并調荆橋之馬隊上援。然歟。以上各說。先此密商。沈思以窮其變。博訪以求其益。弟爲先事預防起見。乞諒之。

致官揆帥 初八日

前得手諭。卽將原函奉交滌生矣。因尊函未存座右。遲久未復。應復事宜。開列於後。一、霍山之賊。已入流波。則商固麻城羅田黃安及德安漢陽。已有漸次吃緊之勢。擬卽移進上巴河。探明賊所從入之處。卽從警處迎剿。惟六千餘人。可當一路。卽賊多亦尙不畏怯。但恐賊分。則我軍苦不能分耳。一、黃州一府。形如圓甌。黃梅宿松是一路。蘄水是一路。蘄州是一路。羅田一路。麻城黃安一路。六安與麻城連界。卽繞出黃州之上。再繞出太湖宿松之上。五六百餘里。與漢陽德安毘連矣。若官軍併作一路。則賊必乘虛而入。乞請蕙生撰稿。切實聲明地勢散漫情形。必應以黃州爲重鎮。乃能四路策應。由尊處奏報。弟今日奉廷旨。亦擬報明一次。大約安慶廬州未復。弟不敢離黃州。應以黃州爲老營。得尺則尺。得寸則寸。仍守老兄平日穩局之法。不敢失也。一、弟到黃州以後。將派之營。已派往下游。兵力已厚。只恐異日分竄。則弟力只能顧一路。尙須調援耳。一、請吉林黑龍江西丹千名。一、記七年八月。都將軍咨有

官員名單。蒙中堂奏調。未盡准行。可否此次再於各員中揀調。捐馬二千匹。請大凌河馬一千匹。均爲得法。乞鈞意定稿。能派玉農往挑。得其精壯西丹乃妙。西丹之富者能弓馬。貧者亦與漢人等耳。無錢無馬。馬上仍生疏。酌之。一八將之罪。請鈞意斟酌。決無成見。中堂是第一仁厚德性。林翼亦恐非能殺人者。事經中堂酌定。必得其宜。決不參差也。此次賊不來則已。來則必多一路。則力可與之相角。分爲二爲三。則費手矣。一餉項大虧。乞飭司道議節省之法。以上縷縷。均乞鈞酌。

致羅澹村方伯 二月十一日

連得手書。蓋念彌篤。連日分起拔營。前駐上巴河。林翼非欲自戰也。五六千人只能專打一路。若林翼留守。則至少又須分去千人。非并力之法。且希庵於臨陣能審地勢。於全局地勢。向未領會。或恐其百密一疏。賊若竄入。必是大股。又必分枝而來。恐非另調一將上援。不可爲功。蓋兵力不甚爭多寡。四五千人亦可當一路。假如以五千人當萬五千之賊。諒可制勝。以五千人分當兩三路之賊。則須各有統將。乃可無虞。勝負之數。強弱之勢。專賴此一人也。前已咨商都公。預爲準備。尙未見復。林翼之愚。亦必俟漸近。乃決意征調。先事紛更。恐人或謂之矣。尊意以爲何如。前撥湖口小池口二營。終必仍爲我用。前此因滌公只有凱章二千五百人。是百戰之餘。聞其失去一半。因相隔十八里。夜深救援不及。恐滌帥誤事。則江西必危。江西危則鄂之南岸又警。豈鄂力之果堪代謀哉。且以一千一百人挪去普承堯六千人。計無有奇於此者矣。如果鄂警。雪芹亦必派回來助。仍到黃州也。至派往荊橋之周忠容。應隸蔣道。本是蔣道老哨官也。蕙公言前隊不過千餘人。偵探得確。迅予迎剿。亦是一計。然亦必與楚境稍近。乃可行也。賊速如鼠。兵遲如牛。此種情形。殊難籌策。古人每言輕兵出奇制勝。或再亂三四十年。當有此等人才。近日之兵勇。能穩固便是上等。將領能布置審勢。亦不多覯也。昨沈思終夜。發仁營會同副訓營。先行馳入麻城。嬰城

固守。付以米四百石。火藥四千斤。與之面約。賊逼城下。堅守十日。官軍必到。賊如入境。無論多寡強弱。不准接仗。一意堅守。賊不得城。總易了辦。此賊之技。的是狐鼠也。在野外作壘。不憑城。官軍必可制勝。似此佈置。麻城可保。亦必得臨事驚疑。鄉團均無實際。純盜虛聲。即如黃岡一縣。并無一人團練。惟前此葛致遠招游勇。及范潮闌餘黨。強名爲團勇耳。羅田稍好。麻城黃安。未必不可造就。然總是人才未能訪查確切耳。蘄州之陳德園。已有長進。餘皆虛聲耳。何曾能戰。弟兩次黃州。若有意埋沒士民之功勞。心術實不可問。然亦不便斥言。以失其望。只冀其稍稍助聲威。斷接濟。加偵探。便是非常之功。天下之大患。總是書生不知兵之過。總以兵事爲小人之事。非學者之事。一遇警動。則讀書人早已遠走。或隱匿不出。以此觀之。黃州那得有團練哉。只剩地方幾名惡痞。作假充團長。事後保舉。則書差門丁均首選耳。下游抽撥。不在兵而在將。前已預咨矣。咨札已行糧臺。乞查之示之。羅田請兵。未便分撥。自弱其勢。此事若分兩路而來。林翼與希庵當一路。舒六兄與蔣當一路。否則舒與林翼互易之。或可盡力。若三路而來。恐他處不免小失。然盡心盡力謀之。猶可爲也。伍令初八日探報。流波礮已有動機。距松子關長嶺關約百三四十里。萬山之中。一線羊腸。早已專人前往坐探。一日。稟黃勝日十三日可到麻城。湖南尙有二千人未到。到日再行斟酌。縷縷奉復。

復李香雪 十一日

得示備悉。邊事近日及半月一月之間。尙不足慮。所慮者日後耳。卽日後尙不足深慮。所慮者下游小統將不知兵略。而三路圖皖之謀。未能卽得三人。并須於三人之外。另求一人。替希庵思之未得。我心彌苦矣。希庵之義。應謀皖以雪恥。又應保楚。然後能謀皖。弟則鄂吏也。不謀皖固難以保楚。不保楚又奚以謀皖。此心怛怛。日夜不釋。至麻羅之防。尙有可謀。倘再包出麻羅之外。則鄙人之方亦窮。而智亦短。其隨營効力而不能留黃州者。則以獨留黃州。

必須留千人爲守。兵分力單。鄙人之意。向以并力爲主。不願零星分撥。致使一事無成。此亦弟之深心矣。釐局招引私人。其弊頗大。弟用許多鄉人。除周壽山一人以外。究無一人是咸豐四年以前認識之人。即曾少固邢星槎周笠西。均是四年冬間。延訪而招致者。分局之員。未知此心。亦并不能如弟之心。無所倚。應請札飭各局。凡非總局及撫署所委札。凡假託撫署所引薦者。應分別去留。精意簡汰。其私引子弟入局。則直當懸之戒律矣。又局事總以留意江漢沿江沿河大局爲要。天下之利。必歸於水。江淮河漢是也。楚得其二。所未得者淮南北。盡心力於此。二水之間。復得人才之可信者。注重於此。則用力少而成功多。外此僅枝葉耳。此時應專意察核於江漢近水之處。切囑卹賞一節。不能不勉應之。弟固知糧臺艱。而代領之不能盡無欺隱。然領兵者不可與之言餉。言餉者又不盡可與言兵。所以難也。黔之黎兆勳。近日何如。頗念之。

致王鴈汀制府 十二日

前信甫發二日。而手諭又至。感仰奚言。楚中近事。兵非不多。而苦於偏重一隅。以五萬餘人分謀江皖。爲下游尙以力少爲詞。豈不可恥。上游則終有應接不暇之勢。此亦可慮。近九年兵事之誤。誤於官軍注重於前。賊計轉襲其後。官軍以仰攻挫銳。賊計轉以餘力乘虛也。鄂之兵非不多。總無一枝人馬。置於活著。故機局總滯。林翼謀餉。不爲不力。然月欠十餘萬兩。仍乞大力月有所濟。并月乞鉛丸三萬斤。是所至感。刻下六安霍山之賊。由豫州之固始進發。漸及楚疆。入楚固難。然尙有人焦愁豫中。則恐其束手耳。郭建汝等終爲楚蜀之患。具見老成深慮。嘗笑近年官吏之識力。如燕雀處堂。煦煦相樂。而不知盜賊已隱伺其旁。又匪徒到官。漫不經意。卽或懲處。亦必一意姑息。勢必如吳老公之再呼荷荷。而後卽安。是可慨也。林翼移軍前進。以期并力迎剿。六千勇丁。如遇鉅賊萬餘。或堪角力。如賊分爲二爲三。則尙不支耳。軍書倥偬。百不及一。附寄奏章。均是實情。尙乞鑒正。

致總局分局 十三日

十二日得初十日蕙公書。寄代撰揆帥奏稿。詞義均妥。近人說事理。不分晰。蕙公手筆。切於事理。惟沈毅有識四字。須告之同一省。同一事。不可互爲標榜。旣嫌其黨。又嫌於淺也。賊尙徘徊觀望。已飭伍令移駐商固之交。設法偵探。下游陳德園之捍蔽。兩蕪。與昌營之防剿。英山。捍蔽羅田東面者。尤不緊要。而太湖之官軍。與太湖城賊。尙隔一河。圍則不足。攻則不可。頓以重兵。如同虛糜。究竟賊之是否上犯。遲速多寡。尙難逆知。料其必先犯商固者。不得商固。則無米也。賊到商固。任其自然。則我楚防不勝防。而漢德二府均緊。若以六七千人。越境而謀。則內地亦恐空虛。所以然者。總是兵綴城下。如弈棋之庸手。不善著劫也。實則兵多於張楊之時十倍。多於武漢未復時幾二倍。豈可再添兵。以致同形饑潰乎。八將請中堂定案。林翼等無不遵依之理。欲嚴者理也。不能殺人者情也。八將優劣。尙煩另酌。定案後。交付差遣效力。再俟秋間酌量委用。此時添兵實苦無餉。無餉之患。與無兵同。弟如喪家之狗。如鬻桑之殍者。屢年矣。如八將之勇敢者。近日營中尙有此才。又蕙公之示。以璞階不與希庵合路。此却不可。迪庵在日。璞階頻受斥責。駕馭頗難。其性亦頗浮動。非獨當一路之才。反復思之。必不可行。又有一周寬世者。新放總兵。十三日乃出圍。尤爲奮勇。希庵棄而未用。林翼頗惜之。希庵言其營制頗虛僞。有十餘人不足額。又以驟貴氣盈。欲折抑之。待半年一年乃可用。或有深意耶。容秋間酌之。商城百姓紛紛遷移。殆其警矣。

致彭雪琴方伯 十四日

得初十日書。意欲以普軍由彭澤入浮梁。離鎮二十里。爲景德之西路。此計必不可行。如果強之。必致大誤。凱章在東。其兵將強健。尙恐不能破滅此股。兄之前爲此議者。特以助凱章之聲威耳。兄思普之膽氣軍情。因人成事。則

有餘。獨當一路則不足。弟若期望太過。必致債事無疑。一挫則彭湖皆動矣。切須改計。千囑萬囑。若定期夾攻之說。尤屬萬不可行。東西相隔太遠。軍情瞬息千變萬化。萬一凱章勢不可戰。而此間強之。則誤凱章而使之輕進。萬一凱章已進。而欽堂乍退。亦必使凱章轉無退路。此尤兵家之所大忌也。至普鎮來信。口糧欠五月。本年以五六千人。僅領五千之餉。似此情形。廉潔之將。亦難自馭其軍。況普軍耶。前說應請速即稟商滌帥。並函商江西省局。另行酌議。切不可使普獨當一路。則決無可疑矣。切囑切囑。看來此事。兄不過預擬及此。因尊處言及景德鎮危急也。然總以滌帥之示爲定。時凱章已站住。不必急也。

致司道暨總局分局 十四日

迭次之探。似漸真矣。奉上一閱。其六安一股。似尙未來。此股欲入商固。似係先鋒。數不過萬餘。昨夜已將阿參將調守陳德園。(井不要緊。惟是昔年布置之地。不可輕棄耳。)唐道調到荊橋。準備異日抽調耳。調唐道則勉強可分二路。調蔣道則竟可合現在各營。分爲三路。狗若噬楚。當可烹之。入境則剿辦必速。不入境亦須遣將往剿。商固光山。均產米之地。當可委員預往酌辦。惟現在賊尙徘徊。卽令有警。此現在之軍。尙可支應。可一面打仗。一面再調。若賊未至而紛紛預調。恐不甚妥。且恐墮賊之詭計也。賊探頗真。黃州有一枝閒空之兵。早已知之矣。惟州縣太無定力。羅田麻城請兵請餉。羅田已將前繳之二千。付去一千。又新到桂勇二百人。已付羅田防松子關。每月須七百餘兩。亦聊厚不薄矣。麻城則必可守十餘日。但須諄囑守將。賊來之時。卽地方來報賊只二百。亦不准出城。蓋地方士庶。無知兵遠識之人。去年大股乘間。李曙堂以五百人在城。趙堯彰以三千五百人在兩路口地方。官民催李曙堂出城出戰。蓋言賊不過數百耳。李曙堂傷百餘人。而麻城卽日失守。王震等轉運之員。亦跟踉去走。是誤人而亦且自誤。可怪也已。昨已諄札黃副將堅守待援。此城不失。事總好辦。私計料賊尙不目前吃緊。或不卽來。欲蠶食豫

中有米之地。軍糧不虧。乃能思逞耳。賊在河南地界。必縱橫千里。無人抵禦。蓋欲求黃州之六千人。亦不可得。蓋合一省二省之營兵。亦難調集六千人也。時局如此。豈不可危。然則楚事尙可謀。林翼必應竭愚慮以效力矣。大約賊數在六安者。約五六萬人。暫時徘徊。專爲糧米起見。其必上竄。則毫無可疑。特其從入之處太多。必須審料萬全耳。然亦只有并剿之法。無分防之法也。

致羅澹村方伯 十五日

前商請補州縣一案。仍請以擇人爲主。另單二件。弟已存覽。州縣佐雜。踵接於道。蓋以鄂爲肥美耶。儻再得一二年。官滿於城。民哭於野。更恐官有餓莩矣。反復思之。竟無良策。試思之。博議之賊。尙游魂乍前乍却。然黃州必應設三年之防。少村學問。近日有進境否。弟欲設書局。查兵事地理。應在省耶。抑於黃州設局耶。黃州設局。可以日月就將。先有取益。黃州只要有人布置。永無可棄之理。昔年楊公不守黃州。其出兵廣濟之時。未曾於黃州設守故也。假令其時在黃州先設防。則兵敗仍可復振。迪庵尙有敗歿之事。可見孔子之慎戰。與臨事而懼。乃至言也。弟曾設儲材館。不過爲更換分局委員起見。後因其立名太顯。改爲寶善堂。所費至少。所益至大。儻無此處。則明知分局之有弊。而無人可易。應以此堂爲釐金根本。應仍設省中耶。抑改設黃州耶。皖北不平。江南必不能平。不覩於晉與隋出師之路徑耶。必以一枝出巴蜀。以循江。以一枝出廣陵。一枝出和州。一枝出廬州。一枝出蘄州。一枝出襄陽。皆古今形勢之自然也。縷縷奉布。卽希鑒之。

致左季丈 十六日

十五日得初九日書。知南路又警。我本急求印渠及其部下之將。而服嶺之防。又奪之使南。何統將之才之少也。

軍中無智勇之統將。則萬人二萬人亦終歸於敗。無論彭劉勇力太單。不能禦賊。即使再益數千人。若智略短淺。亦終必敗矣。湘中亦尙乏才。何況他省。李雨蒼志在北路。林翼亦欲用之於北門。可以二月啓程爲妙。凱章能否支撐。尙未定也。賊數太多。兵力太單耳。凱章知稟留吳翔岡。頗見器識。人才因磨練而成。總須志氣勝人。乃有長進。成敗原難逆觀。不足以定人才。趙陶之餉。已設法補直。鄂中自羅李募兵。均以到鄂之日起支。昨因此事頗費周章。然亦不能盡如所欲。例外申縮。林翼已飭司事者。妥爲照應矣。籌餉固較易。帶兵較難。惟以衰絰出山。不司兵事。則此身何以自處。萬世之清議。其不足畏耶。至公謂帶兵非所長。固然。然萬事可謙。兵事不可謙。太謙則怯。太謙亦近僞。况目今十八省之上座者。尙以不肖爲最能兵耶。此二年之中。應在黃州兼司餉事。決不能安坐堂皇。如尋常服官模樣。老妻病狀。丈前已見之。心恐其病久而或痼。欲乞仲遠爲醫。而亦格於義分。不能如願。此出爲不得已之變局。受印不過爲餉事耳。餉之誤人若此。默計欲丈莫出山而恐不能。更恐遲而後出山。又難措手。又恐所託非其地。終必受困。丈肯謀湘以保湘。丈去湘。湘豈憶及前事。遵守前法。以益丈耶。此時南路告急。固不必深談。爲丈深思。固有良策。惟滌公則謂湘中必不可無公。囑不可搖動。當以湘鄂爲天下之根本。其說然與。太史公作屈原賈誼傳。提王明受福爲論。又其作孟子列傳。專提利欲中人立論。此其特識。固應千古不朽。皖邊頓兵數萬。卽一二年亦必無尺寸之功。不能三路進兵。又不能有三路之將。奈何。廷旨欲林翼入皖。已言其不可。然數月之後。終必再及。以中朝本無定見。隨外間之議論爲轉移也。袁之內召。乃因勝劾去。袁不足深惜。勝劾袁亦不足深怪。但袁在尙不能支。劾袁而袁得所。勝不自求才而劾人。如鬪者自砍其指。豈非大愚也乎。袁公畢竟忠。心亦殊不可多得。六安破後。狗尙徘徊。黃州有兵。賊固偵探而知之矣。手此奉復。

致左季丈 二十二日

廿夜聞警。肅復一函。水師必以健捷二營。速回湘中。趙福元是大大可造就之人才。能不調回固妙。如必不得已。則林翼亦湘人也。馬隊百名。萬不濟事。至少亦須三百人。已函商揆帥與都公。恐不我予也。驍騎校十人來湘教習。則實無用處。卽迪部二百人教之三年。然弓箭馬槍。仍無實力。南不善騎。北不善舟。天限之也。此時大計。應以扼險自固。堅壁養銳。伺釁再動。三月兵力可集。再堅持二三十日。固豈堅忍。乃可用也。若以新到之營。乍爲嘗試。則萬人亦不過數次。敗仗而已矣。乞公速取唐秦王之禦。劉武周宋金剛薛仁果宗羅喉之法。開具始末。告之峴莊印渠。非厚集其力。慎養其鋒。不可破此鉅賊也。又此賊以中下之兵接仗。而中權後勁。伏於陣尾。輕而不整。勇而無剛者。遇之必敗。此亦可預告峴莊也。又永州鎮總兵周寬世。頗勇敢。十月十三日夜半出圍。其時主將已亡三日矣。非戰之罪。亦非不能守也。可招致之。其才亦不過五百人耳。若江西則必以八千人萬人界之。普尙六千。周不可八千人乎。安徽鄭魁士尙統三萬人。而楚中如此人才。均僅以五百人付之。長沙之城。必可無虞。攸縣茶陵。乃賊所注重。蓋必騎交界之山脊。以爲可東可西之計。亦深知官軍於交界處所。戰守不能自主。防剿均不得勢故也。計此賊必害湘中半年。總之軍事必有所忍。乃能有所成。地方必有所舍。乃能有所全。公早知其深微矣。

復都直夫將軍 二十四日

得示敬悉一切。湖南賊勢頗熾。號稱二十萬。郴桂一帶。民俗強悍。甲於他省。從亂者必多。力鬥者尤多。聞十三日又連陷桂陽州等處矣。馬隊二百。本嫌其單。況必須有智勇知兵之將。乃可不誤事機。兵隨將轉。俗諺良有深意。此次如蒙與禮堂商撥。必乞以可靠之營總前往。否則恐損國威而無實濟。湖南奏請勅下將軍。以二百馬隊赴援。并請中朝速撥馬隊二百。以補其闕。弟意此次賊匪馬匹亦多。若僅止二百人。非知兵之良將。不能萬全也。湖南步兵尙有強者。若調度齊全。厚集其力。而堅忍自持。當可得力也。總求老兄費心。昨日樞中來信。言天津有黑龍江馬隊。

若預先以函懇求僧邸。異日撤防之時。以一千馬隊撥入湖北。實爲便當。僧邸心憂天下。當無不允行者。弟擬請揆帥預奏。并求老兄賜寄一函。代陳一切。弟不敢與親王通書信也。今日鍾榮煥稟到。弟頗怪之。據云并非推諉。願先到省辦出藥料。伺候將軍。弟詢其脈證。據云心疾甚於足疾。若不安心調理。僅照俗醫脚痛醫脚。或恐貽誤。糧臺司道。已稟中堂。在省城安設公館。省城醫藥甚便。弟意仍請老兄回省。如以爲可。弟卽飭瞿定國來迎。仍以水路爲便。黃梅一切不便。弟心歉然之至。

致曾滌丈 二十七日

二月廿七日。奉二月十五日五號信。敬聆一切。水師兼步。前以說帖寄厚庵雪芹。均言難行。尊示當先求人而後立法。求人以統領爲難。尤爲體要。厚庵久病。岌岌難支。雪芹血性過人。陸戰尙非所習。李與吾陳金鰲連年亦患血證。此皆四年以前。精悍之士。積勞而疲。殆非朝氣矣。劉國斌尙未接談。有李朝斌者。似有英氣。刻因石逆由南安陷宜章。興寧桂陽縣桂陽州等處。湖南調王明山統水師。湖北以蕭翰慶一營。繼援急切。尙難改議。且巢湖舊時船廠。近又新添水師。仍未可單也。異日或能另謀。陸路統將。則以鮑春霆之陸兵。由舟入江。自與水師通氣。惟春霆酷好攻堅。頗有固執不化之概。貴戰賤謀。雖裨將之雄。仍恐不足以當一路耳。官帥奏捐馬。并奏西丹十日內可得旨。此間已委定記名副都統巴揚阿前往辦理。并攜銀二萬解部。前奏定另覽矣。若西丹不得力。中樞來信。囑預致僧邸。於天津撤防時。酌撥黑龍江兵丁千名來楚。官與都可寄信於僧邸。林翼與丈似可預函寄知筠仙也。采買馬匹。北口爲多。七月以後。盈望成羣。若到河南陝西。零星收買。不如徑行出口爲合算。俟昨奏批回。卽有定章矣。田興恕已復古州。昨經湖南奏派南路統兵普承堯等。爲建德所牽。蕭濬川又爲湖南調去。湖南卽令強支。而郴桂窮民。經石逆此番脅制入賊者必多。恐鄂與豫章。均旰食矣。水師抽半改陸。尊示以一舟之中。有改陸有不改陸。有加餉有不

加餉勢必窒礙難行。軍事最忌參差。最嫌紛擾。尊見是矣。六安霍山均失守。鄂與皖之路盡阻。李鶴人十六日遇害於官亭。其潰勇已過麻城。粵逆窺及定遠一帶。勝帥以招降爲得計。蓋亦今之熊文燦矣。恐近月翁祖庚力必不支。湖南乞馬隊二百人。官欲應之而多不肯。卽勉強應命。亦是怯將弱兵。恐徒損國威耳。馬隊將領在鄂者。惟多與舒能戰。另有一平海。已回旗矣。（因瘡疾服輕粉中毒。左足短二寸。）此外亦少良將。其在勝帥德帥營中者。兵多於鄂。不啻五倍。然頗有爲賊所圍擒。爲賊教戰者。將不得人。無法可施。三河桐城卹賞未發足。三月以後。未免稍欠。秋冬之間。仍可彌補。如湖南不致大亂。則餉糈仍可敷衍。糧臺固不可歉。亦不可豐。豐則官場之侈心又萌矣。財用如人身之氣血。周行肢體。有疾如癰疽瘡疔之類。病在一肢一脛。而周身之血脈皆阻。故頗望隣境之安。教馬隊戰法。似以黑龍江人爲宜。馬隊以衝突爲奇。尤以善退爲奇。馬隊如水師。必有前有却。乃爲妙用。湘營馬隊。能進不能退。退則羣然色駭。不復再能歸伍矣。

致袁午橋 三月初一日

三接手告。感念何深。以整飭殘兵。尙遲函復。而公歸京國。不留信宿。則禍在淮徐。不可思議。讒人之愛公。亦可謂私德矣。如國計何。中懷憂悶。井渫不食。使人心惻。此間新失良將。卽竭力圖謀。非二年不能有成。欲入皖而虞餉竭。欲保境而又虞將少。不肖才力庸有濟乎。熊文燦一意招降。此非賊降。乃降於賊耳。而又美其名曰賊降。大抵招降之手段。惟漢光武唐太宗之時之將帥能之。下至宋世宗汝霖輩。已不免竭蹶矣。此豈近今之人所可妄行哉。

復皖補翁祖庚

正月二月。連得三次手告。並公牘奏稿。感頌德言。尙是私誼之纏綿。而窺測忠盡。冠越朝右。固一世無兩。愛國心

丹憂民髮白。讀疏奏一再遍。不覺淚涔涔下也。因巡邊設防。匆遽多疏。遲至兼旬。尙未裁復。歉愧萬分。林翼去冬到黃州。其時楚軍已扼定宿松。邊防已固。賊勢已挫。其力戰之功。則都將軍與多副都統鮑鎮軍之功也。林翼十一月尙在益陽途次。不可掠人之美。貪天以爲己力。都將軍在宿松患病。林翼歲杪自往訪之。旋回黃州。所駐勇丁八千人。皆三河桐城瘡痍之餘。擇其精實完固者。續撥二千餘人。正月初旬前往太湖。計頓兵太湖城下。與分布荊橋。分布英山之馬步。已二萬餘人。賊已憑城設守。仰攻不可。必非歲月之間。所能奏功。水師之在安慶城下。及彭澤湖口之交者。又一萬餘人。陸軍爲城壘所遏。水師亦無著手處。虛糜尙是近患。英華坐竭。壯志暗銷。一二良將積勞成瘕。而繼起無人。乃遠憂矣。黃州六千人。以麻城商固。時有邊患。未可并力一隅。致兵勢偏注於下。蓋近九年以來。官軍以仰攻挫銳。賊計以餘力乘虛。官軍注重於前。賊計轉襲其後。此固非賊之強於官軍。特其機勢未熟。不如賊之運掉自如也。況黃州六千人。自應暫留作鎮。如秋間能分兵三路。分途進剿。則征皖之志。或可稍申。然三路之兵。尙易籌謀。三路之將。尙未盡集。有劉道長佑及其部下之良將李明惠江忠義劉坤一。已迭次函招。夏間來鄂。秋初可入皖。而石達開連陷郴桂七八州縣。劉印渠等爲湘中所留。計不諧矣。至林翼之身。兼籌餉糈。必不能親入皖地。只能於黃州營中駐守。蓋二三年之內。尙不能離黃州也。石達開糾合福建連城江西西南安廣東連州廣西賀縣羣盜入郴桂。號稱六十萬人。實數亦不下二十萬。湘南之力。必不能支。來此乞師。已分水師二營。陸師二千一百人前往。仍恐無濟湘省。不能力遏此賊。則鄂省腹背受敵。長江之險。恐爲賊所奪。而踞我上游矣。默察賊勢。自連鎮高唐河北肅清之後。氣燄稍衰息。自五年冬石逆從義寧入江西。與粵東之匪二三萬合併。而賊勢復張。自午橋初次罷官。張樂刑倡亂。而皖北之賊勢又張。而時俗尙以某省肅清。某省克復。鋪張揚厲以入告。以之釋九重宵旰之憂。則可耳。豈謀國之至計。與疆場之實情哉。在朝在野。般樂如昔。侈泰有加。此與燕雀母子煦煦自樂何異。又與溺人必笑何異哉。鄂餉月須三十五六萬。林翼力籌此事。不過月得二十餘萬兩。尙欠十餘萬兩。林翼離此地。則二十餘萬兩亦

恐減色。此鄂中籌餉之難也。迪庵殉難以後。人才銷歇。殄瘁之狀。不可思議。雖復加意延攬。百方整飭。而胚胎規範。彷彿如前。筋骨殆遜於昔。此又兵事之難也。賊如間道襲麻城以撓楚。林翼尙思極力抵禦。所患者分爲二三路。必顧此失彼。又恐其與石逆密約。俟石逆從湘之南境。漸犯入鄂。而後陳逆等再圖由皖入楚也。又近日頗以定遠空虛爲憂。其江浦已得。亦賊勢所必爭也。招降之事。才大力量大。乃可行之。如漢光武之時。唐太宗之力。則指揮自如。羣雄聽命於上。則羣奸自斂手於下。下此則宗汝霖之留守汴京。偶一行之。然已萬分喫力。非汝霖得意之筆也。鶴人好引匪人。其將如袁懷忠。盧又雄。驕怯失律。恐須按以軍法。否則終爲大患。公所處之境。萬難。林翼自問五六年間所處之境。爲軍興以來所未有之奇。然自得迪庵而兵乃強。得厚庵而水道已通。以林翼擬公之艱鉅。殆百倍於人。且其時林翼能使湘中之鄉里士民。均來助我。公之鄉人。何能入皖耶。曾以公書與仲遠立庵公閱。周立庵君子也。特有守。不必有爲。幹事之才稍短。均嘆念不置。然而德輶莫助。友誼終虛。刻下黃州之兵力。又少二千。而石逆之擾湘南者。警報日三四至。楚其盱食。今日乃驗。如湘南能破石逆。劉印渠及其三賢將來鄂。林翼必以三路分兵入皖。而自駐黃州。竭力謀餉以贍之。此志未知秋間能如願否。

致彭雪琴 初六日

傑人陣亡。誤於預先要約之一事。近年陸營情弊甚大。非仁義忠信如塔公羅公李公。萬不可約會。只可各量其力而已矣。刻下總以守定彭澤湖口爲是。如彭澤難守。則湖口尤不可失。當以死力爭之。黃澤遠應調入湖口矣。劉傑人之軍。應以李寶賢爲賢。可代管之。留千五百人足矣。

復川督王鴈汀 三月初九日

鄂軍之接濟。屢荷大君子厚德恤鄰。隆施未墮。而前此復以鉛丸火藥。欲借東壁餘光。實以征皖之師。水陸並進。約共五萬餘人。又因石逆達開。近由江西竄擾湖南。連陷郴桂等處七八州縣。此間復兵分上援。均資協濟。此項需用愈繁。鄂省愈形缺乏。雖隨時製造。終難濟十分之二三。現當分途攻剿之際。軍火所需。萬分緊急。本省既無從措辦。又不能遷延時日。致誤軍機。全賴鄰省曲爲體恤。按時接濟。庶不使行間戰士。有徒張空卷之歎。貴省自軍興以來。頻年解撥籌辦。固屬艱難。然究屬完善之區。出產之地。採買製備。較楚省尙屬便宜。伏冀俯念時艱。如數辦就。飛解來鄂。以濟軍需。此係大局所關。非僅爲楚北起見。諒不嫌其再三之相瀆也。

復褚教職 初九日

前以一紙書爲介紹。欲求相助爲理。江干盼望。僅得魚函。而星駕未來。轉增渴想。猶幸惠然肯來。不我終拒。此間軍務倥傯。任仗需才。非得天下賢豪。不足以挽狂瀾。而蘇民困。故相需甚殷。而相求不得。不迫。敬乞吾兄將經手事件。作速清釐。卽日束裝來營。相與商榷時事。籌畫機宜。庶集思廣益。或可於時艱有濟也。謹掃榻以俟高賢。如飢如渴。不盡拳拳。

復伍茨孫 三月十三日

初十日探稟均悉。定遠已專人往探矣。我軍念楚邊之尙虛。未能分道速進。實爲可愧。力有不足。非心之或忍也。且湖南之賊。已緊逼永郴。豫州之賊。一陷睢陽。一擾南陽。建德之賊。又將窺彭湖。失我劉守騰鶴。吾楚爲四爭之地。楚其旰食。今日乃驗矣。聞豫中邱鎮陣亡。河南在此請兵。已奉廷旨矣。楚力不能遠及。遷地爲良。楚材亦實難四路兼顧。昨已分步營二千一百人。馬隊二百。水師二營。援湘。湘居上游。唇齒之患。尤切也。閱書并雲鴻曉亭公函。事理

明白。形勢了然。板橋旣爲七八路歸束之處。實可爲楚豫皖出入總路。閱圖考說。欣慰無似。至於費用一節。毫無足慮。試問吾民自二三年以至今日。所失於盜賊者何限。所費於詐索者又何限。卽如蔡同知開坊。曾因被人控爲通賊。勒捐十萬。（實固不值。虛亦不值。凡人要自立。要自強。要求己而莫求人。所謂求己者。卽君子之中立不倚也。卽君子之自強不息也。）夤緣再四。已繳二萬串。又另繳三千串。而前此之二萬串。尙付之流水也。豈不可惜。處此時勢。四面皆烽煙。所在皆荆棘。惟有努力自衛。尙是中策。居今日而求多財。以自豐。譬如燕雀處堂。母子煦煦相樂。而不知禍機已發也。爲盜賊積蓄拱手奉之。而尙不識其姓名。彼亦并不道謝。豈不愚哉。鄙人在楚。官吏尙不至十分貪詐。以供應出差之錢。爲百姓保身家足矣。又何經費之足慮哉。且此等事。是藉地利以省費。愚人難於慮始。易於圖成。願雲鴻曉亭大聲疾呼。不日成之。鄙人今日之率作與事。人頗嫌之。至二三年之後。思鄙人之言。與其日覆孳孳之苦心。當有含泣而思念不置者矣。

復李雨蒼 十三日

來示備悉。石逆騎嶺脊而窺虛實。得勢則思逞。失利亦思竄也。豫州之搶四起。來此請三千兵。廷諭允之。而實無可籌撥。吳翔岡曾致書招之。而所致之書。未知到否。大致謂兵可挫。氣不可挫。氣可偶挫。而志終不可挫。左公必致回湘。我亦不便爭也。鄙君之深微處。尙未晤談。難以臆斷。大抵兵事另有一種人物。文而近史。武而近俠。皆非能兵者。湘旣日亟。貴營赴鄂之期。未忍速催。視大局如秦越人之肥瘠。豈不肖所能出諸口耶。所示撫湘不可稍有輕重。足見心力。特不知意念所注。疑是何輕何重耶。尙乞詳悉示及。以證異地之心。

致彭雪芹 己未三月十四日

連得二書。敬承所示。近年營中。非營官之少。而哨長隊長尤易選擇。所乏者統將耳。統將須坐定勇敢。不算本領。外。必須智略。足以知兵。器識足以服衆。乃可勝任。總須智勇二字相兼。有智無勇。能說而不能行。有勇無智。則兵弱而敗。兵強亦敗。不明方略。不知布置。不能審勢。不能審勢。即千萬人終必敗也。金殿安亦頗勇。然好徇人情。所選哨官。非私親即密友。不知軍中之事。乃將士性命所關。百姓性命所關。何人情之有。所示楊占鼇。邢萬升。蔣信玉三人。中有小統將之才否。如得一小統領。則以三人爲三營。而號令統歸一人。一二年戰功果著。當再拔入。再添營。必可合式。若僅止營官。而不堪統帥。則如滿屋散錢。不歸串。必無用處。楊占鼇。俟回時。札調。邢蔣乞先飭來。一見求之。而得命也。求之不得命也。求之不得。而此心此志。百年不懈。始終以求才爲主。此亦命也。羅近秋才分何如。有志氣。頗識道理否。兵事則三五年亦未易了。此番又取永郴桂衡之民以爲賊。湖南人殺湖南人。尙一生殺不完。况勇少於賊耶。黃澤遠交棧臺使用。餉歸鄂省。如湖口有警。普若敗挫。則尙欲以一營來助。如可不需。亦乞示下。總之。林翼處。即使萬分爲難。亦不專爭黃澤遠一營。總以守定石鐘。莫棄前功爲要。普等不知兵略。不知宜戰宜守之機勢。此事本難言。許多讀書人亦不知也。

復李香雪太守 三月十五日

得書言鹽卡之事。中肯。陸路設卡。總難盡善。一語破的。足以知民之情僞矣。麻城之事。訪的再辦。下游湖口。尙可無虞。劉亡而普勝。繼又敗。然敗兵尙有萬人。賊亦不過萬人。將無智略。又無德性。又無器識。奈何。江西長官。度越尋凡。各將請添兵。無不應者。却不管餉從何來。作撫臺不管餉。亦甚便宜。承詢湘中人來。頗怨左公。此天下古今之通病。昔年滌帥倡義。舉國非之。兩司且上詳請參。其時徐與陶爲藩臬也。四年後湖南無粵逆。惟廣東竄入三股。一股從茶陵竄江西。其時賴有王璞山力與之抗。一抗再抗。仍不免竄往江西。吾湘官民之嘖嘖致怨者。尙有憾於王與

左也。殆五年以後。全境無事。庸劣之官。得以安富尊榮。浮華之士。亦得以般樂怠傲。於是頌左者有人。頌滌帥者亦有人。怨詈者固無識。頌美者亦非情也。弟於二月寄左公書。切囑其專意集兵。慎勿分防。言軍事之要。必有所忍。乃能有所濟。必有所舍。乃能有所全。若處處設備。卽十萬兵無尺寸之效。此意至精至切。左公手無斧柯。不過睨而視之耳。官與士安得不怨。不僅左公然也。昨見希庵戒其敬慎虛心。湖北不久有難。與皖交界者五百餘里。與豫交界者千二百里。與湘與豫章交界者又千有餘里。試思如此幅員。如此鄰舍。更從何處防起。一處有事。林翼之罪已不赦。古今人以任事爲最難。而世俗巧宦。動以兵事爲戒。蓋亦閱世之深。不得已而出乎此也。迪庵血性剛烈。故一敗卽以身殉。殉之良是也。丈夫不可辱。與其圖後局之難撐。不如顧當前之大義。此迪庵之所以甘心無悔也。大抵爲人謀事。是世間苦境。謀人之軍。尤難之難者也。平時不守正。怨固不免。平日守正。人莫誰何。兵事有蹉跎。則怨謗更多矣。七年之夏。常沛霖張祥泰已欣欣自得。此固世情之自然。小人之幸災樂禍。固不足怪也。近月多憂。壽山去後。惟仲然尙可深談。然憂不可懈也。有能合不能分之苦。天下安有一枝人馬。並會一處。以犯楚疆之笨賊哉。又辦事之才。取人之法。原無一定。有聖賢一路。有豪俠一路。古人所以不可幾及。弟之所患。仍是統將無人。希庵則能獨當一路。而他路又時誰屬哉。周條侯受命卽請便宜。以梁委七國。其時漢景帝與竇太后屢詔救梁。而條侯不奉詔。王翦破楚。非六十萬人則不行。卽行亦堅壁以審機。唐太宗與宋金剛戰。以蓋世雄略。堅壁年餘。分兵抄其糧道。糧竭賊逃。一日夜追二百里。設此三事處今日。早已撤去矣。姑發梗概。以助高明。

復楊厚庵軍門 十五日

劉傑人銳意攻堅。致有此挫。捐軀赴敵。兄弟後先。殊堪痛愕。乃一戰不利。致使賊勢披猖。殊爲可惜。至賊匪備船上犯。吾兄以屢勝之師。碩畫籌防。江而游氛。自可無憂。其奚突。惟湖口九江。俱係扼要重地。我軍以四年全力。得之

甚難。而守之亦殊不易。諸凡防剿事宜。尙望卓裁審量。函普鎮加意防閑。相機妥辦。萬不可稍有疏虞。皆賴盡抱權衡。多方指示也。襄府水師有警方調。前函爲思患預防之計。暫不必亟亟也。湖南調弟處四營。并乞馬隊。已於舒輔廷部下籌撥二百名。派營總一員。督率前往。初十日已啓行矣。近探陳逆大股。尙徘徊定遠之間。霍六一帶。尙未十分警逼。現派委紳士。於商固入麻總路。擇其險隘。設立礮卡。外杜窺伺。內省防兵。俟湖南軍事稍定。方圖併力東征耳。

致會滌帥 三月十五日

湖南所調馬隊。十一日從上巴河啓行。聞招勇已及三萬人。初一日以後。尙無信來。衡州寶慶。或可不失。惟擄榔桂永三郡之民。以爲賊。異日之爭戰。未有艾也。黃澤遠必留湖口。交雪芹派守。景鎮未復。而劉傑人先亡於建德。普之各營。頗有勇敢。而主持兵略。實無其人。終必敗矣。尊處添勇三千。而無統將。是猶銅錢塞滿屋子。而未歸貫串也。實爲近事之大可憂。此間有希庵之肅靜。目前尙不覺其苦。然好修飭之人。不喜樸魯之士。異日臨大敵。決大疑。恐骨氣不揚。思慮不入。獨歸一路。切非其選矣。希庵在此間。固無妨礙。然賊分則兵不得不分。似須爲之謀。臨時假統。或不得力也。此事內咎於心。思之半年。竟不可得。豫州捻匪四起。豫撫奏乞黃州兵。廷旨允之。力固難分。遷地勿良。尤楚軍之通弊。湖南藩庫糧庫。可支三個月。惟尊處三萬。必不能濟。近得江西萬餘。而失湖南三萬。何財運之窮也。

致閻丹初農部（銘敬） 十六日

久聞志行。如饑如渴。始得之涓春。繼訪之午山。又證之以傅詩。而傾慕之誠。結於夢想矣。頃奉上諭。已蒙聖恩。允。從此鄂中受福無窮。延望之殷。尙乞投袂而起。不我遐棄。新野衛公。是吾死友。王槐軒所舉。去年卽欲同午山奏。

調而不果。弟不知衛公字號。尙乞老兄轉致愚忱。一同速駕。軍務地方。不拘一格。必軍務乃能逾格。必地方得人。軍務乃能順手。此機當共鑒之。弟才力至劣。而好善之誠。殆過時人。如憐其愚而教益之。則事猶可爲也。天下之患。不獨在盜賊。患在人心不轉。人才不出耳。人才隨時而生。患在人之不求耳。欲言不盡。聊抒梗概。敬質高明。

致郭筠仙 三月十八日

湖南力與賊抗。苦哉高叟。現已募得三萬人。然尙不及賊數十分之一二也。長沙必無虞。而邊郡必有失。目前尙可支。而流毒必及於數省。欲使賊畏怯而不深入。莫如乞黑龍江馬兵千人。以健將如舒保者將之。輔以楚兵萬人。必可破賊。且馬隊若得人統帶。千人之餉。不過步兵二千人之餉數。而兵力可抵三四千人之用。屢請官揆帥奏咨。臺邸乞援。揆帥尙遲疑未發也。賊若圖湘。湘中地勢誠難盡恃。馬隊以山多而稻田鱗比也。章若犯豫賊。則滌軍必不支。犯鄂則鄂尤不支。滌之部下。將少兵少。鄂軍已入皖者二萬餘人。急切必不能另募二三萬人。以湘中之健將壯士。假歸於里者。尙有可取。鄂中則將無可選。勇無可募也。且湘中積存百萬兩。不過僅支三月。鄂則一錢無存。豫章則尤無條理。是可憂也。惜無以此實情上告者。吾恐東南終無完膚矣。湖北江西宜麥宜棉花之地。馬隊尙可馳騁。公其有術以致此乎。念之。

致官揆帥 三月十九日

勝帥所咨馬姓桐勇一事。殊屬荒謬絕倫。已如尊示。通飭各營。嚴行拒絕。如有依違。并許其督兵圍捕。斷不許一人入營。一刻逗留也。衡州人初九日來信。湘事尙無恙。而湖南意謂不以鄰國爲壑。恐是大言耳。湖南將士。轉戰六七年。敢戰之風。始於江興塔與羅與李。已成風氣。其猛將壯士之倦而思歸者。一呼卽出。二三萬人不難召募。湖北

不能。江西尤不能也。此事尙求鈞度。思患預防。江面却有餘力。水師儘多。不足爲慮。

致張仲遠莊蕙生 三月二十二日

得書敬悉。趙呂劉三子均到營。已與接談一次。尙須留三四日再深談。劉子才尤美。若善教養。當可有成。寶善堂固可位置。而鄙人屬望尙不止於牙釐之薪水。照例之保舉也。呂子是故人之子。一見尤爲心惻。堯仙之後。豈忍以縣丞降辱。似應於捐銅局加捐知縣。分發試用。林翼必竭力助之。或俟有便。再謀成全之法。此子頗醇美。趙子與我情本深。或加助捐貲。或待異日效力。入名軍籍。均無不可。總論三子。劉之異日成就較易。亦較大。呂子如飛鳥依人。人自憐之。趙子頗見精采。剝落浮華。返於醇樸。乃可有造。從學入德。固有其門。不習爲吏。當自得師。孔子之教。不輕許人以從政。蓋其慎也。此三人者。應以何人爲從政之才。公試思之。不患無位。患所以立。鄙見異日之行走分發。凡公有言。弟必應命。特舉人以祿位較易。而成人之美。使之練習成才。似較難也。仲達所論屯衛利弊。較審委員分查之議。祈先議定委員。弟必從命也。分統之志。弟必成之。日夜以此事爲事。泰山之溜。可穿石矣。達夫開缺。十八日已發。有負蕙生之雅囑。著筆甚輕。較告痛尙直捷了當。而更無窒礙耳。湖南之事。尙未甚穩。賊力甚大。蓄謀太深。謂爲張皇者。淺之乎視人矣。

致官揆帥 三月二十五日

昨唐義渠擊獲安慶逆首羅光簡之妻劉氏。稟請如何處置。鄙意以爲殺一賊婦。無損於賊。適以阻其歸順之心。不如厚爲安慰。另覓一明白可靠之人。密往賊中。諭令獻城。光簡獻城贖罪。即可保全眷屬。並許奏獎三四品官職。以示招徠。業將此情。批令設法妥辦。其賊婦劉氏。并令送交省垣委員管看。優加撫卹。管見如是。未審可否。

致秦撫曾卓如 二月二十六日

三月廿五日黃州營次。奉三月十五日手諭。荷賜軍餉萬五千兩。天下已任。憂樂關懷。感仰何似。方今碩德遠猷。魁梧耆艾。可式百僚者。必推關中治行爲第一。惟以一省供數省之饑。擘畫惟勤。薰抱多勞。林翼等治軍不力。迄用無成。吁何可愧。所自信者。此軍人才。殄於三河。志氣骨力。或遜於前。規模肅括。質地樸謹。尙較東南各省爲優。數月之後。仍可奮發有爲耳。石逆竄郴桂。勢頗張大。籲公以左生謀。倉卒召發壯丁三萬人。鄂中復派馬隊水師及步兵四營以助之。湘人連戰於外。壯士之替代假歸者。踵接肩摩。卽倦將之棲遲故里者。不下數百人。呼之卽出。期月成軍。設石逆挾此衆以窺江右。鄂中則擾攘傾側。不知所屆矣。然石逆之志。非嘗須臾忘鄂也。近月以來。顧憂南路。添兵則餉已竭。尙是築室道謀耳。皖賊憑城抗拒。賊饑未斷。卽再與相持三年。仍無期限可卜。應候湘軍麤定。再謀進剿。此時分去之人。雖屬無多。而將士返顧之憂心。如懸旗搖搖未定故也。豫州來此請兵。鄂力無以應之。關中天府。以三面守。以一面戰。此奉春留侯所以御天下之至計也。鄂則四爭之國。形勢不如秦矣。秦地自明公入關。吏治蒸蒸日上。回漢相爭。解釋糾紛得體。聞引用馬百齡。其人之才力高下。不可知。要其身列仕途。顧廉恥而敬國法。當可信矣。竊計秦地回民。頗多爭鬪之風。隱憂方切。如蒙遴委三五妥人。周行訪察。取回民中之讀書識字。有身家頂戴。復擇其稍明白。顧大義者。加以禮貌。或調至省城。接見以寵之。異日地方有事。卽可責成其人。以使之自戡其類。則幕府辦事。乃有綱領線索之可尋繹。或亦愚者之一得乎。楚事百孔千瘡。林翼坐廢不治。顧不自恤其境。而爲越俎之謀。其愚妄亦旣太甚。繼思老前輩之於林翼。尙未識面。而至性感孚。不遺葑菲。山不言高。海不言深。故敢妄獻其愚。以備採擇。非必其言之有當也。林翼在郟城。新得將領數人。以餉竭而尙遲添募。均置左右。好爵以糜之而已矣。使我多財。則軍事尙可爲也。秦中良吏極多。沈太守已經拔擢。此外異才。尙乞便中開示。林翼非能延攬也。好善之

性。如飢如渴。特欲一識姓名。錄之夾袋。以志向往之誠耳。又聞顧醇慶。余賡揚龔衡齡。江開陳照。均有才品可造。道路所探。未知其詳。亦欲得長者之衡鑒。以定其高下耳。

致湘鄉楊石泉朱鐵橋 三月二十七日

湘軍起義。撐持數年。近則將有暮氣相乘矣。惟羅公與李公未竟之志事。必以吾黨救之。乃可以成其終。蓋兵事以人才爲根本。人才以志氣爲根本。兵可挫而氣不可挫。氣可偶挫。而志則終不可挫。今日軍中之人才志氣。殆不如前。然猶賴有希庵也。希庵母病。欲假歸三月。以慰其私。閣下爲忠烈高弟子。乞爲東南民命。強起到黃州。代理三四月。俟希庵八月圖皖。公仍可歸湘中。林翼才分無可表見。而其好善之誠。與接待軍士之情。誼肫切。相差可自信。或者聲音顏色。尙非不可與言。而距於千里之外者乎。

致湘鄉劉霞仙 二十七日

迪庵忠骨到家。聞先生始終條理。喪祭葬禮。均當其宜。葬地已定否。便中尙乞示之。以釋懸注。三河之失。由分兵太多。攻堅太苦。精銳已損。瘡痍未復。承詢所以進兵之速。則速有兩次進兵援廬之旨。其時李鶴人新失廬州。勝克齋又新敗也。林翼祭文中。有固知兵少。不忍惜身。固知賊多。不忍違君之語。又有四城既下。道無留者。急援廬州。何其速也之語。中朝雖據外間奏請爲言。面實無期限督責之意。勝帥奏乞作爲該處幫辦。奉旨之時。軍已覆矣。鄂事殆難言。澹村先生主持省垣綱領。其扶正氣而保善類。固無疵議。惟尙不肯獨任耳。希庵主持兵事。漸次整理。鄙人之愚。則覺軍中人才太少。志氣筋骨。殆卽於暮氣矣。將以氣爲主。以志爲帥。專尙馴謹之人。則久而必惰。專求悍鷲之士。則久而必驕。兵事畢竟歸於豪傑一流。氣不盛者。遇事而氣先懼。而目先逃。而心先搖。平時一一稟承。奉令惟

謹。臨大難而中無主。其識力既鈍。其膽力必減。固可憂之大矣。儲才館主持無人。已成虛設。近於營中支幕以處士。夏間當葺雪堂之基以處之。提調無人。鑑衡不審。則濫竽者多。尊示養育。裁成之論至精。夫人才因求才者之志識而生。亦有用才者之分量而出。用人如用馬。得千里馬而不識。識矣而不能勝其力。則且樂駑駘之便安。而斥騏驎之偉俊矣。朱子云。是真虎必有風。然則虎不嘯。非風之不從也。所愧在此。所懼在此。來示又言保境息民。理財養士八字爲訓。頓兵已久。湘事定。則此軍必應圖皖。當留三。四千人。爲鄂鎮復仇雪恥。希庵與林翼之責也。林翼負大罪而出。若不於兵事稍盡力。其何以堪。當其聞警而出也。以迪庵義深情切。又經手未完者。不忍獨諉於希庵一人耳。皖事苟完。我輩豈可再與於世事哉。正月奏調六人。已奉旨者四人。林聰彝（文忠季子）衛榮光（新鄉翰林）閻敬銘（朝邑人。庶常改主事）張建基（曾任東湖知縣）尙有林汝舟（文忠長子）童棫（四川翰林）奉諭召見。或仍發往郡省也。訪系志節清嚴。兼明吏事者。平日均未識面也。希庵亦知其父母思念之意。并知其父母病。而又念軍事統轄無人。憂思無策。蓋此軍萬餘人。均稟命於希庵也。如蒙石泉鐵橋來鄂替代。希庵可暫歸。有寄楊朱二函。乞代求之爲荷。

復英山縣何秩九 四月初一日

皖城下竄。此間另有確耗。緣江浦浦口。與金陵相犄角。爲彼此必爭之地。頃經我軍以計取之。而六合合圍。城池亦指日可下。故賊之攻浦救六。勢所必至。據聞援賊近十萬。尙不止。抽撥定遠一處也。毋恃其不來。恃其不能來。嚴防確探。仍乞留意爲幸。

復荆宜施道嚴渭春 四月初四日

團練之弊。公知之已深。故言之切。然此中過誤。不在民而在吏。州縣苟師法子羽子賤。以得人爲先。有兄事師事之人。則亦未始不可戢奸謀而清內患。三代以下。官與士民打成兩橛。所與處者惟役耳。事奚由理。今日之事。當進君子之真團。退小人之僞團而已。團練可張虛聲。杜奸細。追敗賊。遠擄掠。荆宜與鼎澧接壤之處。防不勝防。大要在嚴江防以自守。斯爲先著。江防不誤。卽決裂亦不過南岸數縣耳。而根本不搖。應將水路要津。先期防查。則事前先有把握。蘄黃以下。水師尙富。彭楊之心謀。楚頗忠。設有緩急。則可保其連橋直上。必無空虛之理。陸路爲英山太湖荆橋除德園所牽綴。其置於空著。以備應活機者。惟上巴河一起。不滿六千人。如有緩急。亦可酌斟。陸路之險處。要處總處。凡幾處。須兵幾何人。此非周咨博訪。復沈思靜審。不能得其要也。檄州縣繪圖。特以戶工房之舊圖塞責耳。公試豫思之。兵事決於臨機。而地勢審於平日。非尋常張皇幽渺可比。李與黃三清之請。如蒙恩允。則鄂之幸。特人微言輕。功薄罪重。惕惕自恐。恐不當於中朝之望耳。笠西應否留楚。應否補足三班。候省中之信。林翼不能自發其端。昔年引用此公。頗排衆議。如六年石逆破走。排衆論而特命鮑超於餉竭之時。作添兵之事。然而七年之自春徂秋。八年之冬。力遏宿松。亦稍有補。實則豫謀於六年之夏季也。近日又有一志向。欲開湖北之風氣。爲自強之計。爲不甘爲人下之謀。而竊念餉精不足。徘徊已三月之久矣。另件錄上。事尙未成。而此心殊拳拳矣。江陵捏災之案。地丁項下。除舊緩七十四兩外。八年報緩一萬一千五百四十九兩零。漕米在外。是亦鮑令之續耳。監令則舊緩一千餘。捏緩八千一百四十一兩餘。漕米在外。情尤可惡。蔭雲前信。尙謂監利之冊籍已有成效。吾斯未信。不獨贊詞。是公家之利。故歷年以來。無人傷心也。若私家之田舍。若此。廬旅若此。田主不焦憤致命者幾希。藉曰事須漸進。政貴有恆。然而林翼於鄂。亦已四年矣。其所成就。果無愧哉。年復一年。不可救藥。林翼之愧恨當何如哉。公其爲我切思之。明示之。課大旺大舖一日。差爲心慰。湖南蓄百餘萬之餉。湖北則月有所虧。湖南之猛將勇士。倦鬪思歸者。穀擊肩摩。相望於道者。不下十萬人。故一呼而雲集。響應已四萬人。湖北則千人。二千。亦無可募。曰貧曰弱。安乎危乎。

公之心志。不忘在莒。他人之志。然乎否乎。

復蘄州彭牧禹門 四月初四日

團練以防兵爲聲援。斯誠至論。鄙意竊謂百數十里瀕邊之境。僅恃千餘防兵。遏賊越竄。微特歧途百出。鞭長莫及。卽確偵大隊掩至。力與捍敵。非有各團練聲明旗鼓。駭賊觀聽。亦恐瘠牛債豚。勢力不支。惟是兵勇日支日糧。接戰是其應分。防此防彼。原可隨時調撥團練。不過就地糾合。自衛身家。不能任意轉移。賊之將來。團經而兵緯。賊之旣至。兵正而團奇。如是而已。至於激勵忠憤。敵愾同仇。則在牧民者德義淪洽。民忘死勞。非一蹴所能驟緻也。蘄蛇一事。觀柳州捕蛇文。知爲千古虐政。得與不得。亦在有意無意之間。正不必以此報最也。

致羅方伯 初五日

希庵治兵。極有法度。其立志以謀皖保鄂。自任純一不二。蓋此公是志在聖賢。心無纖毫妄念者也。六合無賊。太湖之圍。尙阻隔水道。不能得手。兩水夾護一城。春夏之交。宛在水中央。應俟秋令。乃可謀也。其母久病。思子頗切。湖南軍務未竣。湖北亦難深入。不如及此夏令。准其私假三月。弟思人生之事。莫大於思親。見面一月。則心安理得。此後爲國出力。氣必盛於前。心力亦必專一不紛矣。弟是鮮民。不忍重違其意。昔信陵君奪晉鄙軍。下令曰。父母在。一子在軍者。歸養。兄弟在軍者。一人歸養。八萬人選汰爲六萬人。遂以破秦。蓋用兵之道。在得人之心。乃能得人之力。信陵君固翩翩濁世之佳公子也。至湖北各營。法度謹嚴。將官謹慎有餘。林翼卽不才。尙能任此而不致貽誤。今日與希庵面談。林翼自信必不自作聰明。且自言惟其稍有聰明。故能不自作聰明也。近月以來。弟營所訪求勇敢著名。一可當十當百者。頗不乏人。均歷年打仗。確有實跡之人。非虛聲也。厚以廩餼。延攬頗多。林翼之好勇敢。更勝於

他將。其平日優待將士之情。固人所共見也。惟因餉項未裕。不敢放手。此時且多儲人才。以備異日之選。林翼從軍已七年。尙未厭兵私志。尙欲創造規模。力開風氣。俟削平皖北。乃求我志耳。愚公之山。精衛之石。殆毋類是。咸寧錢漕。尙有附城包戶五百餘家。苟非多取於民。何樂爲此。能清其致弊之由。而徐爲整理。以復自封投櫃之法乎。咸寧茶葉并百貨釐。通行上海委員。呼應不靈。偷漏且多。能助力會辦。添益軍餉乎。此條應責成之。并由牙釐總局知會。咸寧好訟。能於聽斷明決。不取分文。并約束書差。不致魚肉鄉愚乎。夫爲政之要在不侮鰥寡。不畏強禦。作州縣者。不爲劣紳富戶之所嗾使。斯得之矣。乞澹村先生與李令遇泰。堅明約束。勉踐斯言。乃不愧幹練之吏耳。

致太湖諸營 初六日

有言太湖河水。自上游龍山宮。分爲二流。夾城而過。至下游十五里之迴龍山。復合山水一發。城在中央。擬於下游迴龍山水口狹窄處。設法堵堰。仿引沂注邳故事。此旁人獻策之詞。不知地勢若何。其地須駐重兵。然後堰可保。築堰蓄水。可使太湖之城。蕩爲巨浸否。又賊勢必拚命衝突。以撓我計。必須兵若干。乃可無患。其東南一路接濟。可因此斷絕否。說者謂此法可使太湖賊盡爲魚鼈。然乎否乎。此外應思之策。尙有何事宜預籌。何事宜預防。萬分焦灼之時。偶聞此論。錄以奉聞。倘有可採。卽乞相度籌畫。祕密自酌。詳悉指示爲禱。

致羅澹村方伯 四月初三日

安陸士習民風。錢糧詞訟。積弊甲通省。來示所言均是也。周壽山署煩難疲玩之缺。以試其才。自可因事造就。近年才志均好。然愛人之道。以嚴爲主。寬則心弛而氣浮。幸嚴以戒之。新息之兄有言。良工不示人以璞。大器晚成。可見君子愛人自有深意。鄙見并不望其補缺升官也。唐鶴九之才。與吳公同調。心力均果銳能入。其清查沔陽。如有

成效。一洗積弊。則以之委署監利。人不能嫌我不能。疑若猶未也。應待後命。乞公查詢沔陽近事。或竟以手函詢之。由尊處速卽函詢。均可行也。舉人不能不破格。破格則須循名核實。否則人卽無言。而我心先愧矣。來示以近月同通州縣來鄂者。轂擊肩摩。如貧家食指日繁。無執事以相處。則且私相訾議。自以智虛羸淺。惴惴致愆。爲謙退之詞。此時指省者。均以湖北已治已安矣。欲享清閒之福。以遂其稻粱之謀。世俗之情。固不足怪。安富如江蘇山西陝西四川。指捐者。一二千員。均無位置。亦無差委。任其去來。則可耳。鄂省尙有見長官之一日。如江蘇四川山西。則有不得見者三年矣。此中人才。豈可以一人之見。一筆抹倒。應請分日分起。不可旅進旅退。轉致勞神。而不可考核。應停其照例稟見。促膝並坐。與之緩談事理。久之。則浮僞者。其本末立見。而稍稍可用者。姑志於心。以待試用。或亦披沙揀金之一法乎。然此事頗費眼力。須全副精神。隨事貫注。乃可有准耳。至於地方委用我輩。旣欲稍稍補救於斯民。豈可再避嫌怨。須知禍福有定命。顯晦有定時。去留有定數。避嫌怨者未必得。不避嫌怨者未必失也。古人憂讒畏譏。非以求一己之福也。蓋身當其事。義無可辭。恐讒謗之蜚騰。陷吾君以不明之故。故以悄悄之憂心。致其忠愛之忱耳。至於一身之福禍進退。何足動其毫末哉。以林翼料事。如中堂之德大福厚。心無纖芥之私。必無後慮。老兄勲懋篤厚。秉心公正。亦必無嫌怨之慮。所不可知者。林翼用人。頗患束濕薪之過。氣粗智闊。百孔千瘡。然此公心尙在。尙可勉附於中堂與老兄之末。此後更當綜合名實。純一不二。苟其才也。雖疎必舉。苟其非人。雖親必斥。充類之盡。不過謗怨沸騰。放廢不用。昔年問梁某公署蘇撫。英夷入江。梁公送客。伴倒於宅門外口流沫而目斜視。以此避死。姑蘇之人皆目笑之。厥後劉督在閩派商。梁公避於江浙。纍纍如喪家之狗。又蘇藩司聯某於粵匪破鎮江時。效梁所爲而加甚焉。又昔年家居六年。見某撫與某藩在湘。凡可以徇人情而避怨謗者。無所不用其極。湘中之吏治頽廢。不可救藥。而亦禍逮其身。然則守柳下之直道。必愈乎梁公之僞疾。以求退矣。若陸費若萬之貽害地方。又不如任怨之尙可盡此心矣。且世間那有恩怨哉。官事如浮雲蒼狗。美人惟人所肖。昔漢平陽侯願以齊之

獄市爲寄。我輩亦當如是。苟其中無私毫之欲。則綜核者。盡一時之心力而已矣。處此時艱。豈容更萌他念。公其毅然行之而毋疑。書詞汗漫。傷時駭俗。幸閱後屏之秘之。

與蔣文若論刊讀史兵略事例 四月初七日

初六日晡後。得專卒寄來摘鈔左氏傳。披閱一過。林翼連年待罪戎行。惟今日之學稍勤。而案上公牘。則廢擱不治矣。梅村所擬體例均是。如伐某國取某邑。凡兵事之無當於兵略者不錄。其意良是。所言各條亦均是。惟渠之地輿之學。極爲精博。刪煩就簡。非梅村自爲之。則恐擇之不精也。又此編以兵略爲本。而兵略以地利爲要。如楚失成臯而亡。蜀失荊州而蹙。秦王得虎牢而竇王并擒。宋伐燕雲而汴京不守。元爭襄陽而鄂歸掌握之類。凡有關於大略遠謀者。幸明以教我。又凡以謀略勝人。不戰而誦人之兵者。又如衛文大帛之冠。大市之衣。如魏武屯田邸閣之事。皆強兵之至計也。不必有兵事之可錄。而必須編入冊中。如子西之策夫差。已錄入矣。淮陰初拜大將。之料項羽是也。大約分編在諸賢。而總裁則專屬之梅村矣。刻本亦須大雅。不可以坊間俗本爲式。大致須如大板日知錄成樣。字畫須細筋入骨。鐵畫銀鈎。如武昌無好手。可在湘潭長沙覓之。此則專屬之文若矣。

致會滌帥 初七日

兩得賜書。敬承一切。景德鎮終必收復。事固有時。瓜熟自落也。屈蟠守湖口。人地最宜。小池口現必無事。所駐黃副將澤遠。因東流有警。已調往城守。爲水師護糧耳。普軍中有羅近秋。勇敢確然可信。蓋冠寶營而第一。惟不審稍。稍有將略否。幸及時訪察。以留塔忠武之餘烈。欽堂之膽氣。無所長而才具又所短。終難獨任耳。因皖賊游魂未定。致希庵未能省親。私心愧恨。中夜怛怛。近探陳逆全力注於江浦浦口六合。蓋十萬人矣。其留上游者。僅城守之賊。

四五月。楚軍亦難期深入。希庵於初八日坐快蟹船回湘。三月之假。軍事尙可奉令惟謹。林翼至愚。當不自作聰明。亦惟林翼頗聰明。當不自用其愚。此舉心安理得。秋初再出其心稍平。其志氣必更盛矣。林翼近頗留心驍勇。夾袋編小。不能回旋。而私志必欲爲湖北力開風氣。再假數月。當有一新軍也。筱泉俟尊處別案先保後。敵處卽奏歸湖北。澹村先生忠謹醇篤。如得相助爲理。器量益宏遠矣。天津尙無警變。湘中之賊頗張。石達開已竄駐祁陽山中。新舊之賊如蠅如蟻。蓋數百里無斷缺。左卿頗怪蕭濬川之從容雅步。又謂我輩謂賊少爲失實也。湘若不支。則鄂與豫章更不必問。湘中猛將壯士之倦而思歸者。何止十萬人。庫存百萬餘兩。近十年富強之國也。假令與鄂爭雄。鄂中添三五千人。亦恐不能應手。安得一呼響應。一二月內。卽成四萬餘人哉。以此思鄂之危可想矣。廷旨一道抄呈。請示辦法。

致官揆帥 初八日

初八日得湖南軍報。大局雖無潰敗情狀。而備多力分。左支右絀之情形。已在語言之外。細心體察。竊恐其力不能勝。湖南地小。山徑險隘。較湖北地勢不同。戰守亦較湖北爲易。猛將壯士之假歸於家者。穀擊肩摩。故一月內外。成軍四萬餘人。湖北將才較少。勇風未開。若欲倉卒召募。恐難應敵。若賊志必在拊鄂之背。窺蜀之藩。則現在兵力。惟黃州六千人可禦一路。而武昌岳州荊宜五府地面。防不勝防矣。况又有皖賊之牽綴於前也。哉。湘南去冬以來。庫有所餘。約逾百萬。湖北每月供支東征之餉。必虧數萬以外。設湖南果不支。禍必及於鄂省。地勢與兵力。尙不及湖南。則鄂事必不堪涉想矣。查二三年賊從湖南犯鄂。犯皖。犯金陵。其時永州衡州長沙。并未失守。此次永州衡州寶慶三府。卽令保守無恙。而賊所經過。不必定由郡城。若大股分竄。湖南不能追。湖北勢必不能堵也。二三千人禦賊於封。在昔年則尙屬可行。近年賊計專以裹脅多人。分路包抄。以迷軍士之目。而懾軍士之氣。未戰而氣先

怯。故不能堅持不敗也。上冬三河桐城。是其前鑿。大抵賊若拊鄂之背。必在夏秋之間。其大枝另由西路窺伺巴蜀。則尙未可知也。湖北禦此大股。必須再添二萬人。餉力固不能任。將才又不能多。日夜籌思。安得有一二萬人。以爲鄂用乎。且恐湘人之驚魂未定。則從軍之士必少。湘中鑒於前此之空虛。非全境肅清。三五月後。必無援師出境。亦必無追兵到鄂也。則鄂之士民。豈堪再罹奇禍也耶。愚見欲自守於境內。不如助剿於境外。助剿則兵少而功倍。目守則備多而勢分。有一愚下之策。不如及希庵假歸之便。卽派湘軍撫標精銳五千人。從岳州湘陰益陽。取道邵陽。以剿寶慶一路之賊。希庵所居鄉村。距寶慶甚近。陸軍從岳州到寶慶。必在希庵到家後廿日。公義私情。兩得其宜。且周寬世等。尙可附益二三千人。以此精銳搏戰。當可破滅一路。救隣美名也。湖南橫逞意氣。不應爭者必忿爭。而以厚道待之。大度處之。盛德也。賊多而不守城。則戰事必多。如能剿除一股。則湖南之受賜不必說。卽湖北江西。亦可免十年之憂。大功也。一心奉公。人未乞師而予以精兵。一意保民。不忍使脅從之衆。久陷賊中。變爲戾種。消東南數省之隱憂。此又陰德之尤大者也。惟此計頗奇險。在湘受益甚大。在鄂則不甚穩。應以湘撫二三千人守黃州。專以固守爲事。不謀戰略。更以新定鄂軍章程。於蘄州大同鄉。募千人爲守兵。於麻城黃州安募千人。於襄鄖募千五百人。均且守且練。私料近二月。賊已趨六合江浦。楚境或可以援湘乎。或曰。楚軍不援皖。而惟湘是圖。又湘人以空虛而致賊。鄂人奈何效尤。愚見皖賊遍地。久無主人。孤軍遠征。必須分爲三路。待時而動。湘賊有湘中主人。尙肯自謀。得助則成功。失助則功不成。情境固不同也。賊在皖者。不過十萬。且未必卽來。賊在湘者。終必貽鄂人以隱憂也。以上林翼一人之愚見。未知有一二字可採否。私心亦未敢信以爲是。且湖南人亦未曾來此乞兵。愚人過慮。故縷縷奉商。并非定見也。如寶慶之議。以爲未可。則或由平江瀏陽。以助茶陵攸縣。是亦一說也。大約賊之大股。必由寶慶山中入西山矣。又助湖南兵力。莫如馬隊餉。不過如步兵之二人。而力可抵步兵之五人。巴玉農廿八日已過衛輝。行走尙速。應否催之。應否再乞數百甲兵。應候鈞定。

致厲伯符觀察 四月初八日

前奉來示。以若照鄂軍坐營章程。則力尙可添三營等情。弟思前定鄂章。尙有許多行不去之處。卽如長夫太少。一難也。長夫僅許坐營價銀一兩。二難也。凡勇士非重價。則不能養其身。卽不能得其力。三難也。現已將前章刪改。較前所添。不過三百金內外。或不致格礙難行。轉成虛設。天下萬事萬物。凡便宜不是貨。而兵勇之饒果。與士人之智識過人者。非重祿優餼。不足以贍之。此事頗難斟酌。卽現定章程。尙恐不足以招徠猛士也。新章一本。乞公同核。正如以爲可。卽請算較明白。交文若發刻。刻後將前行鄂軍章程銷燬可也。刻下營中札調各處鄂人可戰。及水陸將備可戰者不少。仍是湘人多。弟以確切戰功爲憑。故不能不用湘人耳。勇丁則決計用鄂人。如可添三四千人。則將領尙有其選。惜餉糈不繼耳。公同思議爲要。至此書有實濟於近事。且必傳之書。萬不可以俗手刻成。時俗坊板。令人生憎。應如何札調上等刻手。乞伯符子山兄謀之。大致必如大板日知錄成樣。及監板廿一史成樣。乃可行也。校對尤爲第一要事。文若妥謀之。

致左季丈 初八日

前於四月初三日。得三月二十七日手書甚詳。以黎順傳述閒言。致稍憤鬱。實則曉事人必不議公也。議公者。湖南之官也。如醉如夢。忽歌忽泣。此等佐雜。畀以道府。未信其可也。湖南稍有所蓄。且呼嘯成風。應募者逾四萬人。將士頗知戰法。而機略形勢。又無出左之右者。賊之蓄謀窺湘。殆亦失算。若竟窺鄂。鄂無以應也。蕭口口雅步從容。逢人便問魏三兄。其所謂血性者安在。彼言網開一面。是欲縱賊入蜀。師揚武陵故智也。蕭口口生長於蜀。豈容自萌此心。陳金鼇并非欲調回。因前言水師已足。并蕭守一營。亦可不需故也。在湘則恐兵多無餉耳。實則湖北之

防剿潯皖。亦鄂人之代謀。豈其厚於潯皖而轉簿於湘耶。應候信到。卽札飭糧臺續解水師之餉。其馬隊五月後之餉。則已札行矣。有言石逆膽怯者。據稱在浙江衢州攻城。忽賊探報九江李大人從間道山僻處繞來。石逆疑爲迪庵。不知其爲李定秦也。卽夜自徙。改圖犯閩。其設然乎。近日情形何如。劉印渠現在何處。能并力以辦此股否。皖中情形。日見支離。湘尙有人。鄂才獨少。自顧不暇。何暇謗人。

與余會亭 四月初十日

足下所請彭心友留營。已另案批准。并破格優給鹽糧。由糧臺動支矣。我志在於力矯湖北積弱之習。特開風氣。另批之行唐丞者。可查閱卽知我心之拳拳矣。足下久於蕪黃。蕪黃之士。有廉勇明白。曉暢兵略。武可殺賊。文能和衆者乎。足下生長襄陽。襄陽之士。有忠義爲心。勇敢爲志者乎。求將之道。在有良心。有血性。有勇氣。有智略。舉貢生監白丁。皆可不拘資格。足下能訪舉數人。稟請調看乎。又阿參將一營。大小員弁千人。豈無三五可造之才耶。幸隨地隨時。因才訪察。明以告我。

復恩秋舫 初十日

承解火藥。燃試極佳。惟配合灰料。古法以茄桿爲最。柳杉次之。茄桿刻難購覓。柳杉儘有。何至採用雜木。愚意且依法配試。何如何如。

致羅澹村方伯 四月十二日

希庵已到武昌否。何日西上。弟前說恐公議仍以爲不妥。(初九日所上條陳分兵援湘之說也)弟亦不敢自

信其是。公意云何。茲擬復奏三件。亦不敢自以爲是。敬乞會同蕙生仲遠子山伯符改正。已另將稿本寄上中堂。加改正後。乞回明中堂爲荷。此時漸有不寐之意。心神卽不如冬春之專一矣。正摺一分。夾片二分。正摺無多詞。夾片則關係異日之安危。不可不先事預籌。都之徘徊。畏勝帥也。林翼亦須早謀。林翼之日夜憂思。夜不能寐。畏湖南之以鄰爲壑也。募勇一萬。不如馬隊一千。以賊氣先怯。賊心先寒。若以馬隊伏後。卽不肖如林翼。自帶五千六千人。亦敢與二萬賊相抗。必如此。乃不牽動下游。乃至數年。經營之黃州。再行委棄。黃州爲湖北之精華也。黃州搖動。漢陽武昌可危。中堂之公心盛德。天下一人。應以良言日進左右。必蒙鑒納。諸君子其念之哉。敬之哉。如馬隊事可行。則林翼再從容調募鄂人爲勇。所添不多。湖北總可有爲否。則臨時必手忙脚亂矣。膽量人人皆小。只須分別平日膽小。臨時膽大耳。今人則平日膽大。臨時膽小。可痛也已。

致左季丈 己未四月十二日

得初三日書。又將十日矣。軍情何似。焦憤肖深。不肖之志。尙欲民力助湘。而謀尙未成。志亦不申。不敢告也。公之於時事。蓋可謂才。然林翼視之。尙未盡其用。有德有寵。無位無民。其河以濟。問公者。湘人。非鄂人也。此沛公司馬之類也。何足介意。此等事何足一噓一哂哉。惟是籌筆勤苦。中懷拂逆。恐身其瘠矣。湖南軍事賊勢。已代草會奏。旣以預防上游。而又與前言相合。近日衡永寶情形穩固否。昔條侯之破七國。堅壁三月。以太后梁王之故。而不受詔。故曰亞夫真可任使也。秦王之破宋金剛。亦堅壁年餘。俟其糧盡遁走。則一日夜追剿二百餘里。秦王非天錫智勇者哉。設今人當之。則議其怯矣。天下絕少知略之人。近月發憤著書。取左傳通鑑之兵事地理而編次之。兵事以知略爲上。地理以釋今爲考證。公講輿地二十年。管兵事又十年。明晰此中之精微者矣。此書秋前可成。冬春當可刊板以行也。印渠何如。將中應注意於此人。

致羅方伯 十二日

去年星槎到而林翼居憂。星槎即欲同歸。中堂獨信任而委以安陸。不知者尙欲爲達夫作復歸於毫之計。其議論星槎其屢屢矣。茲閱其來稟。其治行何如。鍾祥得此功效。始願尙不及此。使守令若此。天下安得有亂世哉。林翼不保星槎。亦不願星槎之久作官。更不望其補缺發財。然沾沾不釋於去年進言之事。則心以爲憤也。可見世事無真是非。特有假好惡耳。我若徇私以枉事。異日豈有利於星槎哉。然世之徇私以枉事者。試返而自問。異日又豈能獲私利之報於其所徇私利之人哉。蓋亦反其本矣。江浦一帶。信息尙好。儻使徇私而可屠。則皖民尙有再生之日。勝帥之前奏。蓋覬覦六合之功也。貪功者決非大器。早間各摺。諒已詳察矣。

復商城羅復亭司馬 四月十三日

接奉惠復。具悉防禦之設。深費盡勞。謝謝。此事爲節省防兵起見。守險在民。而決戰仍在將士也。來示周詳。心爲憮然。竊念決勝運籌。以地利爲要義。而非身經履勘。胸有智珠。亦不能得其要領。閣下老謀碩畫。洞中機宜。酌夷險而措置之。必爲地方安全之利。惟是香社高叟。久耽煙霞。以一紙煩勞玉趾。至與雜作爲儔。此心殊抱不安。不才如林翼。亦何能有爲。惟賴二三同志。從公戮力耳。皖謀尙無進步。而湘氛告警。又爲鄂拊背之虞。任鉅時艱。莫此爲極。先生何以教之。

致荆宜施道嚴渭春 十四日

湘南之賊。初三日以前。及初五日以前來信。尙是左支右絀。防不勝防之狀。駸駸及新寧武岡矣。荆南道之江防。

是否有一二必扼之到。說者謂扼太平口。與岳州荆江腦。卽得要領。然乎。又陸路州縣之在江南者。以何路爲要。先事預思。臨時乃有把握也。刻下不能不預行添兵。以新者守上游。以慣戰者拙調從征。或亦慎守其一。而戒備不虞之一端乎。然力不從心。苦餉之不足。殊難放手。古聖賢之必欲恭儉爲德。正患臨難無錢耳。蔭雲兄贈我之京錢九錢餘。試之不效。蓋中邊皆甜。造作多也。公送之。甚似佳。尙未試用。然以虛糜軍餉。無可致力之軍。食此有愧。應卽停止。節下送醜食品。遠道將來。往往却之難安。本年札飭糧臺。停年節醜遺。則弟處亦不得獨收。以自異於營官。應求告之蔭雲笠西。停止爲荷。江隄何如。蝗孽何如。尙希示我。

致牙鰲文案糧臺諸君 四月十四日

據副右營逃去之敗勇孫姓供。四眼狗於鶴營降後。破勝帥之營。勝帥本是大敗。乃轉以捷聞。方告急。求援於朝。狗卽夜馳往江浦矣。又以捷聞。均見章奏。卽夜馳往江浦。不能逞志。賊約六七萬人。官軍亦有數十營壘。嚴守不戰。前憑江流。後阻沮澤。賊亦不能越也。狗偷渡金陵。以金陵求援日急。每人日米四兩。每禮拜錢八文。數日後。狗仍渡江。欲卽往六合。如六合不敗。則金陵可破。計零星接濟。必不能多。湖南之局。終爲鄂患。力不足也。昨日之奏稿三件。抄上祈錄一分。備諸公異日之張本。諸君子須勉自愛。鄙人欲以此事傳一二替手久矣。香雪不必說。少村異日何如。閱後仍還之。候中堂繕發後。抄行各處。并寄滌帥也。又湖北存庫之錢不佳。須轉移於無形。每月領一萬串。仍限二月三月。將釐局錢之佳者繳還。應請少固香雪文若經手。則無弊。而於異日之緩急。仍有可恃。凡商民不可使之疑。錢價貴時。出庫錢萬串。以便民。若以庫錢取用於有警變之時。商民未習。貫索未勻。則不免疑阻矣。此莊子所以致慨於朝暮賦狙也。又利國之要。尙須鑄錢。如購銅器。設局於武漢之市。大約千錢可得十餘斤之銅器。其根本在此。加白鉛三成。并加以火工之雜費。其利害得失在此。如千錢所購之銅器。自廢改成。以雍正康熙

錢式爲定。仍可得千錢。而贏數十錢。或十錢。便爲上利。卽千錢購器。僅能鑄成千錢。尙是中利。千錢購器。鑄成九百八九十錢。亦是小利。利在權操於國。不操於私鑄之奸民。而商民之隱受其利者無窮也。均當勉行。諸君子公商審處。若用蔭雲所用之人。仍無當也。此事若苦心思之。實力行之。楚民可富。富在民不在官。民富乃官富也。若今日之官長。則必以大錢之欺民者爲利。豈知勾本爲利。卽縮本亦爲利哉。吁。此事應商之方伯。方伯與鄂人非言利之人。然。方伯於國計民生之受益處。必毅然行之。但恐我之委託非人。則無如何耳。購銅器之事。少固兄爲之。必得其實。鑄事則望香雪文若思議之。若此計不行。錢必日見其小。民必日見其窮。不可不知其錢貴銀錢。猶其淡顯者耳。速卽周咨博訪。以窮其變。沈思妥議。以折其中。梅村所著極佳。此編成。必敬授諸君子各一部。精而熟之。可爲帝者師矣。然亦視諸公之天分何如。志氣何如。又凡可以利國利民。俗人所疑。而志士所獨任者。不妨集思以益我。凡奇謀至計。總在平實處。如布帛菽粟之類。愈近淺。愈廣大而精微也。又富國之道。總須先從利民著議。乃有根本。乃有歸宿。欺民者詐也。自愚而以之愚人。智者不爲也。剝民自剝其身也。如割肉以充饑。腹未飽而身已殘。仁者不爲也。不可不知。華元付以銀四十。招降札文一道前往矣。此等事亦可備一格。而不可專恃此也。

致厲觀察 十四日

得十一日書。以不能因餉絀而遂不籌兵。可謂知要矣。如奏乞天津防堵黑龍江甲兵千名。則一月後可到沿邊。先添三千人。約計可抽回萬人。輔以馬隊。(指新調天津而言)一千名卽分兩路。尙可戰也。否則只有聽天由命之一策耳。添馬隊則賊氣先怯。而餉不甚多。添步隊過多。則餉必竭。謀鄂之忠。此爲第一。各營節賞。已明見公牘。減省未便。獨於馬隊加增。應請減半給發。如昔年發千錢者。此後改爲五百錢。亦聊厚不爲薄矣。雪琴厚菴之水師餉項。尙可稍欠。雪琴則有江西釐金。且五年六年七年八年之舊。一洗而清也。雪琴處似可暫停。厚菴處只可暫欠。湘

營用度亦太多。均不知籌餉者苦心孤詣也。湖南如餉項不支。則水師四營。除湖南所募。不管外。應查明人數多寡。酌量徑解湖南。仍候弟處咨文。乃行可請。先行查明。援湘各水營人數。及支領餉項數目。先期開單示及。以便行酌咨札。都多所轄。亦有步將。節下餽遺。應請一例停止。免一番應酬也。弟處既不送營官之禮。擬并不收司道節下餽遺食品。以昭畫一。購馬差。應委楊遊擊爲是。督巡捕兼城守者也。容再商之中堂。弟想欲於正項內。扣銀三百兩。另飭特覓民戶良馬十餘匹。交弟蓄養。此件請存記。俟發銀時。告之承辦之人。彼處馬價。到十餘兩。二十餘兩。便是軼羣拔類。其尋常馬羣。概是四兩八錢也。沿途亦須稍稍有費。不過八兩可到鄂。蕭姓應收監嚴訊。其餘皆鱗爪也。我輩用人。豈能保其不作弊。彼自作孽。與我輩何尤。卽聖賢亦不能使此等人之守法奉公也。遇事嚴辦。正見我輩之無心。且可保全。此後許多事體也。已另札委審。其辦案則不拘成樣。其辦罪則一定之局矣。

復貴州荆道韓南溪 四月二十四日

黔中軍務。艱窘異常。閣下屢經靈錯。百折不回。夔鑠是翁。新息候之志事矣。此間征皖諸軍。未能進取。楚豫邊疆。時虞震動。江西贛南。現已肅清。彭建會剿。亦頗得手。其負偶者。惟景鎮一股耳。江浦守賊薛成良。獻城。江南官軍渡江守之。進克浦口。并圍六合。該處與金陵唇喉。賊所必爭。陳逆率衆往援。勢頗狼狽。皖北捻賊。勝帥專以招撫爲事。各股仍復擁衆自衛。所部并未盡薙髮也。石逆陷榔桂後。乘間躡永州屬邑。殆徧浸。且及於祁陽新寧。劉印渠諸公。遇殪之。此賊結黨蓄謀。志圖鄂蜀。恐急切必難盪滌也。

致童子木檢討 四月二十五日

林翼聞閣下之志氣於渭春。已二年矣。揣摩思擬。蓋當世之豪傑。春間以大名疏請於朝。得命報可。楚人歡忭。各

私爲慶。朝命催促入對。由鄂由秦。其道奚從。李申甫從軍撫州。過邾城時。談兩日夜。知公以家爲累。林翼竊謂不然。盜賊滿天下。近人之所知也。而所患不盡在盜賊。則近人之所不知也。公亦何以家爲。公爲西甌先生高弟子。抱負奇氣。存遠大志。聞於世俗之情。鄙棄不留於胸次。必慨念時艱。翻然命駕。以盡其所志所學矣。渭春不言公之所居。林翼亦不知公居何地。前寄摺稿於蜀督。未知鈔寄臺端否。盜賊縱橫已十年。欲儉德避難。當學枯寂仙佛。謝絕人間事。而近年賊踪所至。窮僻寺觀。焚掠一空。操是欲安歸哉。及是時二百餘年之恩澤。尙未泯盡。人事之然。當爲愚公之移山。爲精衛之銜石。過是欲少味矣。林翼負罪從戎。念才力之無所樹立。故日夜汲汲。以求於當代之賢豪。公其鑒其愚而憐其誠。不勝至感。軍次邾城。日飲峨眉雪水。西望雲山深處。峩然企思。所期末至。我勞如何。專此敬請台安。不盡馳慕。

致各統帥 四月二十九日

日來屢接南信。軍情甚緊。湘中儲蓄無多。一月後餉必不支。殊深焦灼。議者云。賊攻寶慶。實欲由常澧以窺荆南。此間若不預爲籌畫。一旦有警。倉卒調援。恐難濟事。太湖一軍。前因堅城不能進取。且牽率六千餘人於荆橋。師老餉糜。實爲無益。不若撤太湖諸營。回駐宿松。二郎河分荆橋數營守陳德園。其餘數千。悉令馳赴常澧之間。擇要屯駐。有機可助湘剿賊。事急仍扼險防荆。內固荆圍。外壯湘威。并可屏岳蜀藩。至於防岳一路。有現駐省垣。及新招督標各營守備。已不空虛。東北雖逼近皖氛。安慶之賊。牽於水師。必不能上犯太湖。舒桐之賊。卽能上犯宿松。陳德園馬步。進或不足。守必有餘。况陳逆新敗之餘。未必卽思豕突。羅麻邊境。諒不至遽有警動。轉瞬礮卡告成。防堵亦易爲力。且上巴河大營。足供諸路策應。下游可保無虞。爲今之計。似宜急固荆南門戶。輔以水師。防守江路。俟湘省肅清。再行調回。分途入皖。方爲妥善。所議如此。是否可行。伏冀諸公碩畫老謀。同商可否。都公處改用步軍。忠心謀國。

心憂大局。可否預籌。務期策出萬全。至切至要。

致會滌帥楊厚菴都直夫彭雪琴 五月初五日

頃得湖南探報。另錄奉上。寶慶爲資水之要。可由益陽出林子口。常德爲沅水之要。河澚船料如山積。賊得沅水要津。則據洞庭之上游。又由武岡。則已接近秀山酉陽。志在犯蜀。蜀中兵力。恐不足以當此鉅賊。且恐忠涪夔之險要。爲賊所得。則又據長江之上游。憂憤實深。籌思無策。應請隨機指示。以爲遵守。再沅資之間。可否再乞酌撥水師一二營。均應由湖北發餉。較之防於岳州。尤爲扼要。左光培甫經調往荊州太平口。曾紹霖前已調往荊江腦。合併附聞。

復平江何達夫 初五日

得書敬悉。龍臣以濟時材佐戎東下。方冀從容贊畫。悉掃樓槍。一展其胸中抱負。乃變起非常。全軍覆沒。元戎參佐文武四百餘員。同歸於盡。迪庵篠石温甫浣溪四人而外。均不屍還。而龍臣忠骸。尤一再求之不獲。念之每爲淚下。顏常山竟爲齏粉。史閣部僅有衣冠。丈夫報國。生且不愛。安惜遺蛻。所難爲情者。獨生存者耳。然清風亮節。顯揚甚大。庭訓益昭。固無煩以尋常慰藉之詞進也。其嗣子尙稚齒。遺腹女雛髮未燥。薄賻千兩。囑子山湘舫轉交。均其教養。婚嫁之資。諒已妥爲位置。閣下爲大宗起見。欲爲其殤子立後。親支中果有昭穆相當者。事屬可行。或再嗣一姪。亦足以廣其後。然此閣下家事。妥酌行之可也。遺稿乃其生平精血所在。自應壽世。顧鄙人道卑德薄。軍興以來。間關戎馬。筆硯俱荒。何足傳龍臣承囑傳贊誌銘諸事。不敢輕諾也。竊有志焉。能脫稿當爲另寄。湘省軍事甚緊。鄂蜀皆唇齒相依。水陸馳援。尙不知有濟否。黃州下游。如安慶宿太一帶。皖賊與官軍久持不下。一俟秋間。湘事稍紓。

乃大舉圖皖。知念並聞。

致官秀峯揆帥 五月初六日

連日心憂賊之入蜀。日夜不安。旁皇無措。賊前已分枝竄寶慶武岡矣。近乃舍祁陽而以大股盡竄邵陽新化及武岡。其分陷廣東州縣者。又必陸續而來。既以綴永衡之追師。使湘人疑畏而不得并力於寶武。計亦狡矣。查資水發源於武岡。夏漲可由安化益陽。分犯岳常澧。則皆舟楫萃蒼之所。又聞賊蹤已至洪江。則踞沅水之上流。河澗船料堆積如山。賊得辰州常德。必造船礮。以瞰洞庭。而洞庭之險必失。然此猶近患也。且料賊勢必不如此。卽如此以湖北湖南之力。尙可掃除一二。卽不然。禁遏之使不能東下。其禍亦輕也。愚見賊必以一二枝犯常德澧州施南以窺夔。以三四枝入辰州北河。分出永順。以窺酉陽秀山。而入涪州。則大江之險必失。夫江之險失。則湖北必無安枕之日。此乃異常之大變。賊計果逞。必於近一年內閉關不出。自謀巢穴。一年之後。乃圖四逞。十年二十年之內。鄂不得安。而關中亦必危矣。古今謀吳楚。必爭上游。蓋取高屋建瓴之勢。千里江陵。一日可至。如王濬楊素之造舟於蜀是也。又如秦之破楚。必先取巴蜀。方舟而下。以出捍關是也。賊之志在此。鄂之所患。亦獨此爲大耳。湖南之辰永等府。前面亦無攔阻。後路追。是送賊入蜀也。南撫固無此意。而將帥之力不能戰者。必且以入蜀爲幸事。謂不欲以鄰國爲壑。特大言耳。中堂昨日賜函。欲以水師守三峽之險。此湖北切要之大政。亦老成忠藎之遠謀。惟水師守險。自上剿下。則事半而功倍。自下防上。則勢逆而力勞。何也。盛漲之時。水師泊於依岸之處。而中流仍不可制。蜀中產大木。設以巨筏橫撞。火船載薪乘風浪。夏漲以圖我。則固可危。又兩岸須陸師。予有依賴之勢。楚師守水。安得同心協力之蜀師。以保陸路。又遣將出境。譬如遣女歸人。其家自有翁姑。不能事事歸我主張。設遇不知兵情之主帥。則調撥乖方。如安徽焦湖之失。齎寇兵而張賊勢。鈞係可慮之事也。且縱能守於一時。不能保日久之不懈。卽使賊不入

鄂不能使其不害蜀與秦。況賊入蜀。則國家歲少二百萬之入款。而又歲增四百萬之出款。兵興已十年矣。何堪再煩聖主之焦念哉。卽以鄂之一省而論。東防吳而西防蜀。分兵則兵力單。添知則餉力絀。且蜀之鹽斤百貨釐稅。亦軍餉所關也。蜀之不利。鄂庸獨利乎。是必應代蜀爲謀。已無疑義矣。林翼之志如精衛。而愚如杞人。近日不寐。竊思一策。敢獻其愚。惟乞中堂採擇施行。江西現無多賊。景德鎮不過萬人。嬰堅壘而不出。石逆之入蜀者。至少亦必十萬廿萬人。若請朝命。以李定泰守饒州。饒廷選守撫州。彭玉麟守九江。卽異日金陵大股。因飢分竄上游。金陵兵多。尙可回剿。其禍猶小。湖南追兵入蜀。將無統一。湖南有鄰省遠隔。鞭長莫及之勢。蜀督有主客相形。呼應不靈之苦。查現在江西之兵。與湖南之兵。半係曾滌帥舊部。若密奏請旨。訪曾滌帥酌帶江西湖北湖南四川水陸精銳將備。由鄂馳入蜀中。限五十日可到。只須坐鎮夔州。而蜀中士風民風。已隱然有鼓舞奮興之勢。庶由鄂入夔。可繞在賊之前面。由湘入蜀。則反出於賊之後路矣。石逆願避滌帥之兵。去年滌帥欲到浙江。而石逆入閩。滌帥欲詣閩。而石逆入粵東。此亦有趨而避之之隱情矣。一也。滌帥創造水師。水師將備。尤能得情。欲保蜀之不失。亦非於水師得人不可。二也。蜀中財賦。可以自贍。以滌帥前往。而兼總督。則士民輸將。爭先恐後。不至卽虞餉竭。致呼救於司農。以增主上之憂。三也。滌帥忠實。久在聖明賞鑒之中。其事上信友。全憑一誠。卽如中堂推赤心相待。滌帥之感激非常。并無絲毫意氣。可見其必能成功。且此奏爲大局起見。中朝必見採納。四也。四川新督。外強中乾。色厲內荏。於軍務尤不相宜。其調蜀而又來京者。嫌於英夷之欲撤其人。而實則知其不可用也。且聖意必不令往蜀。前次派往粵東。雅步從容。無心國事。此番到蜀。貽害必多。有公署任水陸軍務。亦不相合。必與外省情形。格關不通。以滌帥督師。則石逆必不能逞志。保全大局。五也。金陵之賊。必可漸飢。皖北之賊。鄂人任之。惟捻匪之禍甚大。招降之禍。必有奇變。滌帥欲請馬隊。意固注於兩淮。然兩淮之勢。尙不如長江勢力之大。且中朝尙有人能剿此賊。西蜀之富。五倍於兩淮。十倍於江西。二十倍於湖北。失蜀則急切無人能了此賊。中朝亦未必卽動禁旅。是失蜀則禍大。保蜀則福大。六也。

藩帥若得蜀中兼署總督。軍務緊急。必能不請外餉。軍務平定。必能每歲協濟京餉二百餘萬。此可於奏中切實聲明。必能保其不誤。七也。以人事君。大德也。保誠篤之臣爲國家之益。大功也。薦賢不必受賞。隱德必及子孫。八也。惟是正摺中。或用三銜雙銜專銜夾片。或用清字專銜。另摺以實情密陳。力請代辦總督。并申明該侍郎本年五月。現已服滿。且須聲明必有地方之責。則餉精不匱。州縣聽令。乃於軍務有益。中堂爲國宰輔。爲柱石臣。此等大政。非中堂不能進言。非中堂不敢進言。林翼幼年。卽見外省督撫。惟陶文毅林文忠與祁竹軒盧厚山先生之心術德量。與中堂心術德量同。又林翼幼年。因見陶文毅。請其密保林文忠伊莘農先生作兩江替人。文毅深以爲然。事關大局安危。及早補救。實有大功於國家。卽一時未蒙採納。亦不失爲忠愛之言。如竟兪允。則舉一人而一省受福。天下受福矣。或疑賊必全竄江西。江西必不支。夫江西不支。無礙於鄂。亦無礙於天下。四川不支。則楚與秦均不安矣。兩利兩害。擇其輕重。惟中堂密酌。林翼人微言輕。而救蜀救鄂。舍此則必無良法。如蒙採納一二。卽密傳澹村蕙生及同城大員。公同密商。擬稿須囑之蕙生。精心結撰。將利害得失之故。明白曉暢。尤以必得總督爲要著。切囑其勿草草也。專此密陳。敬請採擇酌度。

致各帥 五月初八日

據潛山葉令稟稱。該縣城距太湖八十里。其路一經黃泥港。一經小池驛。兩處距潛太各四千里。黃泥港有馬隊可截。欲截小池驛一路。似宜駐兵於該處之西北方高橫嶺外。烏株嶺馬尾堰一帶。其地近小池驛二十餘里。有險可據。懇請預先派弁探勘地勢。相機而行等情。前來。林翼查如此辦理。能斷太湖之賊糧。否賊糧果斷。援賊必來。能不致因賊援之多而引退否。四眼狗現在滁州。天長來安等處。烏合毛賊約十萬人。加以懷桐潛廬巢。合無爲舒城各路之守賊。約四萬人。賊數不患其多。然亦必先爲之備。該令所言之地。距太湖大營若干里。馬步策應。尙可馳援。

否。又須若干人。乃可駐紮。何營可請奮勇。均請商示。如現在力量可行。固可酌辦。如不可行。則俟西南岳常澧荆宜施事定。秋後全力大舉也。林翼無成見。特此奉商。大約破太湖之法。非以一枝勁旅深入虎穴。斷其糧道。則必無成功。而尤以勁旅二萬人。預先調集於空處。佈作三路。俟賊回援。乃可合剿分剿矣。再常澧辰沅荆宜等處。日形緊急。奈何酌之。

復宜昌釐局鍾雲卿（謙鈞）二十四日

前札所云。原以激厲人才。頃閱來函。具徵竭力奉公至意。黽勉從事。所謂清慎勤者。足下其兼之矣。誠得如兄數十輩。分佈各路。何患庶務不理耶。逆黨全注寶慶。屢挫不衰。而後至者。尙錦延不絕。林翼日夜籌思。賊若竄據常澧巴蜀。乘高瞰下。勢如泰山之溜。力能穿石。鄂省受害必深。昨復撥兵五千。馳赴寶郡。歸李希庵統帶助剿。十九日已啓行矣。

致長沙張燮庵處士（華理）六月初六日

日與果臣游。藉悉吾兄學業志行。超越庸流。時深企慕。林翼新纂左傳通鑑兵事地理諸書。非得博極羣編。精於考據者。詳加校對。竊恐乖舛雜陳。遺譏來者。閣下淹通如貴。與精核如升庵。必能辨別風淮雨之訛。訂安息酉陽之誤。茲特以一書爲介紹。卽祈命駕來鄂。俯賜參訂。俾成善本。是所切禱。

致平江張子衡（秋潭）

閣下負幹濟之才。究心軍事。重以義衛桑梓。倍著賢勞。曷勝欽挹。林翼因軍事負罪而出。客冬臘八。馳駐黃州。此

間辦事需材。特以一紙書爲介紹。卽請束裝來營。共爲將伯之助。仍分別軍務地方。酌量任事。不盡限以軍事也。

復安襄隕荆道毛驥雲

接奉惠函。具悉壹是。小宛增註。有慨乎其言之。當亦詩中應有之義。欲以補鄭箋之所未備耳。大抵猾吏奸胥。剝民膏血。固較桑扈竊脂爲尤甚。此輩行爲。不顧名義。其狡詐百端。足以蔽上官之耳目。而時慮其操術之未工。而險狠殘酷。流毒無窮。爲民不利。如云不克。卽食其肉。而寢處其皮。而貪心猶未有厭。所在皆是。不能盡殺。卽殺之。而前蠹旣去。後蠹又生。惟設法箝制之。去其爪牙。使無橫噬。則亦供奔走之人耳。非虎狼也。襄陽鄖陽胥吏之弊。尤熾。乞與午山香圃。力除此弊。以蘇民困。矜填寡。而平岸獄。使輿情畢達。怨毒全清。求治之道。莫捷於此。州縣親民之官。一吏胥之不能制。卽不免於率獸以食人。尙何能與民分憂耶。啓李兩太守。均能愛民者。惟以時董戒之。嚴飭各屬。加意防閑。是爲至要。棗陽謝開基一犯。仍懇飭各屬留心捕緝。多方密拿。期於必獲也。

復孝感縣文任吾

接來函。藉悉一切。錢漕額賦。業經痛減陋規。而欺隱民情。猶有盜憎主人之意。蚩蚩者何太愚也。惟賢宰徐徐清。理加以詳密。當不至供久缺。使斯民日陷於罪。而不自知。昔子產之禘衣冠。而伍田疇。孰殺之歌。不後於誰嗣。亦愛人以德之事也。張濂卿孝廉。聞其襟期品藻。卓爾不羣。扁試論文。當能供拔真士。弟亦曾奉關聘。欲請設館。舟次編集書史。未審惠然肯來否。

復長陽縣程禮門

接來函。具悉。壹是聞賢宰勵精圖治。丕著循聲。前函非過譽也。親民之官。莫如守令。吾儒讀書筮仕。其初念未嘗不以愛民爲心。迨一入仕途。或爲俗吏所滌染。或爲丁胥我驅使。近習之蔽錮已甚。輿情之疾苦罔聞。而吏治日頹。民生日瘁。此世變所由生也。房今日而急挽狂瀾。當以痛掃書差積弊爲先著。以除莠安良爲中權。至計與保甲勸農桑。時與之講信修好。以泯其雀角鼠牙之釁。皆良吏之後效。而可以漸臻上理者也。昔子游子賤之作宰官。首重得人。是孔子之教人作吏。不過以得人爲本。足下誠以此爲師。必當訪有正士。以爲佐助。可得聞乎。

復霍山縣王竹坪

接奉惠函。具悉。溫甫先生忠骸已獲。而元首尙在賊營。其設法購覓之處。惟仗大才運用機宜。多方開導。或可有濟。至何龍臣伯凝。丁篁村諸君子。其殉節處所。當亦不遠。前遣各隨丁前來認辨。諒經足下諄囑士紳。依地而求。必能勾當。惟彌月之久。尙無消息。心甚懸懸。尙乞加意調停。以期必得。便千秋義魄。歸安扮榆。則足下之爲功於忠魂者。卽其造福無量者也。瑣費清神。不勝感荷激切之至。

復姚桂軒廣文（紹崇）

接展惠翰。深荷注存。荆楚之事。以得人爲上計。治兵有人。治民有人。理財有人。斯本根植。而枝葉自茂。求之未得。我勞如何。客臘三十日抵黃州。復以歲杪。會都直夫將軍於宿松。籌商剿辦。新正五日回營。後路尙須布置耳。鄂中軍餉月需三十餘萬。皆取資於釐金。惟商賈之利稍厚。較之加賦勒捐。稍爲得體。肩挑負販。亦祇無任其偷漏。而不必苛刻錮銖。來示謂行法而得法外之意。此中大有權衡。至於衰旺有時。懼來呵譴。則正無庸豫慮。來抵吾人任事。反己爲先。實收實解。去侵蝕浪用之弊。此心可以質大廷。人之多言。何須介介。其河口張家店花布釐金。另俟總局

酌復。已將原函寄局矣。

致林鏡颿聽孫昆季

黔中一別。靡日不思。比以一紙書。由京奉寄。而王鴻臚笑山同年。仍發還黔中。不獲致諸左右。其時文忠尙在閩。而閣下尙待庭闈也。嗣於元年。在黎平任所。敬奉輓章。交臨桂縣張凱嵩號月卿者。轉寄慶遠鄭年伯處。聯語有千古英雄皆墮淚。四方婦孺盡知名之句。日久忘其全體。不能記憶。未知到否。嗣後荷戟入楚。在走於鼎澧岳鄂。潯陽河口。蘄黃之間。挫敗飢潰。憂患日深。音驛不時。中心如結。繼晤冰如觀察。屢詢近狀。儉德辭榮。光輝日闕。在高賢之自處則善矣。林翼不揣冒昧。謹以大名入告。不肖鄙陋。何堪仰慕高賢。惟念閣下綜理精密。如陶士行忠勤憂國。如李伯紀斯人不出。如蒼生何。欲假手以活百性。以留七聖之恩澤於斯世。以繼文忠之德之志。而復覩前賢之規範。公欲獨善。豈能忽然忘情耶。况盜賊充斥之天下。與叛藩叛國不同。隱居求志。亦當料地勢。識時務也。林翼以去秋七月。居憂回里。涕泣陳情。未荷准行。方擬再四。瀆請。適值三河奇變。楚軍全覆。聞難推諉。隱惡尤甚。出山非禮。在山非義。出則於事無補。不出亦於心不安也。客冬臘八。馳入黃州軍營。竊計必全軍然後保楚。必保楚然後能謀吳。惟是吏治不修。民生日瘁。理財不善。飢潰堪虞。日夜講求用人行政之大端。而未能盡當。尙冀惠然辱教。不勝感激。延企之至。奏稿呈閱。敬候台安。不盡欲言。

復鄖陽府李午山

閣下勤宣新政。於各屬吏治民情。不憚博訪周諮。深知情僞。大抵爲政在於得人。興利必先除弊。聞鄖襄一帶。吏胥之肆毒。甚於虎狼。此輩積病太深。非痛下鍼砭。不能除其沈痼。而民間之顛連疾苦。亦斷不能呼號畢達。况以有

盡之脂膏。其何堪。此日朶月削之。有加無已耶。閣下念切愛民。務乞嚴飭各屬。加意訪查。設法箝制。求治之效。莫捷於此。其鄉間壞種。亦須鋤而去之。使無滋蔓。去其害馬者。以安駟良。於是而興保甲。勸農桑。儆游惰之風。戒奢侈之習。物力不窮。凶荒有備。遂使犬吠無驚。如岑君之守魏郡。桑枝麥穗。如張公之爲政漁陽。斯則賢太守之所居民樂。所去民思者。其政績循聲。爲大莫與京也。下游軍事。多禮堂與唐道鮑鎮。已進太湖之楓香鋪。蔣道駐營荊橋。余參將防守英山。後路尙須布置。內度軍情。外審賊勢。非三路進兵。不能得力也。

復蔣之純

接三十日來函。所論太湖城賊。必斷其東南門接濟。乃可徐圖收復。又必先克太湖。而後可進攻石牌。皆一定不移之理。其西北門河水尙涸。惟地道非急切能成。轉瞬春漲。瀾漫窪下之區。斷難開挖。必擇地勢高處。方能得力。聞天堂之賊。已至英霍界嶺。此路僅余參將四營耳。仍須靜以待動。緊防援賊爲是。來示謂諸營一氣卷舒。仰見大才調濟之處。師克在和。鄙懷之所深以爲慰者也。

致秦撫曾卓如望顏

久不致書左右。始以居喪未葬。繼以軍事。負罪而出。金革匆匆。殊疎箋候。每念德量。中心蘊結。何伯凝司馬落落奇才。我老前輩大人宏獎。僞異說士如雲。八月十五日到鄂。林翼先於八月十三日回籍。始終不曾一面。而竟以林翼之一言而死。且攜其子同殉於三河。是役也。以數百戰之精銳。屢勝不少挫之師。全軍覆於一旦。同時與難多傑者。而伯凝父子。日營甫數日。卽以捐軀。鬼物或忌才而吝其成功。而林翼則負此良友矣。雖加等請卹。不足以慰忠魂。而大有負於我公甄拔人才之雅念。心用愀然。楚地吏才將才太少。三河桐城之債事。實亡五千人。養生弔死。撫

舊募新。頓益三十餘萬兩之費。而按月之水陸援江。援皖者。又三十餘萬兩。林翼臘月到鄂。已虧九十餘萬兩。近月將百餘萬兩矣。到黃州月餘日矣。極力振作。外實如前。而中情非昔。則以人才殄瘁。志氣不如昔年也。軍士傷尙可完。大將亡不可贖。其皖軍之謂乎。念滌帥以忠義倡率。近三四年。精銳殆盡。如林翼等。獨能自強耶。待楚軍之尙存。食公德者不少。秦雲覆冒。自陝而西。澤及江漢。所施先至於南國。其感激何如耶。春夏六個月。月餉。敬求我公如數如期委解。如林翼得藉手而稍有補救。則昔年我公之厚施於鄰。隆貺未墜。前事可完。儻春夏六個月之精力。不能復振。或竟無可成。則利鈍不可逆觀。虛糜亦屬赧顏。不復再以鄙言瀆聽矣。抑人亦有言曰。人病舍其田而芸人之田。鄂之陸師入皖者二萬餘人。水師入皖。與水陸之代守湖口彭澤者。又二萬餘人。其駐黃州者六千人耳。曾滌帥援江之師。辦餉三萬。鄂之自謀。朝不及夕。而滌公忠蕙。力謀楚疆。又覺不能相負。甫田之務廣而荒。微生高之乞鄰。而與人。其謂我矣。林翼獨曰。禦盜不僅於戶庭之外。必於通衢大邑。預爲之防。若待盜至房闔之際。恐無及矣。鈞見以爲何如。

復會事恆貞幹茂才 己未六月十九日

鄂事孔急。任杖需材。得閣下爲之贊襄軍務。當有把握。前因令兄相招。不便塾留。抵鎮後小住數日。卽祈命駕來鄂。相助爲理也。江右游魂。沅丈及諸公協力攻剿。翦滅不難。湘氛雖熾。希庵印渠已後先抵寶。諒能力解重圍。聞捻首張隆復反招降之事。林翼早知受害必深。今果不出所料矣。滌丈現奉寄諭。防堵夔州。惟冀到蜀後。再有後命。則有兵有權。何患事之不濟。西南安危。繫此一舉。想中朝必有定見也。承示新招鄂軍。不必刻選。愚謂立法宜嚴。用法宜寬。顯以示之紀律。隱以激其忠良。庶幾畏威懷德。可成節制之師。若先寬後嚴。竊恐始習疲玩。終生怨尤。軍政必難整飭。高明以爲何如。

復荊州府唐蔭雲 己未五月二十八日

隄務加工省費。堅實求成。自須監督得人。庶能一律鞏固。國帑無虛糜之用。民居無蕩析之虞。水姓順而地利可開。田賦充而軍餉亦足。安上安下。禹功之所以遠也。錢漕統征統解。更可早完。亦祇求年清年款。當函寄藩臺糧道。卽效長沙之開徵。全完亦無不可。岳令專以催科爲事。而不能與民分憂。尙祈嚴爲重戒。州縣親民之官。政平訟理。民懷其德。自無不樂。以是區區者。爲急公奉上之心。撫字不明。誅求亦徒苦矣。來示謂批提各案。限三月完結。足使牽連無辜。不至久受拖累。而雷厲風行。卽以殺人爲生人之意。其傅大鴻等。玩抗錢漕。欲解省懲治者。不如解營。更爲直捷。馬廠以速成爲是。府監府倉。修葺亦爲急著。其義學之培植。書院之整理。育嬰堂之核實支銷。皆有益於地方。風教惟賢太守盡力維持。漸臻上理。異日德政循聲。不減昔之寇君耿君也。

復都直夫將軍

承示西林布之三營。探防援賊。照應後路轉輸。自以不遷動爲是。賊犯楚邊。必是大股。必非一路。唐道回援。亦不過防守陳德圍與兩靳耳。仍無補於羅麻。如果羅麻警急。則舒之二三百人。李之數千人。恐尙須撥援。故不能不留以有待。且後路空虛。亦非前敵之利。來示謂前敵情形。須稍緩時日。再作計議。具徵我公沈機觀變。通籌全局之至意。蓋專顧一路。則他路告警。必致調撥維艱。數日之後。賊情必有動靜。我公洞燭機宜。前函奉商各路準備之策。敬乞預籌賜示。

復都將軍

查六安霍山之賊。窺伺楚邊者。大略可觀。現探鍾逆方逆陳逆。率大股乘虛上犯麻城黃安兩蘄羅田。尙慮分途告警。後路未可全空。新到西丹。本應令其前同大隊操練膽識。弟之前此暫留。不過準備撥援之意。其應如何調撥之處。仍請尊處札調。至保慶巴隆阿兩營。如舒六兄十餘日移營到荆橋。與應歸其調遣。如未能到防。則仍請老兄斟酌札飭。又馬隊之在王家畝五里墩者。兩路聯絡。互爲策應。扼要爭奇。斟酌至當。自以不輕動爲是。但上游如果警急。總祈酌量簡派精銳馬隊。方可得手。如不警急。則弟處必不敢紛紛乞請也。至蔣道之軍。欲責成多禮堂兄。督會兩面照應。惟念禮堂兄忠勇冠軍。現在太湖獨當一面。且各營均舊隸將軍麾下。聞將軍之號令。札調必無不遵也。改隸他營。恐心悅誠服之處。或不如在將軍麾下矣。

復荆宜施道嚴渭春

涪州忠州一路。安設礮船。出之川督。則爲固圉庇民。保全大局之至計。若以他人越俎而代。不知者且色然駭矣。來示謂無船礮可慮。有船礮而無將領。尤可慮。是誠知言。荆宜一帶。已調樊國泰水師。以資游緝。施南無養廉。可於藩臺請領。必使費用處沛然有餘。而後能盡力於公事。昔人之優給船價。與忠信重祿之旨相合。蓋藉以免其瞻前顧後之思耳。來示謂夷務辦法。旣不誤餉。且存國體。第恐依違遷就。亦不過稍緩須臾。亂之初生。已示之弱。此後支節。殆難思議。然目前之計。旣不能行。而薛公以三寸之舌。展轉而求全。其用心亦良苦矣。

致兩司 六月二十五日

宜昌以陳守洪鍾委署爲是。安常處順。循分供職。必可不負也。佐雜必不能不循資格。不循資格。則司中吏胥高下其手。而撞騙萬端。司中於循資序補挨委之餘。只須訪拔其聲名之尤美。參劾其貪鄙之太甚者。便可整飭。惟州

縣有民社之寄。斷不可僅守資格。要缺必須遴員。差委例得酌量。如謂林翼等有私。林翼願執其咎而不敢辭。林翼昔年從政。見天下之督撫藩臬。一差一缺。無一不滿例而行。卽無一不挾私以徇。且瘠苦煩難。人之所棄者。則尙有輪補輪委之人。而肥美滑甘。則皆捷足者所得。懸一例而預謀於例先。更變一說以圓通於例外。例實足以快其私。而不足以杜一切之弊也。蓋輪補酌補。輪委酌委。本有兩端之可趨可避。而顛倒之心。上下之手。則仍在督撫藩臬耳。昔在黔湘。見藩臬某某。開口便言例。如某公在湖南。無一事不照例。實則無一事真照例。凡京官有所囑託。或吏有所賄求。如鼓答桴。其應如響。京信朝至。司牌夕懸。苞苴夜行。委札晨發。甚有不出省門而獲盜十名。或數十名。專意請託。而記功十次。且數十次者矣。故曰循例乃適足以快其私。故林翼願破格而以一人執其咎也。

復廣濟縣方菊人大湜 二十八日

前者稱疾告退。經林翼切實批復。頃接來函。仍申前請。何固執之已甚耶。吾人以身許國。卽難進退任情。若因勇丁滋事。拂然請去。情固不可。事亦難行。吾輩之委質。如女子之結褵。從一而終。非有大故。不得不委曲求全也。假如女子而忽見鄉隣有鬥。登我堂而燬我屋。拂逆乍來。憤鬱不釋。拂然曰。我不耐此。仍歸吾娘家也。或曰。我被橫逆。不謀大歸。人將侮予矣。此豈情事之當然哉。吾兄胸吞雲夢。芥蒂自能隨時冰釋。所請斷難曲從。至於貞右勇丁。自應確究嚴辦。以肅軍政也。

致莊蕙生方伯 七月初一日

薇垣功過裕。參以臆說。已請西民兄繕稿。遲卽奉復。一得之愚。要無補於遠猷耳。希菴欲東。意在先保湘鄉。林翼初議自北而南。爲大局謀。爲湘謀。均應如是。何意千條萬縷。密囑諄諄。臆度之不能。遙制之不可。古人將帥必在行

間。蓋非獨爲均勞逸。共甘苦起見。勢必親歷其境。呼應乃靈。商量乃妥也。得廿六日顓門先生手函。感服揆帥。誠懼誠忤。從此兩省可和心歸命矣。以德感人。其效如此。治世尙可循資格。亂時應變。非專精壹志。訪舉鑒別。則必不能補救於一時。此不過嫌怨二字。吾輩萬不得免耳。須知升沈禍福。有定命。進退行止。有定時。充其量。不過譏謗沸騰。放逐不用已耳。何足以動吾之毫末哉。尊諭言在閩在楚。所見鈞軸均善。知惟小有左袒者。偶不免耳。左袒之喻。蓋卽公之隱以爲教矣。循省再四。跡似而心非。辦事全在用人。用人全在破格。訪問之不確。鑒別之不精。則心中惶恐。負疚滋甚。若自問此心。則實諸鬼神而無疑也。惟是公意良厚。應服膺不失。有則改之。無則加勉。以答盛懷。張建基委江陵。劉申甫委東湖。均可得力。陳拾珊不必來營。乞卽諭止。其人之謹慎不待告。其謹慎之外。又非口舌所能啓牖者矣。吏事須習而後成。民之情僞。以閱歷而後知。非見面時所能告訴矣。

致郭筠仙太史 初三日

得五月六日手書。前捷奇助冠世。戰而後撫。撫亦稍易。台邸以一身繫天下安危。豈惟四海蒼生之是賴。實我成廟所默相也。近事如何。尙乞明示。所乞黑龍江馬隊。此時必恐卽難抽撥。皖楚之重。不如天津之要也。秋冬撤防之時。尙乞力懇台邸。以精甲兵一千。助討皖賊。湖北愛惜將士馬隊。未曾使之危地。不比勝帥之驕愎狂愚。輕賤馬隊也。勝帥每戰必敗。每敗必以捷聞。數千馬隊。或溺於水。或辱於賊。傷哉。

致皖撫翁祖庚 初七日

壽春爲古名城重鎮。爭淮者守此則得淮。并可得江。應獻愚意。開列於後。麾下應專以守壽春爲主。守備以儲米糧軍火爲先。目下兵力不能主戰。不如於奏餉到時。量行撤退。去怯留強。去巧留拙。去僞留誠。來約萬人。可留四五

千人。須知應去之人。不去則苦餉竭。不能戰。并不能守。不如速去。尙易養。尙可易守也。盧袁實無足取。不如給咨從豫遣回。其類此者。准此効勝。既不能則不如推袁。一推再推。至於三四推。深心妙用。賢明自有權度。餉之來路。須預防爲人所劫。協餉請十萬。難得一萬。鄙意欲公多請十萬。而又欲公速撤兵。以四五千爲度。馬隊尙有若干。却不可撤。前解一萬。并川餉一萬。計日已到。尙有應解一萬。張寅恭等回營。卽續解也。如需軍火軍械馬槍弓箭之類。亦應酌量有無。以供急需。湘事甚迫切。援軍萬餘人。尙未得手。鼎澧岳荆宜均告警。老伯中堂請退再四。竟荷恩允。缺放黃縣相公。老伯尙居春明。壽春好守。公且毋欲急戰。瓜熟自落。殆必待時。近日情狀。尙乞詳示。

致陳秋門前輩 初七日

奉到大咨。并荷手諭。省垣釐局。已具條理。感何言狀。老前輩大人德量冠時。鄉里矜式。乃以時值艱危。養兵無術。溷大君子以市塵繙算之鄙事。在公只以保民贍軍爲心。故屈意曲成而不悔。在林翼則殊非敬禮長者之義。負罪懷慚。心以爲愧。惟是取利於人。非得碩望耆艾重臣之一言。則勿信勿從。刻下懷胎初成。成效尙待一二月以後。如蒙俯允。暫俟一二月。更荷成全之美。非敢固請。實所心企。尙祈諒之。并求於此一月內。慎選正士。則事不勞而功可久大。再林翼於雪堂之左。構寶善堂七楹。其前又七楹。意欲爲事賢友仁之居。而提挈無人。衡鑒或誤。乞請老前輩爲寶善堂主人。如書院師長之禮。特不課八股八韻耳。堂成於七月望後。屆期再專弁來迎。林翼舉賢自代。非官職之不耐。實禮教之自傷。至於金革之事。萬無可諉。昔年以各營付迪庵。迪庵殉國。不忍愬然。且鄂居天下之中。非四路擴清。八表安晏。鄂固不可一日無兵備也。愚誠惘惘。尙祈明鑒。

致嚴渭春廉訪 十二日

諸葛大名。經聖人改定而名益彰。恩寵之渥。近時無二。所願益厲前猷。克勤遠略。以答天心。而副名實。滌帥入蜀之議。以爲是者半。以爲非者半。張小浦乞留矣。湖南旣捷。荆益皆响。自樂以爲萬世不拔之基也。後命何如。未可知也。如聖意堅定。竟如前旨。則保蜀境以保西南。兼實京餉。其功助所及。殆可爲國家謀三五十年太平之大政。其德器根基。不同流俗。固近年難得之好手也。中樞之大人。見不及此。只看聖心之獨斷何如耳。此事亦關數省之福命。不可強也。若以刻下兵事而論。則張兩翼以蔽江表。豈非我所私願。前議爲天下之大局。欲治蜀以保全秦晉荆襄也。非僅畏石達開而不得不藉此措詞耳。

復島口釐局但少村 十五日

接奉惠函。藉悉壹是。鄂中軍餉。以釐金爲大宗。能除中飽。杜偷漏。設法勾稽。具見權衡至當。茶釐辦有起色。甚以爲慰。洋藥無行。難免隱瞞之弊。而非大市鎮亦難一一舉行。來示責成各局核收。以節糜費。甚爲妥洽。其通山之包茶釐金。與業戶釐金。已抽者不便重抽。未繳者必須追繳。已函致武穴釐局。查核施行。又聞咸寧之丁泗橋門市。因六縣祇此舉行。故該地商民。尙屬觀望。可與總局商辦如何通行。是爲至要。

復鮑春霆總鎮 二十日

寶慶援軍之捷。非希庵之力不至此。蓋其用兵出奇。得間而入。故能所到必破。將在謀不盡在勇。希庵其兼之矣。吾弟久歷行間。知於戰勝攻取之道。具有心得。以靜制動。以預應猝。以我料敵。以經行權。讀兵書而通其變。則知進知退。能正能奇。雖古來名將。不是過矣。湘事畢。必當力謀皖事。儲韜略。勤訓練。明恥教戰。以立他日功名。則林翼之所爲刮目以相看者耳。

致左季丈 二十三日

十一日疏稿。讓美揚善。學進而識量益宏。此時此世。惟讓美可以免禍。不僅道理應如是。分量應如是也。揆帥十五日。自發一疏。錄希稿而連賤名。以我視之。猶嫌蛇足。少此疏。不更高矣美矣乎。希庵無續報。未卜何如。幸示大略。希破圍後。頗刻論人才。立功之時。不應及此。以其時考之。則近乎新婦燹火之躁。以其事考之。亦非曹武惠江南勾當公事之識量也。丈異日處功名之際。亦當思念鄙言。

致嚴渭春廉訪

二十三日得二十二日四號信。奉恩諭來京展覲。天顏有喜。嘉謨入告。感慰何如。九月闈後。再定行期。其時澹公當自北而南。仍歸於鄂。則公事更好商量。但未審老兄近年行囊。足供京國之資否。如公事交付爲難。私計支絀太甚。則片奏聲明。軍務亦甚便也。計程須三月之久。乃可往返。只此三月。我意猶嫌誤矣。公豈可久離者哉。公握篆後。卽專意延見。此治國之先務。眼光精力。宜注重於此。公知注重於此。乃識時務之俊傑矣。趙公晏清。固佳士也。州縣傳單。尙無需索。供應之語。然已付之滌帥矣。愛人以德。足見高誼。近人不講友誼久矣。良用慨然。竊見近十年二十年。有子姪在側。而其父其叔。乃以字號呼之。風俗之薄至此。何況古人直諒之義哉。諸葛大名。已如詳咨部矣。推位讓賢。滌公以爲大智。且謬曰。忠孝仁讓。四者皆備矣。初八子刻。驛遞。十四日必到。計程應早批回。然至今未見也。澹公徘徊邯鄲道上。望國門而不敢入。畏黔驢而苦夜郎之行。播州非人所居。固人情也。到保定當接閱疏稿。則晝接情詞。可以坦然自任鄂事矣。此舉先天不違。久在意中。惜救罪稍遲於我。仍歎歎耳。救此良友。自念頗誠。爲鄂民謀。固亦忠矣。皖事殆不可支。翁在壽春。勝在蔣壩。此君不去。皖難未已。計一省髮捻。不下三四十萬人。而無一旅之兵。

可恃無一日之餉可籌。中朝若以爲可有可無。則不如棄之。若猶不忍舍。當改弦而更張之矣。

致宜昌陳石山 二十九日

鶴峯州雷訓導品學純篤。而親老家貧。甚爲可念。前令主鶴峯長陽兩書院講席。兼派鹽課局務。應請照舊辦理。并囑張令送給關聘。爲祝此孝子名儒。祈轉飭所在善視之。

致曾滌生星使 二十九日

得雪芹書。知大纛已指石鍾。風月之美。友朋之盛。令人神往。季洪先生忠義勃發。不可遏抑。畢竟爲牧令爲穩守。約施博。有成跡之可尋。鄙人去鄂。潛村乃主持善類之人。揆帥此次。亦必刮目以待國士也。俟到雪堂。可暢言之。而取決於明公之一言。何時可從石鐘詣雪堂。大約十日留。尙嫌未暢也。次青同來。未頗苦念之。翁祖庚守壽春。求援頗切。勝在蔣壩。殘敗不復能軍。山東人向呼此公爲敗保。蓋其治軍也。如鄭公子突。所謂勝不相讓。敗不相救。輕而不整。貧而無親者矣。翁祖庚屢以微詞彈之。天意鑑其隱矣。祖庚五六次言風痺。此無益於己。何不及早推袁。尙可望其稍漸成功。一推再推三推。必報可矣。曾舉亞夫之決。以示之。據私函頗謂然矣。

致錢萍石典試 八月初一日

初一日漢陽令專遞二十六日手書。敬承一切。寶慶上月解圍後。十六日夜間。盡數南竄。服嶺以南。殆其旰食。而長沙尤苦邊防之未已也。鄂蜀上游。暫緩須臾。滌帥旣以宜昌駐兵自陳。蓋恐爲主人翁所噴也。刻下情形。荆宜鼎沸。尙無他虞。不便以有用之兵。置之宜昌無用之地。擬商之滌帥。揆帥卽合力謀皖。皖中無一寸乾淨土。無尺寸完

膚。勝帥滿腔忌刻。其志欲統天下之人。其才則實不能統一人。其在皖中。每戰必敗。每敗必以捷聞。故中朝尚催其進兵。而不知其創敗之實際。卽再遲三五年。亦必無成功也。翁祖庚仁而不武。退壽州後。賊亦跟蹤進犯。鑪橋。壽州易守。三面阻水。一面拒賊。如得鄉民之實任戰事。一二人。亦尚可固守不失。儻能及時汰弱兵。去浮費。稍米穀。貯軍火。姑作不蜚不鳴之人。尚不失爲中策。水道之大綱。以江淮河漢爲最要。正陽爲淮水之中流砥柱。壽州又正陽關之屏藩也。翁祖庚初退壽州之時。卽囑其堅守不戰。蟄伏忍耐以待時。祖庚已心肯之。陸續濟以軍餉火藥。或猶可支也。若以弱兵餽卒。強與悍賊挑戰。則必敗也。鄂之謀皖。不能不竭力引爲己任。蓋臥榻之旁。不容他人鼾睡。戶庭之外。盡是盜賊窟穴。是不謀皖。卽不能保鄂。不待智者而知之矣。林翼等積年戎帳。精力已頹。若再遲延一二年。英華銷歇。卽再欲鞭策。而亦無能爲役。匪僅林翼也。如楊厚庵年只三十八歲。李希庵年三十七歲。然而頭童齒豁。狀如五六十歲老翁。又如曾滌公年甫五十。長於林翼一二歲。其精力殆兼一人。近亦稍稍衰矣。前此皖事之決裂。與鄂中謀皖之遷延。則以地勢賊勢之未審也。以數千人深入。顧此失彼。旋起旋踣。官軍注意於前。賊勢包襲其後。枝枝節節。迄無成功。自非大力包舉。一氣呵成。不可擬以四五萬人分四路進搗。四五萬人專指陸師。水師尚不在其內。湖北竭目力耳心力。旣已月謀三十萬之餉。若得秦晉蜀三省忠心效力。專濟滌帥。月各三萬兩。則一年之內。皖江南北。必有成效。否則相持十年。亦無進境。且弟等不假兵符。不求專對。所求者於事有濟耳。且不貪金陵之功。只期皖北之安慶廬州巢縣與蕪湖得手。則駐軍二百里之外。而金陵不攻自破。却江表一事。便可小作結束。爲山水雲霞之人。無他求也。天心久欲鄂人東下。前奏讓賢。乃先天而天不違也。有三事歸朝之日。可請質於聖人者。一。勝帥難任事。其人本不知兵。尤不曉事。徒亂人意耳。自降於賊。而美其名曰賊降。蓋其一生本領。以熊文燦爲祖師。而昏懦剛愎。又過之矣。尤乞楚軍不受彼節制。則楚軍或可成功。一。乞部臣堅意主持。嚴催秦晉蜀三省。月助滌公專餉各三萬兩。則滌功可成。鄂力可紓。一。楚軍征皖。不須另假兵符。揆帥寬仁敦大。近時所獨出。實可

遙總兵事。不致我軍掣肘。若易以他人。則不能如此之脗合無間也。又林翼精力已頹。夏令輒不寐。前此舉賢自代。其人誠摯專一。必能盡心力於吏事餉事。初八日出奏。十五日奉硃批另有旨。又准片開。奉旨將原摺暫存本處。澹村八月初三日入對。計近日恩命已在途矣。九月澹村到鄂。即可及時進皖。或疑辭鄂得皖。以皖之翁。現與蔣壩之勝相構也。殊不知鄂可辭。則皖亦可辭。使不辭鄂。則皖乃益不可辭。前摺明羅某治兵。尚非所長。則欲以免夜郎之行也。欲救己罪。則誤於遲。或可稍救良友。使之盡力鄂事。駕輕就熟。以補軍餉之萬一乎。闡後或能在省垣奉謁。或旌節戒途之日。在澆口館次奉謁。引領西望。如飢如渴。賊圍鱸橋。壽州告急。近月兵事。尚難逆覩也。

致莊蕙生方伯 初二日

滌公無赴宜之理。理也勢也。東征須全力赴之。搏免打狗。其用正同。卽令滌公合謀。力亦稍足。而不甚有餘。地勢賊勢。非四五萬精兵。三路四路統將不可。此其時矣。若從此精進不懈。敬慎不驕。而天心倚任。責以成功。嚴諭三省。限以月餉三萬。（秦晉蜀專濟滌公。非爲鄂人乞也。）不出半年。皖北可清。否則十年尚猶有臭。林翼希庵滌帥厚庵。均恐英華銷歇矣。公試深思而博訪之。回明中堂。俟滌帥信到。卽可專奏。蓋賊數不過十餘萬人。得三四路精兵。各統以將深入而不嫌其孤。分枝而不虞其弱。且四路分搗。則鄂之門戶已嚴。亦不煩留邊株守。以無間可入也。都公恐不忍。不令其暫退。以本任爲養病之地。尊酒養牛。亦敬禮忠藎之意。壽州爲正陽關之要。正陽關爲全淮之要。爭天下之大利者。惟以江淮河漢。水道大綱爲第一義。已切致祖庚。求其蟄伏堅忍。不聳不鳴。天下郡治之好守。莫如壽州。荊州襄陽矣。翁公昨已專弁走謁臺端。可詢之。視暇之文。聊寫胸次之所欲言者耳。不料文案糧臺。竟送匠門。加以優獎。文無足異。其自鳴得意。乃下里巴人之結習。弟尤不免。惟自覺不衰颯。不委靡。或者尙可效力。以成一二事耶。不敢不勉。澹村先生初三遞請安摺。則恩命卽在途矣。若疑辭鄂得皖。鄂尙辭則天下之物無不辭矣。同人

之和。揆帥之德。天下疆吏。無此遭逢。且兵精吏飭。蒸蒸日上。天下巡撫之安穩。豈能更有第二哉。鄙人之意。皖北定則駐營於金陵二百里外。而金陵不攻自破。卽至愚極陋如林翼等。當小作收束。大海回風。生紫瀾矣。前作祝嘏文。亦自道其梗概。無欺詞也。

復陳惺軒 十二日

所論王君志行踔躒。超絕等倫。其武節剛方。動用安重。殆昔人所謂條侯穰苴之倫。不能過是者。林翼聞而慕之。而亟思一見以爲快。世俗波靡。所賴有二三誠篤君子。相與力挽狂瀾。天性之清正。不必以文學相掩。自駒空谷。介紹無從。欲以札調來營。面談一切。仍請閣下飭紀綱之僕。代致飢渴之誠。幸勿金玉其音。不勝翹企之至。

復富池鰲局鄧曦亭 十二日

書來以初試羹湯。備增持重。竊謂食物有至味。嗜好不必與人殊。雖辛苦酸鹹。四時互易。亦在調劑之各得其宜。治國如烹鮮。以吾弟之曲體人情。自無難操刀一割也。舊章可循則循之。按部就班。有功無過。局勇宜革。則革之。防微杜漸。弊竇難開。禁包關瞞釐。除私侵中飽。斯則吾弟之所爲斟酌盡善者。卽以來函所云。願吾弟時時加意耳。

致各帥及司道糧臺營務處 十八日

湘省之賊。已遁竄粵西。援軍應卽陸續調回。以備合力征皖。惟皖省之地勢賊勢。非四路進兵。決難成功。而四路進兵之議。又必須先取太湖。則兵勢乃能順手。刻下太湖兵力尙單。且自古有戰法。無攻法。計惟有添兵以斷賊之餉道。方能聚殲也。應商事宜。開列於後。一、太湖城外。應再添兵若干。方可永杜賊之出入。一、添兵應駐何處。東西南

北形勢險要。卽祈詳悉指示。一我軍旣以重兵合圍。斷賊出入。其駐營地方不宜逼城太促。則難於出隊交鋒。如何酌定地勢之處。祈示之一。賊在城中。現糧尙有多少。約計合圍之後。賊糧可支幾月。可支幾時。一圍城不難。圍城則須防備大股援賊也。破援賊然後城賊可破。如何應變審機之處。乞示之一。太湖城外馬步可稱強兵。只嫌尙虛一面。難於斷賊之餉耳。擬卽以黃州現兵來助。而各路調回之援軍。留備策應。蓋預留一大枝置於空閒之處。以爲應變之兵。待他路之賊機已露端倪。然後起而乘之。則滿盤棋子均活。無一獸著矣。此議何如一。黃梅宿松廣濟之轉運已久。民力甚勞。有言將武穴糧臺。移至九江下橫壩頭。可直捷省便者。其情形是否屬實。如果有益於民。而不至誤轉運。可請速函示。以便分札遵照辦理。以上各條。敬祈訪察地勢賊情。詳悉賜示。林翼無用兵之略。有討賊之心。且萬萬不敢貪他人之功。以爲己力。又恐師老力疲。不能不求其合力剿除也。此心尙其鑒之。

致李篠泉太守（瀚章） 十八日

滌帥於十二日來黃州。縱談數晝夜。論天下近事殆徧。令弟少荃接談甚祕。直抒胸臆。譬效如洪鐘。每念皖北殘黎。受禍甲天下。則人人有義憤之色。鄂中已請滌帥改入蜀之行。先其所急。林翼亦推位於澹村中丞。以兵事自效。挈將東征。因義無所辭。而責無可諉耳。石逆不獲逞志於湘。遁入西粵。黔蜀之間。難保無乘隙偷越者。黔中兵氣不揚。固難敵此狂寇。卽雄封如西蜀。倘振作不得其人。富強亦未可恃。稍薪厝火。不足爲安。而較之皖江南北。若燎原之不可嚮邇者。則兩害相形。不得不取其輕耳。

致李希庵 十九日

滌丈初十日到。九日夜談不可輟。今日已往鄂城。而兵勇八千餘名。均駐黃州。聞揆帥以謀皖入奏。二十二日當

可得旨。滌丈之意。若到蜀作客。則不如仍在皖豫章之爲妙。前此奏駐宜昌。恐近前而爲主人所噴。又無處索餉也。昨查其新舊各軍。須月餉十二萬兩。僅湖北每月三萬。供應如前。江西錢漕。三倍於兩湖。市鎮釐金。亦倍於兩湖。然止供應蕭軍萬七千兩。滌帥各軍萬三千兩耳。是滌丈每月尙少七萬兩。昨到黃州。密詢支應各員。始知其詳。滌丈體恤鄂力。而鄂中斷。不可不勉竭其愚。已另外加送三萬矣。此老有武侯之勳名。而尙未得位。有丙吉之陰德。而尙未卽報。是可慨也。鄂省月餉二十八萬九千兩。造辦軍火鉛丸篷帳弓箭軍械。修理船隻。又月須數萬金。無論如何刻薄殘忍。敲骨吸髓。每年不過三百萬兩有餘。然已爲自有湖北以來所未有之事。去年僅得協餉三十萬兩以外。本年僅得協餉十萬兩以內。(本年鹽釐較遜。刻下頗大虧。)此鄂餉出入盈虛之大概情形也。天地之財。只有此數。商民之力。竭盡無餘。似無別項生財之法矣。來示以湘軍錢章全改。雖爲餉艱起見。到底非厚道之舉。又言亦願鄂省不負湘軍。始終一心等語。爲之憮然。本年正餉。卽以市價搭錢。尙不免虧。兄意欲加厚。弟意欲不虧。勢有兩難。義貴有制。滌丈開此軍。羅李之師。彭楊之師。皆湘軍也。現駐黃州之湘軍八千人。從江西而來。向不發錢。卽發錢亦照市價。此獨非羅山迪庵兩先生之部下。撥歸滌帥者乎。此厚彼薄。情亦難堪。征皖之師。另起馬步。均照市價。則此間亦不可獨異。昨日滌丈笑言。照市價乃大功德也。且聞各營勇丁。實得折錢之惠。不過一成。是照市價。而於勇丁之餉。必無大損。應求兄成此美舉也。四眼狗屢爲桐城鄉勇所敗。弟尙疑之。近日訪問。係桐城南鄉周家圍團勇。因賊匪伐其祖塋樹木。憤而同仇。屢與賊戰。無不大捷。其地三面阻水。賊敗亦不追剿。賊設計騰空桐城。空城思誘令入城。而後合圍以困之。周家圍似有人在。不中其計也。潛山亦起義一千六百人。據山爲險。頗能殺賊。征皖須四路進兵。進兵須先克太湖。又須先以數千人斷太湖城賊之餉道。又須距城稍遠。則勢不逼而節不促。乃可有爲。援湘各軍。可請於九月十五日前。齊到上巴河駐紮。老兄可在省多爲侍養。俟有緊要之信。弟卽飛函來請。以瞿定國快蟹來黃州。半月可到。蓋兵先到。則賊知巴河有備。聲威已樹。賊援大至。則兄必速來。仍不誤機也。

致松滋縣汪省吾（維城）十九日

湖北差胥疲玩。積弊已深。必取其猛如虎。很如狼者。設法箝制之。剝去爪牙。使無橫噬。懲一警百。則亦供奔走之人耳。此輩嗜利無恥。卽痛下鍼砭。稍縱卽逝。隨時防護。仍不能塞弊竇而斬弊根也。一詞之呈。不准株連。一案之審。不使留獄。悉心剖決。使廉明公正之志。相信於窮簷僻谷之中。則刁詐輿情。不期自化。平岸獄於一日。明信義以三年。將政簡刑清。雖龔黃吏治。不是過也。夫囹圄有壘囚。舉家爲之驚擾。必至輟耕罷織。男屬於塗。婦嘆於室。誠使化爭端而課農桑。則盡地利以養民。卽可儲正供以裕國。至於新章所定。無非爲藏富於民起見。而條告頒行。固不必爲貧民減徵。亦斷不許富民取巧。來示謂官宦之家。尙有照章減數者。豈其間尙不免包征流弊耶。抑富宦竟不遵章完納。而偷減耶。弟嘗謂不侮鰥寡。不畏強禦。仲山甫是也。侮鰥寡。畏強禦。卽今日徵收錢漕之官吏。吾儒讀書筮仕。祇求不負所學。盡吾力之所能行。吾心之所安。世途炎熱。俗吏逢迎。有不爲利害升沈。何足動吾毫末哉。彼視州縣爲利藪者。亦在賢宰之審所處而已。信到卽望將紳富實情。切實函復。不得一字欺隱。此事係奏案定章。弟於世事毫無所徇。斷不容畸輕畸重。稍有偏枯也。

復四川總辦西秀黔彭防務毛小梧太守 十九日

來書所論蜀邊地勢。如張子房之借箸。馬伏波之聚米。令人一目瞭然。曷勝欽佩。來示慮石逆假道於黔。勾結而西。具見深識遠慮。必能爲未雨之綢繆。蓋該逆久蓄伺蜀之謀。計在取徑楚南。兼拊鄂之背。此次不獲逞志於楚。儻闖入黔中。萬不敵此狂寇。而思南銅仁各處緊要。與蜀邊昆連。扼要設防。當惟長城倚重耳。

復荆門林棣園 二十日

司牧之任。政在養民。如種植然。先除其蠹。奸胥猾吏。痞棍劣衿。皆民蠹也。蠹之不除。養於何有。長林地廣人稠。詞訟繁雜。必須勤消積案。剖決公平。遇有疲玩之書差。刁唆之訟棍。先施辣手。曲運婆心。庶幾政簡刑清。民無擾害。撫字既得。催科不勞。除莠安良。華實并茂矣。足下新政宜勤。勉爲報最。當不使龔黃吏治。專美於前也。

復余會亭 二十三日

藍逆帶黨入踞霍山。此賊向不能戰。不足爲悍。以王令視之。則悍耳。退駐土地嶺。恐亦非久計也。無勇何有團。不練何能戰。亦不足爲王令責也。賊由諸佛庵入流波磴。希犯英固。仍是上年故智。松子關之防。自是正論。如該逆犯英界。以麾下之衆。穩紮穩打。暫勿輕動。爲是臨陣。亦須堅忍。半日不戰。待賊氣將衰。賊志已懈。賊隊已散。待賊之埋伏包抄之計。已一一畢露。然後并力乘之。此必勝之策也。確探嚴查。皆爲要著。慎重爲之。

致官揆帥 二十三日

滌帥留辦皖省。於目今鄂皖大局有益。但每月十三萬之餉無著。若開仗拔營。或再收養三五賢才。則月須十五萬兩。乃可指揮如意也。外餉終恐不能如期如數。而鄂中盡力騰挪。亦不足用。是可慮也。聖意似尙屬意於蜀。而特不知其爲蜀主乎。抑爲蜀客乎。滌公辛苦過人。抑鬱七年。若竟得蜀。亦原可施展。特朝命尙遲遲爲可念耳。王制軍昔年竭力助鄂中軍餉。承以二百金交冰如代辦一切。實屬得體。都將軍護衛馬隊。弟已函懇留交。弟處新兵。須舊兵帶領。乃識賊情。新兵到時。敬求全交舒六兄。仍以舊兵勻入其中編隊。舒六兄自同希庵打一路。另以數百人付滌帥。以三百付林翼。大約一千五百餘人。須或分三大枝二小枝也。萍缸眼力過人。科舉尙有異才。可備異日大用。希庵之兵。已函札調令先來鄂。希庵欲侍親一二月。且看事勢緩急。如果有警。再催不遲。霍山係袁懷忠與王自籛

所守似非大股。弟已派四千人前往上巴河。松子關防守矣。桐城百姓與賊久戰。其志可嘉。其機可乘。民心轉則天心自轉。皖禍近十年。或是轉機乎。皖南僅湖口有守兵一千。東流有守兵六百五十人。守則有餘。戰則不足。若防其竄擾江浙。向恐無此力量。卽滌公之兵。亦並不敷分布也。

致戶部軍機王少鶴 二十四日

石逆爲楚軍所破。斬馘至多。渠魁未得。不過二三月。又如浮萍在水。風定復合矣。天下盜賊。有增無減。楚南將帥之能勝戰陣者。有減無增。奈何奈何。服嶺以南。殆將糜爛。西蜀富庶。仍不忘情。湘與鄂其能晏然自逸矣乎。滌公欲駐宜昌。不卽入蜀。恐近前而爲主人噴也。主蜀則可有爲。客蜀則必不可有爲。且必趨趨不前也。七年作客。險阻艱難。備嘗之矣。揆帥請并力謀皖。滌亦欣然。惟苦無餉。不欲帶兵耳。林翼援湘之軍。九月杪可歸。卽當親帥以圖皖。黃州久駐。戚然自傷。澹公之不速來。何也。林翼則無論如何。總以越境討賊爲計。惟鄂兵太少。皖賊太多。加以滌軍乃敷調撥。滌軍月餉尙少十五萬兩。其何以濟。公於鈞軸司農前。能爲滌公一謀否。如月得協濟十五萬。自冬至於明夏。庶有寸效。似不同他省之虛糜矣。亡友孫芝房同年。著作若干卷。豫寄尊處。芝房志在千秋。付託之意深矣。我公及筠仙高義薄雲。慧光如鏡。如允校訂刊刻。則林翼與滌公願獨任刻資。彙寄尊處。林翼學殖久荒。不能編校。則公與筠仙爲獨勞矣。滌公過黃州。強留談八日夜。已到江夏。晤揆帥商進止。雁汀先生到漢陽。意似引退。願決翁祖庚處酌量濟之。乃杯水車薪耳。

與沔陽州周壽山 二十五日

足下志氣豈復時人所有。而識力亦超越今人。林翼等方扶持之不能。深自愧矣。營中友人所擬駁。乃因時艱而

却慮非盡。爲此事之至理。非常之原。黎民所懼。蓋非草昧洪荒。不能談論及此。足下上策。決非其時。襄隄加高培厚。道在人爲。使以邢公及足下爲之事。必有濟。又安得百坡千放翁。以供我江漢之用耶。卽此尙不能如人意。遑論神禹之明德哉。

復余會亭 二十五日

賊在霍山修築城濠。預留退步。實急謀進步。擄人擄糧。日內必有舉動。賊欲犯鄂。必非一路廣羅之防。勢將并營。前撥禮字二營。駐守松子關。今又撥蔣道一軍。進駐上巴河。但店一帶。相機策應矣。賊犯英山。萬萬不可輕戰。堅持以待其弊。伺其瑕而蹈之。當能一發卽破矣。增修營壘。確探賊情。預商應敵之法。賊雖多無患也。

復襄樊釐局張實君 二十六日

來示所論藥土釐金。質輕價重。不能到處設卡。亦不便逢人卽搜。此通曉治體之言。近日洋藥風行。所在皆是。其通衢大市。則以設行抽收。勾稽較易。其零星小販。則以各處分局帶辦。期無廢法而已。部章所定。不能不自爲伸縮。斯行法而得法外之意矣。金侍讀傳述一節。林翼爲軍儲起見。惟求有濟。外間是非毀譽。任意短長。所不顧也。只願盡力一二年。兵事得手。歸先人之敝廬。藉以稍寄孺慕。以待當時賢者。坐言起行。不復與曉曉者爭利鈍也。

分致川督秦撫晉撫

滌帥現駐上巴河。與林翼合力圖皖。前官揆帥以此軍共萬七千餘人。每月需餉十二萬兩。有奇。奏請川。陝。山西。江西。各撥解銀三萬兩。奏准在案。現在尅日進剿。相度形勢。批亢擣虛。軍事似有起色。惟攻皖須分兵四路。數道并

進。非厚集兵力。不足奏功。今日大勢。不患兵不勁。而患餉不充。楚北月餉三十餘萬兩。竭力籌措。尙覺不敷。而滌帥一軍。獨當一面。必不可少。專恃外省接濟。稍不濟事。一處不應。支絀立形。蓋兵與餉相依爲命。從前因停兵待餉。致誤事機者。不一而足。兵之利鈍。視餉爲轉移。尤必預先籌給。方能有恃無恐。而勇氣自倍。且皖省者。天下之關鍵。地居水陸要衝。爲金陵上流。皖賊不滅。則江路不斷。而金陵無克復之期。儻養癰不治。與捻匪合勢。而進規河南。則防不勝防。中州以北。皆爲可憂。故剿皖之舉。誠安危之所繫也。諸公蓋忱在抱。本無俟將伯之呼。但念兵以食爲大命。早到一日。卽早受一日之賜。安危之機。間不容髮。儻潛太兩城。有克復之望。則裹糧而行。方可乘勝東下。夫疆吏皆有固圉之心。若鄰省之事。非忠愛纏綿固結而不可解者。不能多方籌畫。使千里之外。呼吸立應。惟諸公以天下爲己任。務乞不分畛域。早爲籌備。無論何項急需。先儘此款。如數每月迅速撥解。如弩之離弦。水之赴壑。應期前來。不踰晷刻。天下幸甚。

致官揆帥 己未八月二十六日

霍山一股。是從前黃州城之藍承先。報稱萬餘。尙不甚慮。且賊必探知黃州有兵。未必卽來。惟多禮堂性急。聞二十四五六。卽欲移營太湖之東二十五里。而囑林翼調唐義渠到太湖。多禮堂一團高興。林翼不便掣其肘而不行。而私心總嫌其稍急也。太湖必可支一二月之糧。如彼糧將竭。而援賊乃至。則援湘各軍。早已到鄂矣。滌生先到鄂。談敘必歡。此公心無半點私也。

致漕運總督袁午橋 八月二十七日

公仍持節淮上。是聖人之至明。而不爲讒言所間。惟是汾陽部曲。已屬他人。倉卒召募。未可應敵。而餉項無出。尤

爲艱窘。公視師以來。兩爲狂風引去。又不能脫離苦海。必與惡客爲鄰。殆東坡所謂箕獨有神者與。旁觀憤怒。而篤
棗薑忠。無幾微不平詞色。德量甚大。功助必成。固私心之所頌。念不忘者也。林翼整飭瘡痍。本擬漸次試用。適石逆
狂竄湖南。力攻寶慶。城外援軍二萬。城中兵民殆六萬。被賊長圍久困。不得已以希庵率水陸萬人往援。七月十六
日。石逆敗竄。遂由東安走全州。灌陽。改圖桂林矣。此番斬馘雖多。而渠魁未得。不過二三月。又將復振。殆如萍浮水
面。風定卽合耳。湘中已派人追剿入粵。希庵九十月當可回鄂。以共圖皖事。當湘事之告急也。舍希庵則無良將可
以統軍。而林翼又別無他將可用。勢逼處此。不能不顧上游。林翼發兵後。僅領餘兵二千入黃州城守。蓋兵將已全
付於湘中。萬一賊至。僅以嬰城自固爲長計矣。近日賊乃西上。而湘禍已暫紓。弟可從容調回。并力謀皖。鄂中所自
籌之餉。歲入實屬不少。而恆苦其不足。則以安慶湖口英太等處。水陸馬步防剿之人。盡取資於鄂。鄂力實不能勝
也。澹村正大光明。今之儒者。林翼已舉以自代。而朝命至今未至。蓋澹公陛見。或自處於謙讓也。實則澹公籌餉而
林翼司兵。兩有所益。若置之入閩。則負澹公矣。滌公奉命入蜀。八月十二日行抵黃州。談敘八日夜。官揆帥又以并
力謀皖上請。天語兩許之。虛涵萬象。不下十成斷語。滌公現往武昌。與揆帥籌進止。留皖則與兵事有益。入蜀則與
鄂皖之餉事有益。惟林翼自揣才力。獨力必不能舉皖。則深望滌公之合。而滌公月餉十五萬。僅鄂中月給三萬。此
外遲遲不應。又深望滌公之入蜀。此老有諸葛之勳名。而無其位。有丙吉之大德。而無其報。軍興以來。公與滌公及
小浦先生所處。爲獨艱難耳。爲之慨然。林翼無論澹公能來不能來。秋杪冬初。必入皖邊督辦。惟南人必不能踰淮
北。只可漸謀安慶耳。萍疋前在都中來。略述嘉謨入告之梗概。林翼才力何能有爲。水陸將備。皆塔羅李三公之餘。
卽皆滌丈之所提倡。而振興者也。林翼恐終負老兄知人之明。心以爲懼。心以爲愧。燈下縷縷。敬請助安。

致蔣之純觀察 九月初五日

石牌堅城。忽以不意而得之。蓋乘驪龍之睡而摘其項下珠也。然得之易。守之甚不易。不得已先請義渠入石牌。太湖城守。松子關雖緊要。賊尙未至。而石牌太湖。賊所必爭。應一面請援湘各軍回援。一面請老兄卽日兼程前往太湖。會同多禮堂籌剿。以成大勳。一應支應。請飭委員速籌。弟已劄行。并咨行滌公官帥多君。及各路矣。松子關竟無人可守。由弟處另行派員一千八百人來替。但須老兄啓程十日後。乃可到齊也。

致莊蕙生方伯嚴渭春廉訪 九月十一日

夏令苦熱。久不乘馬。有髀肉復生之感。昨兩日馳至巴河。微肆手足之勞耳。前接來書。遲遲未復。此時外省人及局外人。尙未悉籌餉之苦。亦不通觀大局。且不知鄂中兵事餉事。較五六年。加至五倍。較七年。加四倍。較八年。亦加三倍也。去冬到營。深恐軍心過憤。復仇太急。如漢代獠亭之故轍。今則一年矣。若天下秉禮之士。尙義之人。責我以忘仇忍恥。林翼其何以自立。故欲託老兄以餉事。并不願渭春留滯道上。尤不願其歸秦中省墓也。爲皖計。爲鄂計。須將巢湖以南之州縣克復。然後并力規畫巢湖之北。及淝上各州縣。則用志不紛。乃妙於用。蓋巢湖之界限。亦頗如洞庭之界。鼎澧岳鄂彭蠡之界。饒廣南昌九江也。假如賊伺武昌。繞道南昌上游。乃可轉入武昌九江之地。基勢固甚難。巢湖以南之宿松太湖望江懷寧桐城英山霍山潛山。漸次規取。復并力於廬江。乃以重兵屯於桐舒六安。以規廬州。則巢湖以南十州縣。乃可守而不失。蓋以水師入巢湖巡防。則陸兵可省。而遂得以專力於淝上。淝以東尙可緩圖。巢湖以南。必須努力。此天地自然之界限。卽行軍自然之次第。去冬舍廬江不謀。舍桐城不守。所謂自貽伊戚也。是當痛戒。并望老兄博咨以益我。弟實願虛心以受教也。滌帥之軍。約九千人。若調到張蕭。則萬五千人。兵行增而餉日竭。若再徘徊觀望。是終無謀皖之日。蓋持久太過。不僅兵將氣怯。亦恐他省另有兵事。徒亂人意耳。反兵之義。希庵之血淚未乾。固已義憤填胸。不待迫促。卽下劣如林翼者。負大罪以出。株守實所不安。似不煩中朝

之催督。而中心已皇皇矣。沅圃九月中旬可到。滌帥似宜由石牌以規安慶。援賊大股當在江浦六合。其上援約太湖糧竭欲潰之時。援賊之來。必以另股從六霍商固內犯。以搖我邊陲。以牽掣我東師。應以勁兵良將。如希庵者。從此入手。以多鮑從太湖規潛山桐城。以林翼從英霍會於桐城。以四路分進。而均以桐城六安爲總匯。俟安慶得手。分規廬江。水師入巢湖。卽以桐城爲老營糧臺運道之總局。蓋四路進兵。則無隙可入。不必以重兵留防運道。惟目下之石牌一軍最便。滌帥可九月杪進駐於此。運道分四層。滌帥一軍循石牌最易。多鮑居第二層較難。林翼居第三層。已是萬山之中。用夫多而用力勞。是爲更難。希庵之軍火由麻城英羅運去。其米糧從商固採辦轉運。尤難之難者也。此又另有所費。不在口糧之內。滌帥昨咨以三萬之外。月加三萬。飢則同飢。飽則同飽。我輩不容歧視也。城工武職成風。均可用。如須添員。則薇柏二臺密訪公議。忻通判未可遠調。余會亭初六日已進英山霍山交界之大楓樹嶺。此爲總路。不可不防。部下三千餘人。或可戰守。霍山現無多賊。久必大至。石牌乃乘驪龍之睡。而探取其珠。已派唐蔣六千四百人。或守石牌。或并太湖。請多自酌。多是功名之士。驍果之人。處置各將。頗費心力。若輩總不脫一矜字也。希庵之兵。十月可到。滌帥之弟。若到在先。則希庵本人遲到亦不妨。愚意希庵一軍。俟援賊有變症。然後乘其機而破之。譬之南塘矛法。須先讓對手打一下。然後應之。此理至微妙。我兄以爲何如。縷縷奉復。乞精思博訪。明以教我。

復鮑春霆 九年九月十三日

派隊驚城。使賊不能安息。亦是疲敵之至計。如再誘之出戰。大挫其鋒。則將不攻自破矣。來示謂太城克復。分軍前進。其由潛山剿舒桐一路。弟與多與兄任之。其由石牌攻安慶一路。滌帥之軍可任之。而克復之功。仍當歸弟與多都護兩軍。前此血戰。事業垂成。滌帥與兄斷不欲居良將之功。以爲己力也。此次成師而出。必須一氣呵成。必待

布置周密。步驟井然。方可鼓行。而前幸勿過於急性也。

復張實君 十三日

藥土之稅。質輕價重。寬於法中。使不得遁於法外。況古今取利之法。莫妙於輕。輕則就而。則避。俗情大抵皆然。議重者不能深悉民隱。故事多窒礙。仍無實濟。是在閣下之隨地制宜。斟酌盡善而已。

復監利縣唐鶴九

虛心實力四字。仍望時時加意。虛則能明。不至以氣矜之隆。轉滋物蔽。實則視民事如己事。而休戚相關。自能誠求保赤。蓋有催科而無撫字。不可謂稱職。能聽訟而不能挽回人心風俗。亦不可稱循良。閣下誠能以居敬窮理之功。爲除暴安良之用。則高明沈潛。剛柔交濟。知以學道爲愛人之本。自不難教養兼施也。清丈未竣。而徵收一項。辦理爲難。雖一時權宜行事。仍祈趕緊清查。以期力符原額。是所切囑。

復張生濬萬

三河奇變。一時死事者。文武四百餘員。同歸於盡。令兄并列忠義之林。得與恩卹。國家昭忠有典。列祀明禋。死且不朽。篁村本籍專祠。前已以與難諸君。列名奏請。現梁營官華彬爲篁村立廟於蘄州。亦耐令兄主位於左。丈夫報國。生氣凜凜。不磨。馬革未還。所不自惜。顏常山竟爲齏粉。史閣部僅有衣冠。而浩氣精忠。至今猶在。閣下手足之誼。固知不能忘情。然仔細思之。覺身膏原野。死事尤烈。正不必過爲悲悼耳。所望閣下奉養靈闈。曲爲慰藉。安與令兄立後。以爲他日承襲之謀耳。

復松滋縣汪省吾 十四日

書中所論書差廉恥。欲感以誠。行寬之實。張嚴之聲。弟則謂嚴與寬皆屬外面。而明字乃是正面。不明則寬固失之。嚴亦未足爲得也。國賦正供。原有定額。不能爲貧民加。亦不能爲富民減。況薄斂新章。無非以閭閻易竭之脂膏。特爲藏富於民起見。視前此加徵積弊。減去大半。若違道干譽。卽概行蠲免。仍未足以養欲而給求矣。當此軍餉浩繁。國用支絀。以是區區者。勉力奉公。亦屬分所應爾。是義也。非利也。不可不切實思之。至於炎緩一事。不能不竭意認真。足下欲軫念窮簷。定當核實辦理。惟求其是。求其實。并漸次有增無減。以求一二年之後。力復正額。是爲至囑。堤工土費。使民自衛其身家。加札嚴示。事屬可行。惟收費必交存正紳管理。官吏不染指。使出錢者曉然於官之爲民。非爲己。當無不踴躍輸將也。農閒水退。擇地培修。實用實銷。與爲經紀。使水潦有備。民無流離。汙萊旣墾。地力可盡。澤國生靈。羣利賴之。行飢溺之志。傲遊惰之風。除盜賊而安善良。平爭訟而敦和睦。皆在賢宰之實力實心。從容報最耳。

復蔣之純觀察

兵事以自固門戶爲先。以斷賊餉源爲圍剿至計。出門捕盜。而門鑰未鍵。則盜反乘虛而入。北門之壘是也。竭澤求魚。而不能博塗周塞。盡絕支流。則魚不可盡取。東路之防是也。來示審勢安營。甚爲周密。惟於潛山來路。與浮橋賊糧搬運之處。恃團勇爲聲援。大致雖佳。似尙未能盡塞其餉竇。若令糗糧日益。則攻復需時。仍祈與多鮑唐諸公商酌妥辦。是爲至要。團丁助剿。義憤可嘉。火藥自須接濟。賞賚亦所不惜。然必須貴營更番輪哨。以壯聲威。毋使此未經戰陣之民。輕與狂寇爭鋒也。

致李希庵 九月十八日

九月十二日。奉九月初二日手書。并公牘一件。商擬六日。竟慚不能復。詢之滌帥。則曰。每路以七八千人爲度。滌帥現帶萬人。現擬以三千人自衛。以七千人交沅圃爲一路。多與鮑屢有戰功。本年屢請添兵。林翼不准。此二起共不過步兵七千餘人。自可獨當一路。林翼現在黃州之人。僅只二千五百。似不足當一路。而又未可卽裁。其黃勝日一營。尙駐省城。或可減去此營。并減去鄖陽兵七百。又或將黃仲江之營更易。而撤去此營。通計不過能裁二千人以內。而東流則必須另派一營往代。乃可行也。至義渠之三千四百人。原可酌裁。然能獨當小統。自立小門戶。太湖安慶未復。未便卽裁。弟意朱品文及四營。旣爲閣下所賞。因餉竭而使老兄不申其志。私心深爲以愧。刻下滌帥一軍。不能不稍稍盡意。而糧臺月虧。實及十萬。若蕭張到鄂。月虧必在十五萬矣。弟意仍請酌定。將鄂中裁去之營。并於老兄援湘十營之內。請去一二營。而將此五營帶來。或可得力也。援軍起程之後。如有警信。弟再專函奉聞。多侍一日。多侍一月。總是人倫之至樂。弟必訪實賊情。斟酌定準。乃敢飛函奉告也。但後面不可無一枝勁兵。擬卽以援軍回鄂者。駐紮上巴河。以期控制四面。滌帥十月內。必進駐黃梅。而以沅圃進石牌。林翼由陳德園山路進太湖。英霍之交。滌帥之意。擬以台駕由商固六安進。蓋此次四路分進。滌循江爲第一路。多鮑由太湖循桐城爲第二路。林翼由英霍指舒城爲第三路。台旌由商固六安而指廬州爲第四路。轉運惟林翼與老兄山路爲最難。而兵事賊情。亦以第四路爲最重大。第四路非公不可。固無疑義。但不必先發。俟三路并進。陳狗必從下游以十萬人來援。彼時請老兄應之。可使狗賊成擒也。滌帥之奏。指畫已明。鈔行冰案。祈細查之。餉少因兵多而然。唐之三千四百。及新添西丹馬隊鄖陽千人。張啓基水師。皆去年弟丁憂後之事。通計亦月須三萬四萬以外矣。餉匱而勢不可止。兵愈遲。則餉愈虧。若使天下後世。疑弟無良忘仇忍恥。弟其何以自解。十月初旬。弟卽先行進紮太湖邊界。儘此冬令三月。

春令三月。或可稍稍開拓尺寸之地。若到春深水長。馬隊步兵。又須休息矣。澹村先生有到浙江之信。前請未蒙恩允。深爲林翼之不幸。擬到皖竟再作道理。天下惟籌餉是賤役。籌得尙不算賬。況實無可籌耶。

致左季丈 九月十九日

奉書皆憤懣之詞。不能以口舌與公爭論。惟覺公因此等人事而自損太過。則尙非愛身之道也。劉慶到長沙。當知大概。惟有忍乃能有濟。公其念之哉。希庵十營及馬隊二百。乞先飭回鄂。石牌既得。太湖已圍。則四眼狗當從六合江浦率大股上援。林翼十月初旬。當進兵英霍之郊。希庵須暫留長沙。以全其愛慕之誠。俟援賊果警果真。則以一函實告。或猶可及也。坐快蟹趕路。卽風雨阻滯。亦不過二十日可到。此番須努力一打。乃可謀皖鄂之稍安。軍興以來。惟四年塔忠武殺曾天養。八年李迪庵先生殺林啓榮。是頭目。此外均無可紀之功。賊數尙多於前。而世人有燕雀响响。母子相樂之意。其不必烏盡而弓已可藏矣。鄂中驟添滌軍萬餘人。鄂力實苦不可言也。

復蕪湖縣劉子坦

賊勢蔓延於皖南。未審趨重何路。邇際秋成。旣實。道途四溢。愈見鴟張。周軍門轉戰分馳。疲於奔命。該逆必肆意上游。不復瞻前顧後。涇石祁太一帶。尙未大遠。棠封。近日賊蹤所向。當有確耗。金陵長圍。曾否周市。內外聲息。或尙屬一氣相通。均祈縷悉示我。圩董募勇堵賊。輿情思奮。公義在人間。固徵國運中興。亦足下德教使然也。惟物力艱辛。事難支久。深以爲念耳。

復張仲遠觀察

漕規陋習。積弊百年。經閣下刪減而整正之。舊病方除。而新病又作。言之愕然。書吏如此弄權。殊堪痛恨。非閣下明察秋毫。幾使鐵面冰心。痛革弊政之苦。忽壞於翫法舞文之手。吁。倪令之稟。知屬官之畏上司。竟不如其畏書吏。毋得曰苛政猛如虎也。可不懼乎。來示通札查訪。防微杜漸。洵爲要著。佩服甚慰。甚承示以商固進兵。艱於轉運。不如益余際昌之軍。使防英霍。鄙見尙不能無疑。誠如來示。減去北路兩軍。則英霍之仍不能不防。勢也。防英山之必須重兵。亦勢也。深入英霍。不能兼顧麻羅。又須駐後軍於黃州爲策應。是所省者。祇轉運一節。而老師無功。轉嫌糜費。且我輩專循安慶桐城而下。使賊趨重英霍六安固始。必至牽掣不前。欲免於勞。而究何時可逸也。來示又謂粵捻尙未盡合。南北兼營。又激之并力。相拒。弟思皖地情形。捻逆在淮北。未注意於淮南。粵逆在淮南。亦未注意於淮北。此次我之所圖。卽巢湖以南之事。且捻逆起於近年。號稱數十萬人。實因粵匪未平。而恣肆橫行。如淮南先定。則捻逆必卽日解散大半矣。總之皖賊一日不除。鄂邊卽一日不能安枕。竊賊充斥之時。無剿法。無堵法。兼恐人才日少。物力日竭。大局愈不可支。一旦羣盜麇至。必至措手不及。不如乘勢進攻。并力一舉。其幸而有濟。則國家之福也。亦時數之將回也。至弟駐軍之處。暫在楚皖之交。四路相距。不過一百餘里。呼應較靈耳。

致曾滌帥 十月初九日

昨夜密書。敬承一切。此等事。林翼素不留意。夏間安慶有賊來言。亦漫不加省。韋賊屢與二季交戰。又心憚水師之威。與淮上情形迥異。所詢四條。以派索百姓。或官給銀米。爲最關緊要。竊意仍須官給銀米耳。應勒約立功後。分別資送回籍。而專留其頭目。編入行伍。蕪湖太平。實爲關隘。水師同去。賊計乃成。卽有反復。亦與水師無礙。親丁作質。不過堅其投誠之心。可行可止。無甚關繫。若能救皖南之急。而不致卽分皖北兵力。又使江西專防石逆。而暫紓饒廣之憂。丈卽準行。亦無不可。至安危大計。全不關此。安史之禍。不在安史。黃巾之禍。乃成於破敗之後。是可憂也。

致曾滌帥 十月十七日

驥雲兄筭子嚴正。而出以平實。當擔以鄂任。楚民其有託乎。麾下應駐黃梅。而統領應駐石碑。石碑地勢。實爲至要。多禮堂力固稍微矣。圍城無壕。則萬七千人。只當六七千人之用。援賊若至。非校大力。不能成力。若賊不以全力。援一路。或分兩三路而來。則尙勞。蓋念耳。賊援石碑太湖。名爲二路。而仍是一路。尊處除二三千人駐黃梅。以三千人守石碑。則堪以制援賊之死命者。不過五千人。勝仗可以包打。援賊亦必破走。此意中事。惟欲盡數剿滅。使狗黨不能復振。使皖北諸城。望風吐款。則尙疑其未能。蓋援賊須負創。然後各城守賊。不攻自走。欲破滅大半。非以重兵勁旅。從後路斜出。不爲功也。希庵兵到。希庵稟言。或假歸十日半月。其情可念。此起兵勇。自暫歸一路。不敢卽循商固六安。應於二十四日二十八日分起。且進英蘄之交。麻城之兩路口。羅田之松子關。應派人專作守局。太湖城賊已搭浮橋。近日必有一大仗。此城賊尙欲求勝耳。若援賊到。則力尙不足。聞潛山有地名天堂。萬山叢薄。外險中夷。其四旁均有隘可守。有一夫當關。萬夫莫開之勢。其地可通潛山太湖桐城舒城。實四塞之地。中權扼要之險也。聞明季張獻忠踞此最久。米糧可供二三千人之食。惟軍火須從烏道中盤運。此處若駐三千五百人。則桐舒之賊。皆有震驚之勢。幕下多熟悉形勢之人。敬乞訪察指示。若僅派二千人。則只能作牽綴之勢。不能必其成功也。

致鮑春霆唐義渠蔣之純 十月十七日

近日城賊。必思捨命一戰。我軍須先持之以堅忍。審量果定。齊力痛打。軍中之事。不患兵方之不勇。而患兵心之不齊。不患軍勢之不盛。而患軍令之不一。假如唐營欲戰。而蔣營不欲戰。又如多禮堂命戰。而霆營不欲戰。則心力必不能齊。竊謂軍事以號令出於一。乃有成功。凡接仗之時。應以何時何刻。一齊出隊。須請副都統禮堂兄預擬一

定號令。號令未出。不准勇者獨進。號令果出。不准怯者獨止。如此則功罪明而心志一矣。此事請卽會商禮堂兄酌定施行。

致莊蕙生 十月十八日

連旬患風寒。以久居雪堂。江夜寒耶。自逸太過耶。變於東偏。服藥數帖。今已小愈。潛山天堂告警。此地爲太湖潛山桐城舒城之要隘。萬山叢薄。外險中夷。形如圓甌。若以兵駐此。則山徑四路可通。潛山桐城舒城之賊均震。賊若踞此。則亦不易破也。今夜已檄行余會亭速行。而飭吳幹臣孫樹人往英霍之交。以代余軍。或猶可及乎。弟候希軍到齊。從容料理。再行進發。大約尚在蘄水之邊耳。毛驥雲因滌帥之約。而來與之久談。讀其章奏。嚴正之性和平之音。而所說事理平實可行。異日必能力濟時艱。公可深交而薦之揆帥也。

致鮑春霆并寄蔣之純 十月十九日

養兵所以衛民。兵不愛民。何樂有兵。糧餉軍火。營中要需也。然可以體恤民情。節省民力之處。務須極意謀之。乃不負殺賊安民之本志。聞黃梅分設七局。轉運三年。每日需用民夫。共計三千餘名。民力竭矣。七局中新開停前兩站。專爲霆營添設。前有懇求合并一路者。近復踵而行之。湘營新移軍火米糧。均關緊要。紳民踴躍。飛速辦理。奈該營糧米。專在梅城採買。由停前解送。宿松縣屬二郎河收存。計六十里。每米一石。兩站交替。需夫四名。雇價不下五百文。每日連運軍火。照前添夫價二十餘千文。賠累已經月餘矣。苦民如此。實所不忍。更聞霆營告假勇丁。及弁勇差務在外者。均擅用民夫。實屬不知愛民。卽須自愛之道。現擬將轉運由石牌入太湖矣。務望足下嚴查諸弊。如何運轉便民。毋徒貪取米糧賤值。不顧民間搬運賠墊之苦。并如何嚴禁弁勇藉差擅用民夫之處。一一縷晰查禁。復

知。毋稍徇縱。是爲至要。若必仍前苦民。致滋抗累。則百戰之功。亦無以償過矣。

致糧道張仲遠 十月二十五日

漕事是我公之大德。清端蘄黃恭毅偏沅。後先爭烈矣。公能久持善政。貞固不撓。則吾楚百姓。生生世世。感且不
朽。林翼何力之有。漢川沔陽。請告之冰如。速往勘報。七手分南糧。欠解六千餘兩。係漢陽沔陽漢川天門所欠。定例
本嚴。別無方法可想。惟此事冠九今日。亦力言其不可。冠九定三縣之額。而恐貽冰如以吏議。其用心亦尙無他。公
試設法曲成之。如不能辦。可否移其罪於林翼一人。而寬道府州縣之議。統惟裁酌。弟本志不欲以過誘人。豈願以
六千餘兩而誤四州縣之考成。并陷一賢太守哉。乞速酌示復。豫州益州不可思議。賊已改作逃荒。民分起入蜀。而
石逆踞柳州慶遠河池等處。其非爲滇黔可知矣。蜀人必謂山中無處得米。不容多人。試問張獻忠入蜀時。果有人
飛芻輓粟。以利其行糧哉。李希庵一萬六千人到寶慶。日夜運籌。只苦米少。派員派紳。加價加夫。冠蓋相望於道路。
石逆在寶慶圍城。約十七八萬人。七十餘日之米糧。又從何處採辦而來。此可行仁暴異用。情形迥不相侔矣。君青
如欲鈔全案。謂卽鈔寄。特江南額重。必須再減。乃能有益於民耳。石米不能過二兩四五錢。或竟二兩。乃可一拯吳
民之厄。吳賦之重。始於賈秋壑。成於張士誠。而又激於明太祖之一怒。六百年之禍。豈一手一足所能爲力哉。公擬
渭春治豫。力量尙恐不足。姑看其長進何如。

致皖撫翁祖庚 十月□□日

滌帥於廿四日拔營。前往黃梅。以規安慶太湖。於廿四日飭余際昌從英山。以入潛山之天堂。而另以七營入英
山之石頭嘴。自率各營。於廿八日繼進。惟希庵之援湘各營。廿七日始到黃州。希庵尙因母病。請假未來。弟等各營

雖不敢藉希庵未到爲詞。然早到則戰事乃穩矣。舒桐之地似須馬步相輔。所謂西丹千名。所購馬二千匹。尙爲河南搶匪阻截。此則必須速到。乃可直入舒桐。弟刻下暫駐蘄水英山之交。俟太湖得手。安慶諒有動機。舒桐一帶。冬春之交。馬步亦可施展也。午橋握篆。推袁之功效。已可見矣。克竟以大義自遁。自飭。然於皖禍實可稍減。滌帥不願入淮北。願圖淮南。午公所請。竟含糊復奏。蓋謂橋不踰淮也。

致司道及總局 十月□□日

二十八日拔營駐巴河。到蘄陽坪尙百餘里。到彼亦不過備英霍之後援。大局總須太湖潛山懷寧克復。乃可有濟。此軍本從間道指舒六。其地平曠。英霍則萬山叢薄。出境則平原矣。非舒六兄馬隊來助。難以指揮自如。希庵各營。應駐上巴河及但店等處。希庵未來。沅圍歸去。兵日增而將日少。非鄂之福也。應商事宜。條列於後。一傳聞樊城釐局慘殺十七命一案。而府縣無稟報何也。此處主局事者爲張實君。應卽更易。而力量能辦此者。頗難其人。局中公商爲要。一西丹尙未能來。此間盼望已切。聞自應山至漢陽州縣。傳聞西丹馬隊及馬匹過境。須費錢六七千串。三五千串不等。州縣豈能賠錢辦公。不過上負國帑耳。若果因公虧墊。必成無限轆轤之虧空。實非公家之利也。鄙見不如糧臺籌銀。攜往信陽州。每西丹一名。給銀一兩。夫馬價八錢或一兩。以此類推。上至營總副都統。以三十兩爲止。但須切諭營總統帶官。不准索地方官分文粒米。亦須嚴札地方官。不准私給分文粒米。此雖爲公事。動國帑二三千金。似屬不值。然州縣必可因此少省。省州縣之力。卽是愛惜國帑之力。費州縣之錢。卽是虧空國家之錢。無二致也。至本省所辦張家口購買馬匹。不須州縣辦差。其黑龍江捐馬匹二千。例須州縣辦差。弟意亦可仿西丹之法。由糧臺委員。每馬酌給銀一兩。餘管喂來鄂何如。以上如公議以爲可。卽速五百里示復。以便札行咨行。一弟處前札行派有漕州縣一成錢。修理城工。令而不行。恐致損於政體。近聞州縣已嘖嘖矣。鄙見不如以釐錢一萬

五千鹽錢一萬五千。陸續湊合。尙可不致漫無收束。緣應山至漢陽。旣以缺苦差重爲詞。而漢潛天河鍾盞等縣。又以水爲詞也。與其待州縣之不奉令而誤公。不如體量事勢而先爲體要之得也。總之州縣只能發財。不能喫苦。此天下之通弊也。州縣少喫苦。則國家少作虧空。以上三事。速商專復。如三五日內札行。尙可及也。其西丹及口馬黑龍江捐馬糧臺有案。儻愚見可行。卽速以草稿擬行寄到。再補正詳。今日途次思議所及。敬以實告。務祈速復。

致李香雪 十月二十八日

解京餉奏。卽用尊稿。較譜香稿爲渾括。以部中本不明白。卽不必與之說明白也。沙宜收一免。一薄取以順商販之情。實可多收。以資京餉之益。若如近日部中之計。勢將使天下之利。盡歸於逋逃而後止。此天下之拙工也。敍城危迫。是蜀亂之嚆矢。正氣消亡。天下安得不亂。征皖亦特顧目前之計耳。究於大勢無補。

致錢萍石典試 十月二十九日

公才智冠世。出而任疆事。可活百姓以救時。特恐志不得申耳。豫州牧頗闇弱。今冬捻匪尙不過擄掠而去。年復一年。羽翼漸成。則獪子亦解噬人。將不可復制矣。卓如移蜀。竹厓撫秦。午橋握篆。均近事之差。可人意者。以皖事論。午橋得握寸柄。翁祖庚當不致飢餓而死。惟午橋必再向鄂中索兵。橘不踰淮。遷地勿良。殊以爲苦耳。移營蘄水邊界。尙無實濟。金陵安慶均可圖。特恐是敷衍之局。爲將帥增凌烟之色。而於公家之事。均無絲毫之補。兼恐朝堂大老。封疆大吏。因此而驕。泰自是。正煩聖慮耳。愚拙如林翼。何敢言事。以老兄之垂愛。逾恆拊發狂言。太湖近月約可克復。滌帥已往黃梅。如不須林翼前往。更覺省事。其張家塆等處。林翼仍須兼顧也。毛賊之在皖江南北者。除四眼狗尙堪戰陣外。賊中驍果。亦頗乏人。所慮者。安史滅而禍更烈於安史耳。

致余會亭參戎 十一月初四日

得葉介唐初一日來信。知弟廿六日已紮天堂朱武廟。軍律嚴明。軍威整肅。可慰可感。天堂百姓已與賊爲仇。得弟助之。當可守也。但兵不可太分。恐分則力弱。剿賊亦不可太遠。怨遠出而無後援。太湖潛山未克。則舒桐亦難進。兵弟可詳思而審處之。審地勢。審賊情。隨時函知爲荷。應商事宜。開列於後。一。米由本境採。兄恐弟營銀少。已飭糧臺預籌一月二月米價。或由沈個堂從金家鋪寄天堂。或由陳德園專親兵護送前來天堂。兄不負天堂士民之意也。一天堂軍火。可向沈個堂領取。兄已批交個堂矣。局設金家鋪。往取亦易到也。一天堂如嫌兵力尙單。兄尙可相助一。二千人。尙有餘力。弟試酌之一。兄暫駐界牌石。兄思取潛桐。當從何路進兵。一天堂之米。究竟能養兵若干。一天堂爲我所有。則潛山桐城舒城霍山之賊。均已失勢。善守不失。異日順手。當以弟此舉爲第一功。刻下兵力守定。再謀戰事。軍報却宜川流不息。以慰鄙念。

復潛山縣葉介唐 十一月初四日

得來書。具悉經畫井然。袍澤之義。官民一心。歲寒晚節。疾風勁草。君之董戒激發。忠義可風。而潛山士民。尤不易得。可感也已。可敬也已。昌營余會亭。廿六日已紮天堂。此是良將。乃鄂中美才。孤軍深入。弟甚念之。應商事宜。開列於後。一。六營不嫌力單否。合之則一萬二萬賊來。尙可力戰。分之則力必薄。氣必怯。一處不得手。處處不得手。此亦兵家之所忌也。一。余會亭軍火。已飭沈個堂於金家鋪轉運。請公派弁派夫。前往領取。公處如須軍火子藥等件。亦可鈔弟函告之。沈個堂司馬也。一。昌營米糧。由營定價。天堂之民甚苦。弟不負心。如昌營米價不應手。弟處卽由糧臺專解到潛。由尊處會同昌營清給。決不致誤也。一。弟因潛太未復。難進舒桐。且到張家壩之前。會取太湖。如尊處

有所需。有所商。可專人到界牌石營前商辦。一太湖未復。潛山可攻否。須若干人。由何路進兵。一天堂兵力如尙不敷。亦不妨直言。以上縷縷奉商。敬祈賜復。

復會滌帥 十一月初七日

奉初五日手書。敬悉嶮虛言。太湖不必撥營。則多鮑蔣唐稟請。則仍望多撥爲宜。否則乞以三千人駐黃梅。六千人駐石牌之前。以規安慶。以慰民望。仍請鈞度。澹公午公有信來。此乞請公軍。午公推讓。丈所不屑。然午公必再乞師。終須斟酌以應之。中朝必以希庵應淮北之請。不能預爲謀畫。近年中朝於外省請兵。絕無應者。惟靠召募。亦惟湖南人。愚不可及耳。此事尙乞預思。林翼不駐蘄陽坪。而駐界牌石。與孟子百步五十步。莊子朝四暮三之情形相等。界牌距英山正路九十。小路六十。距太湖百十里。距潛山百八十里。距英山之天堂楓樹石頭嘴。亦百八十里。距潛山天堂寨二百餘里。馬隊未到。希庵未來。孤軍難入舒城。故飭幹臣守英山。金守逸亭。守但店。以顧羅田麻城。姑作自守之計耳。林翼實無補於軍政軍儲。一年以來。負慝實深。而中心不可有貳。惡其無恆心。而多反復也。卽遵前訓。謹守不敢忘。惟虛懷引領。以盼金陵安慶之奏功而已。鄖陽千兵。或可精選二百名。以習馬隊。精力目力。未審能如期望否。在黃州久勞於賓客。山中簡僻。或稍稍養息一半月也。

致蔣唐鮑三營 十一月初十日

初三日以後。夜間環攻。凡賊守定。則不可動。聞此數夜。不開一槍一礮。視若無事。則久攻亦無益矣。兵事以有指望爲主。卽如去年二郎河捷後。直至今年九月。霆營移東。湘營移北。乃算有指望之日。前此一年。固頓兵一面。而缺其三面也。今旣已有指望。則不可爭克復之遲速。只患賊於薪盡仰屋待炊之後。或乘夜竄出。我軍不殺一賊。博得

一座空城耳。此則尙須預思及之。凡賊不多殺。則易一城而氣燄如故。換一地而圍守又費時日。此則可憂之大者。至滌帥應駐黃梅。已無疑義。其兵應否駐太湖。抑應否進石牌。望公商稟請。天堂之賊三路紛至沓來。籌畫頗窘。太湖西北方有石道灣環之處。恐賊從此竄越。須加意嚴防。切囑切要。并望示復。

致會滌帥一則 十一月初十日

得初七日手諭。所慮極深微沈摯。慈祥遠大。其於林翼之苦情尤切至。林翼非多鮑之獨認一路者可比。不得不兼顧。卽不得不多分。隨身只三營。卻不足惜。亦不足慮。惟慮他處之單弱。卽林翼之單弱耳。始議只因天堂一軍。急救介唐。不免深入。直探虎穴。因而石頭嘴不能不駐一軍。因而陳德園亦不能不駐一軍。查天堂一軍。不可撤退。不僅萬民性命可憐。鄙人聲名可畏。且異日不進桐舒則已。若猶有志於舒桐。則我軍循山外而圖人。賊匪負山而中而伺我。如芒刺之在背。如鯁骨之在腹心。牽綴我師。趨不前。理也。亦勢也。且昔年都多鮑盡力於宿太。而林翼獨勞心於兩蘄。及張家塆。且勝且敗。崎嶇兩年有餘。林翼之功少罪多。而林翼之心力。則獨苦矣。張家塆失。則蘄水蘄州廣濟黃岡均震。此鄂境山中之情形。天堂不失。則異日潛桐舒之軍行無阻。人固不得而喻其苦心矣。去年賊不知有天堂。三河挫失。乃得此險。今昔又不同矣。查四眼狗葉芸來僞報。均注重於此。天堂已撥九營。余會亭六營。蔣信玉等三營。勢能禦一萬餘賊而已。賊黨日益。則心以爲危。石頭嘴事。丈及幹臣七營深入力單。亦日以爲念。均苦無可退之地。林塆籌思再四。只有守定松子關兩路口。不動不變。以金逸亭進英山。以聯絡石頭嘴之氣。暫緩扎調。待時而動。以蔣道回龍灣。以聯絡天堂之氣。或續入天堂。察機而行。請丈駐黃梅。而賜四千人。先至太湖。駐蔣道之舊壘。則林翼之機局乃靈。而不致紛紛撤動。致負罪於百姓。而貽禍於將來。區區愚忱。尙乞鑒諒。

初十夜復初七之示。意猶未盡。亦殊無十分把握。惟天堂山險。旣已深入。似不可拔。余會亭初七日來報。賊已退。

去龍井關。此尙是怯弱。其精悍在浦六。將來未來也。丁月臺蔣信玉楊占魁三營。續又前往。事固難以逆料。勢乃不可中止。以天堂爲異日圖舒桐潛山之根本。又英羅今日之屏蔽也。守定松子關及麻城兩路口。而以希庵專圖英霍。從石頭嘴進兵。似是一策。舍商固於不顧。亦尙無妨。如能抽得之純四千人回援。同林翼與希庵共辦一事。則狗亦不足深患矣。之純之在太湖。不必卽動。待丈籌定可替代之人。再行相機而行。希庵處。林翼已專函求之矣。又龍灣似是太湖後路。林翼只剩三營。無能兼顧。又太湖西面稍虛。雖不必重兵。太空亦可虞。天意欲楚中撥兵。從商固入淮潁。以顧北路。前奏以希庵到日再商。嫌其遲也。天意以北爲重。恐須太湖克復後。籌六千人以隸午橋。乃可行也。至丈之應駐石牌。應駐太湖。殊難代籌。以地勢均未親到也。石牌深入七千人。乃足資戰守。太湖則酌分五千四千。以代之純。以彌縫其闕。亦可行也。乞丈酌之。總之四眼狗若從霍山潛山上援。之純一軍。仍乞撥回。則湘軍乃厚。撫標乃能獨往獨來。連日寒疾。未盡痊可。丁月臺治軍能起早。林翼欲學丈訓起早。而如弱不能勝何哉。

致各營 十一月十三日

啓者前因希請庵假。來鄂稍遲。西丹馬隊爲豫省暫借。亦因而稍遲。致各軍未能卽進霍山。以致天堂重地。英霍邊境。防不勝防。兵分則力單。深入則勢險。林翼之暫駐陳德園。顧潛山兼顧英山也。設大軍并力進霍山之毛坦。敵一帶。則天堂一軍。扼住衙門。而有藜藿不採之威。卽有進規舒桐之勢。東界嶺上清包家河造家嶺一帶。賊必不敢深入。恐霍山之兵。斷其後也。此時尙恐大股紛乘。不可不慎密自持。預先思畫。目今天堂之計。昌字六營。桂禮三營。兵將均勇。紀律亦嚴。當不致得罪百姓。亦力能分禦萬餘之賊。惟地大山多。彼此前後。照應不宜太遠。桂禮等營。駐上清及英潛交界之東界嶺。布置險要。定操勝算。惟須與昌營聲息相通耳。又山中伐木益兵。設險爲守。可傳官紳。速卽董辦。亦先爲不可勝。以待可勝之上策也。莫以爲迂遠而忽之。至余會亭所請移駐柏樹灣。以規潛山。似應先

得太湖。并俟大軍進逼毛坦廠一帶。乃可行也。

致曾滌帥 十一月十四日

昨夜細思光固一帶。本年似可無虞。金逸亭九營。住但店無益。應札飭前來英山之柳林河。以聯絡石頭嘴之氣。其轉運由蘭溪竹牌而進。亦甚便也。蔣之純所帶湘軍。暫緩調撥。以期迅克太湖。此似有憑。乞鈞酌。又思懷寧爲賊老巢。如援賊大至。似必注重桐城潛山懷寧等處。尊營不分。而并力駐守爲是。應請以三千人留守衛。而以七千人前駐石牌。乃爲勝算。又思狗賊上援。當是三路。力單亦是二路。或全力注重一路。則得之矣。其急救桐城潛山。不能遠繞六安。以圖光固。則似無疑義。若出三路。必有一假一真。若出兩路。必有一虛一實。此則全在偵探之確不確。以憑調度之靈不靈耳。假令狗賊當懷潛一路。而以天堂作虛疑之兵。則金逸亭一軍。或不免會并之純。及余會亭共一萬三千人。加以舒公馬隊。尙可展翼斜趨潛山之地。以包其後。如竟由山徑內犯。則以之純來英山。與金逸亭并力圖之。亦尙不遲也。此議何如。可備一策。乞鈞酌。浙餉尙可再奏。已擬稿寄省。即不得請。亦儘無妨。太潛克復後。另有籌畫。當不使我公之軍情。稍有虧欠。請勿懸念。廷旨催命希庵。當英霍一路。是錢荅疏中之詞。陳德園是黃州所屬。取其處英太潛之交。音驛甚捷。耳目較真耳。本應復奏。稍稍論列。而懶於起草。竟成痼疾。奈何。且俟安慶桐舒得手。再發議論耳。今日移帳山阿中。以避風寒。服桂枝湯三四劑。夜臥仍昏昏。意興亦不振。尙待將息二三日後。乃可以全愈也。

致莊蕙生方伯 十一月十四日

吉令事。卽如尊旨。光化是亂地。乞以時省察。毋致激成事變。致貽後悔。大抵董戒稍嚴。可銷許多不肖之心。正是

吾輩用寬用慈處。兵事太重。沈思再四。危機甚多。舍宮室而樂行帳。又增許多夫馬煩費。夫豈人情。軍事何嘗之有。以爲兵力厚。而勝負之數。又不系乎厚薄。以爲將才勇。而勝負之事。又不盡系乎勇怯。日夜愁思。實無可自信處。太湖之賊。全恃兵力作遙圍之勢。無長濠。無長城。賊如夜遁。只得空城耳。萬一大股援賊。近旬趕到。則我兵被城賊牽綴。二萬人只能以七八千應。援賊多。已分兵四路。勝敗之數。尙不可知。若以五六萬賊。從天堂霍山。以犯我軍。林翼之力。必不支。以天堂分去九營。石頭嘴分去七營。太湖分去蔣之鈍六營。均急切不能調歸一處。其金逸亭九營。尙在但店。已飭移進英山。距石頭嘴不過八十里。或猶可并力也。姑盡力以謀之。一月之內。舒公能以新舊馬隊一千名。由蘄水出紫英山大畝河。則聲勢較靈耳。希庵若速到。以一萬三千人。馬隊千人。直由英霍。以搗舒城。則英羅兩蘄。乃可安枕。否則防剿均苦不支矣。吏事得公主持。扶善類。秉正氣。持公道。陳直言。則馬羅二公。不得專美於前矣。天堂有會亭昌營六將。加以丁月臺桂禮三營。兵精將勇。固屬可恃。然深入虎穴。人皆爲我危之。從東南出水吼嶺。則潛山。從東出龍井關。則桐城。從東而稍北出曉天。則舒城。又北則霍山。不可謂不險。極意優待。以作其氣。口報手函。以導其機。刻下固屬甚振。但不知狗來又何如耳。

復余會亭 己未十一月十一日

逆水之賊。聞風遁走。小股非大股。怯賊非狠賊。戰事尙須審慎。賊之爭天堂者。方未有已也。務祈勤探確探。遠探并預先酌量情形。迅速稟報。軍火要件。運至來榜河。不如卽運至天堂。尤爲取攜甚便。已函告沈伍兩委員矣。

復翁祖庚中丞 十三日

所論賊趨定遠。麾下握定自守之策。而相機圖之。大是穩著。勝旣走而推袁。軍聲較爲聯絡。不失四路截餉。已是

可慰。然屢挫之後。新舊相間之時。整理亦非易易。其建議請滌帥纔出蒙亳。防賊北趨。滌帥不願來。川原平曠。徒恃短兵相接。實非利器。欲以南人而習騎戰。即習之二三年。亦懼不能得力。此事滌帥未必能任之。且聖心亦必另有權衡也。滌帥現駐黃梅。計由太湖進規安慶。以多都護鮑鎮唐道蔣道各軍圍剿甚緊。并不欲掩其前此血戰之勞。欲與相機策應。用心良苦。林翼以月之五日移駐皖邊之界牌石。扼潛太英霍四路之要。而以余參將一軍深入舒潛桐交界之天堂。刺賊援要害而壘。日來屢有戰事。天堂爲賊所必爭之地。即爲我軍繼進舒桐。所萬不可棄置之區。前陳逆自江浦走告潛城葉逆。僞報諄諄注重於此。竊慮潛太未能速下。該大股上竄。而英霍境地。防不勝防。六安光化固始之間。已爲鞭長莫及。來書謂廬州三河。均有可乘之機。尙暫存而不論。希庵假歸未到。其部下尙在蕪春。新調西丹。爲豫州借留。來鄂猶後。英山張八嘴一帶。祇會事恆七營。兵分力單。時深焦急耳。

致會滌帥二首 十五日

麾下移駐宿松。足寒賊膽。不分兵以待變。而急起以應之。自是勝算。太湖爲城賊所牽綴。林翼爲天堂所牽綴。葉介唐十三日來稟。賊已四路紛乘。余丁尙無告急之信。未知力量何如。此處有失。則英蕪處處皆警。尊意以金逸亭九營調赴張家塆。已札行矣。德意甚深微。惟石頭嘴又嫌遠耳。鮑之本生父母久故。臨大敵而請退。人或笑之矣。多以勢均權分。再三爲告。而實亦苦調度不靈也。如何補救。以免危機。實苦無策。之純恐異日難於合并。蓋城爲賊所牽綴。不能自由。且忽賊由潛山。山內山外。橫截太湖之後。希庵未到。林翼不能進兵。而英霍之間。必有一路二路牽我兵勢。太湖兵力。應專打援賊。即放走城賊。亦甚無妨。援賊破則所得不止太湖。援賊得逞。則即得太湖。猶獲石田也。乞鈞函告之。蔣唐鮑爲荷。多料賊情。其機智過人。顧全大局。委婉以救天下之命。皆我輩事也。一切機宜。求文指示。鄖兵尙擬撥援。乞緩期赴調。

丈駐宿松不分兵。是得體要。合機宜。卽不必再有疑慮。惟援賊大股將至。應商要事。具陳於後。一、事權不一。兵家所忌。七年八年以前。多鮑有都公主之。故能戰。今年鮑已實爲總兵。多已實爲副都統。一請省親。一言傷發。情狀不和。已可想見。古來將帥不和。事權不一。以衆致敗者。不僅九節度。相州一役。林翼曾奏言。兵事喜一而惡二三。江忠烈曾奏以兵事少用提鎮。多禮堂之爲人。意忌情深。伎心尤勝。然臨陣機智過人。且是天子之使。以副都統奉旨總統前敵。再四以權分勢。均爲言。不可不專膺委任。將鮑唐總歸其節制。調遣。否則太湖今年之兵事。必有決裂。不可收拾之狀。克己以待人。屈我以伸人。惟林翼當爲其忍。爲其難。非如此。則事必不濟。如因此而鮑請退。則留其兵與多。一、太湖之兵。不爲不多。然爲城賊所牽綴。雖多猶寡也。有牽綴之勢。與特立獨行。四無牽顧之勢。大不相同。設援賊乘我官軍有內外受敵之勢耳。石逆專伺寶慶。兵力非不多也。而竟爲希庵所破。鄙見以爲注重援賊爲上策。一、多禮堂料賊勢不從太湖正面而來。必循潛山山僻而來。乘我之虛。兵機似爲不謬。一、希庵之爲人。別是天地間一種剛烈性情。世人以官派處之。必誤。以富貴功名人視之。則視若腐鼠。林翼誠求之。或尙念我苦心。一、賊步步爲營。以禦馬隊之衝突。其必循山徑僻處。亦爲此。若待其壘成二三日。便無去可擊。應請函囑鮑唐爲是。一、林翼處只贖三營。屢蒙垂念。已遵奉盛意。調逸亭暫來。逸亭屢言力單。非合并之純。則難言戰。而天堂九營。及石頭嘴七營。孤懸心以爲危。如之純會合乃妙也。然亦必俟賊情畢露。乃可言戰。以上敬乞鈞度裁示。明以教之。

十六日專函奉請指示。據各路官紳士民延訪之詞。賊勢若趨安慶。不足畏。若從小池驛循潛山之羅溪河王家牌樓高嶺一帶。則負山爲險。爲潛山天堂之東南。爲太湖之西北。中間百餘里。此路梗塞。異日進兵爲難。太湖之兵。腹背受敵。天堂之兵。亦難得力。日前多禮堂言。宜爭小池驛。卽爲此也。此百餘里之中。如何彌縫。不失之法。敬乞籌度教示。又賊必分三路而來。一小池驛。一天堂。一英霍也。據林翼之愚見。小池驛應聽多自籌畫。而賊之來路如何。俟有確信。林翼須駐柳林河也。又烏向不和。致誤永安。鄭秦不和。致誤桐城。今日之事。以申多抑鮑唐爲上策。乞

決定示之。此天下安危大計。林翼非僅屈己以申人也。

致官揆帥 十六日

自拔營後。結營山頂。風寒中人。因念年未五十。而氣體如八九十人。殊爲可慮。十六日奉十二日手諭。敬承一切。應復者先列於右。應商者續列於後。敬祈酌定。一天心欲楚派兵援淮北。自應敬遵。弟昔年卽創爲此議。昨午橋書亦未決絕辭復。應於唐鮑等軍內酌籌。惟援賊號稱十餘萬。實亦六七萬。分股上犯。此時淮北已輕。必難卽籌耳。如應復奏。亦須以援賊上犯實情入告。請告之蕙生。作一復奏。一松子關兩路口爲後路門戶。如太空虛。必有他變。弟前札趙克彰李續燾紮兩路口。而松關尤重。應請改命趙克彰李續燾移駐松子關之五斗坳。此二人滌帥所惡。不必撥去爲安。一弟分九營入天堂。分七營扼石頭嘴。弟身邊只贖三營。無可抽撥。以替煥義渠。一翁祖庚一萬兩。足見仁懷義氣。天下之事。皆能如此。何患不濟。一馬隊馬匹所籌撥者極是。弟無異議。一狗逆上犯。必分三枝。必有二假枝。一真枝。弟固無回黃州之理。深入尙未能也。一多禮堂屢言無權。然札飭總兵道員。概歸節制調遣。亦頗未當。多勇而怯。鮑勇而愎。唐固中才耳。無可無不可。沈思苦想。軍事以一事權爲第一要義。唐代九節度之師。潰於相州。可爲殷鑒。應於日內設法補救。一多與鮑不甚相得。滌與多亦不甚洽。一太湖萬七千人馬隊在外。滌軍在外。兵力不爲不厚。然爲城賊所牽綴。賊若至。成敗利鈍。未可逆覩。私心日夜憂之。心以爲危。力莫能助。此實情也。一弟當英霍一路。以天堂之深入。頗嫌孤懸。其餘應籌應議之處。日不暇給。亦實無一分把握也。一舒六應飭挑足新舊馬隊一千名。滌帥處僅交二百名亦可。舒處須稍多。乃足用也。挑定後。速請札飭駐紮蘄水英山交界之大嘔河。或英山城外亦可。切速切速。一浙餉澹村願解。而旨意不准。應請再奏擬稿。較滌帥原稿爲安。仍請酌定。速發。遲則明春餉項不支矣。一兩路口松子關尙恐兵單。弟當另籌兵彌縫之。

致多鮑唐蔣四帥 十七日

此刻大股上犯。挾全力而來。破滅此股援賊。則安慶舒桐廬州。均可不攻自下。以賊目只四眼狗一人。其餘均不足數也。如待其逼近。步步築壘。則是棄馬隊之所長。用賊技之所慣。四眼狗慣以築壘。裹官軍之後路。與餉路。曾一夜而作壘數十座也。料度賊情。審量地勢。臨陣機宜。變幻不窮。惟禮堂兄實爲將帥之雄。中心欽企。不可言狀。此時必望大力主持。并請以函告滌帥。速即分撥重兵也。應商事宜。條列於後。一請唐道一軍。即行移駐石牌城中。以便將禮堂兄所部各營調歸禮堂兄本係都護之親兵。呼應較靈。勇敢尤著。必成大功。一請滌帥撥七千人。駐太湖之西北。以固楚疆。滌帥麾下多樸實之才。無浮囂之氣。惟乞二日三日內。即行移營。則吳楚之民。感且不朽。乞禮堂兄義渠兄加函敦請。以全大局。一請禮堂兄以所部馬步。并春霆弟全營。均遵旨歸禮堂兄調度。前往潛山地界。并力以遏援賊。一請之鈍八營。由小池驛高橫嶺入天堂。或由辛家衝柳家畷入天堂。以遏大股山賊。山中有重兵。督會余參將六營。丁訓導三營。則舒桐潛霍之賊。皆如凍蟲。如檻獸。蟄伏而不得逞。山中探辦萬人之食。冬令尙無匱乏也。如山中賊匪盡退。之鈍兄尙可應援山外。一請舒都護速駐大畷河。林翼同金守駐柳林河。則英霍之氣皆通。而吳會七營。不致孤懸。聲援可接。一禮堂兄步軍。已咨請加給口糧。以歸畫一。并行糧臺矣。以上各條。如蒙俯鑒。愚誠則屠狗可成。大勳可卜。但此計須決斷。號令須畫一。此計不可過四五日不決。過四五日不決。則後悔無及矣。寶慶之被圍。三河之失險。可爲寒心。應請公同函請滌帥。速賜決斷。至臨陣機宜。禮堂兄所能獨斷。各營將士恪遵調遣。斷無貽誤也。

致李申甫祠部(榕) 十七日

得書敬悉。軍事不了。恐爲三河之覆敗。爲寶慶之被圍。日夜苦思。呻吟不已。十七日三更定計。奮然興起。坐以待旦。以地勢賊情而論。已拊其背而扼其吭。官渡摧袁。虎牢擒寶。至計深機。亦不過如是。若遲滯不決。則步軍必被圍困。希庵母病。或難絕裾以行。馬隊攻壘。非所長。求野戰不得。其禍敗仍累及滌丈。彌縫補救耳。七千人之請。九頓首而出。志在赴急。難以紓楚耳。或疑闕東面是縱賊。不知賊所恃者城。官軍之所困者。株守之城賊。縱之使戰。可勝也。若待援賊外圍。城賊內突。是官軍有內外夾攻之病。其敗無疑。或又疑太湖功棄垂成。不知得空城。不如破賊。去冬曾得太潛舒桐矣。棄之如遺。則得城不如破賊之功。不待再計而決矣。况破援賊。則可連下五六城。而太湖仍在吾掌握之中。且以地勢論。扼潛山之山外。與天堂之山內。則援賊絕跡。萬不能過潛山一步。亦不能從天堂山僻。繞至太湖。〔此中二百餘里。以天堂爲要。〕太湖仍釜中游魂耳。舍大圍不謀。而小圍是好。智者不爲也。如此布置。且限定三四日成軍而出。則大功必成。賊首頗知兵。不南走桐城。歸安慶。卽北走英霍。趨商固羅麻。然禍猶稍紓緩也。至多公之爲人。其臨陣料賊。明決如神。繞果冠倫。實有可憑。臨大事之時。卽楊素鄧羌。猶當委曲以成人之美。若不假以事權。則事終決裂。事後銷除一紙文書耳。蠲虛止滌丈太湖之師。是小人儒之識。非所望於吳楚東南之大局也。弟敬滌丈。生於至性。此事必得請而後已。且不能逾二日。公與少荃雨亭公求之。當必憐此包胥也。帥府應在宿松城中修城池。設門禁。資守禦。不可輕出太湖。千言萬語。責成我公與少荃雨亭也。公與彭公統兵七千。駐太湖西北隅。萬全無失。不輕出隊。出則齊全。勝亦不遠。追仍一面請元公飛舸趕來。林翼初不料元公之速去。林翼駭懼自危。仍以婉求來鄂。爲是滌帥派七千人出師。弟卽改駐英山柳林河英霍一帶也。

致會滌帥 十七日

七千人之請。九頓首而出。丈必憐此包胥也。得潛山山內之天堂。與潛山山外附近之要道。實拊援賊之背而扼

其吭。除却潛山城外十五里驛路。與天堂山內一路。卽十萬賊來。無隙可入太湖地界。此二枝兵。可管三五百里之要。非扼其吭而何。天堂得手。賊如上趨。則以萬人出龍井關。搗青草塢之虛。非拊其背而何。官渡摧袁。虎牟擒竇。智計亦不過如是。而太湖內數百里。無隙可乘。舍小圍而謀大圍也。幸採納決行。且所言不得過今日。今日已三請矣。明日仍如此法行。賊首當趨英霍一路。舒公與林翼。尙有步兵八千人。合金會吳及撫標三營。以張家塢在內地。不須兵也。賊不至太湖。不得過潛山。不得過天堂。則千穩萬當。馬兵千人。或尙不致決裂。再俟到英山。沈思審處。丈如疑林翼之謀爲非。則太湖步兵必被圍。馬隊於攻壘攻城非所宜。以漸而致困。一二戰不勝。彼之衝突。是所長矣。將有自顧其身。不顧大局之一日。仍以大禍貽丈。補救彼時。乃倍艱難耳。如賊勢大股全趨英霍之純。在天堂。尙可援我湘軍。是一氣。卽改撥二三營。交幹臣與逸亭。均投機也。唐義渠不宜株守石牌。只可留七營爲守禦。而仍挑四營歸多。以援賊多一營。卽備多一路打援賊。則兵愈多而愈妙也。總之破援賊則可得五六城。爲援賊所圍。非三河之失。卽寶慶之窘。得太湖仍當棄之。況未得耶。求丈鈞度決計。丈帥府宜在宿松城中。萬不可移。

致會滌帥 十九日

十七日林翼之議。如有不是。尙乞鈞定。林翼聞之希庵。屢言及七年八年各路之戰事。蓋狗賊之善圍官軍。是其長技。鮑春霆七年血戰意生寺。六營一統將。僅餘一二人尙在。其餘非捐軀。卽成廢。世間忠勇。固推第一。然待其壘成以圖之。實大喫虧之事。故林翼之愚。總思以打援賊爲先著。不欲使其內外受敵也。應商事宜。今日仍專函往商。蔣唐鮑多。條陳於後。尙求鈞酌。一。唐義渠不願駐石牌。以替代多之四營。且言如必欲派往。須帶全軍。應如何準行之處。林翼亦不敢執成見。一。鮑春霆六成擊援賊四成。守舊壘亦可行。但六成擊援賊。更須他軍大力相維。否則單弱。乞鈞定。一。之純不入天堂亦可。天堂尙未十分告急。余丁九營。亦尙可恃。英霍商固。如不萬分緊迫。苟可以金逸

亭支持。亦決不紛紛徵調也。一宿松各營。只苦無統耳。兵將則均樸實。卽他處強兵。亦不過如此。仍乞鈞見再酌。能撥數千人。則抽去之純春霆之六成。打援賊更穩矣。一禮堂之深處。丈諭至精。默而存之爲是。唐鮑於打援賊後。均可獨當一面。另有所思。（西蜀淮北兩處也。）之純則亦不可。羈一事權之意。虛且暫局也。專責成之意。實否。則馬隊不救步兵。畢竟是步兵苦耳。丈旨林翼萬不敢違。然此事竟未能恪遵不失。中有苦心也。總之打援賊。必須精兵萬人。馬兵千人。似須於城外稍遠。以免內外夾攻之苦。四五日定計。則一成不變矣。林翼性躁愧甚。然躁於先。尙可彌縫萬一。到六日後。卽當靜默不言矣。

致會滌帥 二十日

得賜示。以十七日所議。不甚妥洽。十九日又一件。計復諭已在途。蔣多仍主前十七日說。鮑亦有二十五日拔營新倉之說。均復十七日之議。而十九日之議。明日必到。到時再以尊意六成禦援賊。四成遏城賊。蔣赴天堂。多爲游擊之議。再行奉商。林翼私計亦難固執。惟以遠剿則不穩。內外受敵又不穩。鯁鯁過計。殊無把握。如潛山之王家牌樓。高橫嶺。羅溪河一帶。爲援賊捷徑。則陳德園亦於太湖後路。微有關繫。英霍一帶。異日亦必有警動。舍陳德園不顧。則恐此心之非。舍英霍不顧。則與奏定章程不合。此事尙乞鈞示裁決。賜復遵行。至蔣赴天堂。在內則有天堂之余丁九營。在外則高橫嶺亦恐四千孤軍。不能獨支耳。尙乞鈞奪。總求抽重兵以制援賊。而附城逼近城根之壘。不爲城賊所襲。乃爲上計。至一靜一動。或遠或近。林翼本無固見。亦無把握也。統求鈞裁指示。四將此三四日尙可細商。過此當靜以俟之。忍以持之耳。

致鮑春霆總鎮 二十日

連得來書。均是復十七日兄所條議之信。弟有二十五日拔營新倉之議。二十日兄處得滌帥十九日一函。是復兄十七日之信。以兄前說爲不妥洽。仍須熟商。一、滌帥言以之純入天堂。天堂現有余丁四千五百人。天堂之外。則高橫嶺水吼嶺王家牌樓。均賊所必爭。若僅以蔣軍四千人獨行。亦恐尙單也。一、滌帥言以弟與義渠兄仍紮太湖。以六成禦援賊。以四成禦城賊。四成留壘中。不致爲城賊所襲否。一、弟言二十五日拔營往新倉。是否應如此舉行。候滌帥酌示。一、滌帥之意。恐襲遠則拔營爲難。安營爲難。米糧軍火轉運爲難。一動不如一靜。剿遠不如剿近。此滌帥之穩計也。兄之愚見。亦以遠剿則恐兵分力單。逼城又恐腹背受敵。鯁鯁過計。不過如此。至兄處函商。本無固執之見。亦非遙制之心。只求力破援賊耳。只求不爲城賊所襲。不爲援賊所包耳。小包暫包。尙易打破。兄只以函商。不用公牘。恐兄執著一見。以札施行。則百里之外。難於揣度。或有貽誤也。三四日後。則并函商亦不必。只有戮力同心四字爲囑耳。仍望與之純義渠禮堂兄商定。往返文書。恐亂人意。兄不爲也。

致多鮑唐蔣四帥 二十日

狗逆上犯。援賊既多。城賊亦狡焉思逞。我軍內外兼顧。似不免牽綴之虞。鄙意欲於太湖城外。或官軍營外。修濬長濠。爲少省兵力之計。如六年圍攻武昌時。賴長濠得勁。城賊不敢輕出。遂能注重魯家巷援賊。挫其兇鋒。鄂城亦以徐下。成效既著。前事可師。敬請閣下相度地勢。與各營熟商妥辦。如可日內濬成。則城賊一面之防。僅守長濠。較爲易易。卽太城得手。亦足以遏與竄逸。而盡數殲之。是否可行。卽乞卓裁。速籌示覆。

致河南巡撫英蘭坡 二十日

頃聞懷遠一股。出撲壽州。六安一帶兵勇。全數撤往援應。而狗逆以十萬之衆。蜂擁上犯。其前隊陸續已到桐舒。

天堂之余丁各營業已迎擊。疊據搜獲僞報。並賊探供稱。以太湖圍急。注意上援。并勾結捻匪。窺伺商固。兵分而單。鄂力殊難支展。軍情瞬息千變。未便紛紛抽撥。致存瞻顧之思。閣下展策籌邊。助華在望。如能飭口道張守。以三四千人守定固始。即可互爲犄角。或新練尙嫌單薄。但得穩守城垣。臨時策應。亦爲較易。兵機難測。固始爲賊所注重。尙乞卓裁斟酌。先發制人。而固圍之謀。卽爲庇鄰之舉。惟高明垂察焉。

致多鮑唐蔣四帥 二十一日

二十一日得禮堂兄二十日來函。并春霆弟二十日復函。具悉一切。應商事宜。條列於後。一、天堂九營。現無告警之信。該九營本尙可恃。且地勢亦險要可守。如有警信。候臨時再行函報。此時之純一軍。不必入天堂。以仍紮太湖爲定計。以防城賊而備剿緩賊。一、義渠兄一軍。若全營移駐石牌。誠如禮堂兄所言。以有用之兵。未免置之閒散。應仍紮太湖。以防城賊而剿援賊。一、春霆弟來函。二十五日拔營新倉。查霆營駐紮東面城賊乃困。應否移駐新倉。抑或遵滌帥前函之意。仍紮太湖。應行應止。或動或靜。應請春霆弟同禮堂兄從長計議。弟不遙制。惟求禮堂兄春霖弟。計出萬全。乃爲善策。總之天堂九營。目下並無告急之文。而滌帥奏定第一路。現駐宿松。必難分兵前來太湖。是太湖之城圍。未可卽解。惟有就近防城賊。俟援賊已至。就近抽各營精兵痛剿。此時不必紛紛調撥。徒勞兵力。且尙不知賊勢。專向何路。禮堂來信。言及各軍不可過分。亦不必速集。免至臨時分調。難於得力。殊切肯要。此後一切機宜。均請禮堂兄審量賊情。隨時酌奪。隨處策應。弟是奏明專管第三路英霍之事。太湖機宜。惟靠禮堂兄商同諸位一力肩承。相度布置。弟相隔百里。且必須馳往英羅邊界。斷不能遙度太湖軍事也。

再者弟於發信後。卽專意料理英霍一路。兼顧商固一路。卽不再以煩言奉瀆矣。太湖之事。一意奉懇。只求力破援賊。吳楚幸甚。天下幸甚。

再者滌帥必不撥七千人圍太湖。則現在圍兵均屬難撤。誠恐我兵一撤。不但太湖城賊薪米俱便。且恐其出入自由。是弟前議均無用處。殊深焦灼。

致會滌帥 二十四日

來示敬悉。今日得霍山報。壽州無恙。賊盡西竄。似應拔調駐英霍之交。以金舒六七日均可齊到英山也。春霆蒙先添五百人甚好。林翼曾面許異日添足五千人矣。春霆之英鷺。何減迪庵。迪庵之得士心。過於春霆。迪庵失地勢。五千人皆廢。至意生寺之事。一戰而去二營官。亦可一不可再之事。春霆所處地勢。可以四面受敵。凡軍事顧一面則弱者可守。顧二面強者可戰。顧三面強者僅可守。顧四面則強者亦難守。秦王迎擊於虎牢。非待其逼城下而始戰也。大抵四面受敵之境。卽能戰勝於一時。而亦不能受更番迭戰之擾。陳玉成未必一戰卽却也。此間不憂唐蔣之軍而深慮春霆。愛春霆也。春霆似孟施舍。詢以軍事。斷不告饒。加以激厲。轉成憤氣。宜委曲而暗中保全。此意不能宣布於人。唐之所處。萬全無失。膽既遜人。識亦微瑣。蔣之所處。亦尙可全。如援賊不至。幸甚。如援賊之至。不逼太湖。亦尙無慮。設真從此路而來。則必先全春霆一軍。乃能得手矣。

復彭雪琴方伯

受降之舉。責以後效。復示以機宜。使之守定般家匯。而謀青陽銅陵兩處。辦法最爲妥善。深以爲慰。建賊分股出城。乘勢取之。亦自易於得手。適據普欽堂來函。亦有出剿建德之說。而苦無行糧。兄已代函江撫。而囑以相機進攻矣。狗逆有信上犯。太湖城賊。聞大援將至。公然出城挑戰。天堂之余。丁各營。昨復迎擊桐舒。賊股於澇水一帶。兵分兩單。深以爲念。又賊撲壽州。六安一帶兵勇。全數撤去。英霍商固境地。防不勝防。兄擬於日內。移駐英羅地界矣。

致多都護 二十七日

得來函指畫詳明。傾吐肝膽。足見胸有成竹。目無全牛。弟既以軍務重大。奉托閣下。斷不掣肘。亦萬無改移。弟負罪出山。所欲破者賊耳。當卽照來示飭行。仍懇閣下速卽以上策一條。迅速商定。卽刻咨移。疑事無成。能謀尤貴。能斷。至英霍一路。商固一路。勢必有賊分擾。弟當於初一日拔營前往。照應一切。儻非萬不得已。弟必不致紛紛調援也。仁兄來函。以鮑唐圍太湖。寬爲布置。四面合圍。綽有餘力。抽出蔣之純於潛山。黃泥鋪紮營。貴營卽在黃泥鋪迤東五里之野雞灣駐紮。以貴營馬隊策應兩處。兼照管石牌。不獨石牌能守。并能制水吼嶺之賊。不敢窺伺天堂。其犯天堂者。僅舒城主簿園。桐城之龍井關一路。天堂九營。尙不難於剿辦。此爲上策。弟一面函知鮑鎮唐蔣二道外。卽請如所策。咨移辦理。可以操必勝之權。總之緊圍太湖。不使賊出。攻拔潛山。或駐潛山附近。穩紮穩打。靜待援賊奮力迎剿。不使賊入。均是要緊之著。弟決無異議。切函致之諸將。亦必遵辦矣。如可定計。卽請尊處通知。決策施行。弟處斷不掣絲毫之肘。其太湖如何圍法。亦請指示。唐鮑二軍。切囑切懇。英霍商固。弟之責成甚專。唐鮑二軍。能制太湖之城賊不出。則龍灣一路。蘄州之陳德園一路。均無虞矣。

致官揆帥 二十九日

得手函。敬承一切。太湖軍事。議論多而成功少。極意求全。當不致誤事。儻援賊不至。圍城固可靜待其飢潰。如援賊果至。則亦惟有弛一角。而并力打援賊之一法。援賊破則城自下。且又不止太湖一城矣。天堂一軍。扼潛山桐城舒城霍山四縣之要。二十一日又遠剿澧水而捷。然究嫌力單。又已深入重地。尙須隨時補救。弟任英霍商固。而近日所謀。尙在太湖。非好事也。太湖不得。則各路不能進兵。湘軍九營。業已移紮英山柳林河。弟亦擬移營英山羅田。

之交。以顧第三第四路。尙待太湖各軍議定。乃可行也。舒六兄馬隊千名。料理齊全。可壯三路四路之軍威。新兵雖未慣戰。然有步軍相依。尙爲可靠。富慶阿歸禮堂。或易駕馭。押馬兵到。尙可得百三十餘員名。歸弟處。仍是歸舒六兄。打破援賊後。以三四百看家亦妙。壽州賊已退。廬州賊欲上犯。然均是游魂未定耳。靜以待之。或可有濟。淮北撥兵一節。現在淮北不警。或俟一月後。另行籌撥。思量再四。惟唐義渠可撥。而彼心甚畏遠行也。

致莊蕙生方伯 二十九日

金逸亭一軍。已移英山柳林河。英霍商固不可空虛。若偏重一隅。必貽後患。弟之暫行移駐陳德園。爲太湖代謀耳。太湖之事。援賊不至。主圍而使之飢潰。援賊若至。以二軍扼楚疆之西北。以二軍專打援賊。雖近於弛圍。而所保全者必大。成功必美。此定計也。軍事忌二三。尤忌牽綴。以萬人圍城。只算三成。是一萬人只有三千人之用。此理至精切。非經過打仗者。不能道及此情也。兄聞之。可爲第一粲。十年軍事。無人能運掉靈捷者。只苦頓兵堅城耳。李左車之教。淮陰是也。希庵已六函催之。親見其母。輾轉牀褥。必欲其絕裾遠行。恐非人情。況我鮮民。何忍強迫。近日必有復書前來。如實不可強。自以勉強支撐。曲體人情。爲是公意。以爲何如。弟強之使來。恐希庵異日有終身之怨。弟准其侍親。恐弟等兵事不了。而妄自擔荷。異日又爲吳楚士民之怨。弟殊難自處矣。浙江月餉一片。揆帥已允奏聞否。秦晉蜀三省。萬不可恃。以心不在鄂故也。澹村先生由鄂入浙。深知鄂力艱難。當不以空言搪塞。丹初本領本大志節亦堅凝。所謂六君子。當以丹初爲第一才。樊案易了甚慰。當以顧大局。扶善人。申正氣爲主。公會受滌帥之知。愛人以德。毋使楚南士民。以此致怨於滌帥。卽是愛敬之至理。感甚感甚。

致鮑唐蔣三帥

狗逆上犯。遲速無定期。而可決其必至。禮堂兄與之純兄專任迎剿。春霆弟獨駐東路。內外均當賊衝。應移駐北門。歸上年所駐舊壘。義渠兄應移駐西門。以補蔣軍之缺。庶幾聲勢聯絡。可以全師。即可以扼楚境門戶。第臨事爲此不免倉皇。而先行弛圍。亦慮以長賊志。必須確探狗來消息。相時而動。不先不後。適合機宜。使城賊不得早逞。而援賊大至。亦有以并力剿除。斯無瞻顧牽綴之虞耳。

復唐義渠渠觀察 三十日

得手書。擬將訓營撥二三營於西門駐紮。其靈營俟蔣軍移去。即紮蔣軍北門舊壘。大約北門與小西門。靈營專之。南門與大西門。訓營任之等語。如此辦理。即令援賊果至。靈營不致孤軍隔於河外。是以二軍專守太湖。顧楚疆。以二軍專打援賊也。事屬可行。可以無損。惟移營之遲早。應待多都護探實援賊之真僞。且候其酌定緩急也。此議定決。弟以後亦不煩瑣。惟望靜審機宜。以待賊耳。

致錢萍石星使 二十日

臨奉賜書。事機明決。虜在目中。馬文淵隴蜀之規。趙壯侯金城之策。無以踰此。滌帥以中朝不准餉。不准蕭張。奏言兵力僅可強自支撐。可守不可戰。請兵一節。往復十函。終不可得。然亦尙有他法可施。應以援賊之遲速。定分合之緩急。如援賊果至。以多與蔣專剿援賊。以鮑與唐專顧太湖西北。以固楚疆。跡似暫弛東面。而援賊果破。太湖及附近各城。均爲我有。又何嫌何疑。憚而不爲耶。此時尙在靜中密札繕就。俟賊情畢露。決計施行。屠狗之功。不可知。而覆車之患。必可免矣。英霍商固情形。賊情游魂未定。弟雖分九營入天堂。分八營助太湖。然使專一而不二三。注重戰事。不聽皖省州縣紛紛請兵。則事不牽綴。尙可力戰也。金逸亭九營。弟尙贖三營。加以吳曾七營。尙可九千人。

舒公馬隊千名。雖未慣戰。然弟之用馬隊。向以出隊後。遣弁告之。緩步而來。則馬隊在後。賊無包抄之技。俟賊鋒已銜。賊陣已亂。乃縱馬隊乘之。故馬兵用力少而成功大。斷無敗理。特馬兵用之商固。霍盧則有力。用之英舒。則無力耳。林翼駐營。是英山地界。兵已至而將不前。哀此皖民。延望終虛。然速進亦實不穩。此又林翼等無可如何之苦境也。鄙人何知兵略。昔年不應招納楚人。結爲營伍。私計欲自了皖難。則鄂疆稍安。非如八斗才之大言不慚。欲以川粵自任者也。江南大軍五萬人。以圍城而誤皖。北皖南之全局。周天培李若珠之挫。乃牽綴而致敗耳。石逆以二十萬人圍寶慶七十日。遇希庵兵不滿萬。一敗塗地。則圍城爲危機。攻城爲非計。可反觀而知其竅矣。兵事或六千七千人而大勝。或一萬二萬人而不勝。此理難言。

致曾滌帥 十二月初三日

初一日匆匆奉復大概情形。林翼連日反復思議。謹將愚慮所及者。開列於右。援賊未至。且仍舊章。不動不變。卽小者罅漏。亦尙無妨。若派隊接糧。則洪山石嘴。相沿已兩年矣。或尙無礙。援賊果至。以訓營靈營專守西北隅。并力以固楚疆。以多禮堂蔣之純專辦援賊。此爲定計。不必更易。蔣之營伍。固湘軍之尤精者。八營獨自支撐。尙可稍稍自立。況益以突騎一千二百耶。蔣公本與多公相合。前此指派訓靈各營。終日紛紛。迄無定局。近日多公專指蔣軍不及訓靈。則蔣公必無異說。蔣公八營。俟果有賊至。先二日歸并多處。亦不過石牌新倉一路。卽遵來諭。不必先圖潛山。來諭索性大弛一節。恐各營不從。靈營尤難應命。太湖四軍。不必兼顧天堂。應如尊諭。當謹守不失。靈營俟有援賊大至。先二日移蔣之舊壘。不致腹背受敵。則靈營可保全。此時亦仍不動。圍城之難。和向以六萬人。而七年不見功。禍且遍及各省。石逆以十餘萬人。七十日之久。而爲湘軍所破。蓋面向堅城。志有所伺。則不能顧其後。與其旁情見勢絀。無一而可。此李左車所以教戒淮陰也。然非援賊的實上犯。亦不必弛圍。季公二十四日來書。潛川已到。

湘潭催令速來。溶川到則策應第二路。必能大捷。目上機宜。林翼均是鯁鯁。過計只在援賊果至之後。必求運掉靈活。注重援賊。正煩鈞慮耳。援賊之頭目不授首。則半年一小警。一年一大警。吳不得安。楚亦不得安。翁祖庚及霍山令羽書請兵到霍山。兵到霍山。舒城必震。天堂亦穩。且皖民延頸西望。林翼甚愧於心。而速進則嫌不甚妥。請酌示機宜。湘軍無將。若待希庵。非一年半。不可期必。只可以金代領之。而助以事。丈與吳廷華何如。此間之事。似是一氣。曾卓如兩次奏報請鄂兵千人。湘兵二千人。如因敍州土匪。則可不必。若石逆由荔波竄蜀道。則非水陸二萬餘人。不能救也。三千人只可嘗賊。有實濟於蜀。林翼定計。初六日移營英山。與金曾吳合辦一事。以守前議。

致官揆帥 初五日

太湖之事。籌議已定。援賊不至。城可必得。援賊果至。亦不誤事。弟即於初六日移營英霍之交。安一老營。希庵來信。痛哭流涕。萬不忍舍其病母。而即日就道。其母年已七十四矣。親見其病臥牀褥。而絕裾以行。此豈人情可近之人。惟一軍無領將。弟若強希庵。則非情理。自任兵事。又恐誤事機。其軍有金守吳縣丞二人。老成人也。或可委任。容林翼斟酌辦理。倘金守能任此事。則甚妥當。章志俊投誠。獻出池州。已由楊厚菴先行賞給二品頂戴花翎。其部下之黃文金等。中道反兵。自相殘殺。已被章志俊殺退。厚菴之意。欲俟再立大功。方可入奏。至口糧一節。今冬尙可不必代謀。明春立功後。如應籌給。由湖北酌量賞給。總之討賊之策。不可全恃招降。兵強則降賊至。又降賊須陸續解散。（聞初降有萬餘人。近已散去數千老弱。）并實心不擾百姓。乃可施恩。請中堂以此意掣銜復奏。大概此等事并非得意之筆。且恐貽後患耳。太湖克復。諒不遠矣。

致湘營金逸亭 初七日

得書具悉一切。步軍萬人。應由統帶自選。則籌兵一層。似可不虞。其掣肘。霍山之米。自應由營採辦。可發給米價。萬金交營。委員由六霍舒固始分採。亦似不致空乏。則兄所慮二端。足以自便。惟翁中丞迭函請兵到霍山一節。近兩日。則以舒城援至霍山六安等處。飛稟望援。弟意欲先撥撫標二營入城暫守。蓋慮賊踞此城。則異日進兵爲難也。且聞城糧有五千石。亦棄之可惜。惟弟營分撥殆盡。且萬一有賊到霍山。則閉城固守。固可十日不疲。然終無不發大隊援應之理。亦無不速卽援應之情。若他處不牽綴。則萬人亦須直進矣。此層應請速爲思議。決其可否。石頭嘴七營。惟事公二營。尙待斟酌。餘均一氣。撫標有無可挑。隨兄酌之。若以一軍從霍山入毛坦廠。一軍馬隊從流波。撞會於毛坦廠。則松子關商固均無警矣。

致多禮堂都護 初七日

初七日行至英山縣崇山鋪。接到初五日來書。敬想慷慨激昂。忠義奮發之概。令人心感。第二路本是兄等專政。弟處不可掣肘。亦斷不忍掣肘也。兄意以備援賊。須先期布置。弟卽當照示飭行。兄意不望蕭軍接應。此志甚壯。可密存於心。不必宣布。滌帥不分兵太湖。其奏明第一路。或是石牌安慶樅陽廬江等處。弟聽候滌帥自行酌度。瑣瑣奉瀆。轉非美事。弟明日到英山。卽備公牘。咨行尊處。凡太湖潛山桐城廬江之事。遲速遠近。悉聽主裁。弟處斷不牽綴游移也。

復荊州府唐蔭雲 初七日

治水之法。以疏洩爲上。專事抑塞。或慮勞而無功。我兄按轡周巡。當能熟審地形水勢。於監沔兩州縣積年被淹之故。可得其大概。能否擇利而爲之。願以見示。錢漕有增無減。於軍國大計。重有補苴。牧令無欺隱。民情亦無損傷。

而勘災之能事畢矣。新灘辦法。痛除州蠹。非辣手懲創。恐痼弊不除。我兄能親往手拏。更美更妥。

■復荆宜施道粟仲遠

敘州股匪。不難剿除。新徵兵將。第恐未能得力。則養癰適以貽患耳。遠探逆情。隨時防禦。最爲要著。川鹽所及甚遠。而釐金增減。軍餉之贏絀攸關。各處行商。亦可於各局關要。照示軍情。藉以廣招徠而通緩急。新灘辦法。最以痛除州蠹爲先著。然接辦不力。則慮前蠹既走。而後蠹復來。歸州之牧。與新灘同知。暨辦理局員。優加薪水。重養其廉。使得勵冰心而彰鐵面。其并歸鹽務公費。著爲款目。當俟揆帥酌定。准行藥局存積贖。解繳省局。清查細數報銷。妥協之至。洋藥關稅。既不拘完部章。則偷漏之防。必須設法查究。此物質輕價重。務乞諄囑局紳。悉心籌辦。因地制宜。爲禱。日來蜀事如何。花布各莊。當大有起色也。

■致左季丈李仲雲 己未十二月初九日

芝房遺孤零丁可念。鄂中莊蕙生方伯。文友石廉訪。顧子山觀察。張仲遠觀察。厲伯符觀察。五君子又助百五十金。皆仁人之粟也。託公以前項置田。乞賜查收。再爲擴充八九畝。以足其衣食。士類得飽食。便可自立。惟乞盛德成全之。又聞如冠九太守。另寄百金到否。

■致曾滌帥 初十日

奉丈言以敵部及大部。作堅扼之師。多鮑希浚作游擊之師。唐尙在可酌之列。蔣終歸希。一一如尊旨。可尺寸不失。林翼以英山爲老營。暫無深入之勢。惟皖楚之交。萬山叢薄。袤斜三四百餘里。如英山霍山潛山。皆山邑也。霍山

設城在山之盡處。如及賊之未至。而以兵臨其城下。則凡潛山霍山英山羅田麻城蘄州蘄水之山險。均爲我奪。又不僅天堂一隅之爲可貴矣。擬以十三日派吳廷華先至黑石渡。十六日派金逸亭繼進。十九日二十日舒輔廷之舊部馬隊四百人。從流波磯繼進。均於霍山城外。相地駐紮。英山城距霍山城約二百七十里。得此山險。異日不致因孤城牽綴我兵。而轉運之煩。勞費加倍。然興兵以爲民也。使霍民輟耕太息。十室九空。不如勞師而使貧民稍資春耕。所謂住與行。勞費正等也。商之諸君均欣然。惟林翼撥贖二營。不得不屈請事丈連營。暫資鎮守。舒公尙有待馬之兵亦暫留。此近日第三路情形。大致如此。此間尙是一氣。似不爲難。金吳以萬人并力專精。主剿不主守。主合不主分。斷無敗理。可慰蕙念。

復鮑春霆鎮軍 十三日

軍情無定相。一聽多都護主持。則軍令一而衆志和。其成功必易。而又先之以偵探。加之以詳慎。賊雖多何患焉。大約年內陳逆必不能速至。盡力圍困。太湖之功可成也。吾弟忠心義膽。兄所素知。乃戎行閱歷。馴至於優容大度。愼密小心。學問進境。亦如是之速。喜可知也。承示城圍周密。連日以大礮轟擊之。石走瓦飛。賊無固志。尤須嚴防遁脫。必得鼠輩而盡磔之。庶終歲攻苦勤勞。藉以大快人意耳。弟營係扼城賊去路。切囑夜哨勇丁。多方準備。必以積薪舉火爲號。營中亦須多辦火光。以爲接應。并飛報多禮堂都護。俟天明時。向前追殺爲要。至於日間衝突。猶易爲功。要在吾弟與蔣唐兩軍。悉心籌備耳。此間擬撥金守與吳營。入駐霍山。計以扼盡皖邊山險。數日即可進發矣。

復多禮堂都護 十六日

接來函。據探狗逆現來桐城。其舒廬巢縣等處。逆匪麇集。前隊已到青草壩。爲數甚衆。不日即到石碑等因。查陳

逆如果全力上犯。自以分兵於新倉迎剿爲上策。如僅止陳逆賊黨二隊。冒稱陳逆自來。希圖預撤城圍。則此中緩急機宜。應請細心衡酌。如果偵探確切。自應依仁兄前議。以蔣之純八營。會合貴營。專剿援賊。以唐義渠鮑春霆二軍。專顧太湖西北隅。以固楚疆。其如何設法迎剿。與力顧楚疆。牽制太湖城賊。顧全大局之處。皆賴碩畫主持。探確賊情。隨時指示各軍。協力妥辦。仍請就近咨移各營。遵照辦理。并將援賊實情。函商滌帥。以便互爲聲援。弟已駐軍英山城南。相去二百餘里。軍情瞬息。不能遙揣。亦復何能遙制。且賊駐舒桐。則英霍六安皆警。而天堂兵力尙單。均應由弟處隨時策應。弟已撥湘軍入駐霍山。隨身營伍。不敷分撥。其太湖石牌兩路。以仁兄大力肩此重任。弟斷不致掣肘。卽鮑唐蔣各營。惟仁兄指揮是聽。敬乞時惠好音爲禱。

復會滌帥 十七日

奉手諭。深以太湖調撥爲駭異。林翼原議以多蔣備剿援賊。以唐鮑專制城賊。而固楚疆。多君與蔣君十五日商定。忽以霆營一并前往小池驛。十六日得霆營信。恐已無及矣。至尊意欲留霍山各軍。暫止不進。查霍山各軍。只可勉強兼顧天堂。擬留金逸亭十二營。暫駐柳林河。俟天霽則進青田。取東界嶺等處。距天堂僅八十里。距霍山城百里以外。如天堂有警。由青田取派五六成隊打行仗。仍以青田取爲老營。至曾吳七營。聞已冒風雨前進。黑石渡。恐止之不及。事丈尙待二十一二二日始進。事丈言七營至黑石渡。正月杪會合不遲。黑石渡。據一面。控制三面。阻水負山。萬全無害。鄙意或不必強之使止。致駭軍心。多君此番調度。閱春霆信。亦是強使從令也。惟如此舉動。賊必變計。不折而北趨。必不久覓太湖各軍索戰。第二路戰事稍鬆矣。至二郎河陳德園。似尙無慮。林翼只此兵力。天堂所分。是侵第二路之界限。蔣之八營。亦是第三路第四路之兵。而改入第二路者也。然天堂後路。仍必兼顧。尊處尙待蕭軍。蕭軍一年來每苦行役太勞。赴難甚勇。而又不能應機中節。太湖西北尙乞鈞度。救全風雪荒寒。我不得

進賊亦不得進也。尙乞寬釋自衛。介唐之得士民心。亦近年所獨見也。潛士到營。長跪不起。痛哭不止。林翼不得已。允其暫留五月。介唐之居爲天堂。介唐之遇如地獄。非介唐之利而爲此也。此等事只看有利心無利心。林翼非小人之恥爲小人。一軍深入。不得不徇十萬生靈之請。而強作五月之留。且余軍何可孤懸。恐前勞付之流水。而又貽後日之深憂也。

致官揆帥 十七日

奉手諭。敬承一切。應復事宜。條列於後。一、蕭軍未到。而多禮堂急不能待。已調鮑蔣移小池驛。多公驍果戰將之才。非統將之才。然目下我軍無所統。一得不俯從之。弟於軍事。總是委曲求全之心也。一、多公欲添一千二千人。弟擬大局稍定。撥趙李楊朱李五營歸多。而添人則不僅無將。亦且無餉。一、多公是勝克齋一流人物。似較克齋爲勇。亦是可取。一、光固一路。本擬以馬隊千人。并撥步兵。由六安流波。撞進發。與豫州所求。廷旨所論。正合。請尊處卽對復奏。一、瑛蘭坡如肯稍助湖北之餉。月二萬兩。少或萬五千兩。弟必以四千步兵。一千馬隊。由六安捍蔽豫境。特林翼不便明言耳。尊處可否函商酌之。一、韋志俊尙有六七千人。欲歸命於楊軍門。須給月餉。雪琴已另稟上聞。乞酌示復奏大概。請尊處酌辦。一、滌帥慮陳德園二郎河。則未免太過。弟之復信。頗詳錄。請酌示。一、天堂尙可救援。大局當不致有礙。縷縷奉請鈞安。

復多都護 十八日

援賊已至桐城。計分三路。進犯石牌新倉。太湖城圍。尤爲腹背受敵。仁兄籌全大局。弛圍迎剿。各軍頗無違言。想見碩畫主持。機宜獨斷。林翼前須兄臺原議。以鮑唐守太湖。兼顧城援。以蔣營輔麾下。專事迎擊。亦無非內保楚疆。

外禦狂寇之意。適得鮑春霖蔣之純兩兄書。知仁兄近日調度軍事。專以唐道一軍。移紮太城西北。兵力似嫌單薄。仁兄必能顧全大局。四路策應。當不使各營稍有疏失也。爲大將之道。以肯救人固大局爲主。不宜炫耀己之長處。尤不宜指摘人短處。讀來書有前則厝火積薪。絕無疑慮。今則臨渴掘井。未免張皇之語。查鮑鎮唐蔣道均非張皇人。詞義微嫌輕薄。諒是記室措詞之失。固知仁兄之必不存如心矣。鮑唐蔣即有力弱兵單之處。惟望一力一心。大家維持。兵力有多寡。賊情有緩急。與夫各營調劑。戮力同心。皆仁兄智計所優裕。自不至稍有疏虞。來示過涉焦思。用心良苦。風雪荒寒。尙冀從容佈置也。

致余會亭參戎 十九日

刻下援賊約數萬人。由桐潛上犯太湖。多鮑蔣已移營於小池驛。賊若由正路不得逞。則必折而入山。天堂前面必警。尊處務須每日一報軍情。兇必不至以所報紛紛調動。如賊勢注重天堂。兄於十日半月之內。必以大力維持保全。刻下柳林河一軍。按兵不動。此卽林翼深意。特不可紛紛零星調撥耳。此意密告於弟。弟可密存於心。不必宣言。儻賊入天堂。卽令萬分危緊。亦須穩住半月。軍火米糧。先期妥固。密爲檢點。弟只穩紮穩打。固守爲要。

致金逸亭 十九日

昨日公函敬悉。已商之事。恆矣。弟於滌帥敬之甚至。故一切委曲求全。唐七營蔣四營暫留太湖。多與鮑與蔣四營。已到小池驛新倉黃泥港矣。賊必從山內犯天堂。尊處可囑余會亭每日一報軍情。至尊營必須三營到後。再行相機。愈遲愈妙。愈老愈堅。舒公舊馬隊四百。弟亦囑其候信。再行拔營。蓋軍事有以先一著而勝者。如險要之地。先發一軍踞之。此必勝之道也。有最後一著而勝者。待賊有變計。乃起而應之。此必勝之道也。至於探報路徑。則須先

期妥實辦理。

致余參戎二十一日

得函敬悉所探賊情。此番陳四眼狗尙未自來。卽來亦尙能制之。弟已撥馬步三四千人。先進霍山之黑石渡。以援寶慶之十二營。由柳林河進東界嶺青田畝等處。二十四日二十五日分起拔營。到彼小駐。距天堂不過八十餘里。聲勢已振矣。弟意金逸亭十二營與吳幹臣五營（已到黑石渡）終須出霍舒之間。已札調松子關三營。續進五柯楓等處。約二十六七日可到英山。初旬可到防。弟與介唐月臺兄萬全無憂。其如何防剿機宜。可穩謀深算。左宜右有矣。惟年盡歲寒。青田畝一帶。恐一時缺少米糧。卽請鈔此函寄之介唐。速派正紳前往青田畝東界嶺迎會金逸亭。以便糧食無缺。其僕例由營發。斷無短少也。切懇切懇。

致潛山縣葉介唐二十一日

弟以余君一軍。敢於深入。不忍棄之。又見潛山士民。蹙蹙可憐。一片愚忱。欲救人水火。而不自知其罪戾之不可救。且又牽率仁人君子。忍情數月。殊爲慚愧。刻下因懸心天堂。仍以應進黑石渡之十二營。於二十四二十五兩日。由柳林河取道東界嶺青田畝等處。酌量駐紮。小住旬日。再進霍舒之交。又思金逸亭觀察一軍。爲湘軍之最強者。本年破寶慶二十萬賊。卽此十餘營之力。久處天堂。恐無用武之地。弟仍另調松子關三營來五柯楓爲助。二十六七日乃可到英山也。至舒城霍山之令。恐不得士民心力。修卡之事。弟不能札及。天下事惟有良心人乃可使。苟非其人。不如靜而不動。且金吳兩軍。均指舒霍之交。似亦不須急謀此事。潛太總可克復。弟意必續謀舒桐。弟擬仿兩斷礮堡之法。使天堂數百里山險。永無賊匪闖入之勢。此潛人百世之利也。非好官正紳。同力同心。亦恐不濟。藉地

利以衛民。藉民力而使之自衛。實是省錢省力之法。假如山險可守。當用千人者。不過百三四十人。即可使賊匪望而却步。弟所謂百世之利者此耳。

復皖撫翁祖庚 二十一日

鑪橋瓦埠之捷。軍威大振。而又以堅壁清野。使不得裹脅良民。從此節節掃除。層層展布。皖民其再生矣。臨淮代將。旌旆生新。推袁之效。亦大局之幸也。曾滌帥宿松之軍。已分入太湖。以備圍剿。兼顧楚疆。而以多都護鮑鎮蔣道各營。分扼新倉石牌小池驛各路。爲迎剿援賊之計。潛桐黨援日益。天堂之余丁九營。深入腹地。奇著亦險著。尙須設法應援。我軍趨重太潛。而英霍六安。尤防該逆伺瑕而入。林翼以臘八移駐英山城。南撥金守代領希庵舊部。進駐霍六之間。復以馬隊由流波碰一路。相輔而行。意欲扼盡皖邊山險。使該逆不得負嵎。庶我師攻剿不至艱於進步。俟各路軍情稍定。狗來蹤跡既確。卽當以馬步大軍會剿。廬副將部曲。弟所深知。弟曾保過一次。今悔之。

復浙撫羅澹村 二十二日

連奉賜書。於浙中吏事兵事餉事。悉數周詳。想見新政勤勞。如治絲而理其緒。舉網而提其綱。節節清釐。蓋懷彌苦。大抵爲政在人。取人以身。公正人也。以正人而引正士。扶持正氣。何弊不可除。何利不可興。然誠篤之至。亦須出以精明果決也。司道得人。州縣之風。規日謹。將領得人。則從新整頓。汰弱留強。亦可稍爲節省。而資緩急。理財得人。則鹽權商捐。取山海之富饒。以供挹注。無刻剝侵蝕。而自留其餘。皆賴壯猷碩畫。布置從容。幸勿操之過急。致損餐衛爲禱。李次青學識明敏。任事有血誠。近頗眷戀庭闈。厭棄戎事。滌帥屢促出山。而未肯應手。想尊函招致。亦必不肯來也。其人之長處甚多。熱腸血性。實爲第一。其短處則愛才如命。疾惡如讎。而所疾固多惡人。所愛未必才士也。

滌公刻下統將乏人。蕭濬川以廷旨二次令追剿石逆。遲遲其來。現分軍入太湖。不免總總計慮。桐潛援賊衆至。已抽多都護鮑鎮蔣道三軍。分扼石牌新倉小池驛。以備迎剿。林翼於臘八移營英山城南。天堂之余丁九營。深入腹地。尚須設法撥援。以補其勢。希庵未到。以金逸亭代領所部。入駐舒霍之間。與舒六兄馬隊相策應。欲盡扼皖邊山險。不使該逆負隅。布置稍定。俟確探狗逆蹤跡。并力剿除。翁祖庚中丞尚在壽州。袁午橋星使圍剿臨淮。旌旆一新。軍事似有起色。韋目獻池城。厚庵軍門責以立扶自救。而逆黨反戈爭殺。城守不完。進退維谷。然歸順已誠。仍擬招徠。特未可不名一錢。甚有難處。蜀事小警。軍政久廢。辦賊無人。曾卓如前輩初下督蜀之車。請援未許。夷情未定。聞海防又將戒嚴。亂之初生。大局何日了也。陳都司恐未可恃。弟不知爲何如人。已函詢滌帥與雪琴方伯。容當再佈。大抵將士之稍佳者。弟與季公滌公求之甚至。其流落江浙者。恐非上選矣。

致會滌帥 二十二日

連日得分兵喜報。距離三百。幕中之客。無不欽感。如龍馬上山。舞蹈歡喜。今年林翼負疚在心。然聞寶慶之捷。是一幸事。聞宿松分兵。又是一幸事。細察賊氣尙弱。如果戮力一番。可一鼓成擒也。天堂已無後顧之虞。逸亭十一營。二十四日啓行。由天堂之背草山而行。擬駐於青田。販東界嶺等處。距包家河不過三十里。距天堂不過八十里。如竟高興。挾行帳以六成隊。會同天堂九營。從背打出。未始非用兵之奇著也。舒公馬隊。二十五日從流波。撞進發流。波。撞距黑石渡四十五里。吳幹臣尙不單弱。太湖鮑軍拔動後。蔣駐其壘中。以四營力禦城賊。實屬可嘉。另撥已放林千萬不怕矣。林翼私心所對。不過者事丈耳。欲以陳德園捍蔽楚疆。而松子關所調。急切未到。容另撥籌。大勢則各路似屬穩妥。非仁慈大德不至此。富鄭公曾言。范六丈真聖人也。吾亦云然。蕭軍如必欲調入皖中。則須執奏。堅請。左公處林翼已函致之矣。此番潛太似有捷機。所宜深籌者。樞陽鎮廬江縣與舒桐耳。以局勢論。非蕭軍并力。則

窒礙尙多。乞丈酌之。

致各帥 二十三日

迭閱春霆弟之純兄來函。揣度賊勢。或必由水吼嶺高橫嶺內犯。近數日賊匪未敢動作者。蓋外怯小池驛黃泥港之兵。內怯柳林河朱武廟之兵也。鄙意之純兄尙留四營在太湖之東面。如不移動。須義渠兄添兵以助之。如須移動。則請移會小池等處。與春霆之營相犄角援應。庶靈湘之力。以合并而均厚。此應商者一也。又閱葉令介唐。及余會亭丁月台各函。則水吼嶺高橫嶺鐵鎖嶺。尤爲緊急。刻下舒公舊馬隊二起。及吳幹臣五營。已進黑石渡。則霍山已可無虞。金逸亭十一營。二十四日猶潛山之東界嶺青田畝進兵。應如何相機會剿。或以兵代防天堂。而以天堂九營備剿。或留一二營守險。而以六七成隊挾行帳鍋釜。會同天堂九營。挾全勢全力進剿。緩急之兵機。分合之兵勢。應由逸亭主持。其賊情之動靜多寡。山徑之夷險遠近。則由介唐及會亭詳悉函商。或待賊之變症而後急起應之。賊有變症。則賊情畢露。卽小有破綻。而彼竭我盈。彼肆我敬。亦必勝之道也。或乘其游魂未定而先破之。此間遠隔三百餘里。不能遙制也。如天堂各軍。及潛山山內各軍。果有機宜。亦可密會山外黃泥港小池驛。作內外夾攻之勢。此應商者二也。至潛太得手。則蔣金均須并力舒六之間。而桐城樅陽廬江三處。乃謀皖之要著。何枝應何路。每路須若干人。其集思廣益。明以教我。此應預商者三也。弟所思慮。不必盡是。亦不肯執持己見。惟屠狗之心。滅賊之心。則甚堅耳。如有可採擇之處。惟兄酌之。又兵事之妙。古今以來。莫妙於拊其背。衝其腰。抄其尾。從天堂出杜埠野人寨。則自古用兵之奇計。一舉盡之矣。惟須審明地勢賊勢。并須地方官紳。預先安排米糧。引導路徑耳。

致余參戎 二十三日

金逸亭觀察二十四日拔營。近於天堂矣。由天堂出兵。以剿杜埠野人寨之賊。則爲奇功。或可與金逸亭觀察商之。昌桂禮留一營二營守老營。餘均七成八成作爲一路。湘營之到東界嶺者。可以二營守險。餘九營出七成隊。自當一路。此議須細商金觀察。蓋從其後而拊其背。抄其尾。并知會小池驛之多鮑蔣三公。則賊可盡屠也。爲期須在正月。未知何如。總之天堂必無險失。卽邊地守卡者。小有破綻。亦不足慮。賊不過三四萬人。又半是擄掠威逼而來。破之必也。或遲或速。愈審慎愈精妙。不宜草草。

致多都護 二十三日

得書敬審二十一日賊匪來撲霆營。兄之老謀。按兵不動。甚是勝算。惟弟心尙以霆營爲單薄。如之純軍可以合并一處。則十萬賊亦可破。况未必十萬耶。至太湖現有唐之七營。滌帥十營。共計已萬人矣。合圍固好。卽缺亦無妨。以尊處旣扼其前。滌丈又操其後。弟又有重兵以扼天堂。是大圍非小圍也。至天堂以內。弟力尙能照應。或者小池驛等處力戰之時。弟尙可撥精兵。從山內抄出。以拊其背。抄其尾。衝其腰。亦未可知也。

復多都護 二十四日

兄與春霆弟謀定而動。師克在和。取彼兇殘。吾無慮矣。蔣之純兄以二千之衆。遏傾巢城賊之衝。壯氣雄心。可敬可慰。至以四營扼守東面。訓營尙難聯絡。滌帥已以六千人。由宿松前進。當能布置周密。可免疏虞。蔣之純兄八營。應否與春霆并力迎剿。尙祈斟酌。弟意尙嫌春霆稍單薄也。如能續調之純四營。會於霆營小池驛。乃更妙矣。承示賊意。急救太湖。天堂一路。必無賊竄。亦尙難逆料。鄙人已於天堂之內。密爲布置矣。惟仁兄細審賊勢軍情。設法兼顧前路。相機接應。是所切禱。

致金逸亭觀察余會亭參戎 二十五日

得株紫關手示。敬悉一切。所改行天堂道路。較爲直捷。足見仁兄之志在滅賊。各營大將之同心協力也。且感且敬。惟軍事以審地勢。審賊勢爲第一要義。卽如從天堂山內打出。此卽地中鳴鼓角。天上出將軍也。然必須通觀賊勢之輕重。細察地勢之險夷。乃可得手。蓋介唐以救潛民爲重。急切請援。其士民來營面見者。或恐官軍之不前。則隱約其詞。而不肯明白細說。此地勢賊勢所宜細審者一也。余會亭尙老穩。亦深知軍中愼苦。丁月台勇往有餘。軍事尙少閱歷。其所陳說。亦須詳察。此地勢賊勢所宜細審者二也。地靈港木子坳杜母殿金家大屋王家大屋走馬坦撥蒿。販韓家坳三角。嘸七里衝等處。地勢是否阻水依山。地圖不載。我衝賊後。本是上策。但恐汊港之紛歧。或阻我軍之前。山徑之叢薄。或繞我軍之後。非深明兵略地形者。前往看實。未可深入。此賊勢地勢之宜細審者三也。二十二日之戰。蔣鮑尙無信來。多公所報。傷亡副都統銜者四員。且咨尾尙言剿辦殊難得手。是二十二日之戰。并未十分妥善。討賊之志。不以一眚而自撓。而滅賊之功。必須萬全。而自立於不敗之地。此地勢賊勢之宜細審者四也。至內外夾擊之舉。應於審察確切後。再行密商。多蔣鮑三君子。其時在明年正月初旬。或元夜奪崑崙之前。固不可急。尤不須急也。再者。如果地勢賊勢大可有爲。則以余會亭丁月台并松子關及英山營爲一路。金觀察爲一路。以全力全勢會剿。乃成大功。酌之示之。再者。如果地勢得宜。固以并力剿除爲上策。却須一打便勝。若頓兵潛山。山外求戰不得。而太湖之賊。旣較出於外。潛山之賊。又繞舒桐。以窺他處。我軍并重於一隅。亦非兵法之善也。此中緊要機宜。兄可密審詳察。

致官揆帥 二十六日

廿五日奉廿二日手示。敬承一切。應復事宜。敬陳於後。二十一日安慶賊首往桐城迎狗。狗到頗真。其鋒頗銳。二十二日靈港之戰。我軍亡四副都統銜者。馬隊亦傷亡不少。多之步軍亡三百餘人。石牌在太湖之東南。我軍既得石牌。不能不顧。其移營前駐小池驛。乃必然之勢。非中計也。多於二十四日來信。賊於戰後。即分三分之一他出。以弟料之。必分趨天堂與霍山矣。蕭濬川已據駱中丞奏請。由淑浦入蜀。必不來皖。奏稿諒已咨呈冰案。瑛蘭坡要楚兵。殊不知希庵未到。希庵之意。尙欲辭道員不要。每年以半年養親。半年出外打仗。鄂皖求之。尙不知來否。豫中之事。不必再望。希庵兵由英霍而前。已屬萬分支紕。再飭繞道蒙穎。楚無此將。或俟破援賊後再奏亦可。姑飭文案擬一稿。再呈請鈞定。

致多都護 二十六日

得來函。備悉援賊猖獗。非閣下大力維持。血戰抵禦。其禍將不可言。公調換石牌各營。整頓隊伍。再圖大舉一節。甚是勝算。弟之愚見。總須預先安排。以待賊之求戰。然後起而應之。更是必勝之道。蓋賊來求戰。而官軍以靜制動。以逸待勞。以整御散。必勝之道也。此意固不可拘執。而未必全無可採。惟兄密爲酌之。官軍慶戰。不能不有所損。固不可因一告而撓其心。亦不可因大勝而有自驕輕賊之心。蓋我輩卽打平江北。亦只算家常茶飯。并非奇事。惟心念國事艱難。皖民塗炭。勉竭其愚。以求有萬一之補救。成敗利鈍。實關天命。吾盡吾心而已。至弟以昔年在鄂。不應經手招勇。遂至母喪而不能在墓守制。區區之愚。以賊不滅。則吳不得女。鄂不得安。卽長沙與黑龍江。亦不得安。非欲急功近名也。兄是東三省第一名將。奈何因一能不能順手。遂有他日息肩之意。息肩不難。總須打滅此賊耳。天堂一帶。弟專任之。兄欲撥兵添勇。弟早密爲安排。異日必有好勇健將。足供指揮。亦必聽調度。惟急切尙在他處。非可倉卒而至者。請放心。弟必力圖此事。以申兄平日滅賊之壯志也。鄂餉已竭。應於此次擊退援賊後。分別去留。仍

以好兵勇歸併兄處。容弟從容籌畫。若太急。則弟力亦苦不及耳。

致金逸亭 二十六日

二十二日之戰。多與蔣均未甚利。多與蔣稍挫。即怨人稍勝。即驕人。此器量之淺也。多咨來請馬隊。弟顧第三路第四路僅舊馬隊三百餘名。多處舊馬隊一千二百名。且弟處馬隊已進霍山樂兒嶺。勢無可分。舒公在蘄水。則西丹之未。經戰陣者也。萬不可倉卒誤用。多咨來請步隊二三千人。多處四千七百人。蔣八營四千人。鮑三千六百人。合共萬餘人。若再益二三千人。是注重於一路。而不顧其餘矣。如謂力不能抵禦。應以萬人出奇計。趨間道援之。一擊之後。仍當收回。則兵勢如生龍活虎。兵機如魚躍鳶飛。活潑潑地。此爲全勝之算。但須審機審勢。又臨陣之際。須以萬人并力。有前有後。有防抄襲之兵。有按納不動以應變之兵。乃是勝著。如派某人守後。不應期而進。便是違令。應期而不進。便是怯戰。此則必須大令嚴明者也。若徇他人之意。以前爲美。以後爲非。必不妥矣。

復多都護 二十七日

聞老兄營中有賊中僞職。此輩首鼠兩端。反復無定。賊敗則依官軍以自活。官軍敗則又投入賊中。平時以賊情告之官軍。亦以官軍情形告之賊匪。俗所謂兩頭蛇也。須嚴防之。免致漏洩。近七八日。且堅忍以待。大將以救大局爲主。并以救他人爲主。須有嘉善而矜不能之氣度。乃可包容一切。春霆弟一營孤懸。仍望隨時救應。林翼之愚。覺得勝仗無可驕人。敗仗無可尤人。即他人不肯救我。而我則必當救人。願以林翼之愚。質之高明。又打仗須整隊以防包抄。得勝則須戒兵勇搶物。須戒窮追。賊情地勢。乞隨時示之。

致金逸亭觀察 二十七日

夾擊原上是策。欲破此賊。非此計不行。然須密計而不可宣露。須并力而不可單弱。須謀定後戰。相機而行。而不可或先或後。此時且請密商蔣鮑二軍。看定地勢。審定賊情。然後約勢舉行。大約是正月初期及中間之事矣。臨陣之時。一切機宜。弟不能遙制。亦不可遙制。以逸亭十一營及天堂余會亭六營。并力一處。弟恐兄處力單。仍以巢梁及建威軍三營。到三和鋪。以備公調遣。而留丁到交戰時。公防天堂之先二時。分枝并剿。此一策也。以逸亭兄十一營。獨剿一路。或出高橫嶺。或出牛肩嶺。以余丁九營。除留二三營嚴守天堂要隘。以六七營出水吼嶺。此一策也。總之臨陣之時。必須以二三營分布要隘。以杜賊之包後抄尾。斷不可一力前進。致犯兵家之忌。而啓狡賊之心。此爲至要。賊匪除却分枝抄後。并無他長。此宜切切在意。若打硬仗而軍心不亂。賊力實遠不如官軍也。又近日太湖賊困。不僅宜防潛桐之賊。包抄我後。并宜於臨陣之時。預防城賊計窮突出。從山徑衝犯。此雖鄙人之鯁鯁過計。亦不可不留心防備。恐不先不後。恰遇城賊之奔軼也。又天下兵事。只此一理。有圍城之人。須先行另籌打仗之人。此要著也。有臨陣打仗之人。須先安排後勁。或預杜抄後之賊。或備策應之舉。此亦要著也。弟之續派三營來三和鋪。亦卽此意。

致金觀察 二十八日

鄙人之愚。欲屠狗以賀新年。非內外夾擊不爲功。非正月初旬中旬。亦不爲功。然賊勢較石逆爲少。賊計較石逆爲狡爲悍。須一萬人并力同心。則山中一軍。乃可操縱自如。山內地勢與出山之要徑。細訪沈思。乃能得其要領。僅當一面會亭月台。或同湘軍并作一路。出山之後分枝。或自留二營守天堂老營。而獨出要徑。穩紮穩打。尙須加以團練在後。以助聲威。以作牆壘。務期約會多蔣鮑三軍。訂以初旬不雨不雪之吉日。而又移駐距賊不甚遠之地。安營。其日出隊打仗。不過十餘里二十里。則兵不勞而賊可破也。此賊破滅。則吳安而楚亦安。未出隊之前。戒太勞。戒

太遠。臨陣須防包尾。防截後。戰勝之後。戒搶物。戒散隊。戒窮追。此爲切囑。不輕敵而慎思。不怯敵而穩打。斯得之矣。其緩急分合機宜。悉聽逸亭觀察。與山外多蔣鮑密約。弟不遙制。鄙意總以并力爲主。穩打爲主。此是奇兵也。奇兵而出之以穩。尤奇之奇也。

復多都護 二十八日

該逆詭計欲分股衝入太湖。並分路牽制官軍。使我師不使出隊。惟仁兄設法布置。相機截剿。並隨時飛致義渠觀察。豫備首尾迎擊。以遏賊援。賊之衝。此間擬以山內廿餘營。約會麾下暨鮑蔣之軍。內外夾擊。總以來正月初五六七八九等日爲度。因山徑崎嶇。各軍行路艱難。一時趕催不及。卽近抵潛境。亦須養銳一二日。始能進兵。仍須審定地勢賊情。分路包抄。并力一舉。此事當密而又密。不可宣露機宜。如果賊入城中。俟擊退援賊。城中可不留一賊也。

致毛驥雲觀察 二十八日

前得金可亭書。言陶君建威營操練已成。亟思一戰。弟意此軍原爲中原起見。北門鎖鑰。非准不可。實不欲調入皖中。然思皖中狗逆上犯。現有大仗可打。凡兵之氣。不見仗則弱。常見仗則強。久逸則終無用處。異日亦必不可臨敵。欲調來與湘軍或昌營。合同打二三次大仗。仍可撥回襄陽。惟襄陽近日有警。則請止弗調。如襄陽春令須兵。或另調一枝換防。皆隨兄意酌定。卽與陶君言之。果可札調。不妨代弟作札。以奉函諭爲辭。仍由尊處查鄂軍行營章程。酌給一月口糧。令其雇船到蘄水。入英山會剿。非此間兵力不足。實歷練戎行。成全將士之意也。滌帥分兵六千人入太湖。與唐義渠專顧太湖城圍。多鮑蔣三軍出剿援賊。二十二日大捷於潛山之地靈港。踏平賊壘十三座。斃

賊六七千人。尙須謀爲夾擊之舉。冀得走狗而烹之耳。

致糧臺總局 二十九日

軍士深入山中。歲寒風雨。崎嶇險阻。二十九三十日均行役不倦。可飭吳覲臣以小車及水牌。分道運錢到英山。以便多給錢文。軍氣乃壯。轉運萬山之中。勞費十倍。然頓兵經年。所費非三百餘萬乎。費則事集。勞則功成。况英霍舒桐異日小小捐助。則運費亦猶可補也。丹初美才正直。而專心條理。司農中第一把手。留營數月。必能匡我不逮。開仗行軍。則軍火所省較多矣。弟密計已定。金公余公丁公均踴躍用命。以二十營從山中間道趨出。此地中鳴鼓角。天上出將軍也。古今兵事。以拊背扼吭爲至謀。此殆近之矣。可告之中堂星使爲荷。

致余會亭丁月臺 三十日

救鮑打狗。全在天堂。萬人進兵。似宜速宜并力。宜留兵守要隘。以防包抄。決勝之機。宜明斷而深穩。賊壘是待戰。而後填。實其真賊多。駐民房。以殺賊爲事。破壘是第三第四小功也。月台好大言。言狗何日攻壘自退。狗能縱橫千里。豈無狡謀。希庵三次打狗。其穩處不可及。多鮑日前之挫。非力不能戰。兵不足戰。得意深入。爲賊所包耳。又太分則力單。窮追則氣散。大勝而變成大挫。非知兵者也。不可不慎。敬則勝。整則勝。和則勝。三勝之機。決於此矣。

復多都護 己未十二月二十九日

來示欲以陳德園六營。趕移太湖。查陳德園爲羅田蘄州蘄水黃岡緊要門戶。未可空虛。現祇會事恆兩營。且係新募之勇。未經戰陣。不足以與唐營換防。太湖城圍。當防援賊分股。內外衝犯。遼難鬆勁。麾下與鮑蔣三軍萬三四

千人。前臨大敵。固知不敷分佈。第思零星添撥。不能出奇制勝。仍是處處皆單。即再撥七八千人。亦無尺寸之益。仍請仁兄設法兼顧堅忍。以待至初旬。密謀定計。約會山內二十餘營。內外夾攻。使賊首尾不能相應。則一戰而勝。屠狗可期。奉漏卮而注之。何如沃焦釜而圖之也。

復多都護 二十九日

奉賜書。以該逆近逼靈營。恐致糧道不通。全軍不能穩守。囑催陳德園之軍。於三日內趕到。惟是靈營力單。弟早已慮及。龍家涼亭八營。尙可策應。至陳德園之二營。有未便調之處。此外無兵可撥。即欲移緩就急。亦非三日內可能趕到。林翼苦思焦慮。與其撥來撥去。毫無補益。不如挾全勢全力。以剿爲主。所望仁兄多方鎮定。隨時以馬隊梭巡。援應勿使靈營將士重喫虛驚。不出十日。密約山內各軍。并出麾下與鮑蔣之師。噬其前。山內之師。拊其背。內外夾攻。斯爲出奇制勝。若零星抽撥。微論不能得力。實亦無可應命。非兵家之上策也。

復鮑春霆總戎 二十九日

木子坳韓家坳一帶。逆衆負山而壘。每日圍擾我軍。三更始退。弟以三千餘人。當援賊五六萬之衝。尙能穩紮穩打。想見忠肝義膽。辟易萬人。士卒亦皆用命。可敬可愛。堅守十日。山內各軍。約會夾攻。弟犒其前。兄拊其背。可破滅此賊。得鼠輩而甘心。刻下總期督勸將士戮力同心。堅忍以待。切勿輕於出隊。約會之後。與各營奮力衝殺。必得大捷也。

致會事恆 三十日

連日得多禮堂信。以前敵軍情處處喫緊。欲請陳德園四營往顧太湖東面城圍。以防踞逆之衝突。林翼之意。以陳德園爲蘄州蘄水羅田黃岡緊要門戶。未可空虛。因抽撥此間李璞階一營與阿參將二營前往助之。固知丈銳意打仗。而所以不敢遽請者。以滌帥今日來函。有抽撥宿松四營前進小池驛助剿之議。滌帥隨身營伍。覺爲太單。請丈移營宿松。以顧主帥林翼五六日內。謀爲夾擊之舉。或可得走狗而烹之也。

致楊厚庵軍門 三十日

陳金鼇來函。以韋志俊投誠歸順。無有二心。其部下亦多驍勇之士。且係狗逆舊屬。於用兵機謀。早能覷破。欲請調赴皖北。以圖報效等因。惟此間於志俊恩義未孚。老兄威信遠昭。人所敬憚。應老兄會銜札飭。令由水道渡江。先圖樞陽鎮。并飭支應所先付萬金。資其行糧。俟立功之候。再議從擾接濟。祈卓裁酌定。

復余會亭 三十日

除夕得二十七日書。詳論地勢賊情。與我軍前後佈置。步驟井然。欣慰之至。連日接據多禮堂都護暨鮑春霖總戎函。以前敵情形。萬分喫緊。迭次請援。此間實無多兵可撥。非山內之軍急出而拊其背。靈營剿賊圍攻。勢難施展。祈弟台與金逸亭觀察暨月台介唐安速會商。分佈停穩。先期密約多鮑。尅日併力出擊。萬一山外之軍。未能即應。亦可挾山內全勢全力。作以湯沸頂之謀。惟必須一二勁旅。留守天堂。或酌派隊伍。以護舊壘。其鐵鎖嶺關要之處。或卽以葉令派勇扼守。我軍挾釜帳前行。出山之前。以歸并一路。惟是近賊之後。或分或合。或直入或旁抄。皆在相機而動。林翼固不能遙揣。惟望慎密速行耳。

致曾滌帥 庚申正月初一日

山內一軍。二十八日已會集天堂。萬人入山。崎嶇險阻。可敬可念。初旬必從水吼嶺高橫嶺打出。并力以拊賊背。當必成功。又韋姓歸誠。終須養活。丈於世界人。均以天地父母之心爲心。世人頗知丈之嚴正爲第一人。而林翼則謂丈爲慈悲中第一人也。愚見日久不能不養。則不如及時責其立功。可請會札飭令渡江。先襲樅陽。再襲安慶。得其一二。賊必驚潰。賊方伺我於潛太之交。而山中有萬人突出。江上又能批亢搗虛。先傾其巢。先搃其吭。卽費二萬金。亦可請軍門先行札飭支應墊付。林翼不辭也。如以爲可。卽請速賜決定。

致楊厚庵軍門 初二日

用兵先襲樅陽。則實可爲異日謀安慶。謀桐城之要著。以水師四營入內湖。則桐城一帶。轉運皆靈。機勢皆活。惟須默察韋志俊之志意。果否能行。其力量果否有濟耳。酌之。如力不能成功。則酌賞之貲。弟仍不使老兄一人爲難。而張都堂願爲之養。豈非甚便。特恐空言耳。

致莊蕙生方伯

如近日部中。毛舉細做。苛察爲明。煩碎自亂。則焦勞一萬年。而吏治之頹廢。官事之欺朦。更不可問矣。官吏中鄙俗卑賤。不堪司牧者。公總十一州之大綱。亦求專精於此。乃有實濟。若循分習故常之事。非僅以望於明公也。

致各帥 初二日

初二日得之純觀察一函。并山勢地圖。一并鈔寄逸亭會亭矣。圖中形勢。尙煩詳查。其來函或有可採。或不甚妥。卽如所言小池驛爲通衢。霆營較爲喫緊。一說之純近在十里。霆營六七日日夜告急。而勢不能援。則軍事之言易。

行難。已可想見。其所言以金吳駐水吼嶺老營。一出王家牌樓。一出野人寨。一節。鄙意以山內萬人。并力破賊爲上策。若以兵分駐野人寨。是將四五萬之賊。一并包在腹中。如能齊心齊力。原是垓下困項之法。特恐無此本領。則又有兵分力單。兼恐有窮蹙橫決之虞。似須再審。至山內一軍。固應密約山外之軍。內外夾攻。然兵法總以賊來求戰。爲上算。我去求戰。爲下算。所謂致人不致於人也。卽如二十二日之戰。山外各軍出隊二三十里。氣竭勢渙。故終爲賊所乘也。不可不慎。鄙意天堂山內一軍。出山後。且紮定以待。審機審勢。誘之來戰。當易破也。何也。山外之軍。隔賊壘二三十里。山內之軍。又隔賊壘二十餘里。合計中間只隔五六十里。則訂期密約。亦僅祇大概情形。仍靠各路之人。各自力戰耳。至所言速移數營於東門。抽新倉之營於小池驛一節。查滌帥已撥人入太湖。義渠全軍速援春霽矣。一切機宜。請多都護。義渠觀察會同酌辦。弟不能遙制。此間遠隔二三百里。軍機瞬息千變。不可以公牘空言往返遙制。恐文到而情形又變。無可適從也。

復曾滌帥 初二日

初三日奉元日辰刻。由事丈轉遞一函。深以鮑春霽爲念。初二日亥刻。得多禮堂三十日來信。言二十九日多與蔣均出隊解圍。賊卽退出。霆營無恙。霆字左營。拔入霆中營。養息。多禮堂以精選營駐其舊壘。似近日已可無礙。又蒙丈以數千人撥往太湖。則義渠全軍六營。已可與鮑蔣作品字形。爲犄角之勢。天堂之余會亭。三和鋪之金逸亭。已安排出山。爲拊背之勢。只候天晴三五日。必可如約。黑石渡一軍。暫且緩調。林翼在萬山中之營。尙可守。丈居平原衝要之地。林翼乞請以事丈二營。并趙朱二營。到宿松以護主帥。切求莫再調開。趙國香三千人。與狗抗一月。希庵乃到有保麻城之功。有失桐城之大罪。然其人尙老實無他腸。與李不同。事丈二營。切求不調。太湖俟元公希公到時。惟丈之所使之。林翼萬不再行牽制。此時且以養銳爲主。

致金逸亭觀察 初三日

得書審連日進兵情形。并三路地勢。愚見右中二路。尤須厚集兵力。并須分枝之後。會集不遠。每路非四五千人。不可以狗逆所在。須重兵乃可屠滅。似須專人速催凱右信左爲助。其左路賊少。似可二千人或二千餘人。慎守不輕進。爲是。俟賊奔潰。急起乘之。或可多殺敗賊。凱右信左二營。計遲一日。可以到齊。吉營又須遲三四日。可到水吼嶺矣。天堂本善地。既有會亭月台九營。二成隊留防。則凱右信左吉營。均可助戰。以成大功。兄台速即專人迎提檄調。臨陣地勢。尤爲切要。先一日二日安紮老營之時。親同明白營官。四圍瞭望一次。必可得賊之要領。雨雪在途。軍行極苦。弟心感心敬。不知何以報此將士也。至多鮑蔣唐處。弟與兄處。自應先期密行知會。

致會事恆茂才 初三日

林翼於近日之事。覺無十分把握。黑石渡之軍。則暫不必調也。丈則必須希公元公大將到皖。林翼即決計施展。斷不再爲牽制。使老驥不得馳騁。此是愚人一定之愚見。決無他意。丈一生志向。總在成事。丈何惜遲一二月之光陰。而必急於一試耶。丈言初六日拔太湖。則暫可不必。即令宿松不要多兵。丈亦宜暫行按轡。以待希公之至。此敬愛之愚忱。非時俗之見也。恐丈疑我。敢以實告。

致官揆帥 初三日

舒都護二起馬隊。早入霍山。近日太湖軍情。靈營苦况。非滌帥公忠在抱。婆心救人。幾難撐拄。此間欲以山內二十餘營。密謀夾擊之舉。多都護疊次請援。而未有以應。不得已撥李璞階李雨蒼二營往助。略爲補苴。查有新到押

馬官兵并留防武昌護衛馬隊請賜挑撥尤爲奮勇者二百名交富森保管領進紮蘄水預備相機撥幫富森保係直夫將軍所留似可帶隊敬乞鈞裁速酌一俟剿除援賊後卽當酌量凱撤仍以武漢爲駐防遊牧之所立候示復

■復多都護 初三日

震營以三千六百人當三四萬悍賊延山逼壘日夜攻擊之衝其苦况可危其愚忠可念左營營官鄭陽和敢戰之將計并此次受傷至於再至於三機智則未樸勇則真麾下以精選前營與之抽換而復撥勝勇營精選中營并紮一處想見大將婆心救人保全大局之至計公忠碩畫欽佩何如訓軍六營移至小池驛總宜并力不可一分再分自弱其勢惟仁兄與義渠兄詳審地利聯絡聲威皆仗卓裁指示至於山內之軍必於近日天晴出山自當先期密約也

■復鮑春霆總戎 初四日

此次以三千人力抗數萬之賊老弟孤忠貫日月義氣薄雲霄可感可敬老弟與鄭陽和應特疏薦舉卽各營將士應均加獎也兄已函託義渠幫助老弟至山內萬人已拔營約計初五六日可到水吼嶺初十前後乃可開仗也此次援賊必期盡殺多殺殺退之後當使老弟獨領一軍獨當一面也

復吳幹臣 初四日

舒城必無多賊不滿千人惟樂兒嶺一軍太單若得六七千人則又可以間道謀奇功矣初二初三逸亭諸公以萬人出水吼嶺拊賊之背而令多鮑蔣唐攻賊之胸計初十至二十日必可大破援賊若乘援賊初破驚魂未定之

時。先以勁兵馬步五六千人。乘舒城賊膽乍寒之時。襲取舒城。得城之時。密派勇丁。各持一炬。將城內大小房屋米糧。付之一炬。片瓦不留。則異日必無賊可守矣。我軍仍即退紮險要之地。如霍山樂兒嶺等處。似是神算。惜乎步兵太少。未敢出此險著。馬兵則儘可謀畫。湊足千二百人也。又各營之事。以聽調度。奉約束爲主。如各將有不遵統帶之令者。密稟撤參。凡營只在將之得力與否。若勇丁則無不可教之人。兄須預先安排將官於胸中爲要。

致唐義渠觀察并致多蔣李朱 初五日

接來函。以太湖東面圍懈。城賊可由岔路口越馬齒嶺。至羅溪河小湖。援賊可由王家學山竄羅溪河小湖河。均可包抄。我軍北門後路。查援賊於日內夾擊。必可力破。惟須防城賊之衝突。則太湖潛山蘄州之地。必有逸出之賊。被其續害。如薰穴之鼠。亂竄無路。如鋌走之鹿。急不擇蔭。此間催調松子關之趙國香朱子明各營。前往太湖協圍助剿。遠隔四五百里。非八日不能趕到。而援賊之破。不出十日。城賊之由岔路口馬齒嶺竄出者。亦必不出十日。弟已飛告朱雲巖李申甫兩兄。請於所部抽撥四五營。與李璞階阿參將三營。并力移紮雲營東門舊壘。以防城賊之竄逸。其岔路口馬齒嶺等處。應請兄與多都護蔣之純兄會商。設法抽調。以三四營擇要扼守。則太湖之賊。必無漏網也。立候速籌示復。

致李朱多唐蔣各營 初五日

連日細思。尙不患援賊之難破。而深患城賊之突出。則地方百姓。必怨統兵之人。我輩亦自問無顏。頃於初五日。申刻。函請義渠禮堂之純撥兵扼馬齒嶺岔路口。又函請申甫雲巖兩兄。俟松子關二營趕到。以阿參將李璞階會合。仍紮東門舊壘矣。細思東門舊壘。非兵力甚厚。不可穩紮。且松關續調二營。尙未能到。應請禮堂義渠之純速撥

各二營。并請申甫雲巖撥李璞階一營。同阿參將八百人。先行移紮馬齒嶺岔路口。或即在小湖河。合并於要隘之處。主守不主戰。或可力遏城賊耳。連日雨雪在途。山中雪深尺許。初九日之期。恐不如約。然亦在初旬中旬之交矣。

復秦撫譚竹厓 初五日

林翼負罪從軍。再經改歲。兵事毫無進步。愧恨於心。頭鬢盡白。客夏因撥水陸萬人援湘。林翼遂久滯黃州。冬令始視師太湖。將前路圍剿。迎剿軍情。略爲停頓。旋以臘八移駐英山城南。分撥馬步各軍。扼守皖西山險。徐圖進取。狗逆陳玉成。率大股上援太湖。狡悍而多。雖我軍大捷一次。斬馘拳旂。奪其巨壘。而兇燄尙熾。鮑總戎小池驛之師。復被包裹。心以爲危。此間議以二十餘營。草山而出。作拊背之勢。天寒大雪。涉險維艱。而前敵力單。必須設法援應。山徑轉運之費。幾半於營糧。鄂以楚北一隅。歲入有限。而養此五六萬之衆。力盡筋疲。在在時虞飢潰。前次奏請大邦協餉。望歲彌殷。我公飢溺關懷。通籌大局。必不以林翼之智小謀大。力小任重。忍聽庚癸之呼。而少靳推解之惠。乞賜籌十萬鉅款。以濟我於危。若得救全此軍。剿除援賊。則東南大局。皖北生靈。皆感再造之恩。而重拜仁人之賜也。

復余會亭丁月臺 初五日

貴營以二成隊留守天堂。則此間撥來之凱右信左吉字三營。均可助戰。已函告逸亭觀察。速卽專人迎提。計遲二三日。可先後到水吼嶺也。出山後安紮老營。必須親勘地勢。四圍審視。以得賊之要領。賊館蔓延村莊。勢雖散漫。然皆狡悍頭目所處之地。我軍出戰。須層層布置。列陣縱橫。以整攻散。以銳蹈瑕。以後勁而防抄襲。臨陣切戒散隊。得勝尤忌貪財。鄙見右中之路。狗逆所在。須用重兵。分枝亦不可太遠。其左路賊少。似可以二千餘人。慎守而不輕。

進。俟賊奔潰。急起乘之。必能多殺敗賊。一切佈陣機宜。應與逸亭觀察斟酌步驟。聽其主裁。會亭和平謹慎。心賞已深。知無事鄙人。曉囑。月台明快激昂。尙乞出以謹慎。毋稍涉大意也。

復鮑鎮軍 初五日

唐軍初三日移營。已囑與寔營會紮。想已合并一處。惟精選前營。欲抽出左營原壘。另行紮營。則左營前此受七晝夜槍礮之衝。其堅苦屹立。勢如撼山。尤可想見。刻下兵力較前已厚。佈置當可稍爲變通。左營地勢太逼。賊壘或可不紮。至仍以左營歸原。似乎不可。其營帳軍裝。已飭武穴轉運局趕緊解送。即可專勇迎提。馬匹一事。實以鞍轡未到。不欲空效右牽。緩日到齊。定當專足送上。

復安襄鄖荆道毛驥雲 初六日

連奉前後三函。具佩舉善去凶。固圉庇民之至計。感慰何似。豫州疆理無人。軍政大壞。任羣捻飽掠。恣意往來。無過而問者。竊慮日朘月削。民不聊生。中州將爲逋逃淵藪。患生肘腋。禍在腹心。襄棗毗連。何時安枕。儲倉穀。濬城濠。修復樊城舊址。勸捐集事。設法蕙成。備豫不虞。古之善教也。抑又聞之。得人爲行。賢於長城。克知宅俊。有治人不患無治法。沈令兆元孫令寶田均已如命。飭派以資委任。吉令若老衰不堪稱職。撤之可也。陶允中建威前營。技藝嫻熟。隊伍整齊。弟有調入前軍。閱歷陣戰之議。未審已否代行札飭。或須撥旅換防。皆在我公斟酌。爲州保案。添入孔廣新等三員。當函告中堂。求如所請。惟查吳之綱。系於七年襄鄖團防案內。已保知縣。此次與前案本屬一事。不便再保耳。黑龍集扼襄光適中之要。當鄧穀各處之衝。撥營彈壓。必須諄囑將弁。約束官兵。愛惜百姓。并乞我公隨時訪查。隨時董戒。使營團皆行所無事。不擾不驚。戢暴安良。斯爲美備。州縣招解案件。業經奏請通融辦理。盜賊充斥。

之天下。搶劫重犯。果能提訊實供。就地正法。省卻多少葛藤。有過我自任之。不必拘泥文法。此間剿辦援賊。以山內山外之軍。合謀夾擊。旬日可成大舉。惟冀將士同心竭力。以烹狗於東方。則幸甚矣。

致李申甫主政并朱雲巖總戎 初六日

弟處原不許會事。丈輕易出隊。以事丈係初經戰陣。而性又極勇也。弟之敬愛滌丈。公所深知。故於事丈處備極私忱。昨批令不准到太湖。而竟拔營。惟有力求我公以善處。加意裁抑。斷斷不可信其高興之言。移紮東門。亦不可使之當賊衝要。切囑切囑。事丈好動而閱歷少。切求禁止其躁意。如欲云云。則請以滌丈及林翼之令止之。

致張仲遠觀察 初七日

元日來教。敬悉一切。公以微罪行。公之福也。至米石應設法辦理。來書言部議累及於鄙人。此腐鼠也。弟志殆如舞陽侯。所謂卮洒安足辭者。至如塵世得失。早已看破。萬不致鄙俗如是。公勿言及此。爲囑。賊日多而兵日鈍。只要山內一軍及時得手耳。

復蔣之純觀察 初七日

訓營會紮小池驛。軍情自穩。山內各軍。想不出四五日。必有約會夾擊之信。惟賊壘有險夷。制賊自有難易。分兵亦有輕重。一切佈置。均祈兄與多都護。義渠觀察。春霆總戎。熟審地勢。賊情。妥謀分擊之舉。或伺賊之缺處。蹈瑕而入。或挈賊之重處。并力而前。皆在相機斟酌。惟臨陣切戒散隊。切戒貪財得勝之時。尤宜整飭隊伍。多求痛殺。此次山內各軍。并出而拊其背。兄與多鮑唐軍角其前。必是勝著。然亦必須各自穩打。立於敬慎不敗之地。而以忠勇出。

之屠狗必矣。

復多都護 初七日

訓營與霆營會紮。軍聲頗壯。軍情亦較穩。蔣營距賊七八里。出隊亦覺便捷。惟仁兄馳驅策應。備極賢勞。山內各軍。初八九可到齊。想必有約會夾擊之信。尚祈卓裁。速審地勢賊情。與之純義渠兄春霆弟妥籌佈置。相賊壘之險夷。爲分兵之輕重。或伺瑕而蹈其隙。或以銳師并力而攻勁敵。或以誘戰而設伏兵。運用機宜。皆賴老謀勝算。分行佈置。左拂右縈。切戒貪財。切戒散隊。不可不分枝。亦忌太分則力單耳。

致金逸亭余會亭丁月臺 初八日

唐營新到小挫。蓋總是好撲壘而不防包抄也。打此賊總在必勝。不在急戰。吳楚安危。東南安危。全恃山內一軍。舍此并無後繼。亦無後勁。不可不慎也。有打仗之營。總須有第一等好兵。不打仗之營。可十日不戰。不可一戰不勝。總須謀而兼勇。乃可勝耳。

致多都護 初九日

得初七日書。而初六日訓營失壘。及如何情形。并未提及。查訓營初四日拔營。遲遲未進。到後各營。派隊派夫。代爲紮營。壘成四尺。竟爲賊所破。殊失所望。弟意賊從西山南路。包出訓營。似宜移紮霆營之左後。中三營之後。約二三里。斷賊從山徑包抄之路。則霆營與楊朝林各營。當不致可斷餉。地勢軍情。弟處難於遙揣。祈妥速籌商。訓營敗後。其兵將尙能復振。以速自穩。固否。山中之軍。初九日必到齊。尊處與之純專人密約可也。

□ 復唐義渠觀察 初九日

初六之役。營壘未定。不宜出隊。零星接仗。不能以殺賊。而適以挫我師。殊爲不值。且賊以多壘誤我於前。而以悍賊襲我於後。各軍前犯此忌。而不之防。專事破壘。而不爲之後。亦毋乃失計矣。霆營餉道。仍然梗塞。心以爲危。或山內各軍。速出高橫嶺。并力破賊。尙可救也。自公退後。鮑營被圍。黃泥港無賊。而附近霆營及銀硃塔。乃有賊。麾下宜急自整厲。奮勇前驅。救人於危。轉敗爲功。是所盼禱。

□ 致鮑總戎 初十日

密啓者。如力實不能支。尙欲全軍以待大舉。救得人才。不怕賊子不死於老弟之手。此事暫不可宣。萬一到緊急無可如何之時。則新倉荊橋。均是退步。有過兄一人任之。兄爲管理軍事之人。以保全軍旅爲主。斷不忍諉過於人也。山內之軍。初九可齊。不知密約何日耳。

□ 致余會亭丁月臺 初十日

連日以鮑軍孤懸爲慮。幾乎寢食均廢。尊處總宜雄據山巔。必高處立。乃能闊處行。必眼高於頂。乃能力大於身。滌帥言狗已冥誅。其然耶。其不然耶。總要審己。不必問人。

□ 致莊蕙生方伯 初十日

連旬軍事孔棘。思慮多則精力短。肝火熾盛。今日張長泰來拜年。與劉縉來此。均怒色斥罵。幸飭省中新到者。亦

勿來此。新到捐班。此是一科。弟無決絕不用之理。然循例委署。以學製使人。則心以爲危也。蕪水昔年之漕。大戶有侵漁之利。小戶受浮勒之害。民病而官亦病。有雉經於巴河兌次者矣。其黠桀如梅小素者。則專意勾致劣紳。狼狽朋比。紳樂黠吏之分肥。官漁窮民之大利。此已往之大概也。自七年秋改革以後。弟時以手諭諭劉令。以不侮鰥寡。不畏強禦爲戒。曾手懸之該縣漕局。以不侮鰥寡。不畏強禦。仲山甫是也。侮鰥寡而畏強禦。州縣之收漕是也。云云。至再至三。乃能辦動。並飭從重懲辦。所以救州縣而董戒漕政者。無所不至。不料劉令今年預開卸任。頓減每石二百五十文。以一二月之期。將全漕收兌二萬四千餘石。夫減定漕章。三次入奏。其錢數已懸之國門。書之天府。不可增減。增者應問罪。減者亦應劾官。否則劣生刁戶。聞風而起。漕政日壞。州縣亦疲。事必不可爲矣。尊意欲僅議過。似嫌太輕。弟能奏定數目。則虛減亦應實奏。以入彈章也。至易令之欲分肥。則又卑鄙之至。人心至此。吏治何由而飭。方伯當以正人心厚風俗爲首務。毋謙讓未皇也。渭春信來。初十日可到任。到京不謁朝貴。尙有正色立朝之初志。擴而充之。堅守不失。其庶幾乎。此信乞公閱爲荷。

復彭雪琴方伯 十一日

念自墨經治兵。載驚改歲。軍事毫無進步。鄙人一身不足惜。獨惜前途將士。雨雪遄征。金余所部萬人。日內始由天堂出駐高橫嶺。而霆營近逼賊壘。幾困長圍。雖屹立如撼山。而餉道尙多梗阻。其堅苦情狀。尤耿耿不能去心。前敵之危。多蔣各軍。皆形睽勢隔。不能救人如救火。唐軍自新倉移小池驛。初六日三營挫退。不能成營。蓋與客臘二十二日之戰。皆誤於賊壘在前。而不計村館之悍賊。四溢橫出。而襲其後。此心焦灼。我勞如何。刻下所恃高橫嶺之二十餘營。挾全力全勢。拊賊之背。以解霆營之圍。而撥蔣道龍家涼亭各營。漸移而西。進附霆營。聯絡聲勢。以唐營填紮蔣營舊壘。再接再厲。或可大振軍威。相期滅此朝食也。兄隨身只三營。霍山則有吳幹臣五營。與舒都護馬隊。

現駐樂兒嶺。軍情瞬息。尙待隨機調度耳。

復鮑春霆 十一日

自聞初六日唐軍挫退。無刻不懷念弟營。每得弟一函。展視再三。而私心稍慰。如旌懸在空。風過略定。十一日接初十日惠翰。并地圖。未及近日餉道之事。想不過幫運稍難。而堅忍情形。自是屹如山立。天堂萬人。初八九等日。已出駐高橫嶺。可以牽制賊情。來書謂賊意注重二郎河。慮及太湖後路。并楚邊之陳德園。鄙見我軍全勢。并力於前。賊雖狡悍。斷不敢舍此上犯。萬一賊勢分趨。則我軍猶可相機剿辦耳。本日有致唐蔣兩兄函。欲以蔣營漸移而西。以唐營入駐蔣營舊壘。節節抽換。即可到弟營附紮。聯聲威。庶餉道無虞。軍心愈加雄壯。而前後夾擊之議。可以一戰成功。左營仍復原壘。柵棚帳即可專勇前催。槍礮對擊山坳。賊不敢近。深以爲慰。此後約會出隊。切勿專顧賊壘。酣戰而前。須重防村館悍賊。沿山四出。我能以抄後見功。則賊無所施其技矣。

致曾滌帥

初十日夜刻。擬請以趙克彰朱希廣楊得武移駐靈營小池驛之後。以厚靈營之力。鄙人之愚。覺劉瑄林已出太湖。在銀珠塔一帶助戰。卽圍住東門。亦無大益也。所議何如。敬乞鈞度。

致金逸亭余會亭丁月臺 十二日

連日兢兢。急望尊處先占高橫嶺。初八初九初十。三次專函。商之逸亭兄。以居井底爲戒。以先踞山巔爲勝。并切囑高橫嶺不可讓賊占之。日昨得月臺兄書。言所兄之處。私心總覺其稍低。又月臺兄以地圖并書來示。言駐營之

地名曰燕窩。是必外坳中坳。乃爲窩形。此恐犯兵家之忌。十一日未刻。又得逸亭初八夜復書。指陳高橫嶺白楊嶺茅嶺之要。如此則虜在目中。必勝無疑。林翼可私浮三大白矣。預賀預賀。蔣信言賊上竄謠言也。蔣近在鮑營十里。咫尺不救。而能救大局乎。山中一軍萬人。旣得地勢。則惟有審慎賊情爲要。愈老愈堅。湘軍之本領也。切莫改樣。

復會滌帥 十二日

昨日尙不以蔣說爲然。而深以鮑軍爲念。夜間得唐鮑來信。餉道尙通。卽夜躍起。以朱希廣趙克彰至羅溪河。并益以楊得武矣。均於十四十五日可到防。舒公不甚明白。而却樸勇。林翼若到羅溪河駐紮。則距太湖高橫嶺。均只數十里。惟此間是天堂霍山轉運之要道。借蘭溪水次牌運。以省夫力。而日役英霍民夫。每名日給八十文。限一日四十里。百姓踴躍。萬人同命。大營文案轉運聽差隨員。應仍駐於此。而自帶行帳。并酌帶親兵數百人。前往羅溪河。實爲要著。林翼現只二營。以大半留此。以數百人隨行。若留駐界牌石。又分兵力。且羅溪河本無領將。不可必得。又思其次。莫如林翼矣。

致金逸亭觀察 十二日

孔子登東山而小魯。登太山而小天下。湘軍登山頂則小狗。何足道哉。大約近五日。必一鼓成功矣。弟近日又撥趙國香朱子明楊凱臣到羅溪河。因滌帥已撥二千五百人在彼駐紮。再加三營。可以無憂矣。尊處亦不可分顧太多。太多則氣散心散。尊處以戰爲主。他人疑惑之詞。不必顧也。

致余參戎 十二日

鮑營甚苦。太湖羅溪河等處。暫不必分心。軍事紛心。則氣不專。力不足。見屋卽燒。燒一屋則賞一次。無論是民居。是賊館。能募團局散人。專管燒屋。則不過三五日。賊無駐足之地。費銀數千。我亦不惜。夜間派團丁。專以火燒屋。擾賊夜不能安。卽日不能戰。官軍打仗之時。亦可派人先焚賊居。成大事在救大局。莫姑息以藏奸。異日皖境安居。賞錢與民。亦可造屋。凡大屋尤須密燒。急謀大捷。以救春霆。

復鮑總戎 十三日

十三日得十二日書。具諗一切。初十夜三更出隊。擊退唐營舊壘之賊。想見調度有方。撫循得法。士卒忠義感憤之氣。愈苦愈堅。鄙人何德。不知所報。願弟代致私忱爲幸。兄已備米一千石。錢二千串。作賞交武穴吉水溝局員矣。多都護十三移營之說。已實行之否。蔣營附紮。想必遲遲其來。襄陽鞍轡。日望一日。兄殊急不能待。昨遣弁送馬六匹。計日可以到營。鞍轡各件。尙需緩日趕送也。

復浙撫羅澹村中丞 十五日

得賜書。敬承所訓。金陵以長濠困賊。張三面之網。而江面不知措意。江北尤宜賊之掉尾游行也。視乎異域。將自困矣。焉能困人。蘇杭腹地之防。誠不得不早爲之備。天下強兵在將。上將之道。嚴明果斷。以浩氣舉事。一片純誠。其次者剛而無虛。樸而不欺。好勇而能知大義。要未可誤於矜僑虛浮之輩。使得以巧飾取容。真意不存。則成敗利鈍之間。顧忌太多。而趨避愈熟。必至敗乃公事。陳都司英不勝帶勇之任。接籲門中丞初七日來信。已就近札止。虛擲千金。尙無害也。李鎮廷欽弟亦素不相識。滌帥甚不以爲然。昨於函中示意。另抄呈閱。愛我如公。不敢不告。公之待我至誠。弟有所聞。卽應盡情上陳。若有匿情。恐負盛德。譬之葵藿之傾。葑菲之採。惟祈鑒察。而斟酌之。韋志俊獻城。

歸順。復陷於同室之戈。張小浦京堂有意養成此軍。然必須棄多就少。汰弱留強。與之整盤營規。責以立功自效。或可稍資得力。大將官流病。一失之驕。一失之怯。驕尙可制。怯不可爲。要皆矜橋虛浮之氣。有以中之。故決擇不可不慎也。此間山內萬人。於初十一兩日。分抵潛山之仰天庵高橫嶺兩處紮營。十一日該逆緣崖而上。近撲我軍。金逸亭觀察堅忍持之。奮迅出之。遂獲大捷。余參將復橫出抄擊。并力夾攻。破其巨壘。斬馘三千。小池霆營被賊三面圍攻。兩旬有餘日。唐多隔各軍。皆氣沮蔣志。形隔勢阻不能救。得此一戰。節節追剿。可以轉危爲安。此出奇制勝之師。亦非霆營之堅苦。不能久持。與我以破賊之機。或者屠狗可期。割肉一瓣。而薦之李忠武之靈。并稍釋林翼之負罪從軍之恨也。至謀金陵者。必應注意江面及江北。可請函告根雲大督。雨亭節使。弟等分隔勢阻。難於會函也。左公已定正月初十日。挈陶少雲入都。駱公強留十餘日。以了南岸之事。次青處曾以書來商出處。已請其奉攀輿入三江矣。

復荊州府唐蔭雲 十五日

得手書。具稔賢太守爲國爲民。歸本於認真二字。時事之變。誤於不真。視朝廷政教爲具文。以致曠官失職。與民瘼絕不相關。遂使呼號無告。搆此鞠凶。而泄泄沓沓者流。仍復養癰貽患。諱疾忌醫。上下相蒙。不思實力補救。亂之又生。君子信讒。亂之旣生。君子信盜。能認真則悉心講求。聰明智慧。因之而出。精神強幹。亦以不衰。荆楚之間。庶其有爭。欣慰何如。

上海图书馆藏书



A541 212 0018 7299B



~~F 11/213~~